

رِسَالَةُ نُورٍ كَلِيَّاتٍ تَذُنُ

بِسْمِ اللَّهِ الرَّحْمَنِ الرَّحِيمِ
سَلَامٌ عَلَيْكَ يَا غَيْبِي

نورك بكجی

بَدِيعُ الزَّمَانِ

سَعِيدُ النُّورِ سَيِّ

بِسْمِ اللَّهِ الرَّحْمَنِ الرَّحِيمِ

﴿بِاسْمِهِ سُبْحَانَهُ﴾

بو سگه غیبیه یی محرم طوتاردق؛ یالکز خاص قارداش لریمه مخصوصدی. بن وفات ایتدکدن صوگره نشر ایدیلسین دیمشدم. فقط ضابطه گلدی، عدلیه حسابنه اونی صاقلادیغمز یردن چیقاردیلر. ایکی سنه آلرنده قالدی. اوچ محکمه تدقیقندن صوگره إعاده ایدیلدی. بزه مخالف غایت نامحرملر دخی برابر اوقودیلر. بزه چوق یابانی انسانلر گوردیلر. بو ایکی دفعه در إسپارطه عدلیه سنک آلنه باشقه رساله لرله برابر گیرمش، هیچ بر اعتراض ایدیلمه دن گری ویریلمش.

مادام عمومک نظرینه ایسته مدیگمز حالده گوستریلمش و مادام رساله نورک اهمیتنی اثبات ایدوب شاکردلرینی شوقه گتیریور، قوه معنویه لرینی زیاده لشدی ریور؛ البته مدرسه الزهرا ارکانلرینک نشرینه قرار ویرمه لرینه اشتراک ایدرم.

سعید



رساله نور دن پارلاق فقره لر و بر قسم گوزل مکتوب لر

﴿بِاسْمِهِ سُبْحَانَهُ ۖ وَإِنْ مِنْ شَيْءٍ إِلَّا يُسَبِّحُ بِحَمْدِهِ﴾
﴿السَّلَامُ عَلَيْكُمْ وَرَحْمَةُ اللَّهِ وَبَرَكَاتُهُ أَبَدًا دَائِمًا﴾

لیله قدرده إخطار ایدیلن بر مسئله مهمه

أولاً: لیله قدرده قلبه گلن پک اوزون و گنیش بر حقیقته پک قیصه جه بر
إشارات ایده جگزر. شویله که:

نوع بشر بو صوڭ حربِ عمومینڭ اشدّ ظلم و إستبداد ایله و مرحمتسز
تخریبات ایله و بر دشمنڭ یوزندن یوزر معصومی پریشان ایتمه سیله و مغلوبلرڭ
دهشتلی مایوسیتلریله و غالبلرڭ دهشتلی تلاش و حاکمیتلرینی محافظه و بیوک
تخریباتلرینی تعمیر ایده مه ملرندن گلن دهشتلی وجدان عذابلریله و دنیا حیاتنڭ
بتون بتون فانی و موقت اولماسی و مدنیت فانتازیهلرینڭ آلداتیجی و اویوتوجی
اولماسی عمومه گورونمه سیله و فطرتِ بشریه ده کی یوکسک إستعداداتڭ، ماهیتِ
إنسانیه سنڭ عمومی بر صورته دهشتلی یاره لانمسیله و ابدپرست حسّیاتِ باقیه
و فطری عشقِ إنسانیه نڭ هیجان ایچنده اویانماسیله، و غفلت و ضلالتڭ، اڭ
سرت، صاغیر اولان طبیعتڭ، قرآنڭ ألماس قلنجی آلتنده پارچه لانماسیله و غفلت
و ضلالتڭ اڭ بوغوجی، آلداتیجی اڭ گنیش پرده سی اولان سیاستڭ روی
زمینده پک چرکین، پک غدارانه حقیقی صورتی گورونمه سیله ألبته و ألبته هیچ

بر شبهه يوق که: شمالده، غربده، آمريقادہ اماره لری گورونديگنه بناءً نوع بشرک معشوق مجازيسي اولان حيات دنويه بويله چرکين و گچيجی اولماسندن، فطره بشرک حقيقي سؤديگی و آرادییی حيات باقیه یی بتون قوتيله آرایه جق. و البته هیچ شبهه يوق که: ییك اوچ یوز آلتمش سنه ده، هر عصرده اوچ یوز اُللی میلیون شاگردی بولونان و هر حکمنه و دعواسنه میلیونلر اهل حقیقت تصدیق ایله إمضا باصان و هر دقیقه ده میلیونلر حافظلرک قلمبنده قدسیت ایله بولونوب لسانلریله بشره درس ویرن و هیچ بر کتابده أمثالی بولونمیان بر طرزده، بشر ایچون حيات باقیه یی و سعادت ابدیه یی مژده ویروب بتون بشرک یاره لرینی تداوی ایدن قرآن معجز البیانک شدتلی، قوتلی و تکرارلی بیگلر آیاتیله، بلکه صریحاً و إشارة اون بیگلر دفعه دعوا ایدوب خبر ویروب صارصیلماز قطعی دلیللرله، شبهه گنیرمز حدسز حجتلرله حيات باقیه یی قطعیتله مژده و سعادت ابدیه یی درس ویرمه سی، البته نوع بشر، بتون بتون عقلنی غائب ایتمزسه و مادی و معنوی بر قیامت باشلرنده قوپمازسه؛ إسوه چ، نوره چ، فینلانديا و إنگلتره نك قرآنك قبولنه چالیشان مشهور خطیبلری و دین حقی آرایان آمریقانك چوق اهمیتلی جمعیتی گبی روی زمینك قطعهلری و حکومتلری قرآن معجز البیانی آرایه جقلر و حقیقتلرینی آکلادقدن صوگره بتون روح و جانلریله صاریلاجقلر. چونکه بو حقیقت نقطه سنده قطعیا قرآنك مثلی یوقدر و اولاماز و هیچ بر شی بو معجزه اکبرک یرینی طوتاماز.

ثانیاً: مادام رساله نور او معجزه کبرانك ائنده بر الماس قلنج حکمنده خدمتنی گوسترمش و اُك معند دشمنلری تسلیمه مجبور ایتمش. هم قلبی، هم روحی، حتی حسیاتنی تام تنویر ایده جک و علاجلرینی ویره جک بر طرزده خزینه قرآنیه نك دلاللغنی یاپان و اوندن باشقه مأخذ و مرجعی اولمیان بر معجزه

معنویه‌سی بولونان رسالۀ نور او وظیفه‌یی یاییور و علیهنده دهشتلی پرو پاغنده‌لره و غایت معنّد زندیقلره تام غلبه چالمش و ضلالتک اڭ سرت و قوتلی قلعه‌سی اولان طبیعتی، طبیعت رساله‌سیله پارچه پارچه ایتمش و غفلتک اڭ قالین و بوغوجی و گنیش دائرۀ آفاقنده و فّاک اڭ گنیش پرده‌لرنده عصای موسی‌ده کی میوه‌نک آلتنجی مسئله‌سی و برنجی، ایکنجی، اوچنجی و سکزنجی حجت‌لریله غایت پارلاق بر طرزده غفلتی طاغیتوب نور توحیدی گوسترمش. آلبته بزلره لازم و ملّته اّلزمدر که شیمدی رسمّا اذن و یریلن دین تدریساتی ایچون خصوصی درس‌خانه‌لر آچیلمه‌سنه و اذن و یریلمه‌سنه بناء، نور شاگردلری ممکن اولدیغی قدر هر یرده کوچوجک درس‌خانه نوریه آچق لازمدر. گرچه هرکس کندی کندینه بر درجه اِستفاده ایدر، فقط هرکس هر بر مسئله‌سنی تام آڭلاماز. هم ایمان حقیقت‌لرنک ایضاحی اولدیغی ایچون؛ هم علم، (حاشیه) هم معرفت، هم عبادتدر. اُسکی مدرسه‌لرده بش اون سنه‌یه مقابل، اِن شاء الله نور مدرسه‌لری بش اون هفته‌ده عین نتیجه‌یی تأمین ایده‌جک و یگرمی سنه‌در ایدیور. و هم حکومت و ملّت و وطن، هم حیات دنیویه‌سنه و سیاسیه‌سنه و اُخرویه‌سنه پک چوق فائده‌سی بولونان بو قرآن لمعاتلرینه و دلّالی بولونان رسالۀ نوره دگل ایلیشمک، تمامیه ترویج و نشرینه چالیشمالری اّلزمدر که؛ گچن دهشتلی گناه‌لره کفّارت و گله‌جک مدهش بلالره و آنارشییستلگه بر سد اولاییلسین.

ثالثّا: بو رمضان شریفده، قرآنی ذوق و شوق ایله اوقومق، بنم چوق اِحتیاجم واردی. حالبوکه اُمّلی خسته‌لق، مادّی - معنوی صیقتیلر، یورغونلق و مشغله‌لرک تأثیریه تلاش ایتدم. بردن خسروک شیرین قلمیه معجزاتلی یازیلان

(حاشیه): شاید بری بیلیور، تعلّم ایتمگه محتاج دگلسه عبادته محتاج ویا معرفته مشتاق ویا حضور ایستر. اونک ایچون هرکسه لزوملی بر درسدر.

معجزاتلی جزءلر و حافظ علی و طاهری یه پک چوق ثواب قزانديران پارلاق و کرامتلی حزب الأكبر قرآنیه یی بربری آرقه سندن اوقومغه باشلارکن اویله بر ذوق و شوق ویردی که؛ بتون او یورغونقلری هیچه ایندیردی. هیچ بر وسوسه یه میدان ویرمیه رک پک پارلاق بر صورتده درس قرآنیه یی اونلردن دیگله رکن بتون روح و جانمله آرزو ایتدم و قصد و عزم ایتدم که، ممکن اولدیغی درجه ده عین حزب الأكبر قرآنیه گبی فوطوغرافله معجزاتلی قرآمنزی طبع ایده جگزه، ان شاء الله.

﴿الْبَاقِي هُوَ الْبَاقِي﴾

قارداشکنز

سعید النورسی



﴿بِاسْمِهِ سُبْحَانَهُ ۖ وَإِنْ مِنْ شَيْءٍ إِلَّا يُسَبِّحُ بِحَمْدِهِ﴾
﴿السَّلَامُ عَلَيْكُمْ وَرَحْمَةُ اللَّهِ وَبَرَكَاتُهُ أَبَدًا دَائِمًا﴾

عزیز، صدیق قارداشلرم!

أولاً: نورک فوق العاده خاص شاکردلری، سگه غیبیه مشتملاتیله، او اولیاء مشهوره دن، قرق گونده بر دفعه اکمک یه یوب قرق گون یمهین عثمان خالدينک صریح إخباری و اولادلرینه وصیتی ایله و إسپارطه نك مشهور أهل قلب عالملرندن طوپال شکرینک ظاهر خبر ویرمسيله چوق اهمیتلی بر حقیقی دعوا ایدوب، فقط ایکی إلتباس ایچنده بو بیچاره، اهمیتسز قارداشلری سعیده ییک درجه زیاده حصّه ویرمشلر. اون سنه دن بری قناعتلرینی تعدیله چالیشدیغم

حالده، او بهادر قارداشلر قناعتلرنده ایلری گیدیورلر. اوت اونلر، اون سکنجی مکتوبده کی ایکی اهل قلب چوبانك ماجراسی گبی، حق بر حقیقتی گورمشلر، فقط تعبیره محتاجدر. او حقیقت ده شودر:

أَمَّا بَكَلَّةٌ دِیْگِی، آخر زمانده گله جك ذاتك اوچ وظیفه سندن اَكْ مهْمِی و اَكْ بیوگی و اَكْ قیمتداری اولان ایمان تحقیقی بی نشر و اهل ایمانی ضلالتدن قورتارمق جهتیه، او اَكْ اَهْمِیْتلی وظیفه بی عیناً بِتَمَامِهَا رساله نوره گورمشلر. إمام علی و غوثِ اعظم و عثمان خالیدی گبی ذاتلر، بو نقطه ایچوندر که، او گله جك ذاتك مقامنی رساله نورك شخص معنویسنده کشفاً گورمشلر گبی إشارت ایتمشلر. بعضاً ده او شخص معنوی بی بر خادمه ویرمشلر، او خادمه ملتفتانه باقمشلر. بو حقیقتدن آکلاشیلیور که؛ صوگره گله جك او مبارک ذات، رساله نوری بر پروگرامی اولارق نشر و تطبیق ایده جك. او ذاتك ایکنجی وظیفه سی، شریعتی اجرا و تطبیق ایتمکدر. برنجی وظیفه، مادی قوتله دگل، بلکه قوتلی اعتقاد و إخلاص و صداقتله اولدیغی حالده؛ بو ایکنجی وظیفه، غایت بیوک مادی بر قوت و حاکمیت لازم که، او ایکنجی وظیفه تطبیق ایدیه بیلسین. او ذاتك اوچنجی وظیفه سی؛ خلافتِ اسلامی بی إتحادِ اسلامه بنا ایدهرک، عیسوی روحانیلریله إتفاق ایدوب دینِ اسلامه خدمت ایتمکدر. بو وظیفه، پک بیوک بر سلطنت و قوت و میلیونلر فداکارلرله تطبیق ایدیه بیلیر. برنجی وظیفه، او ایکی وظیفه دن اوچ درت درجه داها زیاده قیمتداردر؛ فقط او ایکنجی، اوچنجی وظیفه لر پک پارلاق و چوق گنیش بر دائره ده و شعشعه لی بر طرزده اولدیغندن عمومك و عوامك نظرنده داها اَهْمِیْتلی گورونویورلر. ایشته او خاص نورجیلر و بر قسمی اولیا اولان او قارداشلریمزك تعبیره و تأویله محتاج فکرلرینی اورته یه آتمق، اهل دنیایی و اهل سیاستی تلاشه ویرر و ویرمش..

هجوملرینه وسیله اولور. چونکه، برنجی وظیفه‌نک حقیقتی و قیمتی گوره‌میورلر، اوتہ کی جہتلرہ حمل ایدرلر.

قارداشلریمک ایکنجی إلتباسی: فانی و چوروتیلہ بیلیر بر شخصیتی، بعض جہتلرہ برنجی وظیفہ‌ده پیشدارلق ایدن نور شاکردلرینک شخص معنوسنی تمثیل ایدن او عاجز قارداشنه ویریورلر. حالبوکه بو ایکی إلتباس ده رسالہ نورک حقیقی إخلاصنه و هیچ بر شیئہ، حتی معنوی و أُخروی مقاماتہ دخی آلت اولماسنه بر جہتده ضرر ویردیگی گبی، اهل سیاستی ده اوهامہ دوشوروب رسالہ نورک نشرینہ ضرر گلیر. بو زمان، شخص معنوی زمانی اولدیغی ایچون، بویله بیوک و باقی حقیقتلر، فانی و عاجز و سقوط ایدہ بیلیر شخصیتلرہ بنا ایدیلمز!

الحاصل: او گله‌جک ذاتک اسمنی ویرمک، اوچ وظیفہ‌سی بردن خاطره گلیبور، یاگلش اولور. هم هیچ بر شیئہ آلت اولیان نوردہ کی إخلاص زده‌لنیر. عوام مؤمنین نظرندہ حقیقتلرک قوتی بر درجه نقصانلاشیر، یقینیت برهانیہ دخی قضایاء مقبولہ‌ده کی ظن غالبہ إنقلاب ایدر. داها معند ضلالتہ و متمرّد زندقہیہ تام غلبہ‌سی، متحیر اهل ایمانده گورونمہ‌مگہ باشلار. اهل سیاست اوهامہ و بر قسم خواجه‌لر إعتراضہ باشلار. اونک ایچون، نورلرہ او اسمی ویرمک مناسب گورولمیور. بلکه مجددر، اونک پیشداریدر، دینیلہ بیلیر.

عموم قارداشلریمزه بیگلر سلام.

﴿الْبَاقِي هُوَ الْبَاقِي﴾

قارداشکز

سعید النورسی

﴿بِسْمِهِ سُبْحَانَهُ ۖ وَإِنْ مِنْ شَيْءٍ إِلَّا يُسَبِّحُ بِحَمْدِهِ﴾
﴿السَّلَامُ عَلَيْكُمْ وَرَحْمَةُ اللَّهِ وَبَرَكَاتُهُ أَبَدًا دَائِمًا﴾

عزیز، صدیق، صارصیلماز، ثباتکار، فداکار، وفادار قارداشلم!

بیلیرسکیز که آنقره اهل وقوفی رسالہ نوره عائد کرامت لری و اشارتِ غیبیه لری انکار ایده مه مشلر. یالکیز، یاگلش اولارق او کرامت لرده حصّه دار ظن ایدوب اعتراض ایدهرک، "بویله شیلر کتابده یازیلما ملی ایدی؛ کرامت اظهار ایدیلمز. "دییه خفیف بر تنقیده مقابل مدافعاتده اونلره جواباً دیمشدم که:

اونلر بگا عائد دگل و او کرامت لره صاحب اولمق بنم حدّم دگل. بلکه قرآنک معجزه معنویه سنک ترشحاتی و لمعه لیدر که حقیقی بر تفسیری اولان رسالہ نوره کرامت لر شکلی آلاق (شاکردلرینک قوّه معنویه لرینی تقویه ایتمک ایچون) اکراماتِ اِلهیه نوعندندر. اکرام ایسه، اظهاری بر شکر در، جائز در، هم مقبول در. شیمدی اُهمّیتی بر سببه بناءً بو جوابی بر پارچه ایضاح ایده جگم. و "نه ایچون اظهار ایدیورم و نه ایچون بو نقطه ده بو قدر تحشیدات یاپیورم و نه ایچون بر قاچ آیدر بو موضوعده چوق ایلری گیدیورم. اکثر مکتوبلر او کرامته باقییور؟" دییه سؤال ایدیلدی.

الجواب: رسالہ نورک خدمتِ ایمانیه ده بو زمانده بیگلر تخریباتجیلره مقابل یوز بیگلر تعمیراتجی لازم گلیرکن، هم بنمله لا اقل یوزر کاتب و یاردیمجی بولونقو احتیاج وارکن، دگل چکینمک و تماس ایتمه مک، بلکه ملّت و اهلِ اداره تقدیر ایله و تشویق ایله یاردیم و تماس ایتمک ضروری ایکن و او خدمتِ ایمانیه حیاتِ باقیه یه باقدیغی ایچون حیاتِ فانیه ناک مشغله لرینه و فائده لرینه ترجیح

ایتمک، اهل ایمانه واجب ایکن، کندی می مثال آلاق دیرم که: بنی هر شیدن و تماسدن و یار دیمجیلردن منع ایتمک ایله برابر علیهمزده اولانلر بتون قوتلریله آرقداشلریمک قوه معنویه لرینی قیرمق و بندن و رساله نوردن صوغوتمق و بنم گی اختیار، خسته، ضعیف، غریب، کیسه سز بر بیچاره یه، بیگلر آدمک گوره جگی وظیفه یی باشنه یوکلهمک و بو تجرید و تضییقلرده مادی بر خسته لق نوعنده انسانلر ایله تماس و اختلاطدن چکیلمگه مجبور اولمق، هم او درجه تاثیرلی بر طرزده خلقلری اورکوتدیرمک ایله قوه معنویه یی قیرمق جهتلریله و سببلریله، اختیارم خارجنده و بتون او مانعلره قارشى رساله نور شاکردلرینک قوه معنویه لرینک تقویه سنه مدار اكرامات الهیه یی بیان ایدهرک رساله نور اطرافنده معنوی بر تحشیدات یاپدیرمق و رساله نور کندى کندینه، تک باشیله باشقه لرینه محتاج اولمیه رق بر اوردو قدر قوتلی اولدیغنی گوسترمک حکمتیله بو چشید شیلر بگا یازدیریلمش. یوقسه حاشا کندی می صاتمق و بگندیرمک و تمدح ایتمک و خود فرو شلق ایتمک ایسه؛ رساله نورک اهمیتلی بر اساسی اولان اخلاص سرینی بوزمقدر. ان شاء الله رساله نور کندى کندینه، هم کندی می مدافعه ایتدیگی، هم قیمتی تام گوستردیگی گی، بزى ده معنا مدافعه ایدوب قصورلریمزى عفو ایتدیرمگه وسیله اولاجقدر.

عموم قارداشلریمک و همشیره لریمک خاصه دعاری مقبول مبارک معصوملر طائفه سی و محترم اختیارلر جماعتندن هر برلرینه بیگلر سلام و دعا ایدهرک رمضان شریف لرینی تبریک ایدرز، دعالرینی رجا ایدرز.

خسته قارداشکز

سعید النورسی

رساله نورث مقبولیتنه امضا باصان و غیبی اشارتله اوندن خبر ویرن سکز پارچه دن برنجی پارچه در.

عین مسئله یه بو برنجی رساله ده یگر می طوقوز اشارت وار. سائر پارچه لرله برابر بیگه یاقین اشارت لر، رمز لر، ایمالر، اماره لر عین مسئله یه، عین دعوا یه ائتفاقله باقمه لر ی صراحت درجه سنده در. وحدت مسئله جهت یله، او اماره لر بربرینه قوت ویرر، تأیید ایدر. او سکزدن اوچ دانه سی، امام علی نث (رضی الله عنه) اوچ کرامت غیبیه سیله رساله النور دن خبر ویرمش.

بو سکز پارچه یی آنقره اهل وقوفی تدقیق ایتمش، اعتراض ایتمه مشلر. یالکز دیمش لر: "بو یازیلما ملی ایدی. کرامت صاحبی، کرامتنی یازاما ز." بن ده اونلره جواب ویردم که: بو بنم دگل، رساله نورث کرامتیدر. رساله النور ایسه، قرآنک مالیدر و تفسیریدر دیدم. اونلر صوصدیلر؛ دیمک قبول ایتدیلر. گرچه بو چشید اکراملر یازیلما سه ایدی داها مناسب اولوردی؛ فقط بو قدر حدس ز معارضلر و چوق قوتلی و کثرتلی دشمنلر قارشیسنده آز و ضعیف اولان بزلره قوه معنویه و غیبی امداد و تشجیع و ثبات و متانت ویرمک ایچون مجبوریت قطعیه اولدی، بن ده یازدم. بنم بئلگمه بر خود فرو شلق و یروب سقوطمه سبب اولسه ده، اهمیتی یوق. بو خدمته؛ یعنی اهل ایمانی ضلالت مطلقه دن قورتارمغه لزوم اولسه دنیوی حیات گبی، اخروی حیاتی ده فدا ایتمک بر سعادت بیلیرم؛ بیگلر دوستلرم و قارداشلریمک جنته گیرمه لر ی ایچون جهنمی قبول ایدرم.

سعید النورسی



إشارات قرآنيه و اوچ كرامت علويه و كرامت غوثيه حقنده بر تنبيه و إخطاردر

بو غايت محرم رساله لر، ناصلسه معند بر نامحرمك ائنه بو رساله لردن بریسی گچمش. غايت سطحی و عناد نظریله بر ایکی یرینه حقسز بر اعتراض ایله اهمیتلی بر حادثه یه سببیت ویردیگندن؛ بو مجموعه، رساله نورك خاص طلبه لرینه بلکه أخص خواصه مخصوص اولدیغی حالدده و بنم وفا تمدن صوگره إنتشارینه مساعده اولماسیله برابر؛ شیمدی مذکور حادثه نك سببیه هرکسه دگل، بلکه اهل انصاف و رساله نورله علاقه دار و طلبه لرندن بولونانلره و حاصلردن بر قاچ شاکردك تنسیبیه گوستریله بیلیر فکریله یازدق. شیمدی ایسه، ایکی سنه ایکی محکمه تدقیقندن صوگره بزه إعاده ایدیلمه سندن نشرینه مجبور اولدق.

ایکنجی نقطه: بو رساله باشند آشاغی یه قدر بر تك نتیجه یه باقییور. بیگه یاقین اماره لرله، رساله نورك مقبولیتنه بر إمضا باصیلدیغی إثبات ایدیور. بویله بر تك دعوا یه بو درجه کثرتلی و آیری آیری جهتلرده بیگلر اماره لر و ایمالر اوئی گوسترمسی علم الیقین دگل، بلکه عین الیقین، بلکه حق الیقین درجه سنده او دعوایی إثبات ایدر.

اوچنجی نقطه: بو رساله بی مطالعه ایدن ذاتلر، اینجه دن اینجه یه، خصوصًا جفری حساباتنه مشغول اولمغه لزوم یوق؛ بر قسمی آکلا شیلیمسه ده ضرری یوق. هم عمومینی اوقومق ده لازم دگل. هم کرامت غوثیه نك آخرنده، شاملی حافظ توفیقك فقره سندن باشلا یوب آخره قدر مطالعه دن صوگره و باشده کی مقدمه یی اوقودقدن صوگره (حاشیه) ایستدیگی پارچه یی اوقوسون.

سعید النورسی

(حاشیه): کتابك برنجی و یدنجی قسملرینی اوقودقدن صوگره.

شاملی حافظ توفیق‌ک فقره‌سی

﴿بَاسْمِهِ سُبْحَانَهُ ۖ وَ إِنَّ مِنْ شَيْءٍ إِلَّا يُسَبِّحُ بِحَمْدِهِ﴾

مقدمه: معلوم اولسون که: "زبدة الرسائل عمدة الوسائل" نامنده قطب العارفين ضياء الدّین مولانا شیخ خالد قدّس سرّه‌نک مکتوبات و رسائل شریفه‌لرندن مقتبس نصایح قدسیه‌نک ترجمه‌سنه دائر بر رساله‌ی اون اوج سنه مقدّم، بورسه‌ده خواجه‌م حسن أفندی‌دن آلمشدم. ناصلسه مطالعه‌سنه موقّق اولامامشدم. تا بوگونلرده کتابلری‌ک ایچریسنده بر شی آراکن اَلیمه گچدی. دیدم: "بو حضرت مولانا خالد، استادیمک همشه‌ریسیدر. هم إمام ربّانیدن صوگره، طریق نقشینک اُک مهمّ قهرمانیدر. هم طریق خالديه نقشیه‌نک پیریدر." رساله‌ی مطالعه ایدرکن حضرت مولانا‌نک ترجمه‌ حالندن شو فقره‌ی گوردم:

أصحابِ کتبِ ستّهدن إمام حاکم مستدرکنده و أبو داود کتابِ سُنننده، بیهقی شعب ایمانده تخریج بیوردقلری:

﴿إِنَّ اللَّهَ يَبْعَثُ لِهَذِهِ الْأُمَّةِ عَلَى رَأْسِ كُلِّ مِائَةِ سَنَةٍ مَنْ يُجَدِّدُ لَهَا دِينَهَا﴾

یعنی "هر یوز سنه‌ده جنابِ حق بر مجدّد دین گوندیریور." حدیث شریفینه مظهر و ماصدق و مُظهِر تام اولان مولانا الشّهر قطب العارفين، غوث الواصلین، وارث محمّدی، کامل الطریقه العلیه و المجدّیه خالد ذو الجناحین قدّس سرّه‌نک إلخ...

صوگره تاریخچه‌ حیاتنده گوردم که، تولّدی (۱۱۹۳) تاریخنده‌در. صوگره گوردم که، (۱۲۲۴) تاریخنده سلطنتِ هندک پای‌تختی اولان جهان‌آباده داخل اولمش. طریق نقشی سلسله‌سنه گیروب مجدّدیتیه باشلامش.

صوگره (۱۲۳۸) ده، اهل سیاست نظر دقتی جلب ایدوب، وطنی ترك ایدهرک دیار شامه هجرتله گیتمشدر. هم ایچنده گوردنم که، حضرت مولانانک (ق س) نسلی، حضرت عثمان بن عفان رضی الله عنیه منسوبدر.

صوگره گوردنم که؛ ترجمه حالنده استعداد فطری و قابلیت خارقه ایله، سنی یگرمی یه بالغ اولمادن اول اعلم علماء عصر و علامه وقت اولمش. سلیمانیه قصبه سنده تدریس علوم ایله اشتغال ایله مشدر.

صوگره استادیمک تاریخچه حیاتی دوشوندنم. باقدم، درت مهم نقطه ده توافق ایدیورلر:

برنجیسی: حضرت مولانا (۱۱۹۳) ده دنیایه گلمش. استاد ایسه عربی (۱۲۹۳) ده. تام مولانا خالدک یوز سنه سی ختام بولدقن صوگره دنیایه گلمش.

ایکنجیسی: حضرت مولانانک (ق س) تجدد دین مجاهده سنه باشلانغیجی و مقدمه سی، هندستانک پای تخته (۱۲۲۴) ده گیرمش. استاد ایسه عینا یوز سنه صوگره، (۱۳۲۴) ده عثمانلی سلطنتک پای تخته گیرمش، مجاهده معنویه سنه حاضرلنمش.

اوچنجیسی: اهل سیاست، حضرت مولانانک فوق العاده شهرتندن توهم ایدهرک دیار شامه نقل ایتدیریلمسی، (۱۲۳۸) ده واقع اولمشدر. استاد ایسه عینا یوز سنه صوگره (۱۳۳۸) ده آنقریه گیدوب، اونلرله اویوشامایوب؛ اونلری رد ایدهرک، کوسهرک تکرار وانه گیدوب، بر طاغده انزوا ایدرکن (۱۳۳۸) سنه سنی متعاقب، شیخ سعید حادثه سنک وقوعی مناسبتیه اهل سیاست و همنه طوقونمش، اوندن قورقه رقبوردور و اسپارطه، قسطنیونی، آفیون ولایتلرنده سکزر سنه، یگرمی بش سنه اقامت ایتدیریلمش.

دردنجیسی: حضرت مولانا، یاشی یگرمی یه بالغ اولمادن اُول علامه زمان حکمنده، فُحول علمانك اوستنده گورونمش، درس اوقوتمش. استاد ایسه، تاریخچه حیاتی گورنلره و بیلنلره معلومدر که؛ اون درت یاشنده إجازات آلوب أعلم علماء زمانه معارضه یه گیریشمش، اون درت یاشنده ایکن، إجازات آلمغه یاقین طلبه لری تدریس ایتمشدر.

هم حضرت مولانا نسلأ عثمانلی اولدیغی و سنت سنیه یه بتون قوتیله چالیشدیغی گبی، استادام ده قرآن حکیمه خدمت نقطه سنده، مشرباً حضرت عثمان ذی النورینك آرقه سندن گیدوب، حضرت مولانا (ق س) گبی، رساله نور أجزالریله (بتون قوتیله) سنت سنیه نك إحیاسنه چالیشدی.

ایشته بو درت نقطه ده کی توافقات، تام یوز سنه فاصله ایله رساله نورك تقویه دین خصوصنده کی تأثیراتی؛ حضرت مولانا نك (ق س) طریق نقشیه واسطه سیله خدمتی گبی عظیم گورونویور. (حاشیه)

استادام کندینه عائد مدح و ثنای قبول ایتمییور. فقط رساله نور قرآنه عائد اولوب، مدح و ثنا قرآنك أسرارینه عائددر. یالکز استادمله حضرت مولانا نك بر قاج فرقی وار:

بریسی: حضرت مولانا، ذوالجناحیندر. یعنی هم قادری، هم نقشی طریقت صاحبی ایکن، نقشیلک طریقتی اونده داها غالبدر. استادام بالعکس قادری مشربی

(حاشیه): حضرت مولانا (ق س)، میلیونلر أتباعلرینك إتفاقیله مجدددر و باشده کی حدیث شریفك بر ماصدقیدر. و مادام تام یوز سنه صوگره، درت مهم جهتله توافقله برابر رساله نور عین وظیفه یی گورویور. دیمك نص حدیث ایله، رساله نور أجزالری تجدد و تقویه دین وظیفه سنی گورویورلر.

و شاذلی مسلکی اوندہ داها زیاده اوندہ حکم اییدیور. بن استادمدن ایشیتدم که: حضرت مولانا (ق س) هندستاندن طریق نقشی پی گتیردیگی وقت، بغداد دائره سی شاه گیلانی نك (ق س) بَعْدَ الْمَمَات حیاتده اولدیغی گبی، تصرفنده ایدی. حضرت مولانا نك (ق س) معنًا تصرفی جای قبول گوره مه دی. شاه نقشبندله إمام ربّانینك (ق س) روحانیتلری بغداده گلوب شاه گیلانی نك زیارتنه گیده رك رجا ایتمشلر که؛ "مولانا خالد (ق س) سنك اولادكدر، قبول ایت!" شاه گیلانی (ق س)، اونلرك إلتماسلرینی قبول ایده رك مولانا خالدی قبول ایتمش. اوندن صوگره بردن مولانا خالد (ق س) پارلامش. بو واقعه؛ اهل کشفجه واقع و مشهود اولمشدر. او حادثه روحانیه یی، او زمان اهل ولایت بر قسمی مشاهده ایتمش، بعض ده رؤیا ایله گورمشلر. (استادیمك سوزی بوراده تمام بولدی.)

ایکنجی فرق شودر که: استادم کندی شخصیتنی مرجعیتدن عزل اییدیور. یالکز رساله نوری مرجع گوستریور. حضرت مولانا نك (ق س) شخصیتی، قطب الإرشاد، مرجع الخاص و العام اولمشدر.

اوچنجی فرق: حضرت مولانا (ق س)، ذوالاجنهدر. فقط زمانك مقتضاسیله سنت سنیه یه چوق قوت ویرمکله برابر (علم طریقتی أساس طومق جهتیه) طریقتی داها زیاده طومش، او نقطه ده صرف همت ایتمش. استادم ایسه شو دهشتلی زمانك مقتضاسیله علم حقیقتی و حقائق ایمانیه جهتنی إلتزام ایده رك، طریقته اوچنجی درجه ده باقمشلر.

الحاصل: باشده کی حدیث شریفک "هر یوز سنه باشنده دینی تجدید ایده‌جک بر مجدد گوندرییور" وعدِ اِلهیسنه بناءً، حضرت مولانا خالد، اکثر اهلِ حقیقتجه ییک ایکی یوز سنه سنک یعنی اون ایکنجی عصرک مجددیدر. مادام تام یوز سنه سوگره، عیناً درت جهته توافقی ایده‌رک رسالهُ نور اُجزالری عین وظیفه‌یی گورمشدر. قناعت ویرر که (نصّ حدیثله) رسالهُ نور تجدید دین خصوصنده بر مجدد حکمنده‌در.

بنم استادم دائما دییور که: "بن بر نفرم، فقط مشیر خدمتنی گوروپورم. یعنی قیمت بنده دگل. بلکه قرآن حکیمک فیضندن ترشح ایدن رسالهُ نور اُجزالری، بر مشیریت معنویه خدمتنی گوروپور."

استادیمی قیزدیرما مق ایچون شخصنی ثنا ایتیمیورم.

شاملی حافظ توفیق



رأفت بك و خسرو و رشدی گبی رسالهُ نور شاگردلرینک
رسالهُ نور برکتنه إشارت ایدن بولدقلری بر توافقی لطیفدر.

رسالهُ نورک إسپارطه‌یه نه درجه رحمت اولدیغنه دلالت ایدن بر توافقات

عجیبه:

رسالهُ نورک مظهر اولدیغی عنایاتک کلّیتندن مهمّ بر فردی ده شودر که: إسپارطه ولایتی سکز سنه‌دن بری رسالهُ نورک مؤلفنی سینهنده صاقلامشدی و بارلاگی شیرین بر ناحیه‌سنده (جناب حقّک لطف و کرمیله)

محافظه ایتمشدی. بو مدّت ظرفنده یواش یواش انتشار ایدن رساله نوردن بیگلر آدم اسپارطهده ایمانلرینی تقویه ایتدیلر. بالخاصّه گنجلر پک چوق استفاده و استفاده ایتدی.

وقتا که، استادیمزک بارلا گبی لطیف و شیرین بر محله کی صیقتیلی و پک آجیقلی و اُک قاتی قلیبری آغلالتان إشکنجهلی اُسارتی بیتدی. رساله نورک مؤلفی اولان استادیمزک نظری جناب حقّ عنایتیله اسپارطهده متوجّه اولدی. اوهامه دوشن بعض ظالم اهل دنیانک تشبثکارانه حرکات ظاهریه سی بر سبب عادی اولارق، استادیمز اسپارطهده گتیریلدی.

فقط استادیمزک تشریف ایتدیگی زمان، یاز موسمنک اُک حرارتلی زمانی ایدی. یاغمورلر کسيلمش، اسپارطهده یی إسقا ایدن صولر آزالمش، بر قسم مهمنک منبعی کسيلمش؛ آغاجلر صارارمغه، اوتلر قورومغه، چیچکلر بوروشمغه باشلامشدی.

رساله نورک اُک زیاده انتشار ایتدیگی محل اسپارطه ولایتی اولدیغی ایچون رساله نور حقّنده کی عنایات ربّانیه یی پک یاقینده تماشا ایدن رساله نورک شاکردلری اولان بزلر، عجیب بر واقعه یه داها شاهد اولدق.

بو حادثه ایسه: رساله نور مؤلفنک اسپارطهده تشریفی متعاقب بر عصر ایچنده بر ویا ایکی دفعه وقوعه گلن، بو یاز موسمنده کی یاغمورک کثرتله یاغماسی اولمشدر. پک خارقه بر صورتده یاغان بو یاغمور اسپارطه نك هر طرفی تمامًا إسقا ایتمش، نباتاته یگیدن حیات بخش ایديلمش؛ باغلر، باغچه لر باشقه بر لطافت کسب ایتمش؛ اکثریسی همان همان زراعتله اشتغال ایدن خلقک یوزلری (رساله نورک نائل اولدیغی عنایتدن و برکتدن اولان بو یاغموردن

استفاده ایدره‌ك) گولمش، روحلری اینبساط ایتمشدی. جناب حق کمال رحمتیله، بو یاز موسمنك بو شدتلی و حرارتلی وضعیتنی، بهارك اُك لطافتلی، اُك شیرین و اُك خوش وضعیتنه تبدیل ایتدی. گویا رساله نور یوز اون طوقوز پارچه‌سیله، مؤلفی اولان استادیمره بر طرفدن خوش آمدی ایتمک و محزون اولان قلبنه تسلی ویرمک و غمناک روحنی تطیب ایتمک و دیگر طرفدن ده، سکز سنه‌دن بری یاشادیغی بارلای اوناتدیرمق و او محتشم چنار آغاجنی و دوستلرینی و علاقه‌دار اولدیغی شیلردن گلن فراق حزنی خاطرلارتمامق ایچون، جناب حقدن یوز اون طوقوز رساله‌نك اَلیله، یوز اون طوقوز بیك کلمه‌لری دلیله دعا ایتدی، یاغمور ایستدی. جناب حق او یله برکتلی بر یاغمور إحسان ایتدی که، بر مثلی طقسان اوچ تاریخنده یاغدیغنی اختیارلیرمزدن ایشیدیورز که؛ بو تاریخ، استادیمرنك تاریخ ولادتنه تصادف ایتمکله برابر، بو عمومی حادثه رحمت اولان کثرتلی یاغمور، خصوصی بر صورتده رساله نوره باقدیغنه بر دلیلی ده شودر که:

رساله نورنك نشرینه واسطه اولان استادیمرنك گلدیگی گون، إسپارطه‌یی غایت حرارتلی و یاغمورسزلقدن توز طوپراق ایچنده گورمش. بارلاگی بر یایلادن گلوب بویله بر یرده طایانه‌می‌جغم، دییه تلاش ایدیوردی. اوچنجی و دردنجی گونی باغچه‌لری قسماً گزدیگی وقت، سبزه و اوت و چیچکلرنك صوسزلقدن بوروشدق‌لرینی گوره‌ك غایت متأثرانه صو ایسته‌یور، یاغمور طلب ایدیوردی. آرقداشمز اولان بکر بگدن (دگرنلری چویرن صوی گوستره‌ك) "إسپارطه‌نك صوی بو قدر میدر؟" دییه صورمشدی. بکر بك جواب ویردی: "گولجگك صوی کسيلمش، گلمیور. إسپارطه‌نك درتده برینی صولایان بو صودن باشقه یوقدر." دیدی.

استادیمزک اسپارطہ ده چوق طلبہ لری بولوندیغندن، روحًا یاغمورک
 کلمہ سنی ایستہ یوردی. عین گونده اوپله بر یاغمور گلدی که، اُللی سنهدن بری
 اسپارطه بویله حادثه یی گورمه مش. او یاغمور یوزده طقسان طوقوز منفعت
 ویرمشر. بوندن آکلاشیلیور که، او توافق تصادفی دگل؛ بو رحمت، اسپارطه یه
 رحمت اولان رسالہ نوره باقییور. لله الحمد. بو کرم الهی نتیجه سی اولارق
 استادیمز، "بگا بارلایی اونوتدیردی. اونوته میه جغم بر شی وارسه، او ده (هر
 یرده اولدیغی گبی) بارلاده بولونان جدی دوست و طلبه لرمدر." دییور.

مصطفی، لطفی، رشدی،
 خسرو، بکر بک، رأفت (رح)



رسالہ نور برکتنه عائد یاغمور حادثه سنی تأیید ایدن مهاجر حافظ أحمد،
 سلیمان، مصطفی چاوش و بکر بک و شمعئ نك (رح) بر فقره سیدر.

(اسپارطه ده کی قارداش لرینک فقره سنده کی دعوائی،
 اثبات ایدن قوتلی ایکی دلیلی گوسترییور)

رأفت بک و خسرو گبی قارداش لریمزک خارقه بر صورتده یاغان عمومی
 یاغمور ایچنده رسالہ نور برکتنه خصوصی باقدیغنه، قناعتمز گلییور. چونکه
 گوزیمزله یاغمور حادثه سنک، خصوصی بر شکله خدمت قرآن و رسالہ نوره
 باقدیغنی ایکی صورتله گوردک.

برنجی صورت: رسالۀ نورک واسطۀ نشری اولان استادیمزک جامعی سدّ

ایدیلدی. رسالۀ نوری یازاجق خارجدہ کی طلبہ لرینک یانہ گلہ لری منع ایدیلدیگی ہنگامدہ قوراقلق باشلادی. یاغمورہ احتیاج شدید اولدی. صوگرہ یاغمور باشلادی، ہر طرفدہ یاغدی. یالکز قرہ جہ اُحمد سلطاندن إعتباراً، بر دائرہ ایچندہ قالان بارلا منطقہ سنہ یاغمور گلمدی. استادیمز بوندن پک متأثر اولارق دعا ایدیوردی. صوگرہ دیدی کہ: "قرآنک خدمتنہ سد چکیلدی، بو کویدہ کی مسجدیمز قپاندی. بوندہ بر اثر عتاب وار کہ، یاغمور گلمیور. اویلہ ایسہ، مادام قرآنک عتابی وار. یس سورہ سنی شفاعتجی یاپوب قرآنک فیضی و برکتی ایستہ یہ جگزر." استادیمز، مہاجر حافظ اُحمد اُفندی یہ دیدی کہ: "سن قرق بر یاسین شریف اوقو." مہاجر حافظ اُحمد اُفندی (رح) بر قامشہ اوقودی. او قامشی صویہ قویدیلر. داہا یاغمور علامتی گورونمزکن، ایکندی نمازی وقتندہ، استادیمز دائما إعتما د ایتدیگی بر خاطرہ سنہ بناءً مہاجر حافظ اُحمد اُفندی یہ (رح) سویلہ دی کہ: "یس لر طلسمی آچدی، یاغمور گلہ جک."

عین گيجہ دہ اُولجہ یاغمہ دیغی بارلا دائرہ سی ایچنہ اویلہ یاغدی کہ، استادیمزک اوطہ سنک آلتندہ کی چوبان اُحمدک باغچہ سندہ کی دیوار یاغموردن ییقیلدی. حالبوکہ قرہ جہ اُحمد سلطانک آرقہ سندہ و دگزر کنارندہ بالیق اولامقلہ مشغول اولان شمعی ایلہ آرقداش لری بر طاملہ یاغمور گورمدیلر.

ایشتہ بو حادثہ، قطعاً دلالت ایدیور کہ؛ او یاغمور، خدمت قرآن ایلہ مناسبتداردر. او رحمت عامہ ایچندہ بر خصوصیت وار. سورہ یس آناختار و شفاعتجی اولدی و یاغمور کافی مقداردہ یاغدی.

ایکنجی صورت: قوراقلق زمانندہ، یگرمی اوتوز گون ایچندہ یاغمور

بارلا یہ یاغمہ مشکن، یوقوش باشی چشمہ سی یاپیلدیغی بر زماندہ منبعنہ یاقین

استادیمز و بز (یعنی، سلیمان، مصطفی چاوش، أحمد چاوش، عباس محمد...
 فلان) برابر جماعتله نماز قیلدق. تسبیحاتدن صوگره دعا ایچون اُلزى قالدیردق،
 استادیمز یاغمور دعاسی ایتدی. قرآنی شفاعتجی یاپدی. بردن او گونش آلتنده،
 هر بریمزكُ اُلرینه یدی سکز طامله یاغمور دوشدی. اُلزى ایندیردك، یاغمور
 کسیلدی. جمله مز بو حاله حیرت ایتدك. او وقته قدر یگرمی اوتوز گوندر
 یاغمور گلهمه مشدی. یالکز او یاغمور دعاسی آنده دعا ایدن هر آله، یدی
 سکز طامله دوشمه سی گوسترییور که، بونده بر سر وار. استادیمز دیدی که: "بو
 بر اِشارتِ اِلهیه در. جنابِ حق معنًا دییور که: بن دعای قبول ایدیورم، فقط
 شیمدی یاغمور ویرمییورم." دیمك صوگره سورهُ یس شفاعت ایده جك. و
 نته کیم ده اویله اولمشدر.

الحاصل: اِسپارطه ده کی قارداشلریمزكُ عمومی رحمت ایچنده کی رسالهُ
 نوركُ برکننه دائر دعوا ایتدکلری خصوصیتی، شو ایکی قوتلی دلیل ایله تصدیق
 ایدیورز.

شمعی، مصطفی چاوش، بکر بک،
 مهاجر حافظ أحمد، سلیمان (رح)



صداقتده مشهور اولان بارلالی سلیمانک وظيفه صداقتی تماميله ياپان إسپارطه سلیمانی رشدینک بر فقره سیدر.

عزیز استاد!

قارداشلریمک یگرمی یدنجی مکتوبه گیرن فقره لرینی، کندی فکریمه و حسیاتمه موافق بولدیغمدن، اولر بو نقطه نظر دن کندی فقره لرمدر دییه باشقه فقره یازمغه لزوم گورمدم. فقط بو آخرلرده رساله نورک کرامتنه تماس ایدن بعض حادثه لر بنمله ده مناسبتدار اولارق وجوده گلدیگندن، اوندن بر إخطار حکمنده ایدی که، اولر مناسبتيله بنم ده بر خصوصی فقره قارداشلریمک خصوصی فقره لری ایچنه گیرسین دییه او حادثه لردن بعض لطیف توافقاتی و بعض رؤیای صادقه یی و بر قاچ حادثه یی یازیورم.

بو رؤیالر، بر برینه یاقین و بر قاچ گون ظرفنده گورولمش و حضرت پیغمبر علیه الصلاة والسلام ایچنده بولوندیغی جهتله، رؤیای صادقه در. چونکه حدیثجه ثابتدر که، پیغمبر علیه الصلاة والسلام گورولن رؤیاده شیطان او رؤیایه قاریشه مییور. بو رؤیای صادقه دن هر بری، (گرچه رؤیادر، دلیل و حجت اولاماز) فقط هر برینک عین مئالده إتفاقلری، بر مژده ویریور و رساله نورک مقبولیتنه و حضرت پیغمبر علیه الصلاة والسلامک دائره رضاسنده بولوندیغنه بزلره قناعت ویریور. أز جمله:

برنجیسی: رساله نور شاگردلرندن رضا گورویور: حضرت پیغمبر علیه الصلاة والسلام، جامعده حضرت أبو بکر الصدیق رضی الله عنه أمر ایدیور: "چیق خطبه اوقو." أبو بکر الصدیق قوشارق منبرک أک یوقاری باصامغنه قدر چیقار، خطبه اوقور. خطبه ایچنده جماعته دیر که: "بو سویله دیگم حقیقتلرک ایضاحاتی یگرمی طوقوزنجی سوزده در."

ایکنجیسی: رسالہ نورک شاکر دلرندن عثمان نوری دیورلر کہ: رؤیامده، شمائل شریفه موافق، غایت نورانی بر صورتده حضرت پیغمبر علیہ الصلاة والسلامی اوطوردیغی یره طایانمش بر وضعیتده گوردیم. بو آنده بر صدا گلدی کہ، حضرت پیغمبر علیہ الصلاة والسلامک بر یاورى گلیبور. قبولر بردن بره کندى کندينه آچیلدى. رسالہ نور ناشرلرینک استادی اولان ذات ایچری یه گیردی. حضرت پیغمبر علیہ الصلاة والسلام، استادیمره شفقتکارانه بر إلتفات گوستره رک، طایاندىغی وضعیتدن طوغرلدى. بن ده آغلایه رق اویاندم.

اوچنجیسی: رسالہ نور شاکر دلرینه کوشکنی تخصیص ایدن شکری أفندیدر. رؤیاده اوکا دیورلر کہ: "سنک او کوشکنه حضرت پیغمبر علیہ الصلاة والسلام گلمش." او ده قوشارق گیدوب، حضرت پیغمبر علیہ الصلاة والسلامی چوق نورانی و سرورلی بر حالده بولوب زیارت ایتمش.

دردنجیسی: رسالہ نور شاکر دلرندن نظمى در. رؤیاسنده اوکا دیورلر کہ: "رسالہ نور شاکر دلری ایمانسز ئولملر، قبره ایمان ایله گیرلر."

بو رؤیالر حضرت پیغمبر علیہ الصلاة والسلام ایله مناسبتدار اولمق جهتيله، او رؤیالر زماننده "معجزات أحمدیه رساله سی" مناسبتيله لطیف و کوچک بر ایکی توافقک لطائفی ذکر ایده جگم. شویله که:

رسالہ نور أجزالرندن بر قاچ وجهله کرامتی گورولن، معجزات أحمدیه یه دائر اون طوقوزنجی مکتوبک تصحیحی زماننده، یدی معجزات أحمدیه یه (عصم) مظهر یدی چوجغک بحثنه گلدیگی وقتده، ملیحه إسمنده یدی یاشنده کی قیزم، اومولمق بر وقتده خانه مدن چیقوب استادیمک اوطوردیغی کوشکه گلدی، او یدی چوجق بحثی معصومانه چوجقجه سنه دیگله مگه

باشلادی. چای ایچمه سنی چوق سؤدیگی حالده، کندینه ویریلدی، چوجقلرک بختی بیتنجه یه قدر ایچمه دی.

او ساعتدن اون دقیقه اول، هم اون طوقوزنجی مکتوب، هم معراج رساله سی آیری آیری تصحیح ایدیلیوردی. اون طوقوزنجی مکتوبک یوز آللی صحیفه سی ایچنده بر تک صحیفه ده قورو دیرگک آغلاماسندن بحث وار. معراج رساله سنده آلتی یوز سطر دن بر تک سطر اوندن بحث ایدر. مختلف طرزلرده، مختلف وقتده، مختلف آدم لر، مختلف کتابلرده بردن بر تک سوزی سویله دکلی بن ایشیتدم. او ده، قورو دیرگک آغلامه سی ایدی. هر بری ایکی کیشیدن عبارت ایکی قسم تصحیح جیلر، عین کلمه اوستنده درلر، او کلمه یی سویله یورلردی. بن حیرت ایله دیدم: "ایکی طرف ده بر کلمه یی سویله یورسکز." صوگره باقدق. معراجک تصحیحی عین کلمه یه گلدیگی گی، اون طوقوزنجی مکتوبک تصحیحی ده عین کلمه اوزرنده در. بز حاضر اولانلر شبهه مز قالمادی که، یدی یاشنده ملیحه نک یدی چوجق بختنه توافقی و بو ایکی قسم مصحح لرک عین کلمه ده إتفاقلری، او معجزات احمديه بحثک بر کرامتنک بر شعاعیدر.

ینه پیغمبر علیه الصلاة والسلامک مکتوبیله مناسبتدار اوچنجی بر توافقی: میل اسدن گلن و اورایه گوندریلن کتابلرک لیسته سنی بر سببه بناء صاقلامق لازم گلمشدی. استادم، بو لیسته یی صاقلامق ایچون بکا ویردیگی بلییورمش. بر گون او لیسته یه لزوم اولاجغنی دوشونه رک، بندن ایستیه جکدی. فقط ایسته مه مشدی. او گیجه قالقار، او لیسته یی سجاده سنک یاننده گورور، حیرت ایدر. بو صاقلاندیغی یردن چیقوب، ناصل بوراده بولونسون؟ صباحلین بندن صورت یور. "بن گتیرمدم، خبرم یوق" دیدم. ذاتا گیجه یاننه چیقما مشدم. بونده

بر معنا وار. بز دوشوندك، عین گون میلآسدن لیسته یه گوره کتاب ایسته مگه
 بر حق قزاق ایچون، حضرت پیغمبر علیه الصلاة والسلامك، مصر عزیزی
 مُقَوِّسَه یازدیغی مکتوب، اُسکی مصرلیره عائد کتابلر ایچنده بولونهرق
 اِستانبوله گوندریلمش. بو مکتوبك فوطوغرافله آلینان عیننك بر صورتی، او
 گیجه نك گوندوزنده بزه گلدی، او گیجه کی لیسته حادثه سنه توافق ایتدی.
 بونده شبهه مز قالمادی که، صاقلی اولان او لیسته نك کندی کندینه اوراده
 بولونماسی، بو مکتوب نبویه نك گلمه سنه بر اِستقبال و بر اِشارت ایدی.

ایشته او گونلرده حضرت پیغمبر علیه الصلاة والسلام رؤیاده رساله
 نورله مناسبتدار گورولمه سی و مکتوب ده عین وقتده گلمه سی، او گونلرده
 تألیف ایدیلن خسته لره عائد یگر می بش دواء معنویه یی بیان ایدن یگر می بشنجی
 لمعه و اِقتصاده عائد اون طوقوزنجی لمعه و اونلرک عقبنده اِختیارلره عائد یگر می
 آلتی رجایی بیان ایدن یگر می آلتنجی لمعه نك تألیف زمانلرینه توافق ایتمه سی
 شبهه بیرا قمیور که؛ بو اوچ رساله، حضرت پیغمبر علیه الصلاة والسلامك
 مقبولیتنه مظهر اولمش.

ینه رساله نورله مناسبتی تحقّق ایدن حادثه لردن بریسی ده شودر که:
 رساله نورك اِسپارطه یه مدار برکت اولدیغنی چوق اماره لرله گوردك و
 گوروپورز. اَز جمله:

شکری اُفندی هم کندی کوشکنی، هم مرحوم قارداشی نوری اُفندینك
 کوشکنی رساله نورك درس و تألیفنه ویردیگی بر زمانده، اونك شهرده کی
 اُوینه متّصل بیوک بر خالیچه بناسی آتش آلدی. بتون او بیوک بنا یانیدیغی
 حالده، شکری اُفندینك اُوینه سرایت ایتمدی، حتّی یانان خالیچه بناسنك

مشملا تندن اولوب، خالیچه بناسی ایله شکری أفندینک خانه‌سنه بتیشیک اولان أخشاب اودونلق دخی یانمادی. بو وضعیتی گورن هرکس حیرت ایچنده قالدی. فقط رسالۀ نور ایله علاقه‌لری اولانلرک شهبه‌لری قالمادی که؛ شکری أفندی رسالۀ نورک تألیفنه بو ایکی کوشکی ویردیگی ایچون، اونک برکتیله خارقه بر صورتده هم کندی خانه‌سی، هم مرحوم قارداشنک خانه‌سی او مدهش یانغیندن قورتولدی.

هم رسالۀ نور یازک ناصلکه بیوک بر یاغمور و رحمته سبب اولدیغی دلیلرله بیان ایدیلوب، غوث گیلانی‌نک (ق‌س) کرامتنه دائر رساله‌ده قید ایدیلن حادثه رسالۀ نورک بر کرامتی اولدیغی گبی؛ بو سنه‌کی قیشده رسالۀ نورک مرکز فعالیتی، بارلادن إسپارطه‌نک باغلرینه نقل ایدیلیمش ایدی. باغلرده صوغوق و فورطنه، شهردن چوق شدتلی اولویوردی. بو شدتلی قیشده رسالۀ نورک درس‌ی تعطیل اولماق و ناشری ده طایانه‌یلمک ایچون، بر اثر رحمت اولارق بو سنه‌نک قیشی غایت معتدل گچدی. اوت هرکس بیلیور که، شیمدی‌یه قدر بویله معتدل و بعض گونلری یازه بکزر طرزده بر قیش، بو یاقین زمانلرده گورولمه‌مشدی. ایشته بوگون، یگنی مارت اون ایکی، اُسکی شباط یگرمی یدیدر. ستۀ ثور دینیلن فورطنه‌لی آلتی مشهور گونک اوچنجی گونی اولان بوگون، نَوروز گونی گبی آچیقدر، گوزلدر. ناصلکه رسالۀ نورک برکتی یوزندن رحمتِ إلهیه یاز اورتە‌سنده بر بهار گتیردیگنی قناعت ویره‌جک اماره‌لر ایله گورمشدک؛ اويله ده بو قیش اورتە‌سنده رسالۀ نورک برکتی یوزندن بر گوز موسمی اولماسنه بر وسیله اولدیغنه قناعت ایتدک.

هم رسالۀ نور اجزاسندن إقتصاد رساله‌سنک تألیفنه چوق یاقین بر زمانده، استادیمک معیشتنده کی إقتصادی إفراط درجه‌سنه گیرمشدی. بن و خسرو

و داها دیگر آرقداشلیرمز بتون بیلپورز که: استادیمزڭ خسته اولمادیغی حالده بتون رمضانده یدیگی غدایی حساب ایتدک، بر تک فرنجہ اُکمگی، یاریم اوڤه کیسه یوغردی، یوز اُللی درهم پرنج ایدی. بز تخمین ایتدک که، یگرمی درت ساعتده اوچ خرما دانه سی قدر غذا ایله کلفتسز اداره ایتدی. فضلہ یه اِشتهاسی اولمادیغی ایچون یمپوردی. بو حال، رمضاندن صوگره اوڭا یازدیریلاجق اولان اِقتصاد رساله سنڭ برکتنه و مبارکیتنه و کرامتنه بر اِشارت ایدی.

و بر ده رسالہ نورڭ تقویہ دین حقّنده خدمتنه اِشارت ایدن بر دیگر حادثه شودر که: اِسپارطه نڭ مهمّ بر عالمنڭ، تقریبًا اوتوز قرق سنه اوّل یازدیغی اِستقباله دائر قصیده سنڭ فقره لری، رسالہ نوره تام توافق ایدیور و رسالہ نوری گوستریور. شوپله که:

الله رحمت ایتسین و قبری پرنور اولسون، طوپال شکری اُفندی نامنده اهل قلب و اِسپارطه نڭ بر مدار فخری اولان ذاتڭ کرامتکارانه بوراجه مشهور بر شعرینی گوردیم، گتیروب آرقداشلیرمه گوستردیم. دیدیم: بو ذات بو ضلالتلی زماغزدن بحث ایتدیگی گبی، بر فقره سی ده حرب عمومیدن بحث ایدیور گبی گورونویور. چونکه بو شعرنده دیور:

"آفرین چرخه که، چاتدیردی قودوزی قودوزه."

یعنی، بتون دنیا کافرلرینی بربرینه مسلط ایتدیردی. و ایکی سطر صوگره ینه دیور:

"سوق عصر ایچره بتون داد ستد، کفر ضلال
مشتري قالمادی، دین ایندی اوجوزدن اوجوزه."

یعنی او عصرک چارشوسنده آلیش ویریش دینسزلك أَلنده اولاجق، دینسزلك حکم ایده‌جک، دین غایت اوجوزه دوشه‌جک و اسلامک شعائری گیزلنه‌جک. صوگره دییور:

"شکریا بیلزم أَسرارِ غیبدن اَمّا
یا ایلری، یا گری، تقریب ایدرم اوج اوتوزه."

کندی تفسیر ایدیور، یعنی اوتوز اوچه. شدتلی قافیہ‌سنی مراعات ایچون، اوتوز اوج یرینه "اوج اوتوز" دیمشدر. هم حربِ عمومی‌یه إشارت ایتدیگی فقره‌سیله، "دینسزلك دستورلری، قانونلری، او عصر چارشوسنده حکم ایتدیگی..." فقره‌سنک اورتہ‌سندہ شویله دییور:

"ایریش آی عونِ شریعت (حاشیه ۱) ایریش آی محی الدین!
أَلم ریش (حاشیه ۲) جفا سینهدن ایریشدی ئوزه."

شیمدی بنم قناعتم گلییور که، بو ذات، اوتوز اوج سنه‌سندن صوگره رسالہ نوری إسپارطه‌نک إمدادینه چاغیرییور. "آی عونِ شریعت! آی محی الدین یتیش!" دییور.

(حاشیه ۱): شریعت جفرله طوقوز یوز سکسان (۹۸۰) ایدر. رسالت النور دخی ﴿النور﴾

ده کی لام اصلی لام اولسه جفرله طوقوز یوز یتمش سکز (۹۷۸) ایدوب ایکی فرقه توافق ایدر.

(حاشیه ۲): ریش: جریحه، یاره دیمکدر.

یعنی وفاتندن تقریباً اوتوز اوچ سنه صوگره شریعتہ و دینک شعائرنہ، اسپارطہ یہ یتیشہ جک بر نوری چاغیریور۔ جناب حق دعاسنی قبول ایتمش کہ، وفاتندن اوتوز قرق سنه صوگره رسالہ نور او وظیفہ بی گورمش۔

طلبہ گز و خدمتکاریگز
سلیمان رشدی



رسالہ نورک مصادره حادثہ سی مناسبتیلہ اسپارطہ سلیمانی
رشدینک، اولکی فقرہ سنہ ذیل اولارق یازدیگی بر فقرہ سیدر۔

رسالہ نور شاکردلرینک مرکزی اولان شکری أفندینک کوشکنک قومشوسی سکسان یاشنده محترم علیل عثمان چاوش نامندہ بر ذات، رسالہ نور ناشرلینہ هجوم زمانندن بر گون صوگره رؤیاسندہ گورویور کہ: گونش ایله قمر، برابر اولارق کوشکک ایچنہ گیروب پارلایورلر۔

دیگر بر رؤیادہ کچه جی مصطفی أفندینک حفیدی بکر ینہ حادثہ اَلیمہ دن بر ایکی گون صوگره گورویور کہ: گونش قبلہ طرفندن چیقیور۔ شعاعاتی ایچندہ گونش یوزندہ رسالہ نور ناشرینک صورتی تمثیل ایدوب، عیناً گونشک قُرُصندہ گورونویور۔

هم متدین بر قادین، ینہ حادثہ دن صوگره گورویور کہ: سماواتدن مبارک کاغدلر یاغییور۔ صوریورلر: "بو نہ در؟" رؤیادہ دیمشدر: "رسالہ نورک صحیفہ لریدر۔" یعنی، تعبیرجه رسالہ نور، قرآنک تفسیری اولدیگی جهتلہ، وحی

سماوی اولان قرآنک سماوی و إلهامی بر تفسیریدر. هم یاغمور گبی، انسانلره کثرتلی بر رحمتدر.

حادثه‌نک وقوعندن اول، رساله‌ نور شاکردلرینک هر بری بر جسدک اعضالری گبی، بر جهته‌ده او جسده گلن مؤثر بر عارضه‌بی بتون اعضانک حس ایتمه‌سی نوعندن؛ بو حادثه‌بی رساله‌ نورک درت شاکردی، وقوعندن بر ایکی گون اول شویله گوردیلر: اوچی، یعنی محمد زهدی، خلیل روحی، محمد نیازی، رساله‌ نور ناشرلرینک استادینی وفات ایتمش گوروپورلر که؛ وفات ایسه تعبیرجه رساله‌ نورک تعطیلنی خبر ویریور. دردنجیسی: فاضل بک گوروپور که: (حادثه‌دن بر گون اول) رافده کتابلری قاریشدیرر، بعض کتابلری دوشورور. استاد بکا حدت ایدیور، بن ده دیورم: "رأفت دوشوردی." بردن خانه‌یه پولیس‌لر طولوپورلر، هر شیئی آلییورلر.

هم بوندن یدی بچق آی اول رساله‌ نور ناشرلرینه گلن اَلم پولیس‌خانه‌یه چاغیرمه مسئله‌سنده رساله‌ نورک شاکردلرینک درت دانه‌سی (عین حادثه‌بی بر ایکیسی، یعنی رشدی ایله لطفی عیناً گوروپورلر، ایکیسی ده آز بر تعبیرله) عین حادثه‌بی گورمه‌لری و بو دفعه‌کی حادثه‌بی، ینه درت دانه شاکردلر عیناً گورمسی گوستریور که؛ رساله‌ نور شاکردلری، بر جسدک اعضالری گبیدرلر که، رساله‌ نوره گلن حادثه‌بی، بر جسدک اعضالری گبی حس ایدیورلر.

هم رساله‌ نور شاکردلرندن بکره او مصیبت گوندن بر گون اول بری دیمش: "استادک سنی چاغیریور!" بر حس قبل الوقوع ایله ایکنجی گون استادینک باشنه گلن و رحمت إلهیه ایله خفیف گچن مدهش مصیبتی، دشمنلرک پلانلری درجه‌سنده بیوک، آغیر حس ایتمش طرزنده، آغلایه‌رق غایت

قورقاقلق و خلجان ایله قوشوب گلدی. او خلجان و آغلامه سنه هیچ سبب ظاهری یوقکن، ینه هیجاننی، آغلاماسنی تسکین ایده مییوردی. دیمک رساله نوره گلن مصیبت، شاگردلرینی کرامتکارانه ایقاظ ایدیوردی.

هم مصیبتک عین گونده استادیمز گزمکدن دونرکن، (خسرو و محمدک اخباریله) بردن بره سببسز اهل دنیایه قارشى حدته باشلامش. یگرمی بش سنه اول دیوان حرب عرْفیده کندی إعدام قرارینی بکلرکن، سببسز، قلبسز، رتبه لی ایکی آدم، محبوس اولدیغی قوغوشه تحقیر ایچون گلدکلری زمان غایت عجیب بر صورتده سویله دیگی او حاله مخصوص مشهور بر شتمی اوچ دفعه ظالم و غرضکار اهل دنیایه قارشى صرف ایدیور. "بندن نه ایسته یورسکیز؟" دییه باغیره رق تکرار ایدیور. صوگره صوصویور. عین دقیقه ده ضابطه، کوشکی باصمق ایچون یدی سکز پولیس کوشکک اطرافنه گیردکلری زمانه توافق ایدیور.

مدار عبرت بر حادثه: رساله نور ناشرلرینک تضییقی یوزندن آمرلرینک یاننده یوز بولمق نیتیه رساله نور ناشرلرینه ایلیشنلرک عکس مقصدیله طوقات ییدکلرینک یوز حادثه دن بر حادثه سی شودر که:

سببسز، صرف بعض غرضکارلرک کیفی ایچون رساله نور ناشرلرینه بر قولپ طاقوب محکمه لرده سوروندیرمک و بلکه محو ایتمک ایچون صوره کندینی دوست گوستروب غایت خائنانه بر ریاکارلقه دائره مزه صوقولوب، بر طاقم یالانلرله آمرلرینی اغفال ایدوب رساله نور ناشرلرینه مدهش ضربه گلمه سنه وسیله اولان بر آدم، توجه و مقام قزاقمق دگل، بالعکس او یله بر طوقات یدی که، دنیاده قالدقجه وجدانی وارسه وجدان عذابى چکدیره جک. هم او قولای

وظیفه‌سندن مشکل بر وظیفه‌یه تحویل ایتدیلر و هم ده اوڭا یالانجی نظریله باقدیلر. و هم نفرت عامّه‌یی قزاندی. و هم تحرّی حادثه‌سندن ایکی گون صوڭره بر اختیار آدمی خانه‌سندن چیقاروب یولده گتیررکن، او اختیار ذات فجئه وفات ایدوب هم مسؤولیت مادّیه و معنویه معروض قالمشدر.

أوت، رساله نوره هجوم ایدنلر، وقتيله کفنی بویننه طاقینمالی و رذالته بورونملی و معنوی جهنمه دنیاده گیرمگی گوزه آلمالی.

هم او مصیبت حادثه‌سندن ایکی گون اول، رساله نور شاکردلرندن اولمیان و هیچ بزمه ذهنًا مشغول اولمیان بری رؤیاده گورویور که: إسپارطه‌نڭ آلتنده کی اوواده چوق اورمانلر بولونویور. قوتلی بر سیل گلییور، بو اورمانڭ چوق آغاجلرینی دویرییور. بردن بره بر زلزله أرض اولویور، رساله نور ناشری، ألبسه‌سیله هیبتلی بر صورتده یر یاریلوب چیقییور. (حاشیه) او ده قورقوسندن اویانییور. ایکی گون صوڭره رساله نوری تعطیل و معنًا طوپراغه دفن ایتمک نیتيله گره أرضی تیره‌ته‌جک درجه‌ده بر خطا ايله رساله نورڭ أجزالرینی أوراق مضره نوعندن تحرّی ایدوب، طوپلایوب مرکز حکومته، تا داخلیه وکالتنه گوندرر. هیچ بر دائره قانونجه موجب مؤاخذه و مسئولیت بر شی رساله نوره بولامدیغندن، او معنوی زلزله ایچنده تولدیردک، دفن ایتدک ظن ایتدکلری رساله نور دیریلوب، یر یاریلوب میدانه چیقدیغی گچی؛ ینه او رؤیا إشارت ایدیور که، بر زلزله عظیمه و بر سیل ایچنده رساله نور بو وطن و ملتّه بر خلاصکار،

(حاشیه): دیمک بو گچن سنه کی زلزله یعنی إزمیر زلزله‌سی، رساله نورڭ دیریلمه‌سنه و میدانه چیقماسنه بر أماره‌در و او رؤیایی تعبیر ایدیور. أوت او زلزله‌دن اول رساله نور دفن اولونمش گچی غایت گیزی پرده آلتنده إنتشار ایدیوردی. زلزله باشلادقندن صوڭره أسکی ألبسه فاخره‌سیله میدان ظهوره چیقدی.

بر منجی صورتندہ مصیبتزدہ لڑکِ امدادینہ یتیشہ جک.

رسالہ نور شاگردلرندن
(یلدیرم) سلیمان رشدی



یگر می یدنجی مکتوبک لاحقه سندن آلینمش مهمّ پارچه لر

برنجی مسئله: برنجی شعاعده بر ایکی آیتک ایشاراتنده، رساله النورک صادق طلبه لری ایمانله قبره گیره جکلرینی و اهل جنّت اولاجقلمینی قدسی بر مژده و قوتلی بر بشارت بولوندیغی گوستریلمشدر. فقط بو پک بیوک مسئلهیه و چوق قیمتدار ایشاراته تام قوت ویره جک بر دلیل ایستر دییه بکلردم. چوقدن بری منتظر دم. لله الحمد ایکی اماره بردن قلبمه گلدی:

برنجی اماره: ایمان تحقیقی علم الیقیندن حقّ الیقینه یاقینلاشدقجه داها سلب ایدیلیمیه جگنه اهل کشف و تحقیق حکم ایتمشدر و دیمشدر که: سکرآت وقتنده شیطان وسوسه سیله آنجق عقله شبهه لر وبروب تردده دوشوره بیلیر. بو نوع ایمان تحقیقی ایسه یالکز عقلده طور مییور. بلکه هم قلبه، هم روحه، هم سرّه، هم او یله لطائفه سرایت ایدیور، کوکله شیور که، شیطانک آلی او یرلره یتیشه میور؛ او یله لڑک ایمانی زوالدن محفوظ قالییور.

بو ایمان تحقیقینک وصولنه وسیله اولان بر یولی، ولایت کامله ایله کشف و شهود ایله حقیقته یتیشمکدر. بو یول اخصّ خواصّه مخصوصدر، ایمان شهودیدر،

ایکنجی یول: ایمانِ بالغیب جهتنده سرّ و حیک فیضیله برهانی و قرآنی بر طرزده، عقل و قلبک إمتزاجیله حقّ الیقین درجه‌سنده بر قوّت ایله، ضرورت و بدهت درجه‌سنه گلن بر علم الیقین ایله حقائقِ ایمانییه‌یی تصدیق ایتمکدر. بو ایکنجی یول؛ رساله‌ نورک اُساسی، مایه‌سی، تملی، روحی، حقیقی اولدیغنی خاص طلبه‌لری گورویورلر. باشقه‌لر دخی إنصافله باقسه، رساله‌ نور حقائقِ ایمانییه مخالف اولان یوللری غیر ممکن و محال و ممتنع درجه‌سنده گوستردیگنی گوره‌جکلر.

ایکنجی أماره: رساله‌ نورک صادق شاکردلرینک، حسنِ عاقبتلرینه و ایمانِ کامل قزانمالرینه او درجه کثرتلی و مقبول و صمیمی دعالر اولویور که، او دعالرک ایچنده هیچ بری قبول اولماسنه عقل إمکان ویره‌میور.

أزجمله: رساله‌ نورک بر خادمی و بر تک شاکردی، یگرمی درت ساعتده لاأقل رساله‌ نور طلبه‌لرینک حسنِ عاقبتلرینه و سعادتِ أبدیه‌یه مظهر اولمالرینه، یوز دفعه رساله‌ نور طلبه‌لرینه ایتدیگی دعالری ایچنده هیچ اولمازسه یگرمی اوتوز دفعه سلامتِ ایمانلرینه و خصوصی حسنِ عاقبتلرینه و ایمانله قبره گیرمه‌لرینه عین دعایی اُک زیاده قبوله مدار اولان شرائط ایچنده ایدیور.

هم رساله‌ النور طلبه‌لری بو زمانده هر جهتدن زیاده هجومه معروض ایمان خصوصنده بربرینه سلامتِ ایمان حَقّنده کی صمیمی، معصوم لسانلریله دعالرینک یکونی اویله بر قوّتده‌در که، رحمت و حکمت اونک ردّینه مساعده ایتمز. فرضا مجموعی إعتباریله ردّ ایدیلسه، تک بر دانه اونلرک ایچنده قبول اولونسه، ینه هر بری سلامتِ ایمان ایله قبره گیره‌جگنه کافی گلییور. چونکه هر بر دعا عمومه باقار.

(رساله نور كرامتك بو حوالیده ظهور ایدن چوق ترشحاتندن بر ایکی حادثه بیان ایدیورم)

برنجیسی: خطیب محمد نامنده جدی بر اختیار طلبه، اختیارلر رساله سنی یازیوردی. تا اون برنجی رجانك آخرلنده مرحوم عبد الرحمانك وفاتك تام مقابلنده، قلمی "لَا إِلَهَ إِلَّا هُوَ" یازوب و لسانی دخی "لَا إِلَهَ إِلَّا اللَّهُ" دیهرک حسن خاتمه نك خاتمله صحیفه حیاتی مهله یوب، رساله النور طلبه لرینك ایمانله قبره گیره جکلرینه دائر اولان اشاری بشارت قرآنیه یی وفاتیلله امضا ایتمش. رحمة الله علیه رحمة واسعة آمین!

ایکنجیسی: سزك تألیفکز اولان فهرسته نك تصحیحنده، بر مستسخك نقصان بیراقدیغی بر صحیفه یی، تحسینه دیدم: "یاز!" او ده یازمغه باشلادی. سیم سیاه بر مرکبدن و تمیز قلم ایله بردن یازدیغکز ایکنجی جلد فهرسته نك مقبولیتنه حجت اولارق او سیاه مرکب گوزل بر قیرمزی صورتی آلدی. تا یاریم صحیفه قدر بز بو غریب حادثه یه تعجب ایدوب باقارکن، او مرکب سیم سیاهه دوندی. صحیفه نك اوتیه کی یاریسی، عین قلم، عین حقه تام سیاه یازیلدی. بر زمان بارلاده، باغلرده کی کوشکده، شاملی حافظ و مسعود و سلیمانك مشاهده سیله عین حادثه یی باشقه شکلده گوردك. شویله که:

بن، سهومه دیگم ایچون سیاه بر مرکبی قسماً دوکدم؛ بردن متباقیسی چوق بگندیگم گوزل بر قیرمزی یه تحویل ایتدی. رساله نور کاتبلرینی شوقلندیردی. گوزمه سلسله کرامتك بر اوجنی و ترشحنی گوستردی.

(بوگونلرده، معنوی بر محاورهده بر سؤال و جوابی
دیڭلهدم. سزه بر قیصه خلاصهسنی بیان ایدهیم.)

بری دیدی: رسالۀ نورڭ ایمان و توحید ایچون بیوک تحشیداتلری و کلّی
تجهیزاتلری گیتدکجه چوغالییور. و اُڭ معنّد بر دینسزی صوصدیرمق ایچون یوزده
بریسی کافی ایکن، نه دن بو درجه حرارتله داها یڭی تحشیدات یاپییور؟

اوڭا جوابًا دیدیلر: "رسالۀ نور، یالڭز بر جزئی تخریباتی، بر کوچک خانه یی
تعمیر ایتمییور. بلکه کلّی بر تخریباتی و اسلامیتی ایچنه آلان و طاغلر بیوکلگنده
طاشرلی بولنان بر محیط قلعه یی تعمیر ایدیور. و یالڭز خصوصی بر قلبی و
خاص بر وجدانی إصلاحه چالیشمییور، بلکه بیڭ سنه دن بری تدارک و تراکم
ایدیلن مفسد آلتلر ایله دهشتلی رخنه لهنن قلب عمومی یی و افکار عامّه یی و
عمومڭ باخصوص عوام مؤمنینڭ استنادگاهلری اولان اسلامی اساسلرڭ و
جریانلرڭ و شعائرلرڭ قیریلمه سیله بوزولمغه یوز طوتان وجدان عمومی یی،
قرآنڭ إعجازیله او گنیش یاره لرینی قرآنڭ و ایمانڭ علاجلریله تداوی ایتمگه
چالیشییور.

ألبته بویله کلّی و دهشتلی تخریباته و رخنه لره و یاره لره، حقّ یقین درجه سنده
و طاغلر قوّتنده حجّتلر، جهازلر و بیڭ تریاق خاصیتنده مجرّب علاجلر و حدسز
أدویه لر بولوغق گرکدر که؛ بو زمانده قرآن معجز البیانڭ إعجاز معنویسندن چیقان
رسالۀ نور او وظیفه یی گورمکله برابر، ایمانڭ حدسز مرتبه لرنده ترقیات و إنکشافاته
مدارد. "دییه اوزون بر مکالمه جریان ایتدی. بن ده تمامًا ایشیتدم، حدسز شکر
ایتدم. بو حادثه مناسبتیله ینه بوگونلرده خاطریمه گلن بر واقعه یی بیان ایدیورم:

بن نماز تسبیحاتک آخرندہ، اوتوز اوچ دفعہ کلمہ توحیدی ذکر ایدرکن، بردن قلبمہ گلدی کہ: حدیث شریفہ "بعضًا بر ساعت تفکر، بر سنہ عبادت حکمنہ گچر" رسالۃ النورہ او ساعت وار؛ چالیش، او ساعتی بول، إخطار ایدیلدی. عادتاً إختیارسز بر صورتدہ، قرآنک آیت الکبراسنک ایکی تفسیری اولان ایکی آیت الکبرا رسالہ لرندن ملخص تفکری بر تکلم، تام بر ساعت دوام ایتدی. باقدم؛ سزہ گوندردیگم آیت الکبرا رسالہ سنک برنجی مقامنک خلاصہ سندن منتخب گوزل بر سرینی خلاصہ ایلہ، یگرمی طوقوزنجی لمعہ عربیہ دن مستخرج نورلی، طاتلی فقرہ لردن ترکب ایدیور. بن، کمال لذتله، هر گون تفکرله اوقومغه باشلادم. بر قاچ گون صوگرہ خاطریمہ گلدی کہ: مادام رسالہ نور بو زمانک بر مرشدیدر، طلبہ لرینہ بر ورد اکبر اولاییلیر دییہ قلمہ آلدیم. و بتون رسالہ لرک خصوصی منبعلری، معدنلری اولان بیگدن زیادہ آیات قرآنیہ یی، کندی قرآندہ اُولجہ إشارتلیر قویوب بر حزب اعظم قرآنی یایمق نیت ایتمشدم. شیمدی بو حزب اعظم و بو ورد اکبر، رسالہ نور منسوبلرینہ بعض ایام مبارکہ ده اوقونماسی ایچون بر زمان سزہ ده گوندرمک حقکز وار. إن شاء الله بر زمان صوگرہ سزہ گوندریله جک. بعض کلمہ لرینی ترجمہ و بر قسم قیدلرینی تفہیم ایچون، وقت بولسہم غایت قیصہ حاشیہ گی بر شیئی یازاجغم.

عموم قارداشلریمہ و خدمت قرآنیہ ده بتون آرقداشلریمہ حسرت و اشتیاقله بیگلر سلام.

سعید النورسی



أَمِين و تحسین و حلمی نځ بر فقره سیدر . یگر می یدنجی مکتوبك فقره لری ایچنه گیرمگه مناسب گورولدی.

بوگونلرده زیاده بر حساسیتله رساله لر باقیلدیغندن، عنایتك حمایتی دخی،
بر نوع حساسیتله اكرامنی گوستردی. غایت جزئی بر نمونه سی شودر كه:

رساله النور شاکردلرینه، معیشت جهتنده بر اكرام الهی و كوچك فقط
شایان حیرت و غایت لطیف بر توافق، بر واقعه در. رساله النور خدمتک شهبه سز
بر کرامتیدر. اوت رساله نورك بر سلسله کرامتک منبعی اولان توافق، بو واقعه ده
او جنسندن آلتی عدد توافقاتك إتفاقی ایسه، تصادف احتمالی کوکیله کسر دییه
حکم ایتدك. شویله كه:

بر قاج گوندن بری استادیمزك زیارتنه گیتمه دیگمزدن، قارداشم أمين ايله برابر
استادیمزك زیارتنه گیتدك. ایکندی وقتی برابر نماز قیلدقدن صوگره بزه امر ایتدی
كه: "سزه يمك یدیره جگم، بوراده تعیینگز وار." مکرراً، "بمزسه گز بگا طوقوز ضرر
اولور" دیدی. "چونكه ییه جگگز قارشی جناب حق گوندره جك."

يمك یمكدن عفویمزی رجا ایتمش ایسه ك ده امر ایتدی: "رزقگزی یهك،
بگا گلیر." آمرینی قیرمامق ایچون، لطف بیوردیغی تره یاغی و قباق طاتلیسنی
أكمکله یمگه باشلادق. داها سفرده ایکن، امید ایدیلیمه یین بر وقتده و بر طرزده
و عین مقدارده بر آدم گلدی. أئنده بییدیگمز قدر تازه أكمك، عین بییدیگمز
مقدارده (فندق قدر) تره یاغی و دیگر أئنده بزه ویریلنك تام مثلی قباق طاتلیسی
اولارق قپوی آجدی. آرتیق تعجب ایدیله جك، هیچ بر جهته تصادفه محل
قالیه رق، رساله النور شاکردلرینك رزقنده کی بر برکت ربانی گوزیمزله گوردك.
استادیمز امر ایتدی: "إحسان اون مثلی اولاجق. حالبوکه بو اكرام تام تامنه

مثیلدر. دیمک، تعیین جھتی غلبه ایتدی. تعیین تأمینی ایسه، میزان ایله اولور. " صوگره عین آقشامده، صدقه جھتی دخی حکمنی گوستردی. بز گوردک که، اَکَمک اُون مِثلی، تره یاغی طاتلیسی او ده اُون مِثلی و قباق طاتلیسنی چوق سومدیگی ایچون قباق، پاتلجان طورشیسی اُون مِثلی؛ مأمولک خلافته، رساله النوردن ایکنجی شعاعک بر هفته مطالعه سنه مقابل بر معنوی اجرت اولارق گلدی، گوزیمزله گوردک. دیمک، قباق طاتلیسنک طاتلیغی، تره یاغک اُون حلواسنه گیردی، کندیزی طورشیده قالدی.

رساله النور شاکردلرینک، حسن خدمتنه عجله بر مکافات گوردکلری گبی؛ خدمتده قصور ایدنلر دخی توقات ییدکلرینی (إسپارطده اولدیغی گبی) بوراده دخی گوزیمزله گوردک. پک چوق وقوعاتندن بش آلتیسنی بیان ایدیورز:

برنجیسی: بن (یعنی تحسین) بر گون، یگی آچدیغمز دگان مشغله سیله بگا أمر اولنان وظیفه نوریه پی تنبللک ایدوب یاپامادم. عین وقتده شفقتلی بر توقات ییدم. دگانده اوطورورکن بریسی بگا گلدی، تبدیل ایدیلیمک ایچون امانت اولمق اوزره یوز لیرا ویردی. بو پاره نک صاحبنه، الله ایچون بر خدمت یایمق اوزره تبدیل ایچون مالیه سندوغنه گتدم. بو پاره پی صایارکن، آرالرنده بر قلمپ لیرا بولندی. بو یوزدن إفاده یه و سؤال و جواب و مؤاخذه یه معروض قالدیغم گبی، اویمزی ده تحری ایتیمک ایجاب ایتدی. بنی محکمه یه ویردیلم. فقط تربیه و شفقت طوقادی اولمق جهتیه، ینه رساله النور کرامتنی گوستردی، ضررسز قورتولدق.

ایکنجیسی: استادیمزه و رساله النوره درت بش سنه خدمت ایدن و اوقوتدیران و جدّا طرفدار بولنان بر ذات، اَلنده دینه عائد بر غزته ایله گلدی. رساله نورک مسلکته مخالف بر جریانک صاحبلیرنه طرفدارانه بر طور گوستردیگی زمان،

استادیمک جانی چوق صیقیلدی. بر ایکی گون صوگره شدتلی فقط شفقتلی بر توقات یدی. بر دوقتور اوکا دیدی که: "اگر عملیات یاپدیرمازسهک یوزده یوز نولوم وار." او ده بالمجبوریه عملیات یاپدیردی. فقط شفقت جهتی إمداده یتیشه رک، چابوق قورتولدی.

اوچنجیسی: بر مأمور، رساله النوری کمال إشتیاقله اوقوردی. هم استاد ایله گورشمگه و تام درس آلمغه چالیشیوردی. بردن بر قومیسر طرفندن اوکا اوهام ویریلدی. او ده گوروشمه‌یی و اوقومایی بیراقوب باشقه شهره گیدرکن، بردن سببسز بر طرزده بر آياغی قیرلدی، بر آی چکدی. ینه شفقت یار اولدی که، شیمدی تکرار اوقومغه شوق ایله باشلادی.

دردنجیسی: اهتمتلی بر ذات رساله النوری کمال تقدیر ایله اوقور، یازاردی. بردن ثباتسزلق گوستردی، شفقتسز بر توقات یدی. غایت مفتون اولدیغی رفیقه‌سی وفاتله و ایکی اوغلی ده باشقه یره گیتمه‌سیله آجینه‌جق بر حاله گیردی.

بشنجیسی: درت سنه‌در استادک چارشو ایشنده خدمتنه باقان بر ذات، بردن صداقتنی بیراقوب مسلگنی دگیشدیردی. بردن شفقتسز بر توقات یدی. بر سنه‌در داها چکیور.

آلتنجیسی: بر خواجه‌یه عائد بر حادثه‌در. بلکه حلال ایتمز. بز ده اونی گورمیوز. طوقادی شیمدیلک قالدی.

بو وقوعات نوعندن هم چوق وار، هم رساله نوره قارشى قصوره بناءً توقات اولدیغندن، قطعياً شبهه‌مز قالمادی.

رساله نور شاکر دلرندن
 اوت تصديق ايديورم
 امين، تحسين، حلمی
 سعيد النورسی

هم رساله النورک سهولته انتشارينک بر کرامتی، بو مکتوبی یازديغمز
 زمانده و يکده کی کرامت دقيقه سنده گوزيمزله گوردک. شويله که:

اهميتلی یدی سکز رساله و اشارات قرآنيه شعاعنی مهم بر مکتوبله برابر بر
 طوره ده اهميتلی بر قارداشمزه بر شهره گوندرمشدک. شوفور او پاکتی
 دوشورمشدی. بويله بر زمانده بويله اثرلی، منافقلى، جاسوسلى خبر آلمدن، امين
 بر آل ايله بش گون صوگره ألمزه گچدی. قناعتمز گلدی که، بر عنایت بزى حمایه
 ايديور.

هم رساله النورک حقنده عنایت ربّانيه نك لطيف بر حمايتی ده شودر که:
 قراکلتی بر وضعيته، قورقوتان بر زمانده، جاسوسلى و تحرى مأمورلىرىنک
 تحسّسلى استادىمنک منزلى صارماسی دقيقه سنده، بر فاره استادمزک بر چورابنى
 آلدی. نه قدر آرادق، هيچ بر یرده بولامادق. او فاره نك يوواسنى گوردک. قابل
 دگل چوراب اورايه گیره مز. ايکی گون صوگره گوردک که، او حيوان او چورابی
 گتيرمش اويله یره که، صاقلانمش، محتوياتی اونوتلمش اولان محرم مکتوبلىرک و
 أوراقلرک تام ياننده بيراقيلمش. حالبوکه ايکی دفعه اورايه باقمشديق،
 گوره مه مشدک. هم او چورابی او یره گتيرمک؛ صوبه بوروسنه چيقوب يوقايردن
 اولور. غایت قورناز و ذکی آدم آنجق او ايشی ياپار. هيچ بر جهته تصادف
 احتمالی قالمديغندن استادىمز دیدی: "بو مکتوبلى اورادن قالدیره جغز." بز اونلره
 باقدق، گرچه سياستله علاقه لری يوقدر. فقط وهام جاسوسلره، عليهمزده حبه يی
 قبه ياپمغه اهميتلی بر وسیله اولوردی. بز هم اونلری، هم داها بهانه يه مدار اولاييلن

باشقه شیلری قالدیردق. او هیجانمزدن جاسوسلر خبر آلوب آڭلادیلر که، حاضرلاندق. داها هجوم ایتمه‌دن یالڭز ایکنجی گون، آمین آئنده بر طوربه ایله منزله گیردی. تام آرقه‌سنده قره‌قول قومیسری، گیزی، حسن ایتدیرمه‌دن گیردی. آمینڭ آئنده کتابلر یرنده یوغردی گوردی، طورینی دگیشدیردی.

الحاصل: رسالة النورک إنتشارینه قارشى گلن بتون دشمن و جاسوسلره مقابل بر تک فاره چیقدی، پلانلرینی زیر و زیر ایتدی.

أوت أوت أوت أوت أوت
توفیق احمد تحسین حلمی فیضی سعید النورسی



عزیز قارداشلرم!

سزڭله پک چوق علاقه‌دار و گورشمگه چوق مشتاقم و وضعیتڭزی بو صوغوق قیشده مراق ایدر، خیالاً سزڭ ایله گوروشورکن بر ایکی نقطه خاطره گلدی، بیان ایدیورم.

برنجیسی: اون طوقوزنجی سوزڭ آخرنده قرآنده کی تکرارڭ اکثر حکمتلری، رسالة النورده دخی جریان ایدر. بالخاصّه ایکنجی حکمتی تام تامنه واردر. او حکمت شودر که:

هرکس قرآنه محتاجدر. فقط هرکس، هر وقت بتون قرآنی اوقومغه مقتدر اولاماز. فقط بر سورهیه غالباً مقتدر اولور. اونک ایچون اُکْ مهّم مقاصد قرآنیه اکثر اوزون سورهلرده درج ایدیلهرک؛ هر بر سوره بر قرآن حکمنه گچمش. دیمک هیچ کیمسهیی محروم ایتهمه مک ایچون حشر و توحید و قصّه موسی (عس) گبی بعض مقصدلر تکرار ایدیلمش. عیناً بو اُهمّیتلی حکمت ایچوندر که، بعض دفعه خبرم اولمادن، اختیارم و رضام اولمادیغی حالده، اینجه حقائق ایمانیه و قوّتلی حجتلر متعدّد رسالهلرده تکرار ایدیلمش. بن چوق حیرت ایدیوردم. نهدن بونلر بگا اونوتدیرلمش، تکرار یازدیریلمش؟ سوگره قطعی بر صورتده بیلدم که: هرکس بو زمانده رساله نوره محتاجدر. فقط عمومّی آلدّه ایده مز. ایتسه ده تام اوقویاماز. فقط کوچک بر رساله النور حکمنه گچمش بر رساله جامعیهی آلدّه ایده بیلیر. و اکثر وقتلرده محتاج اولدیغی مسئلهلری اوندن اوقویه بیلیر و غذا گبی هر زمان احتیاج تکرّر ایتدیگی گبی، او ده مطالعه سنی تکرار ایدر.

ایکنجی نقطه: آیت الکبرادن چیقان "ورد اکبر" نامنده کی عربی رساله جگک آخرنده، رساله مناجاتک باشنده کی آیتک تفسیری دییه عربی قسملری علاوه ایدیلسه، برابر اوقونسه ایدر. بز ده نسخه مزه یازدق.

اوچنجیسی: عزیز قارداشلرم! چوق دفعه قلبمه گلیوردی. نهدن امام علی رضی الله عنه، رساله النوره و بالخاصّه آیت الکبرا رساله سنه زیاده اُهمّیت ویرمش؟ دییه سَرینی بکلردم. لله الحمد او سرّ إخطار ایدیلدی. إنکشاف ایدن او سرّه شیمدیلک یالکز قیصه بر إشارت ایدیورم. شویله که:

رسالة النورک ممتاز بر خاصیتی، ایمانک اُکْ صوُکْ و اُکْ کَلّی إستناد نقطه سنی، قوّتلی و قطعی بیان اولدیغندن و بو خاصیت آیت الکبرا رساله سنده

فوق العاده پارلاق گورونویور. بو عجیب عصرده مبارزه کفر و ایمان، اُک صوڭ نقطهٔ استناده سرايت ایدهرک اوڭا طایاندیریور. مثلاً: ناصلکه غایت بیوک بر میدان محاربه‌سنده و ایکی طرفک بتون قوتلری طویلاندیغی بر صیره‌ده ایکی طابور چارپیشیورلر. دشمن طرفی، اُک بیوک اوردوسنڭ جهازاتِ محربه‌سنی کندی طابورینه امداد و قوهٔ معنویه‌سنی فوق العاده تقویه ایچون هر واسطه‌یی استعمال ایدهرک اهل ایمان طابورینڭ قوهٔ معنویه‌سنی بوزمق و افرادینڭ تساندینی قیرمق ایچون هر وسیله‌یی قوللانیر. اهمیتلی بر استنادگاهی کندینه تمایل ایتدیره‌ک احتیاط قوتنی طاغیتیر. مسلمان طابورینڭ هر بر نفرینه قارشى، جمعیت و قومیته‌جیلک روحيله متساند بر جماعت گوندرر. بتون بتون قوهٔ معنویه‌سنی محو ایتمگه چالیشدیغی بر هنگامده خضر گبی بری چیقار، دیر: "مأیوس اولمه! سنڭ اويله صارصیلماز بر نقطهٔ استنادڭ و اويله مغلوب اولماز محتشم اوردولرڭ، توکنمز احتیاط قوتلرڭ وار که؛ دنیا طویلانسه قارشیسنه چیقماز، کائناتی طاغیده‌میان اونی طاغیده‌ماز. شیمدیلک مغلوبیتڭ سبی، بر جماعته و بر شخص معنوییه قارشى بر نفری گوندرمگزدر. چالیش که، هر بر نفرڭ، استناد نقطه‌لری اولان دائره‌لردن معناً استفاده ایتدیگی قوتلی قوهٔ معنویه ايله بر شخص معنوی و بر جمعیت حکمنه گچسین." دیدی و تام قناعت ویردی.

عیناً اويله ده، اهل ایمانه هجوم ایدن اهل ضلالت، (بو عصر جماعت زمانی اولدیغی جهته‌له) جمعیت و قومیته‌جیلک مایه‌سیله بر شخص معنوی و بر روح خبیث اولمش، مسلمان عالمنده کی وجدانِ عمومی و قلبِ کلّی‌یی بوزویور. و عوامڭ تقلیدی اولان اعتقادلرینی حمایه ایدن اسلامی پردهٔ علویه‌یی یرتیور و حیاتِ ایمانیه‌یی یاشاتان، عنعنه ايله گلن حسّیاتِ متوارثه‌یی یاندیریور. هر بر مسلمان تک باشيله بو دهشتلی یانغیندن قورتولمغه مأیوسانه چابالارکن،

رسالۃ النور (رسالۃ النور) خضر گبی إمداده یتیشدی. کائناتی إحاطه ایدن صوڭ اوردوسنی (حاشیہ) گوستروب و اوندن مقاومتسوز مادّی و معنوی إمداد گتیرمک خدمتندہ خارقه بر أمربر نفری اولارق آیت الکبرا رسالہ سنی إمام علی رضی اللہ عنہ کشفاً گورمش، اہمیتلہ گوسترمش.

تمثیلدہ کی سائر نقطہ لری تطبیق ایدیگز، تا او سرڭ بر خلاصہ سی گورونسون.

سعید النورسی



أمین و فیضی نڭ بر فقرہ سیدر.

(رسالۃ النورہ عائد درت بش کرامتدن بحث ایدر.)

خدمت قرآنیہدہ بزہ سبقت ایدن صادق و خالص، متین و وفاکار قارداشلریمزدن مبارک خسرو و رشدی گبی ذاتلر، رسالۃ النورڭ خادملرینہ و وظیفہ لرینڭ مقبولیتنہ بر أمارہ اولان إحسان اولونان برکت حقّندہ متعّد فقرہ لر یازمشلر. بز دہ بو قارداشلریمزڭ فقرہ لری گبی، بو یاقین زماندہ برابر تظاهر ایدن، گوردیگمز بعض حادثاتی قید ایدہ جگز. ہم نمونہ ایچون یالڭز بر قسمنی بیان ایدرز.

(حاشیہ): کائناتی طاغیتمیان بر قوت او اوردویی بوزاماز.

برنجیسی: بو یاقینده استادیمز ایله برابر قیره چیقمشدق. چای یاپیلماسنی، هم ایکیشر چای، اوچر شکرله ایچیلمه‌سنی أمر بیوردیلر. هپمز، اوچر شکرله ایکیشر چای ایچدک. یالکز آمین قارداشمز بر شکر کندیسنه نقصان اولارق ایچمش. آقشام اوزری، رساله‌النورک منبع انتشاری اولان استادیمزک اوطه‌سنه گلدک. آمین، شکر قوطوسنه صرف اولان شکرلری قومیق ایسته‌مش، فقط قوطو سکز شکردن فضله آلامش. آمین "فسبحان الله" دیر؛ اون یدی شکر یرینه قوطو سکز شکرله طولسون، دییه تعجب ایتدک. بو واقعه، بزه شهود درجه‌سنده قناعت ویردی که؛ شو سر برکت رساله‌النور خادمیرنه بر عنایت‌الهییه و بر إلتفات ربّانیه‌در.

ایکنجیسی: ینه عین‌گونه بن، یعنی محمد فیضی، اولجه یازوب استاده تسلیم ایتدیگم هجمات سته رساله‌سنی بگا ویرمک ایچون صاقلادیغی یردن آرارکن، فوق‌العاده بر صورتده بولونماز. بردن او آنده، عادتلرینک خلافته اولارق هیچ وقوع بولماش بر طرزده، بر حادثه ظهوریله، گوزلکیرینی بیراقرق نردبانه متوجه اولورلر. عین وقتده رساله‌النورک انتشارینه و خدمتنه ضرر ویرمک نیتیه جاسوس بر آدمک نردبانه طوغری، ظاهرًا زیارت مقصدیه گلدیگی گورولور. استادیمزک تلاشلی اولدیغی حسن ایدر. هم استادیمز اونک نظیرینی اوته‌کی حادثه بدنییه چویرر، اوکا دیر که: "گوریورسک بن معذورم، زیارتی باشقه وقته بیراق." او ده دونر، گیدر. هم هجمات سته، هم محمد فیضی، هم باشقه ایشلریمز او تجسسدن قورتولد.

أوت هجمات سته صاقلاندیغی معین یرنده فوق‌العاده بر صورتده غائب اولماسی، اهمیتلی بر حادثه‌نک اوکئی آلدی. استاده عارض اولان بو خلاف عادت حالت و او رساله‌نک یرنده بولونماسی، قطعیا تصادفه حمل ایدیلمز. بر

هفته صوگره او رساله‌ی خلاف مأمول بر یرده بولدق. استادیمزک آمریله آمین قارداشمه اُهمیتلی بر صورتده اوقودم. استادیمز ایضاحات ویریوردی. او وقته قدر اویله مهم و تأثیرلی درس آلامشددق. دیمک بو ایکی مهم سرّه بناء رساله کندینی گوسترمدی. بو حادثه رساله نورک صادق و إخلاصلی شاکردلری دایما بر حفظ عنایت و حمایت آلتنده اولدقلرینه شبهه بیراقمیور.

اوچنجیسی: ینه بر وقعۀ برکت: استادیمزک بر اوقّه (یعنی کیلو) پینیری واردی. اکثر گونلرده او پینیردن خوشنه گیتدیگی ایچون، بر ایکی دفعه ییوردی و بزه ده ویریوردی. هم یمکسر اولدیغی اکثر وقتلرده اوندن یددیگی حالده، آلتی آی قدر دوام ایتدیگنی و حالاً ده، یوز درهم قدر او پینیردن بولوندیغی گوروب یقیناً تصدیق ایدیورز. فقط بو حادثۀ برکتک إفشاسندن صوگره، اُولجه گورونمه‌ین دبی گورونمگه باشلادی، نقصانیتنی گوستردی. اوت، برکت خصوصنده شایان حیرت بر حادثه‌در. هم یاریم کیلو تره‌یاغی، اکثر گونلرده فضله‌جه صرف اولوندیغی حالده، اُللی گونه یاقین دوامیله آکلادق که، شبهه‌سز بر برکت ایچنه گیرمش.

هم ینه عین رمضان بایرامنده، استادک رضاسی اولمادیغی حالده، تحسین و بن (یعنی آمین) بر کیلو قدر اینجه شکر گتیرمشدک. اکثر یوغرت و سوت و طاتلی قباغه و سائر شیلره، بعضاً یگرمی اوتوز درهمدن فضله قاتدقلری حالده بش آی دوام ایتدی. حالاً او شکردن یوز درهم قدر قالماسی، البته برکت سببیلهدر.

هم بو حوالیده کی شاکردلر، هرکس جزئی کلّی حسن ایتمش و اعتراف ایدیورلر که: رساله النوره چالیشدیغمز زمان، هم رزقمزده برکت و سهولت،

هم قلمزده بر إنشراح و فرح ظاهرًا حسّ ایدیورز. أز جمله بن کندم (یعنی آمین) إعتراف ایدیورم که: رسالة النور دائره‌سنه گیرمزدن أول، بتون سنه چالیشیردم. نه وقت رسالة النور دائره‌سنه گیردم؛ بش سنه‌دن بری اوچ درت آی قدر چالیشدیغم حالده، اولکنندن داها مفرّح و داها مسعود بر حالده یاشامقلغم، یوزده یوز رسالة النورک خدمتک برکاتيله اولدیغنده هیچ شبههم یوقدر. (حاشیه)

هم أز جمله، استادیمز دیور که: "بنم ده قناعت قطعیه چوق تجربه‌لرله گلمش که، بن رسالة النورک تصحیحاتيله مشغول اولدیغم زمان، پک ظاهر بر طرزده، هم رزقده برکت، هم سهولت گورو یوردم. نه وقت چالیشماز سه‌م او حالی گوره مییوردم."

هم استادیمز دیور و بز ده تصدیق ایدیورز که: "بن صوگ زمانده آکلادم؛ شیمدی یه قدر هم بن، هم دوستلرم بر حقیقتک صورتی باشقه شکلده گورمشز. شوپله که: چپسخانه‌ده بر تک اکمک، سکز و بعضًا اون گون بگا کافی گلدیگی گبی، بوراده ده عینا او طرزده یاشایوردم. هم بن، هم قارداشلم، بونی بنم آز یمک و إشتهاسزلغمه ویریوردق. حالبوکه چوق أماره‌لرله قطعیا آکلادق که، او عجیب حال برکت نتیجه‌لری ایمش. بر قاچ دفعه سکز گونده بگا کافی گلن بر اکمگی عین إشتهایله (چالیشمدیغمدن برکته مظهر اولمادیغم زمان)

(حاشیه): أوت، بتون قوّمله تصدیق ایدیورم که، آمین قارداشز مملکت‌مزه گلدیگی زمان متمادیا فعال بر صورتده هر آی چالیشیوردی. شیمدی ایسه، رسالة النورک دائره‌سنه گیردکن صوگره، اوچ درت آیدن فضله چالیشدیغنی گورمیورز.

ایکی گونده، بعضاً بر بچق گونده بیتیریوردم. دیمک بو اون آلتی و اون یدی سنه دن بری بنم مکمل تعیناتم، رساله النورک خدمتندن گلن بر برکت ایدی. اوت، بزه ده عین یقین درجه سنده قناعت گلمش که، بو کثرتلی حادثات برکت، قرآن معجز البیانک إعجاز معنویسنک بر شعاعیدر. معنا دیر: "ای قرآن شاکردلری! سزی وظیفه مقدسه کزدن اکثریتله گری بیراقان، معیشت تلاشه سیدر. او ایسه، قرآنک فیضیله، برکت نوعندن سزلره ویریلیور. وظیفه کزه باقکز."

﴿اللَّهُمَّ بِحَقِّ اسْمِكَ الْأَعْظَمِ وَبِحُرْمَةِ رَسُولِكَ الْأَكْرَمِ سِرِّرْنَا خِدْمَةَ الْقُرْآنِ
بِنَشْرِ رِسَالَةِ النُّورِ بِالدَّوَامِ بَيْنَ الْأَنَامِ فِي عَالَمِ الْإِسْلَامِ آمِينَ آمِينَ آمِينَ﴾

هم حادثات برکتک عین زمانده، رساله النورک بر کرامتی اولارق، بر شاکردینک بیگلر لیرا قیمتنده خانه سنک، او کاپک یاقین دهشتلی بر یانغیندن فوق المأمول بر صورتده رساله النورک برکتیله قورتولماسی و رساله النورک ترجمانه آخرت جهتنده چوق علاقه دارلق گوسترن بر خانم، او دهشتلی یانغینده خانه سنک او چنجی قاتنده بولونان ألماس و مجوهرات و آلتونلرینی قورتارمق ایچون قوشوب چیقدیغی وقت، آتش هر طرفی صارمش، ألماس و مجوهراتی قورتاره مدیغی گبی، کندی نفسنی ده بتون بتون تهلکه قطعیه ده گوردیگی وقتده، رساله النور ترجمانی، او آتشدن طلبه سنک خانه سنی قورتارماسنی شدتلی دعا ایدرکن، او بیچاره خانم خاطرینه گلمش؛ عجا او یانغینده او آخرت همشیره بولونماسین دییه او کتا ده رساله النوری شفاعتجی ایدوب دعا ایتمش. "یا ربی او کتا مرحمت ایله!" نیاز ایتمش. عین زمانده، او خانم پنجره پی قیرمش، کندینی ایکی قات یوکسکلگنده حولی یه آتمش، فوق العاده بر صورتده نه اینجینمش، نه ده بر یری قیریلمش. هم باقیر و دمیری آریتن او دهشتلی و شدتلی یانغیندن،

(بتون قوناق ياندقدن صوگره) بتون مجوهراتنی و آلتوننی هیچ بری ضایع اولمیه‌رق، بر اون اونی محافظه ایتمش؛ بولمش، آلمش. رساله النورک برکتندن، هم جانی، هم مالی قورتارمش.

هم مذکور حادثاتک عین زماننده وقوع بولماسی مناسبتیله، رساله النورک کرامتکارانه ایکی طوقاتی بین، عین آنده، وظیفه‌جه اُهمیتلی ایکی متجاوز و معجز ایکی آدمک تجاوز و تعجیز آنده بریسنک قفاسنه، دیگرینک جگرینه وورمه‌سی، (حاشیه) بزده هیچ بر شبهه بیراقمدی که، خدمت قرآنی‌ده‌کی عنایت ربّانیه‌نک بر حفظ و حمایت سیلله‌سیدر. "آرتیق طوریکز، یتر! طوقاته مستحق اولدیگز!" دییه معنا سویله‌مسیدر.

رساله النور شاگردلرندن

أمین و فیضی



محمد فیضی‌نک یدیگی شفقت طوقادیدر

أوت استادم بگا معجزاتِ اُحمدیه‌یی، قارداشم خسرو طرزنده یاز دییوردی. بن (یعنی فیضی) بر پارچه تنبللک ایتدم. بردن یگریمی سکر لیلرله عسکره ایسته‌نیلدم. ینه استادم دیدی: "گیت معجزاتِ اُحمدیه‌یی (عصم) یاز، سنی شیمدی ویریمیه‌جگم." صوگره باشلادم. او أمر بر هفته‌گری قالدی. تکرار

(حاشیه): أوت او متجاوزلردن بریسی دخالت ایتدی، ئولومدن قورتولدی؛ دیگر بر سنه عذاب چکدی، هم ئولدی.

بر عارضه ایله ناصلسه معجزاتِ اُحمدیه نځ (عصم) یازیلماسی نقصانلاشدی. تکرار عسکره چاغیریلدم. استادم: "گیت یاز!" دیدی. بن گیدوب کمالِ جدّیت و صداقتله معجزاتِ اُحمدیه یی (عصم) یازمغه باشلادم. فوق المأمول، ایکنجی دفعه أمر گری قالدی. تکرار بر معذرتّه بناءً معجزاتِ اُحمدیه یی (عصم) یازامدم. استادم دیدی: "مادام معجزاتِ اُحمدیه یی (عصم) یازمقده تکاسل ایتدځ، شیمدی سنځ وظیفه نځ، رساله النور حسابنه عسکرلکده در." بردن أمر گلوب، بر شفقت طوقادی یه یوب وظیفه مه گوندریلدم. جنابِ حقّه شکرلر اولسون، ممکن اولدیغی قدر رساله النوره چالیشدم و چالیشدیریلدم. استادم بزه سویله دیگی گبی، آلتی یدی آی صوگره ترخیص ایدیلوب سَوگیلی استادیمه، رساله النور کُ قدسی وظیفه سنه قاووشدم. إن شاء الله بو قباحتم عفو اولمشدر. هم رساله النورده، هم خدمتِ قرآنیّه ده بزلری سبقت ایدن خسرو، رشدی، حافظ علی، خلوصی، صبری گبی خالص قرآن شاکردلرینی و قیمتدار قارداشلریمی شفاعتجی ایده رک او قصوریمکُ عفوینی بتون روحله قرآندن و استادمدن رجا ایدیورم. بن اعتراف ایدیورم که، تبلیگمکُ جزاسی اولارق فوق المأمول بر شفقت طوقادی ییدم.

رساله نور کُ تنبل بر شاکردی، فقط الماس قلملی قارداشلرینکُ غیرت و فعالیتیه إفتخار ایدن

محمد فیضی



رساله نور شاکردلرندن محمد فیضی و أمثاله خطاباً بیان ایدیلن بر حقیقتدر.

قارداشم فیضی!

مادام سن، إسپارطه ولایتنده کی قهرمانلره بکزه مک ایسته یورسک، تام اونلر گبی اولمالیسک. أسکیشهر چسخانه سنده (الله رحمت ایتسین) مهم بر شیخ مرشد و جاذبه دار بر نقشی اولیاسندن بر ذات، درت آی متمادیا رساله النورک اَللی آتمش شاکردلری ایچنده و جلبکارانه اونلرک ایچلرنده صحبت ایتدیگی حالده، یالکز بر تک شاکردی موقّه کندینه چکه بیلدی. متباقیسی، او جاذبه دار شیخه قارشى مستغنی قالدیلر. رساله النورک یوکسک، قیمتدار خدمت ایمانیه سی اونلره کافی اولارق قناعت ویریوردی. او شاکردلرک غایت کسکین قلب بصیرتی شویله بر حقیقتی آکلامش که: رساله النوره خدمت ایدن، ایمانی قورتارییور؛ طریقت و شیخلک ایسه، ولایت مرتبه لری قزاندیریور. بر آدمک ایمانی قورتارمق، اون مؤمنی ولایت درجه سنه چیقارمقدن داها مهم و داها ثوابلیدر. چونکه ایمان، سعادت ابدیه یی قزاندیدیغی ایچون بر مؤمنه، کُرّه ارض قدر بر سلطنت باقیه یی تأمین ایدر. ولایت ایسه، مؤمنک جتنی گنیشلتدیرر، پارلاتدیرر. بر آدمی سلطان یاپمق، اون نفری پاشا یاپمقدن نه قدر یوکسک ایسه، بر آدمک ایمانی قورتارمق، اون آدمی ولی یاپمقدن داها ثوابدر.

ایشته بو دقیق سرّی، سنک إسپارطه لی قارداشلرک بر قسمنک عقللری گورمسه ده عمومک کسکین قلبلری گورمش که؛ بنم گبی بیچاره، گناهکار بر آدمک آرقداشلغنی اولیالره، بلکه اگر اولسه ایدی، مجتهدلره دخی ترجیح ایتدیلر. بو حقیقته بناء، بو شهره بر قطب، بر غوث اعظم گلسه، دیسه: "سنی اون گونه ولایت درجه سنه چیقاره جغم." سن رساله نوری بیراقوب اونک یاننه گیتسهک، إسپارطه قهرمانلرینه آرقداش اولامازسک.

لله الحمد، بو زمانده سنّت سنیه دائره سنده کمال ایمانی قزانان رسالّه نور شاکردلری اولیالرک، مرشدلرک نظر دقتنی جلب ایده جک وضعیتی آلدیغندن؛ هر زمانده بولونان حقیقی مرشدلر، هر حالده بو زمانده رساله النور شاکردلرینه مشتری اولورلر. بریسنی آلدیه ایتسه لر، یگرمی مرید قدر قیمت ویررلر.

هم ذوقلی و جاذبه دار ولایت ترشحاتی قارشیسنده رساله النورک خدمتنده کی مشقّت، مجاهده، کلفت بولوندیغندن، فیضی یه خطاباً بیان ایدیلن بو حقیقت قلمه آلیندی.

سعید النورسی



خسروک بر فقره سیدر

عزیز استادم!

یوکسک و جدی إرشادلریکزله آدیم آتمغی اُک بیوک بر مقصد بیلن طلبه لریکز، صوُک زمانلرده شایان شکران بر وضعیته گیردی لر. خلوصی ثانی بش اون آرقداشیله؛ حافظ علی، جوارنده کی یگرمی یگرمی بش آرقداشیله؛ مبارک لر، اوتوز اوتوز بش رفیق لریله و بالخاصّه حاجی حافظ کوینده أحمدلر و محمدلرک چوق خالص غیرت لریله عمومیت اعتباریله هم هیچ مبالغه سز ییک قلمله، بلکه داها فضله؛ اُک گریده قالان إسپارطه ده ایسه قهرمان رشدینک و رساله لری کندینه تماماً یازان محمد زهدینک و کوچک علی نک و عثمان نوری گبی فعّال

طلبه‌لرک غیرت و همت‌لریله اوتوز ایله قرق آراسنده، حتی بر جهته ممتازیت قزانان محمد زه‌دینک کوچک حافظ علی گبی هم رساله النوری یازهرق، هم کندی اوندی یوز اَللی قدر چوجغی سربست اولارق اوچ آیدن بری اوقوت‌ماسیله و جوارنده دیگر کویلرده بولونان اون بش یگرمیشر آرقداش‌لریله طلبه‌لریگز، قرآنی خدمت‌لرنده غیرتلی بر صورتده چالیشمقده درلر. مبارک‌لرک یازدقلری گبی، درت کویده درت آی ظرفنده اَلفا اوقومیان قرق اَللی آدم، رساله النوری مکمل یازمغه موقق اولمالری، خارقه بر کرامت رساله النور اولدیغنه قناعت‌مز گلدی.

رساله نور شاکردلرندن

خسرو



خلوصی بگک بر فقره‌سیدر

نورک بکجیی

عزیز استادم!

اون طوقوزنجی مکتوبی بر مجلسده و بر جمعه گیجه‌سی اوقومق نیئیه اوزیمه اَلمشدم. شدتلی یاغمورلی بر گیجه ایدی. او مجلسده اوقومق اوزره اَلیمی جیمه قویدم، او مبارک اثر یرنده اولمادیغنی حیرتله گوردیم. اثری قویدیم جیب ییرتیق و دلیک اولمادیغنی گبی، بن ده باشقه هیچ بر یرده طورمادیغمه گوره بو حاله حیرت ایتمه‌مک قابل می؟ او گیجه‌یی اویقوسز گچیردم، متأثر اولدم. حضرت غوثدن بو مبارک اثری ایستدم. لله الحمد ایرتسی گونی، بو اثری دیگله‌مکله نمازه باشلامش اولان بر معلّم واسطه‌سیله بولوندی. شاقیر شاقیر یاغمور آلتنده و چامور ایچنده بو مبارک اثر بولونسه بیله آرتیق اوقونیه‌حق

درجہ اولاجغنی تخمین ایدرسکژ دگل می؟ شایان حیرت و جای دقت و مدارِ عبرتدر کہ، اُکْ اوفاق بر لکہ بیلہ اولمامشدر. حافظِ حقیقی او مبارک اُثری، اوکْا معنًا و جدًا باغلی اولانلر گی محافظہ بیورمش. حفیظ و علیم و حکیم اِسملرینکْ ظاہر بر تجلیسی بویلہ جہ لمعان ایتمش اولدی.


خلوصی

محرم اولان سِرِّ **إِنَّا أَعْطَيْنَا**دہ جفر ایلہ اِستخراجم، عینًا مناظرات رسالہ سندہ "بر نور چیقہ جق، گورہ جگژ" دیہ غیبی مژدہ لردہ کی گی، اِلہامی و حق بر حقیقی، فکرملہ تطبیقاتمدہ بر قصور واردی. او قصور، بنی بر زمان دوشوندیریوردی. مناظرات و سنوحات گی رسالہ لردہ کی مژدہ نوریہ پی، رسالہ نور حلّ ایتدی. دائرہ سیاسیه یرینہ، یوکسک بر دائرہ نوریہ ایلہ او قصوری اِزالہ ایتدیگی گی، محرم سِرِّ **إِنَّا أَعْطَيْنَا**دہ اون ایکی، اون اوچ سنہ صوگرہ "اِسلامیتہ ضربہ وورانلرکْ باشلرینہ اویلہ مدہش بر پاطلایش اولاجق کہ، قیامتہ قدر اونوتلمیہ جق" مثالندہ کی اِستخراج جفری چوق گنیش بر دائرہ اولدیغی حالده، نور سِرِّینکْ عکسنہ اولارق طار بر دائرہ و خصوصی بر حکومتدہ تطبیق ایتمک صورتیلہ، فکرم او گنیش دائرہ پی اِحاطہ ایدہ میہرکْ او حقیقتکْ صورتی دگیشدیرمش. حالبوکہ او اِستخراجکْ گوستردیگی عین تاریخدہ، او رژیملکْ مؤسسسی و باشی دنیادن گوچدی، ضربہ سنی یدی. و عین سنہ دہ، پردہ آلتندہ بیلینمہین و کُرہ اَرْضکْ اُکثریسنی و نوع بشرکْ قسم اعظمی اِستبدادی آلتہ آلان بر مدہش جریانکْ دوگومی و دوگمہ سی و معنًا باشی و اُکْ مدہش اولان او گوچوب گیدن آدم، طوقات یدیگی عین زماندہ، داها سنہ تمام اولمادن، او مدہش جریانکْ بتون باشلری و طرفدارلری اویلہ سماوی و مدہش طوقاتلرہ

و شدتلی فورطنه‌لی مصیبتلره طوتولمه‌یه باشلادیلر که، قیامته قدر عذابنی چکه‌جکلر و چکیورلر. و اُدیان سماویه و اسلامیته ایتدکلری جنایتلرک جزاسنی، چوق گنیش بر دائره‌ده گوردیلر و گوروپورلر. میمسز مدنیتک بو إستفراغ و قوصمه‌سی ایله دنیا‌ی ملوث ایتدکلری ایچون، عین إستخراجک گوستردیگی تاریخده، او مدنیتک باشنه اوپله سماوی طوقات ایندی که، اُک قراکلق وحشتدن داها آشاغی ایندیردی.

الحاصل: سِرِّ **إِنَّا أَعْطَيْنَا** ده چوق گنیش بر دائره‌ی، طار بر دائره‌ده تطبیق ایدیلیمش. نور مزده‌سی ایسه؛ طار و معنوی فقط یوکسک بر دائره‌ی، گنیش و مادی بر دائره‌ده صورتنده تصویر ایدیلیمش. جنابِ حقّه یوز ییک شکر ایدیورم که؛ بو ایکی قصوریمی، **﴿يُبَدِّلُ اللَّهُ سَيِّئَاتِهِمْ حَسَنَاتٍ﴾** سرینه مظهر ایلدی.

سعید النورسی



خسروک بر فقره‌سیدر

چوق قیمتدار و چوق سؤگیلی استادم أفندیم!

حضرت عیسی علیه السلامه دجال حقّنده کی أحادیث متشابه‌دن بر حدیثک اوچ جهتله حقیقی تأویلنی بیان و ایضاح ایدن محمد فیضی و آمین قارداشلیمیزک مبارک فقره‌لرینی صبری قارداشم گوندرمش؛ بوگون آلدیم، او قودم. بو حدیث شریفک مثالنه و حقیقی تأویل‌لرینه او قدر محتاج ایمیشم که؛ قیزغین قوم صحرا‌لرنده سنه‌لردن بری صوصامشرله آب حیات اوزاتیر گبی روح و قلبم بر تازه حیات بولدی، دریندن درینه نفّس آلدیم، بتون لطائف‌لرم سرورله طولدی،

ظاہری جسدِ ممدن معنوی قلبہ قدر سرایت ایتدی. سۆگیلی استادیمز طلبہ لرینی و قسطنیولی قارداش لریمز ده بزلی لطف لریله طویوردقلرندن، جناب حقّه حدسز شکر ایتدم. باشده سۆگیلی استادیم رساله النورک کرامتنه و بو فقره نك فیضنه باقان اوچ اكرام ایله قارشیلادق.

برنجیسی: مکتوبی برلکده تقدیم ایتدیگم صبری قارداشمز، بو عالی فقره ألنه واصل اولاجغی آنده، بر دیگر قارداشنه حادثاتدن بحث ایدرکن بو فقره نك مندرجاتنی آڭلاتمه سی...

ایکنجیسی: بو حقیر طلبه کز خسرو ده، بو فقره نك وصولندن بر گون اول رافت بگله قونوشورکن دیمشدم. "عزیز رافت! بز، حضرت عیسی علیه السلامک نزولنه انتظار ایدیورز. بو پیغمبر عالی شان، دین لهنده حرکت ایدن جریانک باشلرینه نزول ایتسه گرکدر و او ملت ده مسلمان اولاجقدر. سۆگیلی استادیمزک صوڭ مکتوبلرندن بویله آڭلایورم. بو خصوصده امیدم قوتلیدر. إن شاء الله او یله ده اولاجقدر." دیمشدم.

اوچنجیسی: آتابگلی قارداش لریمک سۆگیلی استادیمه یازدقلری مکتوب که، اونی ده بو آقشام آلدیم، او قودم، چوق عجیب گوردیم. او قارداش لرم ده عثمان خالدينک بحث ایتدیگی مجدد دین و او شرفه جناب حقک نائل ایتدیگی ذاتی ده سۆگیلی استادیمز اولان رساله النور اولدیغندن بحث ایدیورلر. او مکتوبی ده برلکده تقدیم ایتدم.

أوت محترم استادیم، بوگونلرده رساله النورک فوق العاده فعالیتی ایچنده چوق کرامت لرینی مشاهده ایدیورز. حتّی شویله دییه بیلیرم که: هر بر طلبه کز، باشلی باشنه، برر برر، بلکه ده کراتله بویله اكرامه و بویله انعامه مظهر درلر.

میلاسلی محمد أفندی، "بر قریه‌ده بیك قلمله نوره صاریلان قارداشلریمزك کوینده کی فعالیتی برآز مبالغه‌لی گورمشلر. بن اونك تحقیقی ایچون گلدم." دیدی. رساله‌النورك بر کرامتی ایدی که، بو کوپك قیمتلی، فعال بر طلبه‌سی مرانغوز أحمد یانمده ایدی. بن دیدم: واقعا بن بو کوپه گیتمه‌دم، قارداشلرمدن سورویورم، اونلر ده دیوردی: "قادین اركك، چولوق چوجق، رساله‌النوری یازان بیك قلم واردر." سوگره مرانغوز أحمد دیدی که: "بزم کوپمز، اوچ یوز آللی خانه‌در. ایکی خواجه، بر حاجی اوچ آدمدن باشقه بتون اولریمزه رساله‌النور گیرمشدر. قادینلره، قیز چوجقلرینه وارنجه‌یه قدر یازیورلر. حتی امیلردن (قرق یاشندن یوقاری) یازی یازان اون قدر قارداشلر واردر." جوابنده بولوندی. میلاسلی محمد أفندی بو فعالیتیه حیران اولدی.

طلبه‌كز

خسرو



رساله‌النورك بش طلبه‌سنك بر فقره‌سیدر

إسپارطه‌نك صاف منابع علمیه‌سندن بر ذات که، طریقت علیّه نقشیه رؤ‌ساسندن و بیك ایکی یوز طقسان ایکی (۱۲۹۲) ویا بیك ایکی یوز طقسان اوچ (۱۲۹۳) آراسنده دار بقایه تشریف بیوران بش قضالی‌زاده عثمان خالدی حضرتلری، مسلک علمیه و عملیه‌سیله علاقه‌دارانه کشفیات و حادثاتی بر حجت قاطعه‌گی وارثلرینه وصیت و محض تبشیراتلرینی شوپله‌جه توارث ایله‌مشدر. حتی استاد محترمك تولدینه تام إصابتلی اولارق تاریخ مذکوره

"ایمانی قورتاران بر مجّد چیقّه‌جق، او ده بو سنه تولّد ایتمش" دیمش. بوندن باشقه درت اولادندن بریسنک او ذات ایله مشرف و ملاقی اولاجغنی علاوه ایتمشدر. بو بیانات حقیقه شویله‌جه جریان ایتمشدر:

یك اوچ یوز یگرمی یدی (۱۳۲۷) رومی سنه‌سی آتابگده سنت و حفظ جمعیتلرندن برنده مُشارٌ اِلَیْهِ عثمان خالدى حضرتلرینك اولادلرندن صوگنجیسی أحمد أفندی مرحومدن، "مجدّد، مجدّد دیورسکز، نره‌ده و کیمدر؟" ایراد اولونان سؤاله جواباً: "أوت، شیمدی موجوددر و هم اوتوز بش یاشلرنده‌در." دیمشدر.

ثانیاً: إسپارطه‌نك یكیجه محلّه‌سندن و قارداشلیرمزدن نوری طرفندن مرحوم مُومى إلیه أحمد أفندی "پدریكز، بنم اولادمدن بریسی او مجدّدله مکالمه و مصافحه‌ده اولاجقدر دیمش، ناصلدر؟" دییه صورولمش. جواباً أحمد أفندی مرحومك "أوت طوغریدر، بن اونکله گوروشدم" جوابنده بولونماسی، إشبو کشفیات و بیاناته مدار اولمشدر. مُشارٌ اِلَیْهِ عثمان خالدى حضرتلرینك مستشنا تسبیحات و تحمیداتك بری ﴿وَأَنْ لَّیْسَ لِلْإِنْسَانِ إِلَّا مَا سَعَى﴾ آیت کریمه‌سنك فضل توفیقنه صیغینارق إسپارطه‌نك جنوبنده، طاغده سِدره نام موقعده أربعین اَیّام مبارکه‌سنی تسعید و حصرِ تسبیحاته نیتله قرق گونلك إعاشه‌یه تخصیص ایتدیگی که، هر بر گون ایچون ألی درهم مقدارنده بر بزدرمه اُکمگندن قرق دانه اولان بر تخصیصاتی بر ایکی گونده یر و قرق گونده داها یمک یمه‌دن او موقعِ مخصوصه‌ده إمرارِ أوقات و تسبیحاته بولونورلر. إکمالنده، گری عودتلرنده مبارك دوداقلری بربرینه یاپیشیر، بیچاقله تکرار آچارلر. برآز ایلریده شو عصرِ حاضرک اوغرا دیغی و اوغرایه‌جغی قویّا مأمول و ملحوظ اولان سفاهت و عطالته رغماً دستور شیوختنی تحدید و آنجق عناصرِ مجروحه جزّاحنی اونوقمایوب و إهمال دخی ایتمیهرک شهادتِ قطعیه‌سنی گوستروب صحیفه

حياتنی ييڭ ايکي يوز طقسان ايکيده (۱۲۹۲) إمضالامشدر.

وانده تأسيسنه باشلانان مدرسه زهرانڭ تأخيري، "دوقتور خسته يه
الزمر" فحواسيله، اون طوقوز ييڭ آلتون تخصيصات و آرقه سنده سلطان رشاد،
داها بری ده ايکي يوز مبعوثدن يوز آلتمش کسورڭ إنضمام رأيي يوز ألى ييڭ
بانقنوط قبول ايتدکلری حالدہ، مادّة موقع فعله ايصال ايديله مەمش. هر حالدہ
حکيم مطلق، قدیر مطلق، داها أحسن صورتی ديله مەمش که؛ او سلطان أزينڭ
لطفيله، مادّياته منت ايتمه دن، **(هَذَا مِنْ فَضْلِ رَبِّي)** الحمد لله إسپارطه ده رساله
نورڭ تأليفه منبع اولماسی و معنوی مدرسة الزهرا حکمنه گچمه سی، پايانسر
قصورلریمزڭ بلکه ده سترينه إن شاء الله وسیله اولماسنی جناب أرحم الرّاحميندن
ديله يهرک، إشبو دستگاه معنوی بی تحکیمًا عثمان خالدينڭ قيمتدار و معنيدار،
صادق و مشهور إخباراتڭ هدف و مصروف لهی گوندن داها آشکار بر حالدہ
ظهور ايتمشدر.

شو متوالی وقایع مثبتہ بز عاجز خدمتجیلره وظيفه أصليمزده آيريجه نظر
دقتی جلب ايتديگنه مطلع اولدقدن صوڭره، ييڭ حمد و ثنا ايله حضور استاده
برر برر وجود معنومزله عرض أندام ايدر و مبارك أَلرینی اوپهرز. عين غايه يه
ياردیمه قوشان و عين دستگاهڭ علاقه دارلری اولان کوچک خسرو و فيضی،
نظيف، أمين، تحسین، توفیق، حلمی گبی قارداشلریمزه عرض ايدرز.

رساله نور شاکردلرندن

حسن، عثمان، طاهری، عبد الله،

خلوصی ثاني صبری



عزیز قارداشلرم!

بوگونلرده تفسیرک و اوننجی سوزک توافقاتنه باقدم. کندی کندیبه دیدم که: بو زیاده تفصیلات إسرافدر، اُهمیتلی مسئلهلر چوقدر، وقت ضایع اولماسین. بردن إخطار ایدیلدی که: او توافق آلتنده چوق اُهمیتلی مسئلهلر وارد. هم مادام توافقه بر عنایتِ خاصّه و بر إلتفاتِ رحمانی رساله النوره قارشى تظاهر ایتمش. او إلتفاتّه قارشى حسنّ شکران و ممنونیت و متشکرانه سَوینج، نه قدر إفراطکارانه ده اولسه إسراف اولاماز. بو إخطار مجملنی ایکی جهته ایضاح ایده جگم:

برنجیسی: هر شیده (نه قدر جزئی اولسه ده) بر قصد و إرادۀنک جلوه سی بولونماسیدر؛ تصادف، حقیقی اولارق بولونماماسیدر. اوت کثرتک اُک طاعنیک و اُک زیاده تصادفه ویریلن، کلماتده کی حروفاتک وضعیتلیدر. خصوصاً کتابتده، مادام هیچ مناسبتی اولمیان و إختیارِ بشر قاریشمیان حروفاتک وضعیتلرنده بر تناسب، بر نظام بولونویور؛ اَلبته بر إرادۀ غیبی تحتنده وضعیتلر ویریلیور. هیچ بر شی دائرۀ علم و قدرتندن خارج اولمادیغی گبی، دائرۀ إرادة و مشیتندن دخی خارج دگلدر که؛ بویله جزئی و طاعنیک شیلرده دخی بر تناسب گوزۀ تیلیور و تنظیم ایدیلیور. و او تنظیم ایچنده إرادۀ عامّه جلوه سندن، عنایتِ خاصّه صورتنده، رساله النوره بر إمتیاز نوعندن، خصوصی بر توجّه گورولمش. بن بو درین مسئله یی تام گورمک ایچون، إشارات الإعجازک توافقاتنه دقت ایتدم و قطعی بر قناعت ایله او سَرّی بیلدم و حسنّ ایتدم.

ایکنجیسی: ناصلکه چوق مبارک و قدسی بیوک بر ذات، غایت فقیر و محتاج بر آدمه، اُمید ایدیلمدیگی بر طرزده، إلتفاتکارانه، بر قابده بعض کاغلره

صاریلی بر هدیه إحسان ایتسه؛ آلبته او بیچاره آدم، او پک بیوک ذاته قارشی، هدیه‌سنک بیگلر مثلندن فضله تشکر ایتمک ایستر. و ییک او هدیه قدر قیمتلی بولونان، او هدیه ایله گوستریلن إلتفاتنه قارشی، نه قدر تشکرده إسراف و إفراط ده ایتسه مقبولدر. و او چوق مبارک ذاتک هدیه‌سنه صاردیغی کاغدلری ده تبرک دیوب شکر گبی یه‌سه، حتی او هدیه ایچنده کی جویزلرک قابوقلرینی ده تبرک دیوب اکمک گبی یه‌سه باشنه قویسه، إسراف اولمادیغی گبی؛ رسالة النور یوزنده إرادة عاممه‌ده، عنایت خاصه إلتفاتنی توافق ظرفیله إحسان ایدیلیمش. آلبته توافقه دائر تفصیلات، تصویرات فعلی تشکراتک بر نوعیدر و سۆینجک و متتدارلغک هیجانلی بر ترشحاتیدر. اوت بویله بر ذاتک إلتفاتنی گوسترن مادّی قرق پاره إحساننه قارشی قرق ییک لیرایه دگر إلتفاتنه قارشی نه قدر تشکر آیه‌سه، إسراف دگل.

سعید النورسی



عزیز صدیق قارداشلرم!

سزک فوق العاده صداقت و علوّ همّتکزدن ترشح ایدن بر هفته اولکی مکتوبکزه قارشی حسن ظنّکزی بر درجه جرح ایدن بنم جوابمک حکمتی شودر که:

بو زمانده اويله فوق العاده حاکم جریانلر وار که، هر شیئی کندى حسابنه آلدیغی ایچون، فرضاً حقیقی بکله‌نیلن او ذات دخی بو زمانده گلسه،

حرکاتی او جریانلره قاپدیرمه مق ایچون سیاست عالمنده کی وضعیتدن فراغت ایدہ جک و هدفنی دگیشدیره جک دیه تخمین ایدیورم.

هم اوچ مسئله وار: بری حیات، بری شریعت، بری ایماندر. حقیقت نقطه سنده اُکْ مهمّی و اُکْ أعظمی، ایمان مسئله سیدر. فقط شیمدی عمومک نظرندہ و حالِ عالم إلجا آتندہ اُکْ مهمّ مسئله، حیات و شریعت گوروندیگندن او ذات شیمدی اولسه ده، اوچ مسئله یی بردن عموم روی زمینده وضعیتلرینی دگیشدیرمک نوع بشرده کی جاری اولان عادت اللّٰه موافق گلمدیگندن، هر حالده اُکْ أعظم مسئله یی اساس یاپوب، اوتہ کی مسئله لری اساس یاپیمیه جق. تا که ایمان خدمتی صفوتنی عمومک نظرندہ بوزماسین و عوامک چابوق اغفال اولونه بیلن عقللرنده، او خدمت باشقه مقصدلره آلت اولمادیغی تحقّق ایتسین.

هم ده یگرمی سنه دن بری تخریبکار اشدّ ظلم آلتندہ او درجه اخلاق بوزولمش، او درجه متانت و صداقت غائب اولمش که؛ اوندن بلکه یگرمیدن بریسنه اعتماد ایدیلمز. بو عجیب حالاته قارشی، چوق فوق العاده ثبات و متانت و حمیت اسلامیہ لازمدر؛ یوقسه عقیم قالیر، ضرر ویرر.

دیمک اُکْ خالص و اُکْ سلامتلی و اُکْ مهمّ و اُکْ موفّقیتلی خدمت، رساله النور شاکردلرینک چالیشدقلری دائره ایچنده کی قدسی خدمتدر. هر نه ایسه... شیمدیلک بو مسئله یه بو قدر یتر.

سعید النورسی



خسروڭ مکتوبندن بر فقره‌در

أوت استادم، گوزیمزله گوروپورز که: أهل طریقت، بدعه‌لره طایانه‌مامش‌لر؛ هم گیرمش‌لر، ایچندن چیقامیورلر، هم سالک‌لری اوندن بر ایکی‌یه اینمش. هم اونلر ده إعتراف ایدیورلر که: ذوقلرندن، جذب ایدیچی گوزللک‌لرندن أُلرنده چوق شیلری قالماش. جناب حَقِّ صِرْف بر إحسانی اولارق رساله‌النورڭ پارلاق، نورانی ناصیه‌سنی مشاهده ایدیورز که، إنعکاس ایدن لمعاتِ نوریه‌سی، بتون إحیاجمه کافی و وافی گلیور، هرکسی حیرته بیراقیور. هم أهل بدعه‌یی سرفرو ایتدیریور. اويله‌لرڭ لسانلرندن، ندامت و تأسفی إفاده ایدن "بیلمه‌مشز!" کلمه‌لری دوکولویور.

محیطمزده، رساله‌النوره قارشى جاذبه‌دار و چوق عالی حقیقتلرندن باشقه أهل بدعه لسانلری صوصمش؛ گویا قراڭقلی گردابلره صوقولمش‌لر، قونوشمایورلر. قونوشسه‌لر ده تأثیرلری قالماشدر. جاذبه‌دار و إعجاز کار لسانيله آنجق رساله‌النور قونوشویور. بدعه و ضلالت ظلمت‌لرینه قارشى آنجق اونڭ طلبه‌لری، قوّتِ ایمانله چلیکدن بر قلعه‌گی طورویورلر. هم اويله فوق‌العاده فتوحات یاپیور و اويله خارق‌العاده بر صورتده أمر و نهي قرآنی پی تمسک ایتدیریور که، پك چوق مشاهداتمزدن يالڭز بریسنی ييڭ قلملی قارداشمز سویله‌یورلر که... سکوت.

خسرو



کاتب عثمانک رؤیاسنه عائد بر فقره سیدر

شعبان شریفک اون بشنجی جمعه ایرتسی لیلہ برائت گيجه سی رؤیامده؛
 بیوک براق، کوچک بر دئز اولان بر گول ساحلنده اینگلیز ویاخود آلمانله، بز
 یعنی تورک حکومتی حرب ایدیورمش. حرب اثناسنده سمدان بر قرالتی ظهور
 ایتمگه باشلادی. "عجبا بو سمدان اینن نه در؟" دییه هیمزک نظر دقتنی جلب
 ایتدی. یاقینلاشدقجه بر انسان و صوگره اوزری إحراملی، یوزی بر پارچه
 أسمر، باشی بیاض و بیوک دلبند ایله صاریلی بر قادین شکلی آلارق، گولک
 اورته سنده همان اینه جگی زمان درحال اورایه بر مرمردن منبر یاپیلارق منبرک
 اوزرینه ایندی. صوگره، ذات عالیگزدن گلن عموم مکتوبلری اوقومغه باشلادی.
 هر ایکی طرفده سکونت حاصل اولدی. اوقودیغی مکتوبلری هرکس جان
 قولاغیله دیگله دی. صوگره نهایتنده "أوت، حضرت قرآن عظیم الشانک احکام
 شرعیه سنجه عمل ایدرسه گز، یاقه یی قورتاررسکز. اگر قرآن عظیم الشانک
 احکام شرعیه سنه رعایت ایتمزسه گز، هپکز محو و پریشان اولاجقسکز." دییه
 سویله دی. صوگره اویمه گلدم. بزم رأفت بگله رشدی أفندی بزم اوه گلدیلر،
 بنده گزه دیدیلر: "بو سړی سن می إفشا ایتدک؟ بو مکتوبلر منبر اوزرنده
 اوقوندی؟" بنده گز ده جوابا: "خایر قارداشلرم، بو سړی سز آگلامدیگز می؟
 بو گلن ذات، سمدان گلیور، بو مکتوبلری اورادن گتیریور. بن کیم اولویورم
 که، او حوادثی اورایه چیقارایم؟" دییه اونلره سویله دم. صوگره بونلره بر هدیه
 إکرام ایده می دییه باقدم، اویمزک دلیگنده درت طوپ حلوا گوردیم. بریسنی برینه،
 دیگرینی اوبرینه و ایکی دانه سنی ده کندم ییدم. آغزم طاتلی اولارق اویاندم.

إِنْ شَاءَ اللَّهُ لَيْلَةُ بَرَاءَتِ حَرَمَتِهِ وَ دَعَاكَ بِرَكَاتِيهِ حَقْمَزْدَه مَبَارَكْدَر، لَطْفًا
تعبیرینی بکله مکده یز.

طلبه گز کاتب عثمان



قره طاغث بر میوه سی

عزیز قارداش لرم!

بو دفعه مکتوب یرنده بو میوه یی گوند ریورز.

بر آیتک معنایِ اِشَارِیْسَنَکْ کلّیتندن بر فردی، حرّیتدن بو آنه قدردر. تشرین
ثانی اوتوزنجی گون (۱۳۵۸) ده قره طاغ باشنه چیقییوردم. "إنسانلرک، خصوصًا
مسلمانلرک بو تسلسل ایدن هلاکتلری و خسارتلری نه وقتدن باشلادی، نه
وقته قدر... "خاطره گلدی. بردن، هر مشکلمی حلّ ایدن قرآن معجز البیان،
سورة **وَالْعَصْرِ** قارشیمه چیقاردی. "باق!" دیدی: باقدم. هر عصره خطاب

ایتدیگی گبی، بو عصریمزه ده داها زیاده باقان **﴿وَالْعَصْرِ إِنَّ الْإِنْسَانَ لَفِي خُسْرٍ﴾**

آیتنده کی **﴿إِنَّ الْإِنْسَانَ لَفِي خُسْرٍ﴾** مقام جفریسی ییك اوچ یوز یگرمی درت
(۱۳۲۴) ایدوب، حرّیت اِنقلابیله باشلایان تبدل سلطنت و بالقان و ایتالیان
حربلری و برنجی حرب عمومی مغلوبیتلری و معاهده لری و شعائرِ اسلامیّه نك
صارصیلمالری و بو مملکتک زلزله لری و یانغینلری و ایکنجی حربِ عمومینک
زمین یوزنده فورطنه لری گبی، سماوی و ارضی مصیبتلرله خسارتِ انسانیه ايله
﴿إِنَّ الْإِنْسَانَ لَفِي خُسْرٍ﴾ آیتک بو عصره دخی بر حقیقتی، مادّة عین تاریخیله

گوستروب، بر لمعہٗ إعجازینی گوستریور. ﴿إِلَّا الَّذِينَ آمَنُوا وَعَمِلُوا الصَّالِحَاتِ﴾ ایسہ، مقامِ جفریسی (آخردہ کی (ت)، (ہ) صایلیر، شدہ صایلماز) یئک اوچ یوز اُللی سکز (۱۳۵۸) اولان بو سنہنک و گلہجک سنہنک عین تاریخی گوسترمکله او خسارتلردن باخصوص معنوی خسارتلردن قورتولمانک چارہٗ یگانہسی، ایمان و أعمالِ صالحہ اولدیغی گبی و مفہومِ مخالفیلہ، او خسارتک دہ سببِ یگانہسی کفر و کفران، شکرسزلک یعنی ایمانسزلق، فسق و سفاهت اولدیغی گوستردی. سورہٗ ﴿وَالْعَصْرِ﴾ کُ عظمت و قدسیتی و قیصہلغیلہ برابر غایت گنیش و اوزون حقائقک خزینہسی اولدیغی تصدیق ایدہرک، جنابِ حقہ شکر ایتدک.

أوت عالمِ اسلام، بو عصرکُ خسارتی اولان بو دہشتلی ایکنجی حربِ عمومیدن قورتولماسنک سببی، قرآندن گلن ایمان و أعمالِ صالحہ اولدیغی گبی؛ فقیرلرہ گلن آجی آجلق و قحطک سببی، اوروجکُ طاتلی آجلغنی چکمداکلی؛ و زنگینلرہ گلن خسارات و ضایعاتک سببی دہ، زکات یرندہ إحتکار ایتمہلریدر. و آناتولینک بر میدانِ حرب اولماسنک سببی؛ ﴿إِلَّا الَّذِينَ آمَنُوا﴾ کلمہٗ قدسیہسنک حقیقتنی فوق العادہ بر صورتدہ یوز یئک انسانلرک قلبلرینہ تحقیقی بر طرزدہ درس ویرن رسالہٗ النور اولدیغنی، پک چوق امارہلرہ و شاکردلرندن بیگلر اہلِ حقیقت و دقّتک قناعتلری إثبات ایدر.

أزجملہ: امارہلردن بری، رسالہٗ نورہ صیقتی ویرن ویاخود خدمتندن چکیلن پک چوق آدملرک طوقات ییمہلری گبی؛ بو سنہ، بو مملکتک اُطرافندہ عمومی بر طرزدہ رسالہٗ نورکُ انتشارینہ صیقتی ویروب شیمدیکی بر

نوع توقّف دوره سی ویرمک خطاسیله، شیمدیکى عمومى صیقتینک بر سببی اولدیغنى گوسترمسیدر.



سورۀ **وَالْعَصْرِ** طاغ میوه سی نامنده نکته سنه بر حاشیه در

﴿الصّٰلِحٰتِ﴾ ده کی (ت)، آخرده کی "تا" لر اکثریتجه وقفه راست کلمه سیله جفرجه (ه) صایلا بیلیر. بو نقطه ده (إِلَّا) برابردر، بو زمانزی گوسترر (۱۳۵۸). و تلقّظجه (ه) اوقونمدیغندن (ت) قالا بیلیر. بو نقطه دن، شدّه لر صایلمازسه و (إِلَّا) برابر دگل، ایکی یوز کسور زمانه قدر ایمان و عمل صالح ایله برابر بر طائفۀ عظیمه، خسارت عظیمه یه قارشی مجاهده یه دوام ایده جگنه إشارت ایدوب، فاتحه نك آخرنده ﴿صِرَاطَ الَّذِينَ أَنْعَمْتَ عَلَيْهِمْ﴾ گوستردیگی زمانه؛ هم ﴿لَا تَزَالُ طَائِفَةٌ مِنْ أُمَّتِي ظَاهِرِينَ عَلَى الْحَقِّ حَتَّى يَأْتِيَ اللَّهُ بِأَمْرِهِ﴾ برنجی جمله، ییک بش یوز (۱۵۰۰) مقاميله آخر زمانده بر طائفۀ مجاهده نك صوڭ زمانلرینه؛ و ایکنجی جمله ییک بشیوز آلتی (۱۵۰۶) مقاميله، غالبانه مجاهده نك تاریخنه؛ و اوچنجی جمله ییک بش یوز قرق بش (۱۵۴۵) مقاميله پک آز بر فرقله، هم فاتحه نك، هم **وَالْعَصْرِ** سورهنك ایکنجی جمله سنك غیبی إشارت لرینه إشارت ایدوب، توافق ایدر. دیمک بو حدیث شریفك اوچ جمله سندن هر بریسی، ییک بش یوز تاریخنه و مجاهده نك نه قدر دوام ایده جگنه دائر إشارت لرینه، عینا بو ﴿الَّذِينَ آمَنُوا وَعَمِلُوا الصّٰلِحٰتِ﴾ ییک بش یوز آلتمش بر (۱۵۶۱) مقاميله، هم ﴿وَتَوَاصَوْا بِالْحَقِّ وَتَوَاصَوْا بِالصَّبْرِ﴾ ییک بش

یوز آلتمش (۱۵۶۰) مقامیلہ اشتراک ایدوب، او طائفہ عظیمہ نڈ مجاہداتلری نہ قدر دوام ایدہ جگنی معنایِ اشاری و جفری ایلہ گوسترلر. و فاتحہ و حدیثک إرائہ ایتدکلری تاریخہ، مقامِ أبجدلریلہ تقرّب ایدوب، فرقلی بر درجہ توافق ایدرلر و معنالریلہ ده تام تطابق ایدہرک، پارلاق بر لمعہ إعجازِ غیبیہ یی گوستریورلر.



بردن برہ قلبہ گلن بر نکتہ إعجازیہ در

قرآنہ عائد اُک جزئی، اُک کوچک بر نکتہ ده قیمتی بیوک اولدیغندن؛ اشاراتِ قرآنیہ نڈ بو زمانمزه توافق ایدن کوچک بر شعاعی بوگون سورہ **وَالْعَصْرِ** نکتہ إعجازیہ سی مناسبتیلہ، سورہ فیل دن معنایِ اشاری طبقہ سندن توافق دستورینہ إستنادًا بر نکتہ سنی بیان ایتهمم إخطار ایدیلدی. شویله کہ:

سورہ **﴿الْمُرْكَفَ﴾** مشهور و تاریخی بر حادثہ جزئیہ یی بیان ایلہ، گلن و هر عصرده افرادی بولونان او گبی و اوکا بکزهین حادثہلری إخطار و طبقاتِ اشاریہ دن هر بر طبقہ یه گوره بر معنایِ إفاده ایتمک، عموم عصرلرده عموم نوع بشرله قونوشان قرآن معجز البیانک بلاغتنک مقتضاسی اولماسندن، بو قدسی سورہ بو عصریمزه ده باقیور، درس ویریور، فنالری طوقاتلایور. معنایِ اشاری طبقہ سنده، بو عصرک اُک بیوک حادثہ سنی خبر ویرمکله برابر؛ دنیایِ هر جهتله دینه ترجیح ایتمک و ضالالتده گیتهمه نڈ جزاسی اولارق، جفر و حسابِ أبجد ایلہ اوچ جملہ سی، عین حادثہ نڈ زماننه تطابق ایدوب اشارت ایدیور.

برنجی جملہ سی: کعبہ معظمہ یه هجوم ایدن أبرهه عسکرلرینک باشلرینه

أبائیل طیاره‌لرله سماوی بومبالر یاغدیرمسنی إفاده ایدن **﴿تَرْمِیْهِمْ بِحِجَارَةٍ﴾** جمله قدسیه‌سی، ییڭ اوچ یوز آللی طوقوز (۱۳۵۹) ایدوب، دنیایی دینه ترجیح ایدن و نوع بشری یولدن چیقاران مدنیتجیلرڭ باشلرینه سماوی بومبالر و طاشلر یاغدیرمسنه توافقله إشارت ایدیور.

ایکنجی جمله‌سی: **﴿أَمْ يَجْعَلُ كَيْدَهُمْ فِي تَضْلِيلٍ﴾** کلمه قدسیه‌سی، أسکی زمان حادثه‌سنده کی کعبه‌نڭ نورینی سوندورمک ایچون، حیللر ایلل هجوم ایدنلرڭ کندیلری یوقلق، ظلمات ضاللتده عکس العمل ایلل علیهلرینه دونمسیله طوقات ییدکلری گبی؛ بو عصرڭ عیناً حیللر ایلل، دسیسه‌لر ایلل، أدیان سماویه کعبه‌سنی، قبله گاهنی ضالالت حسابنه تخریبه چالیشان جبار، مغرور اهل ضاللتڭ تضلیل و إضلاللرینه سماوی بومبالر طوقادیلل جزالانماسنه، عین تاریخی **﴿فِي تَضْلِيلٍ﴾** کلمه قدسیه‌سی ییڭ اوچ یوز آلتمش (۱۳۶۰) مقام جفریسیله توافق ایدوب إشارت ایدیور.

اوچنجیسی: **﴿أَمْ تَرَ كَيْفَ فَعَلَ رَبُّكَ بِأَصْحَابِ الْفِيلِ﴾** جمله قدسیه‌سی رسول أكرم علیه الصلاة والسلامه خطاباً: "سنڭ مبارک وطنڭ و قبله گاهڭ اولان مکه مکرمه‌یی و کعبه معظمه‌یی خارق العاده بر صورتده دشمنلردن قورتارماسنی و او دشمنلری ناصل بر طوقات ییدکلرینی گورمیور میسڭ؟" دییه معنای صریحیله إفاده ایتدیگی گبی، بو عصره دخی خطاب ایدن او جمله قدسیه معنای إشاریسیله دیرکه: "سنڭ دینڭ و اسلامیتڭ و قرآنڭ و اهل حق و حقیقتڭ جبار دشمنلری اولان دنیاپرست و دنیانڭ منفعتی ایچون مقدساتی چیگنه‌ین او أصحاب دنیایه سنڭ ربڭ ناصل طوقاتلرله جزالرینی ویردیگنی گورمیور میسڭ؟ گور، باق!" دییه معنای إشاریسیله، بو جمله عیناً مقام

جفریسیله تام بیٹ اوچ یوز اَللی طوقوز (۱۳۵۹) تاریخیله عیناً آفاتِ سماویه نوعنده سماوی طوقاتلرله اسلامیتَه اِهانت جزاسی اولارق، دییه معنایِ اِشاری اِفاده ایدیور. یالکز "أصحاب الفیل" یرنده "أصحاب الدنیا" گلیر. "فیل" قالقار، "دنیا" گلیر. (حاشیه)

تحلیل: ﴿تَرْمِيهِمْ بِحِجَارَةٍ﴾: ایکی (ت) سکز یوز. ایکی (ر) درت یوز. ایکی (م)، بر (ب)، بر (ح)، بر (ی) یوز. تنوین وقف اولمادیغندن (ن) در، اَللی. بر (ه)، بر (ج)، بر (ألف) طوقوز. مجموعی، بیٹ اوچ یوز اَللی طوقوز (۱۳۵۹).

﴿فِي تَضْلِيلٍ﴾: (ض) سکز یوز. (ت) درت یوز. (ف) سکسان. ایکی (ی) یگرمی. ایکی (ل) آلتمش. تنوین وقفه راست گلمش، صاییلماز. یکونی، بیٹ اوچ یوز آلتمش (۱۳۶۰).

(حاشیه): بو "فیل" لفظی قالقماسنک سَری: اُسکی زمانده دهشتلی فیل محمودی عظمتنه، هییتنه طایانمش، هجوم ایتمشلر. شیمدی ایسه دنیا ثروتنه و مالنه و او ثروته هواده و دَکُزده فیلولر تشکیل ایدوب، او فیل گبی فیلولرله نوع بشری اُسارت آلتنه آلمش و آوروپا مدنیتجیلری مدنیتک محاسنیه، ایلکلریله، منفعتلریله دگل، بلکه مدنیتک سیّئاتیه و سفاهتیه و دینسزلگیله اوچ یوز اَللی میلیون مسلمانلرک هر طرفده حاکمیتلرینی اِحما ایدوب اِستبدادینه سرفرو ایتمش و بو مصیبتِ سماویه سببیت ویرمش. و دنیاپرست غدار ظالمیره، ظلملرینه جزا اولارق طوقاتلر گلمگه و فقیر و معصوملر و مظلوملر، فانی ماللرینی و حیاتلرینی آخرتلرینه چوپرمک و قیمتدار ایلهمک و دنیاده کی گناهلرینه کُفّارة الذنوب ایتمگه قدرِ اِلّهی یه فتوا ویردیلر. شیمدی یدی سنه در دنیاپرستلرک بو مصیبتده وضعیتلرینی و صفحاتلرینی و حربِ عمومی صحیفهلرینی قطعاً بیله مییورم. فقط ایکی سنه اُولکی وضعیتلری، بو سورّه قدسیهک معنایِ اِشاری طبقه سندن گلن طوقاتلر، تامی تامنه اونلرک باشلرینه اینیورلر و سورهنک بر معنایِ اِشاریسنی تام تفسیر ایدیور.

﴿أَلَمْ تَرَ كَيْفَ فَعَلَ رَبُّكَ بِأَصْحَابِ الْفِيلِ﴾ : ایکی (ر)، بر (ت) سکز

یوز. ایکی (ف)، ایکی (ك) ایکی یوز. ایکی (ل)، بر (م) یوز. بر (ع)، بر (ص) یوز آلتمش. درت (ب) اوچ (ألف)، بر (ی)، بر (ح) یگرمی طوقوز. (الفیل) یرینه گلن (الدُّنْيَا) ده کی ایکی (د)، بر (ألف) طوقوز. بر (ن) أَللی. بر (ی)، بر (ألف). بو یكون، ییك اوچ یوز أَللی طوقوز (۱۳۵۹)، اوقونمیان ألف صایلمازسه ییك اوچ یوز أَللی سکز (۱۳۵۸) ایدر. هم عربی، هم رومی تاریخله بو سماوی طوقاتلرک آیری آیری چشیدلرینک زمانلرینه توافقله پارمق باصییور. (حاشیه)



(*) عزیز، صدیق قارداشلرم!

بزم قطعياً شك و شبهه مز قالمادی که؛ بو خدمتمزک نتیجه‌سی اولان رساله نورک سربستیتنی دگل یالکز بز و بو آناتولی و عالم اسلام آقیشلا یور، تقدیر ایدیور؛ بلکه کائنات دخی ممنون اولوب جوّ سما فضای عالم آقیشلا یور که؛ اوچ درت آیده یاغموره شدّت احتیاج وارکن گلمدی. آنقره تسلیم

(حاشیه): اوت بو طوقاتدن، پرشر بشر شرکدن شکره گیرمزه و قرآنه ترضیه ویرمزه، ملائکه أَلرله ده أحجار سماویه باشلرینه یاغاجغنی بو سوره بر معنای إشاریله تهدید ایدیور.

قارداشکز

سعید النورسی

(*) : بو گلن مکتوب تکرار ایله اوقومیه لایق اولمسنه بر إشارتدر که، إختیارسز ایکی دفعه یازیلمش. بز ایلیشمک. صوگره ده عیناً گله جک.

قرارينه توافق ايدن ليله رغائبده کي أمثالسز و گورولتولی رحمتک گلمه سی و دڭزليده محکمهنک بالفعل تسليمه قرار ویرمه سی، ينه ليله معراجده عينا رساله نورک بر رحمت اولديغنه إشارة ليله رغائبه توافق ايدهرک کثرتله ملک رعدک ألقيشلاماسيله و رحمتک أميرطاغنده گلمه سی، او تسليم قرارينه توافق ایتمه سی و بر هفته صوگره ديمک دڭزليده و کیلریمزک أليه آينمه سی هنگاملرنده ينه عينا ليله معراج و ليله رغائبه توافق ايدهرک عينا اونلر گبی، بر جمعه گيجه سنده کثرتله رحمت و یاغمورک بو مملکتده گلمه سی او توافقلریله قطعی قناعت ویرر که؛ رساله نورک مصادره سنه و چپسنه زلزله لرک توافقى کره أرضجه بر اعتراض اولديغی گبی، بو أميرطاغی مملکتده درت آی ظرفنده يالکز اوچ جمعه گيجه سنده که (بری ليله رغائب بری ليله معراج، بری ده شعبان معظمک برنجی جمعه گيجه سنده) رحمتک کثرتله گلمه سی و رساله نورک ده سربستيتنک اوچ دوره سنه تام تامنه توافق ایتمه سی؛ کره هوائيهنک بر تبریکی، بر مژده سیدر و رساله نور دخی معنوی بر رحمت، بر یاغمور اولديغنه قوتلی بر إشارتدر.

و أک لطيف أماره ده شودر که؛ دون بردن بره بر سرچه قوشی پنجره يه گلدی، پنجره يه ووردی. بز اوچورمق ایچون إشارت ایتدک، گیتمه دی. مجبور اولدق، دیدم: "پنجره يی آچ، او نه دییه جک؟" گیردی طوردی، تا بو صباح قدر. صوگره او اوطه يی اوڭا بیراقدق، یاتاق اوطه مه گلدم. بو صباح چیقدم، قیوی آچدم؛ یاریم دقیقه ده دوندم. باقدم "قدّوس قدّوس" ذکرینی یاپان بر قوش اوطه مده گوردیم. گوله رک دیدم: "بو مسافر نه ایچون گلدی؟" تام بر ساعت بڭا باقدی، اوچمادی، اورکمه دی. بن ده اوقویوردیم، بر ساعت بڭا باقدی. اکمک بیراقدیم، ییمه دی. ينه قیوی آچدم چیقدم، یاریم دقیقه ده گلدم؛ او مسافر ده غائب اولدی.

صوگره بڭا خدمت ایدن چوجق گلدی، دیدی که: "بن بو گیجه گوردم که، مرحوم حافظ علی نڭ (رح) قارداشی یانمزه گلمش. " بن ده دیدم: "حافظ علی و خسرو گی بر قارداشمز بورایه گله جڭ. " عین گونده، ایکی ساعت صوگره چوجق گلدی دیدی: "حافظ مصطفی گلدی. " هم رساله نورڭ سربستیتنڭ مژده سنی، هم محکمه ده کی کتابلرینی ده قسمًا گتیردی؛ هم سرچه قوشنڭ و بنم رؤیامڭ، هم قدّوس قوشنڭ تعبیرینی إثبات ایتدی. (که، تصادف اولمادیغنی گوستردی.) عجباً أمثالسز بر طرزده هم سرچه قوشی عجیب بر صورتده، هم قدّوس قوشی غریب بر صورتده گلوب باقماسی، صوگره غائب اولماسی و معصوم چوجغڭ رؤیاسی تام تامنه چیقماسی، هم رساله نورڭ حافظ علی گی بر ذاتڭ ألیله بورایه کلمه سنڭ عین زمانه توافقی هیچ تصادف اولایلیر می؟ هیچ بر احتمالی وار می که، بر بشارت غیبیه اولماسین؟ (حاشیه)

أوت بو مسئله، کوچک بر مسئله دگل؛ کائنات و حیوانات ایله دخی علاقه دارد. بن رساله نورڭ بر شاکردی اولمق إعتباریله، اونڭ سربستیتندن کندی حصّه مه دوشن بو کار و نتیجه یی، بیڭلر آلتون لیرا قدر قزانجم وار قناعت ایدیورم. باشقه یوز بیڭلر رساله نور شاکردلری و تقویّه ایمانه محتاج اهل ایمانڭ إستفاده لری بوڭا قیاس ایدیلسین.

(حاشیه): هم بو قوشلرڭ رساله نورله علاقه دارلقلرینی تأیید ایدن چوق أماره لر وار. أز جمله، او قوشلرڭ علاقه دارلغنی گوسترن مکتوب میلاسه گیتیدیگی عین وقتده غریب بر طرزده قدّوس قوشی او مکتوبڭ مثالنی وضعیتیه تأیید ایتیدیگی گی؛ عین مکتوب اینه بولیده گیجه لین اوقونورکن بیوک بر گیجه قوشی خارقه بر طرزده پنجره یه گلوب قانادیله ووروب طوروب دیڭله می؛ عین مکتوب صاوده اوقونورکن بر دفعه ایکی چکرگه اوستنه گلوب طوروب نتیجه یه قدر طورمالری؛ بر دفعه ده بلبل و سرچه قوشلری عین مکتوبڭ اوقونماسنده پروانه گی اوجوب علاقه دارلق گوستروب علاقه دارلغنی گوسترمسی گی چوق أماره لر، بو کرامت نوریه یی تأیید ایدیور.

أوت دینک و شریعتک و قرآنک یوزدن زیاده طلسملرینی، معمارینی حل و کشف ایدن و اُکْ معنّد دینسزلی صوصدیروب إلزام ایدن و معراج و حشر جسمانی گبی عقلدن چوق اوزاق ظن ایدیلن قرآن حقیقتلرینی اُکْ متمرّد و اُکْ معنّد فیلسوفلره و زندیقلره قارشى گونش گبی إثبات ایدن و اونلرک بر قسمنی ایمانه گتیرن رسالۀ نور أجزالری، ألبته کُرۀ ارض و کُرۀ هوائیهی کندی ایله علاقه دار ایدر و بو عصری و إستقبالی کندی ایله مشغول ایده جک بر حقیقت قرآنیهدر و اهل ایمان أَلنده بر أَلماس قلنجدر.

﴿الْبَاقِي هُوَ الْبَاقِي﴾

أمیرطاغنده قارداشکز
سعید النورسی



کوچک خسرو فیضی نك بر إستخراجیدر

(اوتوز اوچنجی آیتدن حافظ علی نك إستخراجنك بر ذیلی و لاحقه سیدر.)

﴿بِسْمِ اللَّهِ الرَّحْمَنِ الرَّحِيمِ﴾

سورۀ زمرده ﴿أَفَمَنْ شَرَحَ اللَّهُ صَدْرَهُ لِلْإِسْلَامِ فَهُوَ عَلَى نُورٍ مِنْ رَبِّهِ﴾ آیت عظیمه نك معنای صریحندن باشقه بر معنای إشاری طبقه سنك کَلّیتنده داخل بر فردی رسالۀ نور و ترجمانی اولدیغنه قوّتلی بر دلیل بولدم.

﴿أَفَمَنْ شَرَحَ اللَّهُ صَدْرَهُ لِلْإِسْلَامِ فَهُوَ﴾ جمله سی، حساب جفری و أجدی و

ریاضی ایله ییڭ اوچ یوز یگرمی طوقوز (۱۳۲۹) ویا سکز (۱۳۲۸) ایدر. دیمک **﴿مَنْ﴾** کلّیتده و **﴿فَهُوَ﴾** إشارتنده داخل و مدارِ نظر بر فردی، إنشراح صدر نوريله باشقه بر حالته گیروب، اُسکی صیقتیدن قورتولوب، نورانی بر مسلگه گیرن بر شخص، اُسکی و یڭی حربِ عمومینڭ گلمگه حاضرلانمه‌لری اولان او دهشتلی تاریخه و او فردڭ وضعیتنه رمزًا باقار.

﴿فَهُوَ عَلَى نُورٍ مِنْ رَبِّهِ﴾ ده کی **﴿نُورٍ مِنْ رَبِّهِ﴾** کلمه‌سی، رسالۀ نورِ اِسمنه و معناسنه هم جفری، هم صورتی، هم معناسی توافق ایتدیگی گی؛ **﴿أَفَمَنْ شَرَحَ اللَّهُ صَدْرَهُ لِلْإِسْلَامِ فَهُوَ﴾** جمله‌سنڭ ده مقامِ جفریسی گوستردیگی تاریخده رسالۀ نور ترجمانی اولان استادیمڭ (حاشیه) (تحقیقاتله) عینًا وضعیتنه توافق ایدیور.

چونکه او زمانده حربِ عمومینڭ مبدألرنده، استادم اُسکی عادتنی و سائر علومِ فلسفه‌یی و علومِ آلیه و عالیه‌یی بیراقوب، تام بر إنشراح صدرله رسالۀ نورڭ فاتحه‌سی و برنجی مرتبه‌سی اولان إشارات الإعجاز تفسیرینه باشلایور، بتون همتی، أفکارینی قرآنه صرف ایتمگه باشلادیغنه توافقی قوی بر اُماره‌در که؛ بو عصرده او کلّی معنایِ إشاریده مدارِ نظر بر فردی، رسالۀ نورڭ ترجمانی و شاکردلرینڭ شخصِ معنویسنی تمثیل ایدن ممثیلدر.

أوت مادام قرآنِ معجز البیان هر عصرده هر فرده خطاب ایدر و بر علم محیط و بر إرادة شامله ایله هر شیئه باقه‌بیلیر؛ و مادام علماءِ اسلامڭ إتفاقیله،

(حاشیه): بو شرح صدرله مناسبتدار بر توافقدر. استادمدن آڭلادم؛ یگرمی بش سنه‌در دائما و اُڭ مهمّ دعاسی **﴿اللَّهُمَّ اشْرَحْ صَدْرِي لِلْإِيمَانِ وَالْإِسْلَامِ﴾** مناجاتی اولمش.

آیتلرک معنای صریحندن باشقه اشاری و رمزی و ضمنی متعدّد طبقه‌لرده معنالری وارد.

و مادام ﴿يَا أَيُّهَا الَّذِينَ آمَنُوا﴾ گبی خطابلرده هر عصر گبی، بو عصرده کی اهل ایمان، عصر سعادتده کی مؤمنلر گبی داخلدر.

و مادام اسلامیت نقطه‌سنده بو عصر، غایت اُهمیتلی و دهشتلیدر. و قرآن و حدیث اخبار غیبی ایله، اهل ایمانی اونک فتنه‌سندن صاقینمق ایچون شدتلی خبر ویرمش.

و مادام حساب جفری و أبجدی و ریاضی، اُسکیدن بری صاغلام بر دستوردرد و قوتلی بر اُماره اولاییلیر.

و مادام رسالۀ نور و ترجمانی و شاکردلری، ایمان و قرآن خدمتنده پارلاق و تأثیرلی وظیفه‌لری غایت اُهمیت کسب ایتمشدر.

و مادام بو بیوک آیت، حساب جفرله بو عصرده و ایکی حرب عمومی‌یه باقار. اُسکی حربک پاطلاماسنه و رسالۀ نورک ظهورینه توافق ایتدیگنی، معنّا ده گوسترر. البته مذکور حقیقتلره و قوتلی قرینه‌لره بناءً بلا تردّد حکم ایدرز که: رسالۀ نورک شخص معنویسی و ترجمانی، بو آیت عظیمه‌نک معنای اشاری طبقه‌سنک کلّیتنده داخل و مدار نظر بر فردیدر. و بو آیت اوکّا اشارت ایدر. و معنای رمزیه اوندن خبر ویرر. و اخبار غیب نوعندن بر لمعه إعجازیه‌یی گوسترر، دینیه‌بیلیر.

تحلیل: بر (ش) ایکی (ر) یدی یوز. (ف م ن ل) ایکی یوز. (ص د ه ا) یوز. (س م) یوز. اسم جلال (الله) آلتمش یدی. ایکی (ل) آلتمش. ﴿فَهُوَ﴾

طقسان بر. ﴿لِلْإِسْلَامِ﴾ ده کی ایکی ویا اوچ (ألف)، ایکی ویا اوچ. (ح) سکز. ﴿نُورٍ مِنْ رَبِّهِ﴾، "رساله نور" هر ایکیسند (نور) وار. "رساله" ده (ر)، ﴿رَبِّهِ﴾ ده کی (ر) یه مقابلدر. اگر ﴿نُورٍ﴾ ده کی تنوین صاییلسه، ﴿النُّورُ﴾ ده دخی شدّه لی (ن) صاییلیر، ینه إتحاد ایدرلر. (نور) دن باشقه (مِنْ به) طقسان یدی ایدهرک، رساله نورده قالان (ه ل س) ایگی (ألف) دخی طقسان یدی ایدهرک، تام توافق ایدر. تور کجه تلفظده رساله نور همزه ایله اوقونماسی ضرر ویرمز.

سوره مائده‌نک اون بشنجی آیتی ﴿قَدْ جَاءَكُمْ مِنَ اللَّهِ نُورٌ وَكِتَابٌ مُبِينٌ﴾

يَهْدِي بِهِ اللَّهُ

سوره نسانک آخرنده ﴿يَا أَيُّهَا النَّاسُ قَدْ جَاءَكُمْ بُرْهَانٌ مِنْ رَبِّكُمْ وَأَنْزَلْنَا

إِلَيْكُمْ نُورًا مُبِينًا﴾ آیتی گبی، رساله نوره معنا و جفر جهتیهله، معنایِ اشاری افرادندن اولدیغنه قوتلی بر قرینه بولدم.

ایکنجی آیت اولان سوره نسانک آیتی، برنجی شعاع اولان اشارات قرآنیه‌ده، استادم اشارتنی بیان ایتمش. برنجی آیت اولان سوره مائده‌نک اون بشنجی آیتی هم بونک اشارتنی تأیید ایدیور، هم ده ﴿أَفَمَنْ شَرَحَ اللَّهُ﴾ آیتنک اشارتنی تصدیق ایدیور.

أوت بو عصرده معنایِ اشاری طبقه‌سندن تام شو آیتنک قدسی مفهومه بر فرد، رساله نور اولدیغنه کیم إنصاف ایله باقسه تصدیق ایده‌جک.

رساله نور بر فردی اولدیغنه معنوی مناسبت قویدر. مادام بو آیتنک مقام

جفریسی بیٹ اوج یوز آلتمش آلتیدر (۱۳۶۶). اگر مدّہلر، اوقونمیان همزہلر صایلمازسه آلتمش ایکیدر (۱۳۶۲). و مادام رسالہ نور، قرآن مبین نورینی و هدایتی نشر ایدن بر کتاب مبیندر. و مادام ظاهرًا اوندن داها ایلری، او وظیفه‌ی آغیر شرائط آلتنده یاپانلری گورمیورز. و مادام آیتلر، سائر کلاملر گبی جزئی بر معنایه منحصر اولاماز. و مادام دلالتِ ضمنی و إشاری ایله قاعدهٔ مفهوم کلامده داخل اولویور. و مادام نجم الدّین کبرا و محی الدین عرب گبی چوق اهل ولایت، معنای ظاهریدن باشقه باطنی و إشاری معنالر ایله اکثر آیاتی تفسیر ایتمشلر؛ حتّی تفسیرلرنده موسی (عس) و فرعوندن مراد، قلب و نفسدر دیدکلری حالده اُمت اونلره ایلشیمه‌مش؛ بیوک علمادن چوقلری اونلری تصدیق ایتمشلر. ألبته آیتک دلالتِ ضمنی ایله رسالہ نوره قوّتلی قرینه‌لر ایله إشارتی قطعیدر، شبهه ایدیلیمه‌مک گرکدر.

تحلیل: **﴿قَدْ جَاءَكُمْ﴾** یوز آلتمش طوقوز (۱۶۹). **﴿مِنَ اللَّهِ﴾** یوز ألی یدی (۱۵۷). **﴿نُور﴾** تنوین ایله برابر اوچیوز ألی (۳۰۶). و **﴿وَكِتَابٌ مُّبِينٌ﴾** ألی یوز اوتوز بر (۶۳۱). **﴿يَهْدِي بِهِ اللَّهُ﴾** یوز اوج (۱۰۳). یکونی، بیٹ اوچیوز آلتمش ألی (۱۳۶۶). اگر مدّہلر، اوقونمیان همزہلر صایلمازسه، بو سنه کی محرّم تاریخنه؛ یعنی بیٹ اوچیوز آلتمش ایکی‌یه تمام توافق ایدر. اگر **﴿مُبِينٌ﴾** ده کی تنوینده وقف ایدیلسه، بیٹ اوج یوز اون آلتیدر (۱۳۱۶) که؛ هم رسالہ نورک مقدماتنه، هم تنوین ایله تکمّله و برنجی شعاعده بیان ایدیلدیگی گبی، چوق آیاتک اُهمّیتله گوستردکلری عین مشهور تاریخنه توافق ایدر.



﴿بِاسْمِهِ سُبْحَانَهُ﴾

بن، سنڭ إجتهداڭده خطا وار دینلره و إثبات ایدنلره تشکر ایدوب روح و جانله متتدارم. فقط شیمدی‌یه قدر او إجتهدیمی تماميله قناعتله تام تصدیق ایدنلر، بیڭلر اهل ایمان و اونلردن چوقلری اهل علم تصدیق ایتدکلری و بن ده دهشتلی بر زمانده قدسی بر تسلی‌یه محتاج اولدیغم بر هنگامده، صرف اهل ایمانڭ ایمانی رساله نور ايله محافظه نیّت خالصه سیله و نجم الدین کبرا، محی الدین عرب گبی بیڭلر اهل إشارات گبی جفری و ریاضی حساییله بیان ایدیلن بر مژده إشاریه قرآنیه‌ی کندینه گلن بر قناعت تامه ايله، هم محرم طوتولق شرطیله بیان ایتدیگم و او إجتهدامده اڭ معند دینسزله ده إثبات ایتمگه حاضرم، دیدیگم حالده بنی غیبت ایتمک، دنیاده بوڭا هانگی مذهبله فتوا و یريله بیلیر، هانگی فتوایی بولویورلر؟ بن هر شیدن وازگچهرم، فقط عدالت إلهیه‌نڭ حضورنده بو دهشتلی غیبت قارشی حقمی حلال ایتمه! تیره‌سین!.. بتون ساداتڭ جدی اولان فخر عالم علیه الصلاة والسلامك سنت سنیه سنی محافظه ایچون حیاتی و هر شیئی فدا ایدن بر مظلومك شکواسی، ألبته جوابسز قالمیه‌جق!..

إلا بر شرط ايله حلال ایده‌بیلیرم که: بو رمضان شریفده بڭا و خالص قارداشلریمه ویردیگی أندیشه و تلاشی، حق پرستك طماريله، بیوکلره لایق علوّ جنابله، أنانیت تعصّبکارانه سنی حقیقته و إنصافه فدا ایدوب تعمیره چالیشماسیدر؛ مشفق و منصف بر خواجه طوريله، قصوریمز وارسه بزه لطفکارانه إخطار و ایقاظدر. جناب حق ستار العیوبدر، حسنات سیئاته مقابل گلسه عفو ایدر. ایمان خدمتنده یوز بیڭلر إنسانك ایمانی تحقیقی یایمق حسنه سنه قارشی، بنم گبی بر بیچاره‌نڭ حسن نیّته، قوتلی أماره‌لرله عنایت إلهیه‌دن تصوّر

ایتدیگی بر مژدہ قرآنیہ نك تفہمندہ بر یاكلیش، بلکہ یوز یاكلیش وارسہ دہ، او حسنا تہ قارشى گلہ مز، سترِ عیوب پردہ سنی ییرتاماز! ہر نہ ایسہ۔

بو مسئلہ یالکز شخصمہ تعلق ایتسہ ایدی، بن جدّا نفس امارہ می تام قیرمق ایچون اوکّا منتدار اولوردم۔ مسلگمز، بو زماندہ حقّہ خدمت، بتون بتون ترك اُنانیتلہ اولاییلہ جگنی قطعی قناعتمز اولدیغی گبی؛ یگر می سنہدر نفس امارہم ایستر ایستہمز او مسلگہ اطاعتہ مجبور اولمش۔ رسالہ نور و مقدّماتلری، بوکّا بر حجت قاطعہدر۔ فقط غرض و عناد و بر نوع تعصّب مسلکیہی إحساس ایدن و اُسرار مستورہی إشاعہ صورتندہ گلن اعتراض و عییلرہ قارشى اُسکی سعید (رض) لسانیلہ دیرم: ایشته میدان! اُکّ متعصّب علمادن و اُکّ بیوک ولیدن طوت، تا اُکّ دینسز فیلسوفلرہ و مدقّق حکمالرہ، رسالہ نورده کی دعوالری اثبات ایتمگہ حاضرم و ہم دہ اثبات ایتشم کہ، بنم محویہ و اِعدامہ متمادیا چالیشان زندیق فیلسوفلر و ملحدلر، او دعوالری جرح ایدہ مییورلر و ایدہ مہ مشلر!

ہم بتون حیاتمده دلیلسز دعوالری ذکر ایتمہدیگم، سزک گبی اُسکی و یکی آرقداشلرم بیلیورلر۔ باخصوص قرآن معجز البیاندن آلدیغم بر قوّتلہ، آوروپا فیلسوفلرینہ رسالہ نور میدان اوقور۔ رسالہ نور بو زماندہ مدار نظر بر حادثہ قرآنیہ اولدیغندن، بر ایکی اشارت دگل، بلکہ بنملہ برابر رسالہ نور شاکردلری طرفندن استخراج ایدیلن بش رسالہدہ یازیلان اشارتلر، بر جہتدہ بیگہ یاقلاشییور۔ بیك اینجہ جک صاچلر دخی طویلانسه قوّتلی بر ایپ اولدیغی گبی، صراحتہ یاقین بر دلالت اولویور۔ وحدت مسئلہ جہتیلہ او اشارتلر بربرینہ قوّت ویرر۔ بعض اشاراتی ضعیف گورمکلہ اونى انکار ایتمک، انصافہ، حق پرستلگہ موافق اولاماز۔ انکار ایدن معذور اولاماز۔ خصوصًا لزومسز و

ضررلی و مفرطانه بر غیبت اولسه، بو زمانده اهل علم اورته سنده اهل حقیقتی آغلاتدیره جق بر حادثه اَلیمه در.



﴿بَاسْمِهِ سُبْحَانَهُ﴾

قارداشلرم!

قرآنک بر تک آیتک بر تک إشارتی إخبار غیب نوعندن بر لمعه إعجازیه یی توافق صورتیله گوستردیگنی معنوی بر إخطار ایله گوردیم. ﴿أَيُّحِبُّ أَحَدُكُمْ أَنْ يَأْكُلَ لَحْمَ أَخِيهِ مَيْتًا﴾ شو آیت کریمه نك مقام جفریسی (شده و تنوین صایلمازسه) ییك اوچ یوز اَللی بر در، ﴿مَيْتًا﴾ اصلی ﴿مَيْتًا﴾ اولماسندن ییك اوچ یوز آلتمش بر (۱۳۶۱) ایدهرک؛ بو تاریخده، امور عظیمه دن بر دهشتلی غیبتی، شو آیتک معنای إشاری کلّیتنده داخل ایدیور. و امور عظیمه دن بویله بر عجیب غیبت عین تاریخده، عین سنه ده وقوعه گلدی. شویله که:

اون سکز سنه (شیمدی یگرمیدن گچدی) مدّنده سنّت سنیّه یی محافظه ایچون باشنه شایقه قومادیغندن و اون سکز سنه در حیس منفرد حکمنده إختلاطن منع و یالکز بر اوطه ده حیاتی گچیرمگه مجبور ایدیلن و خصوصی عبادتگاهنده اذان محمدی (ع صم) اوقویوب ﴿اللَّهُ أَكْبَرُ﴾ دیدیگندن و ﴿لَا إِلَهَ إِلَّا اللَّهُ﴾ حقیقتی گونش گی گوستردیگندن، یوز

آرقداشیلہ تحت توقیفہ آلینان بر آدم، یوزر امارہ و قرینہ لرہ إستناداً عنایتِ إلهیہ دن گلدیگندن قطعی بر قناعتی ایله اشارات قرآنیہ دن بر مژدہ پی ہم کندینہ، ہم مصیبتزده آرقداشلرینہ تسلّی نیتیلہ بیان ایتدیگی ایچون غیبت و فنا تعبیراتلہ تشہیر ایتمک و اونک درس لریلہ ایمانلرینی قورتاران معصوم شاکردلرینی اوندن تنفیر ایدوب شبہ لر ویرمک؛ گویا اورتلقدہ مدارِ انکار بر شی یوق و هیچ بر منکراتی و جنایتی گورمیورگی، یالکز او بیچارہ نک موہوم بر خطاسنی، سکز سنہ دہ سکسان مدقفلرک نظرندہ صاقلانان و سطحی و عنادی نظریہ گورہ بر اجتہادی یا کثیشنی گورویور ظنیلہ ذمّ ایتمک؛ ألبتہ بو عصرده، بو مملکتده قرآن معجز البیانک قصداً اشارتنہ مدار اولاییلیر عظیم بر حادثہ در. بنجہ، قرآنک ناصلکہ ہر سورہ و بعضاً بر آیت و بعضاً بر کلمہ بر معجزہ اولور؛ اویلہ دہ بو آیتک تک بر اشارتی، إخبار غیب نوعندن بر لمعہ إعجازیہ در.

بو آیتک بو اشارتی، بو عصرده، رسالہ نور شاکردلرینک حقّندہ کی غیبتہ باقدیغنه اوچ امارہ وار:

برنجیسی: برنجی شعاع اولان اشارات قرآنیہ رسالہ سندنہ، رسالہ نورہ و ترجماننہ اشارت ایدن بشنجی آیت اولان ﴿أَوْمَنْ كَانَ مِيتًا فَأَحْيَيْنَاهُ وَجَعَلْنَا لَهُ نُورًا يَمْشِي بِهِ فِي النَّاسِ﴾ غایت قوتلی قرینہ لرلہ ﴿مِيتًا﴾ کلمہ قدسیہ سی جفر و أبجد حسابیلہ و اوچ جہت معناسیلہ سعید النورسی یہ توافق ایتمہ سیدر.

ایکنجی امارہ: ﴿أَيُّحِبُّ أَحَدُكُمْ﴾ إلی آخر... آیتک مقام جفریسی و ریاضیسی بیٹک اوچ یوز آلتمش بر (۱۳۶۱) ایتمہ سیدر؛ عین تاریخدہ، او عجیب حادثہ اولدی.

اوچنجی أماره: او محترم إختيار ذاتی اونوقتق، بلکه شخصمه قارشی تزییفاتنی إختيارلغنه و چوق جهتلرله مابینمزده کی اخوته حرمةً حلال ایتمگه قرار ویردیگم و بز خدمتکار اولدیغمز قرآنه حواله ایدوب بیراقدیغم هنگامده، بردن إختيارم خارجنده، بش وجهله ذمی ذمّ ایدن، معجزانه غیبتدن آلتی جهتلله زجر ایدن ﴿أَيُّحِبُّ أَحَدَكُمْ أَنْ يَأْكُلَ لَحْمَ أَخِيهِ مَيْتًا﴾ آیتی قارشیمده کندینی گوستروب تمثّل ایلدی. معنّا، "بکا باق!" دیدی. بن ده باقدم، بردن تسبیحات ایچنده گوردم که: ییك اوچوز اُللی بردن، تا ییك اوچوز آلتمش بر تاریخی گوستردی. حاملزه باقدم؛ پرده آلتنده اُللی بردن، تا آلتمش بره قدر رسالۀ نور مدد بکلهدیگی إستانبول آفاقنده، بر نوع تعرّض بولونمش و آلتمش برده بردن پاطلاماسیدر.

تحلیل: (ت) درت یوز، (خ) آلتی یوز: ییك. (م م ی ی) یوز. (ل ل ک ک) یوز. اوچنجی (ی ن م) یوز. (ح ح ب د) اوتوز. دردنجی (ی) اون. بش ألف، بر (ه) ایلله برابر اون. آخرده کی تنوین وقفًا ألف اولدیغی ایچون یکونی ییك اوچ یوز اُللی بر. (حاشیه) ﴿مَيْتًا﴾ اصلی یاءِ مشدّده اولدیغندن ییك اوچ یوز آلتمش بر ایدر.

سعید النورسی



(حاشیه): بو آیت بزى شدّتله غیبتدن منع ایتدیگندن، بو حادثه‌یی اونوتمالی‌یز، مدار غیبت ایتمه‌ملی‌یز. إِنْ شَاءَ اللَّهُ، داها تکرّر ایتیمیه‌جک.

﴿بِاسْمِهِ • وَإِنْ مِنْ شَيْءٍ إِلَّا يُسَبِّحُ بِحَمْدِهِ﴾

بو عاجز قارداشکز، هم او اعتراض ایدن او اُسکی دوست ذاته هم اهلِ دقّه و سزله بیان ایدیورم که:

قرآن معجز البیانک فیضیله یگی سعید (رض) حقائقِ ایمانیه دائر او درجه منطقجه و حقیقتجه برهانلر ذکر ایدیور که؛ دگل مسلمان علماسی، بلکه اُکْ معنّد آوروپا فیلسوفلرینی ده تسلیمه مجبور ایدیور و ایتمکده در. اَمّا رسالهُ نورکِ قیمت و اُهمّیتته اِشاری و رمزی بر طرزده حضرتِ علی (رض) و غوثِ اعظمک (رض) اِخباراتی نوعدن، قرآنِ معجز البیان دخی بو زمانده بر معجزه معنویه سی اولان رسالهُ نوره نظرِ دقّتی جلب ایتمه سنه معنایِ اِشاری طبقه سندن رموز و ایمالری، اِعجازینک شأندندر و او لسانِ غیبک بلاغتِ معجزه کارانه سنک مقتضاسیدر.

أوت اُسکیشهر چپسخانه سنده دهشتلی بر زمانده و قدسی بر تسلّی به پک چوق محتاج اولدیغمز هنگامده، معنوی بر اِخطارله: "رسالهُ نورکِ مقبولیتته اُسکی اولیالردن شاهد گتیریورسک. حالبوکه ﴿وَلَا رَطْبٌ وَلَا يَابِسٌ إِلَّا فِي

كِتَابٍ مُّبِينٍ﴾ سَرّیله اُکْ زیاده بو مسئله ده سوز صاحبی قرآندر. عجباً رسالهُ نوری قرآن قبول ایدرمی؟ اوکّا نه نظرله باقیور؟" دینیلدی. او عجیب سؤال قارشیسنده بولوندم. بن ده قرآندن اِستمداد ایلدم. بردن اوتوز اوچ آیتک معنایِ صریحنک تفرّعاتی نوعدنه کی طبقاتدن معنایِ اِشاری طبقه سندن و او معنایِ اِشاری کلّیتته داخل بر فردی رسالهُ نور اولدیغنی و دخولنه و مدارِ اِمتیازینه برر قوّتلی قرینه بولونماسنی بر ساعت ظرفنده حسّ ایتدم. و بر قسمی بر درجه

ایضاحلی و بر قسمنی مجملاً گوردم. قناعتمه هیچ بر شک و شبهه و وهم و وسوسه قالمادی. و بن ده اهل ایمانک ایمانی رساله نور ایله تقویه ایتمک نیتیه او قطعی قناعتمی یازدم و خاص قارداشلریمه محرم طوتولمق شرطیه ویردم.

و او رساله‌ده بز دیمیورز که؛ آیتک معنای صریحی بودر، تا خواجه‌لر **﴿فیه نظر﴾** دیسین. هم دیمه‌مشز که، معنای اشارینک کلیتی بودر. بلکه دییورز که:

معنای صریحنک تحتندہ متعدد طبقه‌لر وار. بر طبقه‌سی ده معنای اشاری و رمزیدر و او معنای اشاری ده بر کلیدر. هر عصرده جزئیاتلری وار. و رساله نور دخی بو عصرده او معنای اشاری طبقه‌سنک کلیتندہ بر فرددر و او فردک قصداً بر مدار نظر اولدیغنه و اهمیتلی بر وظیفه گوره‌جگنه، اُسکیدن بری علما بیننده بر دستور جفری و ریاضی ایله قرینه‌لر، بلکه حجتلر گوستریلمش ایکن، قرآنک آیتنه ویا صراحتنه دگل اینجیتمک، بلکه إعجاز و بلاغتنه خدمت ایدیور. بو نوع اشارات غیبیه اعتراض ایدیلمز. اهل حقیقتک نهایتسز اشارات قرآنیهدن حد و حسابہ گلمه‌ین استخراجلرینی إنکار ایده‌مه‌ین، بونی ده إنکار ایتمه‌ملی و ایده‌مز.

اما بنم گبی اهمیتسز بر آدمک آلدنه بویله اهمیتلی بر اثرک ظهور ایتمه‌سنی إستغراب و إستبعاد ایدوب بویله اعتراض ایدن ذات، اگر بغدادی دانه‌سی قدر چام چکر دگندن طاغ گبی چام آعاجنی خلق ایلهمک عظمت و قدرت إلهیه دلیل اولدیغنی دوشونسه؛ آلبته بزم گبی عجز مطلق و فقر مطلقده، بویله احتیاج شدید زماننده بویله بر اثرک ظهوری، وسعت رحمت إلهیه دلیلدن دیگه مجبور اولور.

بن سزی و معترضلری رسالہ نورک شرف و حیثیتیلہ تأمین ایدیورم که: بو إشارتلر و أولیانک ایمالی خبرلری، رمزلری، بنی دائما شکره و حمده و قصورلرمدن إستغفاره سؤق ایتمش. هیچ بر وقتده هیچ بر دقیقه نفس اماره مه مدار فخر و غرور اولاجق بر أنانیت و بئلک ویرمدیگنی، سزه بو یگرمی سنه حیاتمک گوزیکز اوکنده ترشحاتیلہ إثبات ایدیورم.

أوت بو حقیقتله برابر إنسان قصوردن، نسیاندن، خالی دگل. بنم بیلمدیگم چوق قصورلرم وار. بلکه ده فکرم قاریشمش، رساله لرده بعض خطالر اولمش. فقط قرآنک حروفات قدسیه سنک یرینه بشرک ترجمه سنی إقامه پرده سی آلتنده، نقصان حروفلره یکی خط آلتنده تحریفکارانه اهل ضلالتک تأویلات فاسده لری آیاتک صراحتنی اینجیتمه لرینه باقمیور گی؛ بیچاره مظلوم بر آدمک قارداش لرینک ایمانی قوتلندیرمک ایچون بر نکتہ إعجازیه یی بیان ایتدیگی ایچون خدمت ایمانیه سنه فتور ویره جک درجه ده إعراض، ألبته دگل اهل حقیقت ذاتلر، بلکه ذره مقدار إنصافی بولونان إعراض ایده مز.

بونی ده علاوه بیان ایدیورم:

بو زمانده غایت قوتلی و حقیقتلی میلیونلره فداکارلری بولونان مشربلر، مسلک لری، طریقتلر؛ بو دهشتلی ضلالت هجومه قارشى ظاهرًا مغلوبیته دوشدکلری حالده؛ بنم گی یاریم اُمی و کیمسه سز و متمادیًا ترصد آلتنده، قره قول قارشیسنده و مدهش، متعدد جهتلره علیه مه پروپاغنده لر و هرکسی بدن تنفیر ایتمک وضعیتنده بولونان بر آدم، او مسلکلردن داها ایلری، داها قوتلی طایانان رسالہ نوره صاحب دگلدر. و او اثر اونک هنری اولاماز، اونکله إفتخار ایده مز. بلکه طوغریدن طوغری یه قرآن حکیمک بو زمانده بر نوع معجزه

معنویه‌سی اولارق رحمتِ إلهیه طرفندن إحسان ایديلمشدِر. او آدم، بیگلر آرقداشیله برابر او هدیة قرآنییه آل آتمشَلر. هر ناصلسه برنجی ترجمانلق وظیفه‌سی اوڭا دو شمش. اونڭ فکری و علمی و ذکاسنڭ اثری اولمادیغنه دلیل، رسالۀ نوره اویله پارچه‌لر وار که؛ بعضسی آلتی ساعتده، بعض ایکی ساعتده، بعض بر ساعتده، بعض اون دقیقه‌ده یازیلان رساله‌لر وار. بن یمین ایله تأمین ایدیورم که، اُسکی سعیدڭ (رض) (حاشیه‌جک) قوّه حافظه‌سی ده برابر اولمق شرطیله او اون دقیقه ایشی اون ساعتده فکرم ایله یاپامیورم. او بر ساعتک رساله‌یی، ایکی گون إستعدادمله، ذهنمله یاپامیورم. و او بر گونده آلتی ساعتک رساله اولان اوتوزنجی سوزی نه بن و نه ده اڭ مدقق دیندار فیلسوفلر آلتی گونده او تحقیقاتی یاپامازلر و هکذا...

دیمک بز مفلس اولدیغمز حالده، غایت زنگین بر مجوهرات دگاننڭ دلّالی و بر خدمتجیسی اولمشز. جناب حق فضل و کرمیله، شو خدمتده خالصانه، مخلصانه بزى و عموم رسالۀ نور طلبه‌لرینی دائم و موقّق ایله‌سین، آمین، بِحُرمَةِ سیّد المرسلین...

سعید النورسی



(حاشیه‌جک): بعض مستنسخلر بو بیچاره سعید حقّنده (رض) کلمه‌سنی بر دعا نیّتیله یازمشلر. بن بوزمق ایستدم، خاطره‌گلدی که: الله راضی اولسون معناسنده بر دعادر، ایلیشمه. بن ده بوزمادم.

﴿بِاسْمِهِ سُبْحَانَهُ ۖ وَإِنْ مِنْ شَيْءٍ إِلَّا يُسَبِّحُ بِحَمْدِهِ﴾
﴿السَّلَامُ عَلَيْكُمْ وَرَحْمَةُ اللَّهِ وَبَرَكَاتُهُ﴾

چوق عزیز، چوق صَدِیق و صادق قارداش لرم و رسالهُ نور جهتنده
أمین و خالص وارث لرم!

چوق معنیدار و قوّتلی بر توافق و شاکردلرک صداقتلرینه دلیل، بر ظاهر
کرامتِ نوریه پی بیان ایتمه مه بر إخطار آلدیم. شویله که:

بن وصیتنامه می یازدیغم عین زمانده، گیزی منافق لر، بنم إعتما د ایتدیگم
خدمتجیلریمی ضابطه طرفندن یانمه گلمکدن منع ایتدکلری عین وقتده، فرصت
بولوب، طانیمدیغم بریسیله، سابق طوقوز دفعه دن داها تأثیرلی بر زهر بگا
یوتدیردی لر.

هم عین زمانده، تونسلی و عالم قارداش لریمزدن و بورایه قدر گچن سنه
بنی گورمک ایچون گلوب گوروشمه دن گیدن خواجه حشمت، یوز غاتدن بورایه
یازیور که: "سعید وفات ایتمش، رسالهُ نورک یوز اوتوز رساله سی محافظه
ایدیلسین. تاکه، ایلریده طبع ایده جگز."

هم عین زمانده خلیل إبراهیمک وفاتم حَقْنده بر حزین مرثیه حکمنده کی
پارلاق مکتوبی، شاکردلری آغلالتدیردی.

هم بو زمانه پک چوق یاقین، خسروک، کندی عادتته مخالف بنم وفاتمه
دائر بر ایکی مکتوبنده، ایکی اوچ گون عمر گبی تعبیرلرله أجلمه إشارتلی، بر

پارچه بنی متأثر ایتدی. "عجبا بن گیدیورم" دییه اُنْدیشه ایتدم.

هم عین بو هنگاملرده، اُنْ زیادہ حیاتِ دنیویہ‌ده کی وظیفه‌می دوشونوب و فاتمدن صوگره شاکردلر بو دهشتلی زمانده بنم بدله ده او وظیفه‌ی یاپاجقلر می دییه چوق مراق ایدرکن؛ بردن دڭزلی، میلاس، إسپارطه، اینه‌بولی، امیدیمک یوز درجه فوقنده اوילה صحابتنکارانه و التزام‌پرورانه او وظیفه‌یه قوشوب، باشقه‌لری ده و معلّم و عالم‌لری قوشدیردیلر که؛ بنی حیرت حیرت ایچنده بیراقدیلر.

الحاصل: بو بش جهته‌ده کی توافق، ظاهر بر کرامتِ نوریه‌در. ﴿الْحَمْدُ

لِلّٰهِ هَذَا مِنْ فَضْلِ رَبِّیْ﴾

قارداشلرم! مراق ایتمه‌یگز، جوشن و اُورادِ بهائیه بو دفعه دخی او دهشتلی زهرک تهلکه‌سنه غلبه ایتدی؛ تهلکه دوره‌سی گچدی، فقط خسته‌لق دوام ایدیور.

عموم قارداشلریمه برر برر سلام و سلامت‌لرینه دعا ایدوب، شبهه‌سز مقبول اولان دعالرینی ایسترم. و اینه‌بولیده و جوارنده هم چوق خانملرک، هم کوچوجک یاورولرینک رسالّه نوری یازمغه بشلامالرینی و قرآن درسنی چوق معصوملرک آلماسنی بتون روح و جانمزه تبریک ایدیورز.

﴿الْبَاقِي هُوَ الْبَاقِي﴾

سعید النورسی

برنجی شعاع

بِسْمِ اللّٰهِ الرَّحْمٰنِ الرَّحِیْمِ
﴿وَبِهِ نَسْتَعِیْنُ﴾

(ایکی عجیب سؤالہ قارشی دفعۂ خاطرہ گلن غریب جوابدر.)

برنجی سؤال: دینیلدی کہ: "فاتحہ و یس و ختم قرآنی گبی اوقونان وردلر، قدسی شیلر، بعضاً حدسز ئولمش و صاغ انسانلرہ باغیشلانیور. حالبوکہ بویله جزئی بر تک ہدیہ آن واحدہ حدسز ذاتلرہ یتیشمک و ہر بریسنہ عین ہدیہ دوشمک، طور عقلک خارجندہدر."

الجواب: فاطر حکیم ناصلکہ عنصرِ ہواپی کلمہلرک برق گبی انتشارلرینہ و تکثرلرینہ بر مزرعہ و بر واسطہ یاپمش و رادیو واسطہ سیلہ بر منارہدہ اوقونان اذانِ محمدی (عصم) عموم یرلردہ و عموم انسانلرہ عین آندہ یتیشدیرمک گبی، اویلہ دہ؛ اوقونان بر فاتحہ دخی، (مثلاً) عموم اہل ایمان امواتنہ عین آندہ یتیشدیرمک ایچون حدسز قدرت و نہایتسز حکمتیلہ معنوی عالمدہ، معنوی ہوادہ چوق معنوی الکتریقلری، معنوی رادیولری سرمش، سریمش؛ فطری تلسز تلفونلردہ استخدام ایدیور، چالیشدیریور. ہم ناصلکہ بر لامبا یانسه، مقابلندہ کی بیگلر آیینہیہ (ہر برینہ) تام بر لامبا گیرر. عینا اویلہ دہ، بر یس شریف اوقونسہ، میلیونلر روحلرہ ہدیہ ایدیلسہ، ہر برینہ تام بر یس شریف دوشر.

ایکنجی سؤال: شدّتلہ و آمرانہ دینیلدی کہ: "سن رسالہ نورک مقبولیتنے دائر حضرت علی (رض) و غوثِ اعظم (رض) گپی ذاتلرک قصیدہ لرندن شاہدلر گوستریورسک. حالبوکہ، اصل سوز صاحبی قرآندر. رسالہ نور، قرآنک حقیقی بر تفسیری و حقیقتک بر ترجمانی و مسئلہ لرینک برہانیدر. قرآن ایسہ، سائر کلاملر گپی قشرلی، کمیکی و شعوری خصوصی و جزئی دگلدر. بلکہ قرآن، عموم اشاراتیلہ و أجزاسیلہ عین شعوردر، قشرسزدر؛ فضولی، لزومسز مادہلری یوقدر. عالم غیبک ترجمانیدر. سوزلر حقّندہ سوز اونکدر، گورہلم او نہ دیور؟"

الجواب: رسالہ نور طوغریدن طوغری یہ قرآنک باہر بر برہانی و قوّتلی بر تفسیری و پارلاق بر لمعہ إعجازِ معنویسی و او بحرک بر رشحہ سی و او گونشک بر شعاعی و او معدنِ علم حقیقتدن ملہم و فیضندن گلن بر ترجمہ معنویہ سی اولدیغندن اونک قیمتنی و اہمیتنی بیان ایتمک قرآنک شرفنہ و حسابنہ و ثناسنہ گچدیگندن، ألبتہ رسالہ نورک مزیتنی بیان ایتمکلگی، حق اقتضا ایدر و حقیقت ایستر، قرآن إذن ویرر. بنم گپی بر ترجمانک حصّہ سی یالکز شکردر. ہیچ بر جہتلہ فخرہ، تمدّحہ، غرورہ حقّی یوقدر و اولاماز. گلہ جک آیتلرک اشاراتنہ بو نقطہ نظرلہ باقمق گرکدر. یوقسہ بنی خودبینلک ایلہ إتهام ایدنلرہ حقّمی حلال ایتمہم. بو چوق اہمیتلی سؤالہ قارشى ایکی اوچ ساعت ظرفندہ بردن قرآنک آیات مشہورہ سندن "سوزلر" عددنجہ اوتوز اوچ آیتک ہم معناسیلہ، ہم جفر ایلہ رسالہ نورہ اشارتلی اوزاقدن اوزاغہ إجمالاً گورولدی. آیری آیری طرزلردہ اوتوز اوچ آیت متّفقاً رسالہ نوری رمزلیلہ گوستردیگی خیال میال گورولدی.

إخطار: اُکّ اُول یگرمی دردنجی آیتک باشندہ ذکر ایدیلن إخطارہ دقّت ایتمک لازمدر. او إخطارک یری باشدہ ایدی. فقط اورادہ خاطرہ گلدی، اورایہ گیردی.

ایکنجی بر إخطار: توافقه إشارتله اگر مناسبات معنویه إستناد ایتمزسه، اُهمیتی آزدر. اگر مناسبت معنویه سی قوّتلی ایسه، بو اونک بر فردی، بر ماصدقی حکمنده اولسه و مستثنا بر لیاقتی بولونسه، او وقت توافق اُهمیتلیدر. و او کلامدن بونک إرادهنه بر اُماره اولور. و اوندن او فردک خصوصی بر صورتده داخل اولدیغنه یا رمز، یا إشارت، یا دلالت حکمنده اونی گوسترر. ایشته گلهجک آیات قرآنیّه نکه رساله نوره إشارتلی و توافقلری اُکثریت ایله قوّتلی بر مناسبت معنویه إستناد ایدرلر. اوت بو گلهجک آیات مشهوره متّفقا اون اوچنجی عصرک آخرینه و اون دردنجی عصرک اُولنه جفرجه باقیورلر و قرآن و ایمان حسابنه بر حقیقته إشارت ایدیورلر. و مدار تسلی بر "نور" دن خبر ویریورلر. و او زمانک ضلالت فتنه سندن گلن شبهاتی إزاله ایده جک، قرآنی بر برهانی مژده ویریورلر.

و او إشارتله و رمزله تام مظهر و او وظیفه لری بحق گوره جک، رساله نور گبی بر تفسیر قرآنی اولاجق. حالبوکه رساله نور بو مذکور نقطه ده ایلری اولدیغی، اونی اوقویانلرجه شبهه سز اولماسیله دلالت ایدرکه؛ او آیتلر بالخاصّه رساله نوره باقوب اوکھا إشارت ایدیورلر.

برنجیسی: سورة نوردن آیت النوردر که، رساله نورک رسائل النور و رساله النور و رساله النور ناملریله سبب تسمیه سنک اونی آلتی سببندن بر سبب اولدیغندن، برنجی اولارق اونی بیان ایتمک گرکدر. بو آیت النور:

﴿اللَّهُ نُورُ السَّمَوَاتِ وَالْأَرْضِ مِثْلُ نُورِهِ كَمِشْكُوهٍ فِيهَا مِصْبَاحٌ الْمِصْبَاحُ فِي زُجَاجَةٍ الزُّجَاجَةُ كَأَنَّهَا كَوْكَبٌ دُرِّيٌّ يُوقَدُ مِنْ شَجَرَةٍ مُبَارَكَةٍ زَيْتُونَةٍ لَا شَرْقِيَّةٍ وَلَا غَرْبِيَّةٍ يَكَادُ زَيْتُهَا يُضِيءُ وَلَوْ لَمْ تَمْسَسْهُ نَارٌ نُّورٌ عَلَى نُورٍ يَهْدِي اللَّهُ

لِنُورِهِ مَنْ يَشَاءُ وَيَضْرِبُ اللَّهُ الْأَمْثَالَ لِلنَّاسِ وَاللَّهُ بِكُلِّ شَيْءٍ عَلِيمٌ

شو آیت نوریه نك معناه چوق طبقاتی و وجوه كثیره سی واردر. و او طبقه لردن و وجه لردن إشاری و رمزی بر وجهی، معناه و جفرجه نورلی بر تفسیری اولان رساله النور و رساله النوره درت بش جمله سیله اون جهتدن باقیور. و او طبقه لردن و او وجه لردن بر طبقه و بر پرده دخی معجزانه ألكتریقندن خبر ویریور.

رساله نوره باقان برنجی جمله سی: «مَثَلُ نُورِهِ كَمِشْكُوهٍ فِيهَا مِصْبَاحٌ»

در. یعنی: نور إلهینك ویا نور قرآینك ویا نور محمدینك (عصم) مثالی شو **«مِشْكُوهٍ فِيهَا مِصْبَاحٌ»** در. مقام جفریسی طوقوز یوز طقسان سكر (۹۹۸) اولارق عیناً رساله النور، (شده لی نون ایکی نون صایلمق جهتیه) تام تامنه توافقله اوڭا إشارت ایدر.

ایکنجی جمله سی: «الزُّجَاجَةُ كَأَنَّهَا كَوْكَبٌ دُرِّيٌّ يُوقَدُ» در. یگرمی

سكزنجی لمعه ده تفصیلاً بیان ایدیلدیگی گبی، إمام علی (رض) قصیده جلجلوتیه سنده صراحت درجه سنده رساله النوره باقهرق و اوڭا إشارت ایده رك دیمش: **«أَقْدُ كَوْكَبِي بِالْإِسْمِ نُورًا»** بن تخمین ایدیورم كه، إمام علی نك (رض) بو إشارتی، بو جمله نوریه نك رمزندن ملهمدر. بو جمله آیتك مقامی، بش یوز قرق آلتی (۵۴۶) ایدوب، رساله نورك عددی اولان بش یوز قرق سكره (۵۴۸) غایت جزئی و سرلی ایکی فرق ایله توافق نقطه سندن إشارت ایتدیگی گبی، رمزی بر معناسیله تام باقیور.

اوچنجی جمله سی: «مِنْ شَجَرَةٍ» در. اگر **«مِنْ شَجَرَةٍ»** ده کی (ة) وقفلرده

گبی (ه) صاییلسه بش یوز طقسان سکر (۵۹۸) ایدہرک تام تامنه رسائل النور و رسالۃ النور عددی اولان بش یوز طقسان سکزه توافقله برابر ﴿مِنْ فُرْقَانٍ حَکِیمٍ﴾ کڈ عددینه ینه سرلی بر تک فرقله توافق رمزی ایلہ، هم رسائل النوری أفرادینه داخل ایدر، هم ینه رسالۃ النورک شجرۃ مبارکی (فرقان حکیم) اولدیغنی گوسترر. اگر ﴿مِنْ شَجَرَةٍ﴾ ده کی (ة)، (ت) قالسه، او وقت مقام جفریسی طوقوز یوز طقسان اوچ (۹۹۳) ایدر. توافقه ضرر ویرمهین جزئی و سرلی بش فرقله رسالۃ النور عددی اولان طوقوز یوز طقسان سکزه (۹۹۸) توافقله معناسنک دخی موافقتنه بناءً اوکاً إشارت ایدر.

دردنجی جمله سی: ﴿نُورٌ عَلَى نُورٍ يَهْدِي اللَّهُ لِنُورِهِ﴾ در که، طوقوز یوز طقسان طوقوز (۹۹۹) ایدہرک سرلی بر تک فرقله رسالۃ النور عددی اولان طوقوز یوز طقسان سکزه (۹۹۸) توافقله معناسنک قوتلی مناسبتنه بناءً إشارت درجه سنده رمز ایدر.

بشنجی جمله سی: ﴿مَنْ يَشَاءُ﴾ جمله سی غایت جزئی بر فرقله رسالۃ النور مؤلفنک اسمیله مشهور بر لقبنه توافقله معناسی باقدیغی گبی باقییور. اگر ﴿يَشَاءُ﴾ ده کی مقدّر ضمیر إظهار ایدیلیرسه ﴿مَنْ يَشَاءُ﴾ اولور. تام تامنه توافق ایدر.

بو آیت ناصلکه رسالۃ النوره اسمیله باقییور، اویله ده تاریخ تألیفنه و تکملنه تام تامنه توافقله رمزاً باقییور: ﴿كَمْشُكُوَةٍ فِيهَا مِصْبَاحُ الْمِصْبَاحِ فِي زُجَاجَةٍ﴾ جمله سی ﴿كَمْشُكُوَةٍ﴾ ده کی تنوین وقف یری اولمادیغندن نون صاییلحق و ﴿فِي زُجَاجَةٍ﴾ وقف یری اولدیغندن (ة)، (ه) اولحق جهتیله بیك اوچ یوز قرق طوقوز

(۱۳۴۹) ایدہرک، رسائل النورک اُنْ نورانی جزءلرینکْ تالیفی ھنگامی و تکمّل زمانی اولان بیک اوچ یوز قرق طوقوز تاریخنه تام تامنه توافقله اِشارت ایدر.

هم ﴿الْمِصْبَاحُ فِي زُجَاجَةٍ الزُّجَاجَةُ كَأَنَّهَا كَوْكَبٌ دُرِّيٌّ﴾ جملہسی بیک

اوچیوز قرق بش (۱۳۴۵) ایدہرک، رسائل النورک اِنتشاری و اِشتھاری و پارلاماسی تاریخنه تام تامنه توافق ایدر. چونکہ شدّلی (ر) ایکی (ر)، شدّلی (ن) ایکی (ن)، شدّلی (ز) اصلی اِعتباریلہ بر (ل) بر (ز) و برنجی ﴿زُجَاجَةُ﴾ وقف جھتیلہ (ه)، ایکنجی وقف اولمادیغندن (ت) صاییلیر. اُگر شدّلی (ز) ایکی (ز) صاییلسه او وقت بیک اوچ یوز یگرمی ایکی (۱۳۲۲) ایدر کہ، ینہ رسالۃ النور مؤلفی، مقدّماتِ نوریہ یہ باشلادیغی عین تاریخه تام تامنه توافق ایدر.

هم ﴿مِنْ شَجَرَةٍ مُّبَارَكَةٍ﴾ جملہسی؛ تاءِ اُول (ت)، ایکنجی (ت) ایسه

وقف یری اولدیغندن (ه) اولمق و ﴿شَجَرَةٍ﴾ ده کی تنوین (ن) صاییلحق جھتیلہ بیک اوچیوز اون بر (۱۳۱۱) ایدر کہ، او تاریخده رسائل النور مؤلفی رسالۃ النورک مبارک شجرۃ قدسیہسی اولان قرآنکْ باصامقلری اولان علوم عربیہ پی تدریسہ باشلادیغی عین تاریخه تام تامنه توافق ایدہرک رمزا باقار. ایشته بو قدر معنیدار و متعدّد توافقاتِ قرآنیہنکْ اِتّفاقی یالکْز بر اُماره، بر اِشارت دگل، بلکه قوّتلی بر دلالتدر. بلکه اَلکتریق ایله برابر رسائل النوره مناسبتِ معنویہ سیله بر تصریحدر.

بو آیتکْ مناسبتِ معنویہ سنکْ لطافتلرندن بر لطافتی شودر کہ: اِخبارِ غیب نوعندن معجزانه هم اَلکتریقہ، هم رسالۃ النوره اِشارت ایتدیگی گی، ایکسنکْ ظهورلرینه و زمانِ ظهورلرندن صوگرہ کی تکمّل زمانلرینه و خلافِ عادت وضعیتلرینی چوق گوزل گوستریور.

مثلاً، ﴿زَيْتُونَةٍ لَا شَرْقِيَّةٍ وَلَا غَرْبِيَّةٍ﴾ جمله سی دیر: "ناصلکه الکتریقْ"

قیمتدار متاعی، نه شرقدن نه ده غربدن جلب ایدیلیمش بر مال دگلدر. بلکه یوقاریده، جوّ هواده رحمت خزینه سندن، سماوات طرفندن اینیور. هر یرک مالیدر. باشقه یردن آرامغه لزوم یوقدر. "دیر. اویله ده معنوی بر الکتریق اولان رسائل النور دخی نه شرقک معلوماتندن، علومندن و نه ده غربک فلسفه و فنونندن گلمش بر مال و اونلردن إقتباس ایدیلیمش بر نور دگلدر. بلکه سماوی اولان قرآنک، شرق و غربک فوقنده کی یوکسک مرتبه عرشیسندن إقتباس ایدیلیمشدر.

هم مثلاً ﴿يَكَادُ زَيْتُهَا يَضَىءُ وَلَوْ لَمْ تَمْسَسْهُ نَارٌ نُّورٌ﴾ جمله سی، معنای

رمزیه دیور که: "اون اوچنجی و اون دردنجی عصرده سماوی لامبالر آتشیسز یانارلر، آتش طوقوماندان پارلارلر. اونک زمانی یاقیندر، یعنی بیگ ایکی یوز سکسان (۱۲۸۰) تاریخنه یاقیندر. ایشته بو جمله ایله ناصلکه الکتریقْ خلاف عادت کیفیتنی و گله جگنی رمزاً بیان ایدر. عیناً اویله ده: معنوی بر الکتریق اولان رسائل النور دخی غایت یوکسک و درین بر علم اولدیغی حالده، کلفت تحصیل و درسه چالیشمغه و باشقه استادلردن تعلّم ایدیلیمگه و مدرّسینک آغزندن إقتباس اولمغه محتاج اولمادان هرکس درجه سنه گوره او علوم عالییه، مشقّت آتشنه لزوم قالمادان آکلاویه بیلیر، کندی کندینه استفاده ایدر، محقق بر عالم اولابیلیر.

هم إشارت ایدر که؛ رسائل النور مؤلفی دخی آتشیسز یانار، تحصیل ایچون کلفت و درس مشقّتنه محتاج اولمادان کندی کندینه نورلانیور، عالم اولور. اوت بو جمله نک بو معجزانه اوچ إشاراتی الکتریق و رسائل النور حقّنده حق اولدیغی گبی، مؤلف حقّنده دخی عین حقیقتدر. تاریخچه حیاتی اوقویانلر و همشهریلری بیلیرلر که؛ "إظهار" کتابندن صوگره کی مدرسه اصولنجه اون بش سنه درس آملقه اوقونان کتابلری، رسائل النور مؤلفی یالکز اوچ آیده تحصیل ایتمش.

هم ناصلکه بو جمله نك معنوی مناسبت جهتنده قوتلی و لطافتلی إشارتی وار؛ اویله ده جفری و أبجدی توافقیله هم ألكتریقك زمان ظهورینك قریبتی، هم رسائل النورك میدانه چیقماسی، هم ده مؤلفنك ولادتنی رمزًا خبر ویریور. بر لمعه إعجاز داها گوسترر. شویله كه: ﴿يَكَادُ زَيْتُهَا يُضَيُّ﴾ نك مقامی، یك ایکی یوز یتمش طوقوز (۱۲۷۹) اولوب، ﴿وَلَوْ لَمْ تَمْسَسْهُ نَارٌ نُّورٌ﴾ قسمی ایسه، ایکی تنوین ایکی "نون" صایلمق جهتیله یك ایکی یوز سكسان درت (۱۲۸۴) ایدرك هم ألكتریقك تعممنك قریبتی، هم رسائل النورك یاقینلغنی، هم اون درت سنه صوكره مؤلفنك ولادتنی ﴿يَكَادُ﴾ كلمه قدسیه سیله معنا إشارت ایتدیگی گبی، جفر ایله ده تام تامنه عین تاریخه توافقه إشارت ایدر. معلومدر كه، ضعیف و اینجه ایپلر اجتماع ایتدكجه قوتلشیر، قویماز بر خلاط اولور. بو سره بناء، بو آیتك بو إشارتلی بربرینه قوت ویرر، تأیید ایدر. توافق تام اولمازسه ده تام حکمنده اولور و إشارتی، دلالت درجه سنه چیقار.

تنبيه: بن بو آیت نوریه نك إشارتلینی ألكتریق و رسائل النورك خاطری ایچون بیان ایتدم. بلکه بو آیتك إعجاز معنویسنك بر شعبه سندن بر لمعه سنی گوسترمك ایستدم.

الحاصل: بو آیت قدسیه صریح معناسیله نور إلهی و نور قرآنی و نور محمدی (عصم) درس ویردیگی گبی، معنای إشاریسیله ده هر عصره باقدیگی گبی، اون اوچنجی عصرك آخرینه و اون دردنجی عصرك اولنه دخی باقار و دقتله باقدیرر. و بو ایکی عصرك آخر و اوللرنده ألك زیاده نظره چارپان و ألك زیاده مناسبت معنویه سی بولونان و بو آیتك عموم جمله لرینك موافقتلرینی و مطابقتلرینی ألك زیاده قزانان ألكتریق ایله رسائل النور اولدیغندن طوغریدن طوغریه معنای

رمزیله باقار دییه بگا قناعتِ قطعیه ویردیگندن چکینمیه رک قناعتی یازدم. خطا ایتمش ایسه م ارحم الراحمیندن رحمتیله عفو ایتمه سنی نیاز ایدیورم. رسائل النورک بو آیتک إلتفاتنه لیاقتنی آکلامق ایسته یین ذاتلر، هانگی رساله یه دقتله باقسه لر آکلارلر. هیچ اولمازسه اُسکیشهر چپسخانه سنک بر میوه سی اولان اوتوزنجی لمعه نامنده کی آلتی أسماءِ إلهیه یه دائر آلتی نکته رساله سنه، هیچ اولمازسه او لمعه دن إسم حی و قیومه دائر بشنجی و آلتنجی نکته لره دقتله باقسه ألبته تصدیق ایدر.

رسائل النوره إشارت ایدن ایکنجی آیت: **﴿فَاسْتَقِمْ كَمَا أُمِرْتَ﴾** آیت

مشهوره سیدر که، **﴿شَيْبَتْنِي سُورَةُ هُودٍ﴾** حدیثک وُرودینه سبب اولمش. **﴿اَسْتَقِمْ كَمَا أُمِرْتَ﴾** نك إشارتی سکزنجی لمعه ده تفصیلاً بیان ایدیلدیگی گبی، سورهُ هودده **﴿فَمِنْهُمْ شَقِيٌّ وَ سَعِيدٌ﴾** إلی آخره آیتک ایکی قوتلی إشارت ویرن صحیفه سنک مقابلنده کی غایت مشهور بر آیتیدر. مقام جفریسی بیك اوچ یوز اوچ (۱۳۰۳) ایدهرک، هم سورهُ شوری نك ایکنجی صحیفه سنده **﴿وَاسْتَقِمْ كَمَا أُمِرْتَ﴾** ایسه، بیك اوچ یوز طوقوز (۱۳۰۹) ایدهرک او تاریخده عموم مخاطبلری ایچنده بریسنه خصوصاً قرآن حسابنه إلتفات ایدوب إستقامتله أمر ایدر که؛ برنجی تاریخ ایسه، رسائل النور مؤلفنك رساله نوری نتیجه ویرن علومك تحصیلنه باشلادیغی تاریخدر. و ایکنجی آیتک تاریخی ایسه، او مؤلفك خارقه بر صورتده پك آز بر زمانده علمجه تکمل ایتمه سی، تحصیلدن تدریسه باشلادیغی و اوچ آیده و بر قیش ایچنده اون بش سنه ده مدرسه جه اوقونان یوز کتابدن زیاده اوقودیغی و او زمانك او محیطده اُك مشهور علماسنك یاننده او اوچ آیتک محصولی اون بش سنه سنك محصولی قدر نتیجه ویردیگی چوق مکرر إمتحانلرله (حاشیه) و

(حاشیه): بو بیانات مدحیه سعیده عائد دگلدر. بلکه قرآنك بر تلمیذینی، بر خادمی سعید

(رض) لسانیه و حالیه تعریف ایدر. تا خدمتنه إعتما دایدیلسین.

هانگی علمدن اولورسه اولسون صوریلان هر سؤاله قارشى جواب صواب ویرمکله اثبات ایتدیگی عین تاریخه، تام تامنه توافقله رمزاً رساله نورک إستقامتنه بر إشارتدر.

اوچنجى آیت مشهوره: ﴿وَالَّذِينَ جَاهَدُوا فِينَا لَنَهْدِيَنَّهُمْ سُبُلَنَا﴾ آیتی

قوتلى مناسبت معنویه سیله برابر جفرجه ییك اوچ یوز قرق درت (۱۳۴۴) ایدر که، او تاریخده رساله نورک شاکردلری گبی بو آیتک معناسنه داها زیاده مظهر اولانلر ظاهرًا گورولمیور. دیمک بو آیت، معناسنک متعدّد طبقه لرندن إشاری بر طبقه دن و رمزی بر پرده دن قرآنک پارلاق بر تفسیری اولان رساله نوره باقیور و ائک اول نازل اولان سوره علقده ﴿إِنَّ الْإِنْسَانَ لِرَبِّهِ لَكَنَافٍ﴾ آیتی گبی معناسیله و مقام جفریله إفاده ایدیور که؛ ییك اوچ یوز قرق درتده نوع انسان ایچنده فرعونانه أمثالسز بر طغیان، بر إنکار چیقہ حق. ﴿وَالَّذِينَ جَاهَدُوا فِينَا﴾ آیتی ایسه، او طغیانہ قارشى مجاهده ایدنلری ثنا ایدیور.

أوت حرب عمومى نتیجه لرندن هم عالم إنسانیت، هم عالم اسلامیت چوق ضرر گوردیلر. نوع انسانک، خصوصًا آوروپانک مغرور و جبارلری، بالخاصّه بریسی، قوت و غنايه و پارهيه إستناد ایدرک فرعونانه بر طغیانہ گیردکلرندن، او خصوصی انسانلر نوع بشرى مسئول ایدیور دییه انسان اسم عمومیسيله تعبیر ایدیلمش. اگر ﴿لَنَهْدِيَنَّهُمْ﴾ ده کی شدّه لی "نون" بر "نون" صاییلسه، ییك ایکی یوز طقسان درت (۱۲۹۴) ایدر که رساله النور مؤلفنک بسملة حیاتیدر و تاریخ ولادتک برنجی سنه سیدر. اگر شدّه لی "لام" ایکی "لام" و "نون" بر صاییلسه، او وقت ییك اوچ یوز یگرمی درتده (۱۳۲۴) حرّیتک إعلانی هنگامنده مجاهده معنویه ایله تظاهر ایدن رساله النور مؤلفنک گورونمسی تاریخیدر.

دردنجی آیت مشهوره: ﴿وَلَقَدْ آتَيْنَاكَ سَبْعًا مِنَ الْمَثَانِ﴾ آیتیدر. شو

جمله قرآن عظیم الشانی و فاتحه سوره سنی مُثَنَّا ثنائیه إفاده ایتدیگی گبی، قرآنك مُثَنَّا وصفنه لایق بر برهانی و آلتی أركان إيمانیه ایله برابر حقیقتِ اسلامیت اولان یدی اساسی، قرآنك سبعة مشهوره سنی پارلاق بر صورتده إثبات ایدن و "سبع المثنی" نورینه مظهر بر آیینه سی اولان رساله النوره جفرجه دخی إشارات ایدر. چونکه ﴿آتَيْنَاكَ سَبْعًا مِنَ الْمَثَانِ﴾ مقام أبجدیسی بیك اوچیوز اوتوز بش (۱۳۳۵) عددیله رساله النورك فاتحه سی اولان إشارات الإعجاز تفسیرینك فاتحه سوره سیله البقره سوره سنك باشنه عائد قسمی باصمقله إنتشار تاریخی اولان بیك اوچ یوز اوتوز بش ویا آلتی یه توافقله رمزی بر پرده دن اوڭا باقدیغنه بر أماره در.

بشنجی آیت: ﴿أَوَمِنْ كَانَ مَيْتًا فَأَخْيَيْنَاهُ وَجَعَلْنَا لَهُ نُورًا يَمْشِي بِهِ فِي

النَّاسِ﴾ در. بو آیتك رمزی لطیفدر. چونکه هم قوتلی مناسبت معنویه ایله، هم جفرله أفراد کثیره سی ایچنده خصوصی بر صورتده رساله النور و مؤلفنه باقییور. شویله که: ﴿مَيْتًا﴾ کلمه سی تنوین "نون" صایلمق جهتیله بش یوز (۵۰۰) ایدرهك "سعید النورسی" عددی اولان بشیوزه توافقله إشارات ایدیور که، "سعید النورسی دخی میّت حکمنده ایدی. رساله النور ایله إحیا ایدیلدی، اونڭله حیات بولدی. "أوت، ﴿أَوَمِنْ كَانَ مَيْتًا فَأَخْيَيْنَاهُ وَجَعَلْنَا لَهُ نُورًا﴾ ده کی ایکی تنوین "نون" درلر. بیك اوچ یوز اوتوز درت (۱۳۳۴) ایدر که، او عین زمانده (عربی تاریخله) سعید عمومی حربده مادّی و دهشتلی بر موتدن دخی خارقه بر طرزده قورتولماسی و فلسفه و غفلتدن گلن معنوی و شدّتی بر ئولومدن نجات بولماسی و قرآنك آب حیاتیله تازه بر حیاته گیرمه سی تاریخدر. بو توافقی معنوی و موافقت

جفریه دلالت درجه سنده بر إشارتدر. هم ﴿فَاحْيَيْنَاهُ وَجَعَلْنَا لَهُ نُورًا يَمْشِي بِهِ فِي النَّاسِ﴾ ده تنوین "نون" و شدہ لی "نون" ایکی "نون" و ﴿بِهِ﴾ ده تلفظ ایدیلن (ی) صایلمق جهتیلہ پیٹ ایکی یوز طقسان درت (۱۲۹۴) ایدر کہ، ولادتک و حیاتک برنجی سنہ سیدر. دیمک بو جملہ ایلہ حیاتِ مادّیہ سنہ، اُولکی جملہ ایلہ ده حیاتِ معنویہ سنہ إشارت ایدر.

الحاصل: بو آیت متعدّد و چوق طبقہ لرندن بر إشاری طبقہ دن هم رسالۃ النورہ، هم مؤلفنہ، هم بو اون دردنجی عصرک إبتداسنہ، هم إبتداسندہ کی رسالۃ النورک مبدئنہ رمزاً، بلکہ إشارۃ، بلکہ دلالة باقار.



أَوْ مَنْ كَانَ مَيِّتًا آيَتُكَ تَتَمَّهُ سَي

﴿أَوْ مَنْ كَانَ مَيِّتًا فَاحْيَيْنَاهُ وَجَعَلْنَا لَهُ نُورًا يَمْشِي بِهِ فِي النَّاسِ كَمَنْ مَثَلُهُ فِي الظُّلُمَاتِ لَيْسَ بِخَارِجٍ مِنْهَا﴾ آیتک قوتلی إشارتنی هم تأیید هم لطافتلندیرن اوچ مناسبت بردن رمضانده قلبمہ گلدی. قطعی بر قناعت ویردی کہ، ﴿مَيِّتًا﴾ کلمہ سنہ تام مناسب سعیددر. بو آیت رسالۃ نور ترجمانی اولان سعیدی "مَيِّت" عنوانیلہ گوسترمسنتک بر حکمتی بودر کہ:

موتک معماسنی و طلسمنی رسالۃ نور ایلہ او آچمش، او دهشتلی یوزک التندہ اهل ایمانہ چوق انسیتلی، سرورلی، نورلی بر حقیقت کشف ایدوب إثبات ایتمش. و موت آلود حیاتِ فانیہ ده بوغولان اهل الحادہ قارشی، باقیانہ حیات آلود

موقت بر موتِ ظاهری ایلّه غالبانه مقابله ایدر. ﴿كَمَنْ مَثَلُهُ فِي الظُّلُمَاتِ﴾

سرّینه مظهر اولان اهلِ الحاد، غیر مشروع مشتهیاتک إباحه سیله سوسلندیرمسنه مقابل؛ رسالۀ نور، موتی او آلداتیجی، فانی حیاته قارشى چیقاروب لذت و زینتی زیر و زبر ایدر. و دیر و إثبات ایدر که: "موت اهلِ ضلالت ایچون إعدام أبدیدر و او دهشتلی دار آغاچندن قورتاران و موتی مبارک بر ترخیص تذکره سنه چویرن یالکز قرآن و ایماندر." ایشته بونک ایچوندر که، بو حقیقتِ معظّمۀ موتیه رسالۀ نوره غایت مهمّ و گنیش بر موقع آلمش؛ حتّی اکثر هجومنده موتی أَلنده طوتوب اهلِ ضلالتک باشنه وورور، عقلی باشنه گنیرمگه چالیشیر.

ایکنجیسی: اهلِ طریقتک و بِالْخَاصّه نقشیلرک درت أساسندن بری و اُک مؤثری اولان رابطهٔ موت اُسکی سعیدی یکی سعیده (رض) چویرمش و دائما حرکتِ فکریه ده یکی سعیده یولداش اولمش. باشده إختیارلر رساله‌سی اولارق، رساله‌لرده او رابطه کشفیاتی گوستره گوستره تا اهلِ ایمان حَقّنده موتک نورانی و حیاتدار و گوزل حقیقتنی گوروب گوستردی.

اوچنجیسی: بو آیت جفر و أبجد حسابیله هر طرفده سعیده هجوم ایدن اوچ چشید موتک تماس زمانی و تاریخی عیناً گوستروب توافق ایدر. دیمک آیتده کی "میت" کلمه سنک أفرادندن مدارِ نظر بر فردی و جفرجه اونک إسمی "میت" عددینه تام توافقه خصوصی إشارته مظهر بر ماصدق "سعید النورسی" در.



(صبرینک صدافتنک بر کرامتیدر.)

بن نمازدن صوگره بو تتمه یی یازارکن صدیق سلیمانک خَلْفی اَمین، صبرینک
﴿أَوْمَنْ كَانَ مَيِّتًا﴾ آیتنه دائر پارچه یی آلدیغنی و رمضانک فیضندن اونک ایضاحی
 گبی نورلر ایستدیگنی گوردیم. نه یازدیغمی اَمینه گوستردیم، حیرتله دیدی: "بو هم
 صبرینک، هم رسالۀ نورک بر کرامتیدر."

بو آیتده کی اُسارلی موازنۀ قرآنیه یی دوشونورکن ، سورۀ هودده کی
﴿فَأَمَّا الَّذِينَ شَقُّوا﴾ فقره سنه قارشى **﴿وَأَمَّا الَّذِينَ سَعِدُوا فِي الْجَنَّةِ﴾** ده کی
 موازنه خاطره گلدى و بیلدیردی که: ناصلکه بو ایکنجی آیت و برنجی فقره
 رسالۀ نورک مسلکته، شاکردلرینه تام تامنه معنًا و جفرجه باقییور. اوپله ده:
﴿فَأَمَّا الَّذِينَ شَقُّوا فِي النَّارِ لَهُمْ فِيهَا زَفِيرٌ وَشَهِيقٌ﴾ آیتی دخی، رسالۀ نورک
 معارضلرینه و دشمنلرینه و اونلرک جریانلرینک مبدئنه و فعالیت دوره سنه و منتها سنه
 جفر ایله، توافق ایله إشارت ایدر. شویله که:

﴿يُرِيدُونَ لِيُطْفِئُوا نُورَ اللَّهِ بِأَفْوَاهِهِمْ﴾ گبی آیتلرک بختنده برنجی شعاعده یدی
 سکز آیاتک اَهْمِیتله گوستردکلری بیك اوج یوز اون آلتی و یدی (۱۳۱۶-۱۳۱۷)
 تاریخی که، قرآنه قارشى اولان سوء قصدک مبدئیدر. **﴿فَأَمَّا الَّذِينَ شَقُّوا﴾** جفرجه
 عین تاریخی گوسترییور. اگر شدہ لی (م) ایکی (م) صاییلسه بیك اوج یوز اُللی
 یدی (۱۳۵۷)، اگر شدہ لی (ل) ایکی (ل) صاییلسه بیك اوچیز قرق یدی (۱۳۴۷)
 که بو عصرک طاغیانہ فعالیت تاریخیدر. هر ایکی شدہ لی ایکیشر صاییلسه بیك
 اوج یوز سکسان یدی (۱۳۸۷) که **﴿لَا يَعْلَمُ الْغَيْبَ إِلَّا اللَّهُ﴾** دهشتلی بر جریانک
 منتها سی تاریخی اولمق احتمالی وار.

﴿فِي النَّارِ لَهُمْ فِيهَا زَفِيرٌ وَشَهِيقٌ﴾ ایسه یك اوج یوز آتمش بر (۱۳۶۱)،

اگر ﴿فِي النَّارِ﴾ ده کی اوقوغیان (ی) صایلمازسه یك اوج یوز آلی بر (۱۳۵۱) تاریخنی؛ اگر شدہ لی (ن) أصل إعتباریله بر (ل)، بر (ن) صایلسه ینہ یك اوج یوز اوتوز بر (۱۳۳۱) تاریخنی و حرب عمومی آتشنك فریاد و فیزار ایچنده کی یانغینی گوسترهرك جهنم آتشنده زفیر و شهیق ایدن اهل شقاوتك عذابنی خبر ویروب، اهل ایمانی فتنه لره دوشورن شقیلرك هم دنیاده، هم آخرتده جزالینه إشارت ایدر. عینا اویله ده، بو عصره ده ظاهرًا باقان، أسراری اولان سورۀ

﴿وَالسَّمَاءِ ذَاتِ الْبُرُوجِ﴾ دن شو آیتك ﴿إِنَّ الَّذِينَ فَتَنُوا الْمُؤْمِنِينَ وَالْمُؤْمِنَاتِ فَمَا لَمْ يَتُوبُوا فَلَهُمْ عَذَابُ جَهَنَّمَ وَلَهُمْ عَذَابُ الْحَرِيقِ﴾ إفاده سی گبی هم إستانبولك ایکی حریق کبیری، هم حرب عمومینك دهشتلی یانغینی جهنم عذابی گبی او فتنه نك بر جزاسیدر دییه إشارت ایدر.

الحاصل: بو آیت هر عصره باقدیغی گبی بو عصره داها زیاده نظر دقتی جلب ایتمك ایچون جفرجه بو عصرك اوج درت دوره سنك تاریخلرینه و حادثه لرینه إشارت و معناسنك صورتیله و طرز إفاده سیله ایکی جریانك کیفیتلرینه و وضعیتلرینه ایما ایدر.

صبرینك مکتوبی یولده ایکن و گلمه دن اول او مکتوبك معنوی تأثیری ایله بو آیتی و ﴿أَوْ مِنْ كَانِ مَيِّتًا﴾ آیتیه برابر دوشونورکن خاطرمه گلدی. رسالۀ نور بو درجه قوتلی إشارت قرآنییه و شاکردلری بو قدر قیمتی بشارت فرقانییه و أقطابلرك إلتفاتنه مظهرینك سرّی و حکمتی؛ مصیبتك عظمتی و دهشتیدر که، هیچ بر أثرك مظهر اولمادیغی بر قدسی تقدیر و تحسین آلمش. دیمك أهّیت اونك فوق العاده بیوکلگدن دگل، بلکه مصیبتك فوق العاده دهشتنه و تخریباتنه قارشى

مجاهده سی جزئی و آز اولدیغی حالده غایت بیوک اوپله بر اُهمیت کسب ایتمش که بو آیتده اِشارت و بشارت قرآنیده اِفاده ایدر که، رسالَه نور دائره سی ایچنه گیرنلر تهلکه ده اولان ایمانلرینی قورتاریورلر و ایمانله قبره گیریورلر و جَنّته گیده جکله دییه مژده ویریورلر. اوت بعض وقت اولور که، بر نفر گوردیگی خدمت ایچون بر مشیرک فوقنه چیقار، بیگلر درجه قیمت آلیر.

إخطار: گچمش و گله جک آیتلرک اِشارتلیری یالکز توافقله دگل بلکه هر بر آیتک معنای کلیسنده کی جزئیات کثیره سندن بر جزئی فردی رسالَه نور اولدیغنه ایماء، مناسبت معنویه گوره جفری و اُجدی بر توافقله او مناسبتی تأییداً و اوکا بناءً خصوصی اوکا باقار دیمکدر.

التجی آیت: سورَه حدیده **﴿وَيَجْعَلُ لَكُمْ نُورًا تَمْشُونَ بِهِ﴾** یعنی:

"قراکقلر ایچنده سزه بر نور احسان ایده جگم که او نور ایله طوغری یولی بولوب اونده گیده سکز. "لله الحمد رسالَه نور بو قدسی و کلی معناسنک پارلاق بر فردی اولدیغی گی **﴿نُورًا﴾** ده کی تنوین "نون" صایلمق جهتیه ییک اوج یوز اون سکز (۱۳۱۸) عددیله رسائل النور مؤلفی تدریسدن، تألیف وظیفه سنه و مجاهدانه سیاحتیه باشلادیغی زمانک بش سنه اولکی زمانه و چوق آیتلرک اِشارت ایتدکلیری ییک اوج یوز اون آلتی (۱۳۱۶) تاریخنده کی مهم بر اِنقلاب فکریدن ایکی سنه صوگره کی زمانه توافق ایدر که؛ او زمان اِستحضارات نورییه باشلادیغی عین تاریخدر. ایشته شو نورلی آیت، هم معناجه هم جفرجه توافقی ایسه، عموم وجوهی عین شعور اولان قرآن معجز البیانده اَلَبته اِتّفاقی و تصادفی اولاماز.

یدنجی آیت: **﴿وَيُحِقُّ اللَّهُ الْحَقَّ بِكَلِمَاتِهِ﴾** شو آیت مشهوره نك کلی

معناسنڱ بو زمانده ظاهر بر ماصدقی رساله النور اولدیغی گبی، لفظ اللّٰهده کی شدّه لی "ل" بر "ل" و **﴿بِکَلِمَاتِهِ﴾** ده کی ملفوظ "ی" صایلمق شرطیله طوقوز یوز طقسان سکز (۹۹۸) عددیله رساله النورک طوقوز یوز طقسان سکز عددینه تام تامنه توافقله، مناسبت معنویه بناء رمزا اوڭا باقار. و بو رمزی لطیفلشدیرن و قوّت ویرن مناسبتلرک بریسی شودر که: رساله النورک أجزالری سوزلر نامیله إشتهار ایتمشلر. سوزلر ایسه عربجه "کلمات"در. و او کلمات ایله قرآنک حقائقنی او درجه محض حق و عین حقیقت اولدیغنی إثبات ایتمش که، بو زمانک دینسز فیلسوفلرینی تام صوصدیریور.

سکزنجی آیت: **﴿قُلْ إِنِّي هَدِيْنِي رَبِّيْ إِلَى صِرَاطٍ مُّسْتَقِيْمٍ﴾**در. شو آیت مشهوره کلّی معناسنڱ بو عصرده موافق و مناسب بر فردی رساله النور اولدیغی گبی، جفرله **﴿صِرَاطٍ مُّسْتَقِيْمٍ﴾** کلمه سی **﴿صِرَاطٍ﴾** ده کی تنوین "نون" صایلمق جهتیله رساله النور عددی اولان طوقوز یوز طقسان سکز (۹۹۸) ینه ایکی سرلی (حاشیه) فرق ایله باقدیغی گبی، **﴿هَدِيْنِي رَبِّيْ إِلَى صِرَاطٍ مُّسْتَقِيْمٍ﴾** جمله سنڱ مقام أبجدیسی ایله بیك اوچ یوز اون آلتی (۱۳۱۶) ایدهرک رساله نور مؤلفنک تدریسیله إستحضارات نوریه ده بولوندیغی اُك حرارتلی تاریخی اولان بیك اوچ یوز اون آلتی عددینه تام تامنه توافق ایدر.

طوقوزنجی آیت: هم "البقره" سوره سنده، هم "لقمان" سوره سنده **﴿فَقَدْ اسْتَمْسَكَ بِالْعُرْوَةِ الْوُثْقَى﴾** جمله سیدر. یعنی: "اللّٰه ایمان

(حاشیه): یعنی مرتبه سنه إشارت ایچون ایکی فرق وار. رساله نور وحی دگل، إلهام و إستخراجدر.

ایدن هیچ قومیه‌جق بر زنجیر نورانی یه یاپیشیر، تمسک ایدر. "رساله نور ایسه، ایمان بالله قرآنی برهانلرندن بو زمانده ائک نورانیسی و ائک قوتلیسی اولدیغی تحقّق ایتدیگندن، بو «**بِالْعُرْوَةِ الْوُثْقَى**» کلتینده خصوصی داخل اولدیغنه تأییداً مقام جفریسی بیئک اوچ یوز قرق یدی (۱۳۴۷) ایدهرک رساله‌ی نور انتشارینک فوق‌العاده پارلاماسی تاریخنه تام تامنه توافقله باقار. و بو اون دردنچی عصرده قرآنک إعجاز معنویسندن نشئت ایدن بر عروۃ الوثقی و ظلماتدن نوره چیقارهجق بر وسیله نورانیه رساله‌ی نور اولدیغنی رمزاً بیلدیرر.

اوننجی آیت: «**يُؤْتِي الْحِكْمَةَ مَنْ يَشَاءُ**»

اون برنجی آیت: «**وَيُعَلِّمُهُمُ الْكِتَابَ وَالْحِكْمَةَ وَيُزَكِّيهِمْ**»

اون ایکنجی آیت: «**وَيُزَكِّيْكُمْ وَيُعَلِّمُكُمُ الْكِتَابَ وَالْحِكْمَةَ**»

آیتلیدر. مثال إجمالیری دیر که: "قرآن حکمت قدسیه‌ی سزه بیلدیریور. سزی معنوی کیرلردن تمیزلندیور." بو اوچ آیتک کئی و عمومی معنالرنده رساله‌ی نور قصدی بر صورتده داخل اولدیغنه ایکی قوتلی أماره وار:

بریسی شودر که: رساله‌ی نورک مستثنا بر خاصه‌سی، إسم حکم و حکیمک مظهری اولوب بتون صفحاتنده، مباحثنده نظام و إنتظام کائناتک آیینه‌سنده إسم حکم و حکیمک جلوه‌لی اولان حکمت قدسیه‌ی و حکمیات قرآنیه‌ی درس ویریور. موضوعی و نتیجه‌سی، حکمت قرآنیه‌در.

ایکنجی أماره: برنجی آیت بیئک اوچ یوز یگرمی ایکی (۱۳۲۲) ایدهرک مقام أبجدی ایله رساله‌ی نور مؤلفنک طوغریدن طوغری یه علوم آلیه‌دن باشنی قالدیروب

حکمت قرآنیہ یہ متوجہ اولارق خادم القرآن وضعیتی آلدیگی تاریخدر کہ، بر سنہ صوگرہ استانبولہ گیتمش معنوی مجاہدہ سنہ باشلامش.

ایکنجی آیت ایسہ: مقام جفریسی بیٹ اوچ یوز ایکی (۱۳۰۲) ایدہرک رسالہ نور مؤلفنک قرآن درسنی آلدیگی تاریخہ تام تامنہ توافق ایلہ رمزاً قرآنک باہر بر برہانی اولان رسائل النورہ باقار.

اوپنجی آیت ایسہ: بیٹ اوچ یوز اوتوز سکز (۱۳۳۸) اولدیغندن حکمت قرآنیہ پی اروپا حکماسنہ قارشى پارلاق بر صورتدہ گوسترہ بیلن و گوسترن رسالہ النور مؤلفی "دار الحکمة الإسلامیہ" دہ حکمت قرآنیہ پی مدافعہ ایتمکلہ، حتّی انگلیزک باش پاپاسی سؤال ایتدیگی و آلتی یوز کلمہ ایلہ جواب ایستدیگی آلتی سؤالنہ آلتی کلمہ ایلہ جواب ویرمکلہ برابر، انزواہ گیروب بتون غیرتیلہ قرآنک إلهاماتندن رسالہ نورک مسئلہ لرینی إقتباسہ باشلادیگی عین تاریخہ تام تامنہ توافقلہ رمزاً باقار.

اون اوپنجی آیت: سورہ آل عمرانہ ﴿وَمَا يَعْلَمُ تَأْوِيلَهُ إِلَّا اللَّهُ وَالرَّاسِخُونَ فِي الْعِلْمِ﴾

اون دردنچی آیت: سورہ نساءدہ ﴿لَكِنَّ الرّٰسِخُوْنَ فِي الْعِلْمِ مِنْهُمْ﴾ بو ایکی آیت بو عصرہ دہ خصوصی باقارلر.

برنجیسنک مثالی گوسترییور کہ: أهل ضلالت متشابہات قرآنیہ پی یاگلش تأویلات ایلہ تحریفنہ و شبہہ لری چوغالتماسنہ چالیشدیگی بر زماندہ، علمدہ رسوخى بولونان بر طائفہ او متشابہات قرآنیہ نك حقیقی تأویلرینی بیان ایدوب و ایمان ایدہرک او شبہاتی ازالہ ایدر. بو کلى معنائک هر عصرده ماصدقلری و

جزئیاتلری وار. حربِ عمومی واسطه سیله، بیك سنه دن بری قرآن علیهنده تراکم ایدن آوروپا اعتراضلری و اوهاملری عالم اسلام ایچنده یول بولوب یاییلدیلر. او شبهاتك بر قسمی فتی شكلنی گیدی، اورتهیه چیقدی. بو شبهاتی و اعتراضلری بو زمانده دفع ایدن باشده رساله النور و شاکردلری گوروندیگندن، بو آیت بو عصره ده باقدیغندن رساله النور و شاکردلرینه رمزًا باقمقله برابر علماء متأخرینك مذهبنه گوره «إِلَّا اللَّهُ» ده وقف ایدیلمز. او حالده مقام جفریسی عینًا «إِنَّ الْإِنْسَانَ لَیَطْغَى» نك مقامی گبی بیك اوچ یوز قرق درت (۱۳۴۴) ایدهرک رسائل النور و شاکردلرینك میدان مجاهدۀ معنویه آتیلمالری تاریخنه تام تامنه توافقله اونلری ده بو آیتك حریم قدسیسك ایچنه آلیور. هم حشرک اُك قوتلی و پارلاق بر برهانی اولان اونجی سوزك اطرافه یاییلماسی تاریخنه و قرآنك قرق وجهله معجزه اولدیغنی بیان ایدن یگرمی بشنجی سوزك إشتهاری هنگامنه، هم «إِنَّ الْإِنْسَانَ لَیَطْغَى» عددینه تام تامنه توافقله باقار.

اگر مذهب سلف گبی «إِلَّا اللَّهُ» ده وقف اولسه، او حالده «الرَّاسِخُونَ» ده کی شدّلی "ر" ایکی "ر" صاییلسه بیك اوچ یوز آلتمش (۱۳۶۰) کسور ایدهرک رساله النور شاکردلرینك بوندن اون بش یگرمی سنه صوگره کی راسخانه و محققانه اولان علملرینه و ایمانلرینه رمزًا باقدیغی گبی؛ شدّلی "ر" أصل إعتباریله بر "ل" بر "ر" صاییلسه بیك ایکی یوز اون ایکی (۱۲۱۲) ایدهرک بوندن بر بچق عصر اول مولانا خالد ذو الجناحینك هندستاندن گتیردیگی پارلاق بر علم حقیقت رسوخيله، او زمانده میدان آلان تأویلات فاسدهی و شبهاتی طاغیدهرق یوز سنه ده ألی میلیوندن زیاده إنسانلری دائرۀ إرشادینه آلدیغی و تنویر ایتدیگی زمانك تاریخنه تام تامنه توافقله باقار.

ایکنجی آیت اولان ﴿الرَّاسِخُونَ فِي الْعِلْمِ مِنْهُمْ﴾ شدہلی "ر" اصلہ نظرًا

بر "ل" بر "ر" صایلمق جھتیلہ مقام اُجدیسی بیٹ اوج یوز قرق درت (۱۳۴۴) ایتمکله هر عصره باقدیغی گبی بو عصره ده خصوصی رمزًا باقار. و علم حقیقتده راسخانه چالیشان و قوتلی ایمان ایدن بر طائفهیه اشارت ایدر. و چوق آیتلرک اُهمیتله گوستردکلری بو بیٹ اوج یوز قرق درتده رساله النور و شاکردلرندن داهای زیاده بو وظیفهیه مشکل شرائط ایچنده ثباتکارانه یاپان ظاهرده گورولمیور. دیمک بو آیت اونلری دخی دائره حریمه خصوصی داخل ایدیور.

اون بشنجی آیت: ﴿يَا أَيُّهَا النَّاسُ قَدْ جَاءَكُمْ بُرْهَانٌ مِنْ رَبِّكُمْ

وَأَنْزَلْنَا إِلَيْكُمْ نُورًا مُبِينًا﴾ شو آیت بو زمانه دخی خطاب ایدر. چونکه

تمام - ﴿مُبِينًا﴾ خارج قالسه- بیٹ اوج یوز آلتمش (۱۳۶۰) کسور ایدر. اگر

﴿قَدْ جَاءَكُمْ﴾ دن صوگره کی اولسه ﴿بُرْهَانٌ﴾ و ﴿نُورًا﴾ کلمه لرنده کی تنوینلر

"نون" صایلیسه بیٹ اوج یوز اون (۱۳۱۰) ایدر. دیمک بو عصره ده خطاب ایدر.

هم ﴿قَدْ جَاءَكُمْ بُرْهَانٌ﴾ جمله سی یالکزدرت فرقله ﴿فرقان﴾ عددینه توافقله صریحًا

باقدیغی گبی؛ او قدسی برهان اِلْهینک بو زمانده پارلاق و قوتلی بر برهانی اولان

رسائل النوره دخی ایکنجی جمله سی اولان ﴿أَنْزَلْنَا إِلَيْكُمْ نُورًا مُبِينًا﴾ عددی،

ایکی تنوین وقفده ایکی "الف" صایلمق جھتیلہ بش یوز طقسان سکر (۵۹۸)

ایده رک عینًا تام تامنه رسائل النوره و رساله النور عددینه توافق ایله او سماوی

برهان قدسینک یرده بر برهانی رسائل النور اولدیغنی رمزًا خبر ویریور.

إخطار: سوزلرک اوج اسمی اولان رساله النور ویا رسائل النور ویا رساله

النورده کی شدہلی "نون" ایکی "نون" صایلمق، جفرجه اعلیٰ بر قاعده در.

شدہ لی حرف بعضاً بر، بعضاً ایکی صایلا بیلیر

اون آلتجی آیت: ﴿لِّلَّذِينَ آمَنُوا هُدًى وَ شِفَاءٌ﴾ در. شو شفالی آیت

چوق زماندر بنم دردلریمک شفاسی و علاجی اولدیغی گبی أجزاخانه کبرای الهیه اولان قرآن حکیمک تریاقی علاجلرندن، رسالہ النور أجزالرینک قوانوزلرندن آلارق بلکه بیك معنوی دردلریمه بیك قدسی شفای بولدم و رسائل النور شاگردلری دخی بولدیله. و فندن و فلسفه نك باتاقلغندن چیقان و تداویسی چوق مشکل اولان و زندقه خسته لغنه مبتلا اولانلردن چوقلری اونگله شفالرینی بولدیله.

ایشته هر درده شفا اولان قرآنك علاجلرینك بو زمانده بر قسم قوانوزلری حکمنده بولونان رسائل النور دخی بو شفادار آیتك بر مدار نظری اولدیغنه قوتلی بر أماره شودر که: بو آیتك مقام جفریسی اولان بیك اوچ یوز قرق آلتی (۱۳۴۶) عددی رسائل النورك بیك اوچ یوز قرق آلتیده شفادارانہ أطرفه إنتشارینك تاریخنه و معجزاتِ أحمديه عليه الصلاة والسلام نامنده اولان رسالہ خارقه نك زمانِ تألیفنه تام تامنه توافقیدر. شو توافق هم مناسبتِ معنویه یی تأیید و اونگله تأیید ایدر، هم رمزدن إشارت درجه سنه چیقارییور.

اون یدنجی آیت: ﴿فَإِنْ تَوَلَّوْا فَقُلْ حَسْبِيَ اللَّهُ لَا إِلَهَ إِلَّا هُوَ عَلَيْهِ تَوَكَّلْتُ﴾

ده کی ﴿قُلْ حَسْبِيَ اللَّهُ لَا إِلَهَ إِلَّا هُوَ عَلَيْهِ تَوَكَّلْتُ﴾ نك مقام جفریسی شدہ لی لاملر برر لام و شدہ لی كاف بر كاف صایلمق جهتيله بیك اوچ یوز یگرمی طوقوز (۱۳۲۹) ایدهرک، حربِ عمومینك باشلانغیجی زماننده رسائل النورك باشلانغیجی اولان إشارات الإعجاز تفسیرینك تاریخ تألیفنه تام تامنه توافقه برابر، شدہ لی كاف ایکی كاف صایلمق جهتيله بیك اوچ یوز قرق طوقوز (۱۳۴۹)

ایده‌رک حربِ عمومینک ویردیگی صارصینتیلر زماننده رسائل النورک ﴿حَسْبِيَ اللَّهُ﴾ دییه‌رک اهلِ دنیادن هیچ بر یرده حمایه گورمه‌دن بلکه تهاجمه هدف اولمقله برابر چکینمیه‌رک یالکز باشلریله مشکلات ایچنده أنوارِ قرآنیه‌پی نشر ایتدکلری عین تاریخه تام تامنه توافقی ایسه، هر جهتیله عینِ شعور اولان آیاتده ألبته تصادفی اولاماز. بلکه بو گی آیتلر، اُکْ مشکل زمان اولان بو عصره دخی خصوصی باقارلر و او آیاتی کندیلرینه رهبرِ اِتْخاذایدن بر قسم شاگردلرینه خصوصی اِلْتفات ایدوب اِلْتفاتلریله تشجیع ایدرلر.

بو آیت، سابق آیتلر گی مناسبتِ معنویه‌سی گرچه ظاهرًا گورونمیور؛ فقط بر جهته رسائل النور ایله بر نوع مناسبتی واردر. شویله که: اون اوچ سنه‌در (حاشیه) بو آیت رساله النور مؤلفنک و صوگره خاص شاگردلرینک مغربدن صوگره بر وردِ خصوصیلریدر. هم بو آیتک معناسنه بو زمانده تام مظهر و هرکس اونلردن چکینمه‌سندن فتور گتیرمیه‌رک ﴿حَسْبِيَ اللَّهُ﴾ دیوب متوکلانه مشکلاتِ عظیمه ایچنده أنوارِ ایمانیه‌پی و اُسرارِ قرآنیه‌پی نشر ایدن، اهلِ ایمانی مأیوسیتدن قورتاران باشده رساله النور و شاگردلریدر.

اون سکرنجی آیت: ﴿إِنَّ حِزْبَ اللَّهِ هُمُ الْغَالِبُونَ﴾ در. بو آیت مثالیله حزب اللهک ظاهری مغلوبیتندن گلن مأیوسیتی ازاله ایچون قدسی بر تسلّی ویرر و حزب الله اولان حزبِ قرآینک حقیقتده و عاقبتده غلبه‌سنی خبر ویرر. و بو عصرده حزبِ قرآینک حدسز افرادندن رسائل النور شاگردلری تظاهر ایتدکلرندن بو آیتک کلّی معناسنده خصوصی داخل اولمالرینه بر اُماره اولارق مقامِ جفریسی

اولان پیک اوچ یوز اَللی (۱۳۵۰) عددی ایله رسائل النور شاکردلرینک ظاهری مغلوبیتلری و بر سنه صوگره محبوسیتلری ایچنده معنوی غلبه‌لری و متانتلری و حق‌لرنده یاپیلان مدھش إحا پلانی عقیم بیراقان إخلاصلری و قوۂ معنویہ‌لری تظاهر ایتمه‌سنک رومی تاریخی اولان پیک اوچ یوز اَللی و اَللی بر و اَللی ایکی (۱۳۵۰-۱۳۵۱-۱۳۵۲) عددینه تام تامنه توافقی اَلتبه شفقتکارانه، تسلّیت‌دارانه بر رمز قرآنیدر.

اون طوقوزنجی آیت: ﴿وَالَّذِينَ آمَنُوا مَعَهُ نُورُهُمْ يَسْعَىٰ بَيْنَ أَيْدِيهِمْ وَ بَإِيمَانِهِمْ يَقُولُونَ رَبَّنَا آتِنَا نُورَنَا وَ اغْفِرْ لَنَا﴾ شو آیتک عموم معناسنده کی طبقه‌لرندن بر طبقه إشاریه‌سی بو عصره دخی باقییور. چونکه ﴿يَقُولُونَ رَبَّنَا آتِنَا لَنَا نُورَنَا﴾ هم معناجه قوَتلی مناسبتی وار، هم جفرجه پیک اوچ یوز یگرمی آلتی (۱۳۲۶) ایده‌رک او تاریخده کی حرّیت إنقلابندن نشئت ایدن فورطنه‌لرک هنگامنده هر شیئی صارصان او فورطنه‌لرک و حربلرک ظلماتندن قورتولمق ایچون نور آرایان مؤمنلر ایچنده، رسائل النور شاکردلری آز بر زمان صوگره تظاهر ایتدکلرندن بو آیتک أفراد کثیره‌سندن بو عصرده بر ماصدقی اونلر اولدیغنه بر اماره‌در. ﴿وَ اغْفِرْ لَنَا﴾ جمله‌سی پیک اوچ یوز آلتمشه (۱۳۶۰) باقییور. دیمک بوندن بش آلتی سنه صوگره إستغفار دوره‌سیدر. رسائل النور شاکردلری او زمانده إستغفار درسنی ویره‌جگنی رمزاً بر ایمادر.

یگرمنجی آیت: ﴿وَنُزِّلُ مِنَ الْقُرْآنِ مَا هُوَ شِفَاءٌ وَ رَحْمَةٌ لِّلْمُؤْمِنِينَ﴾

شو آیت عظیمه صریحاً عصرِ سعادتده نزول قرآنه باقدیغی گبی، سائر عصرلره دخی معنای إشاریسیله باقار. و قرآنک سماسندن إلهامی بر صورتده گلن شفادار نورلره إشارت ایدر. ایشته طوغریدن طوغری‌یه طیبِ قلوب اولان قرآن حکیمک

فیضندن و ضیاسندن إقتباس اولونان رساله النور، بنم چوق تجربه لرملة عموم معنوی درد لرملة شفا اولدیغی گبی، رسائل النور شاکردلری دخی تجربه لریله بنی تصدیق ایدیورلر. دیمک رسائل النور بو آیتک بر معنای إشاریسنده داخلدر. و بو دخولنه بر أماره اولارق ﴿مَا هُوَ شِفَاءٌ وَرَحْمَةٌ لِّلْمُؤْمِنِينَ﴾ نك مقام جفریسی بیك اوچ یوز اوتوز طوقوز (۱۳۳۹) ایدهرک عین تاریخده قرآندن إلهام اولونان رسائل النور بو عصرک معنوی و مدهش خسته لقرینه شفا اولقله میدان چیقمغه باشلاماسندن، بو آیت اوکا خصوصی رمز ایتدیگنه بکا قناعت ویریور. بن کندی قناعتی یازدم، قناعتی اعتراض ایدیلمز.

یگرمی برنجی آیت ویا آیتلر: ﴿قُلْ إِنِّي هَدِيْنِي رَبِّي إِلَى صِرَاطٍ مُسْتَقِيمٍ ۖ وَ هَدِيْهُ إِلَى صِرَاطٍ مُسْتَقِيمٍ﴾ سکز طوقوز آیتلرده "صراط مستقیم" ه نظری چویریورلر. و بو طوغری، إستقامتلی یولی بولمق ایچون دائما قرآنک نورندن هر عصرده او عصرک ظلمتلرینی طاغیده حق و إستقامت یولنی تنویر ایدهرک قرآندن گلن نورلر اولقله و بو دهشتلی و فورطنه لی عصرده او طوغری یولی شاشیرتمیه حق بر صورتنده گوسترن باشده شیمدیلک رساله النور تظاهر ایتدیگندن، هم بو "صراط مستقیم" کلمه سنک مقام جفریسی (تنوین "نون" صایلمق جهتیه) بیك (۱۰۰۰) ایدر. مدّه اولمازسه طوقوز یوز طقسان طوقوز (۹۹۹) ایدهرک یالکز بر ویا ایکی فرقله (حاشیه) رساله النور عددی اولان طوقوز یوز طقسان سکره (۹۹۸) توافقله، سکز طوقوز آیتلرده "صراط مستقیم" کلمه لری بو مذکور ایکی آیت گبی رساله النوری "صراط مستقیم" ک آفرادینه خصوصی

(حاشیه): یعنی رساله النورک مرتبه سی ایکنجی و اوچنجیده اولدیغنه إشارتدر. وحی دگل و اولاماز، بلکه إلهام و إستخراجدر.

إدخال ایدوب رمزًا اوڭا باقدیرر و إستقامتنه إشارت ایدر. اگر ﴿صِرَاطٍ﴾ ده کی تنوین صایلمازسه، ﴿النُّور﴾ ده کی شدّلی "نون" بر "نون" صایلییر، ینه توافق ایدر.

هم ناصلکه بو آیت رسالۃ النوره إسمیله باقییور، اویله ده اونڭ إستحضارات زمانه ده باقار. چونکه ﴿هَدِیْنِ رَبِّیْ اِلٰی صِرَاطٍ مُسْتَقِیْمٍ﴾ ڭ مقام جفریسی بیڭ اوچ یوز اون آلتی (۱۳۱۶) ایدهرک رسالۃ النور مؤلفنڭ إختیارسز اولارق إستحضارات نوریه ده بولوندیغی و عموم معلوماتی قرآنڭ فهمنه باصامقلر یاپدیغی اڭ حرارتلی تاریخی اولان بیڭ اوچ یوز اون آلتی عددینه تام تامنه توافقی ألبته أولکی إشاراتی تأیید و اونڭله تأیید ایدهرک رسالۃ النوری دائرۃ حریمه رمزًا بلکه إشارۃ داخل ایدیور.

جای دقت و اهمیتلی بر توافقدر که: رسالۃ النور مؤلفی بیڭ اوچ یوز اون آلتی (۱۳۱۶) صیره لرنده مهم بر إنقلاب فکری گچیردی. شویله که:

او تاریخه قدر علوم متنوعه یی، یالڭز علمله تنور ایچون مراق ایدردی، اوقوردی، اوقوتوردی. فقط بردن او تاریخده مرحوم والی طاهر پاشا واسطه سیله آوروپانڭ قرآنه قارشى مدھش بر سوء قصدلری وار اولدیغنی بیلدی. حتّی بر غزته ده إنگلیزک بر مستملکات ناظری دیمش:

"بو قرآن، إسلام ألدنه وارکن بز اونلره حقیقی حاکم اولامایز. بونڭ سقوطنه چالیشملی یز." دیدیگنی ایشیتدی، غیرته گلدی. بردن مقام جفریسی بیڭ اوچ یوز اون آلتی (۱۳۱۶) اولان ﴿فَاَعْرِضْ عَنْهُمْ﴾ فرماننی معنًا دیڭله یهرک بر إنقلاب

فکری ایله مراقی دگیشدیردی. بتون بیلدیگی علوم متنوعه یی قرآنک فهمنه و حقیقتلرینک إثباتنه باصامقار یاپارق هدفی و غایه علمیه سنی و نتیجه حیاتنی، یالکز قرآن بیلدی. و قرآنک إعجاز معنویسی، اوکثا رهبر و مرشد و استاد اولدی. فقط مع التأسف او گنجلك زماننده چوق آلداتیجی عارضه لر یوزندن بالفعل او وظیفه نك باشنه گچمه دی. بر زمان صوگره حرب عمومینك طراقه و گورولتییی ایله او یاندى. او ثابت فکر جانلاندى، بالقوه دن بالفعله چیقمغه باشلادی.

ایشته هم اوکثا، هم رسالة النوره چوق علاقه سی بولونان بو بیك اوج یوز اون آلتی (۱۳۱۶) تاریخنه چوق آیتلر متفقا باقارلر. مثلاً: ناصلکه ﴿هَدِیْنِ رَبِّیْ اِلَیْ صِرَاطٍ مُّسْتَقِیْمٍ﴾ آیتی تام تامنه توافقله إشارت ایدر. عینا اویله ده؛ بر آیت مشهوره اولان ﴿اِنَّ رَبِّیْ عَلَیْ صِرَاطٍ مُّسْتَقِیْمٍ﴾ مقام جفریسی شده لی "نون" بر "نون" صاییلسه و تنوین صاییلمازسه بیك اوج یوز اون آلتی ایدرهك عینا تام تامنه او تاریخه إشارت ایدر. هم ناصلکه یدی سکز سورهلرده گلن آیتلر و او آیتلرده گلن "صراط مستقیم" جمله لری رسالة النور اسمنه توافقله برابر، بو مذکور ایکی آیت گبی بر قسمی رسالة النور تألیفك تاریخنی ده گوسترر. عینا اویله ده؛ یدی عدد سورهلرك باشلرنده یدی دفعه ﴿تِلْكَ اَیَّاتُ الْكِتَابِ﴾ جمله قدسیه سی مقام جفریسی اولان بیك اوج یوز اون آلتی ویا یدی (۱۳۱۶-۱۳۱۷) ایدرهك عینا تام تامنه او بیك اوج یوز اون آلتی تاریخنه توافقله إشارت ایتدیگی گبی، ﴿طَسَّ تِلْكَ اَیَّاتُ الْقُرْآنِ﴾ آیتی دخی عینا بیك اوج یوز اون آلتی ایدرهك او بیك اوج یوز اون آلتی تاریخنه توافقله إشارت ایدر.

گویا ناصلکه عصرِ سعادتده قرآنده کی ایمان حقیقتلرینه علامتler، دلیلر و او کتابِ مبینک دعوالرینه برهانلری و حجتلری گوزلره ده گوسترمک معناسنده تکرار ایله **﴿تِلْكَ آيَاتُ الْكِتَابِ ۖ تِلْكَ آيَاتُ الْقُرْآنِ﴾** فرمانلریله قرآن معجز البیان اعلانات یاپیور. اوپله ده، بو دهشتلی عصرده دخی بر معنایِ ایشاریسیله او آیاتِ فرقانیه نك برهانلری و حقایقنیک علامتلری و حقیقتلرینک حجتلری و حق کلام الله اولدیغنه دلیللری اولان رسائل النوره معنایِ ایشاریسیله، علامت و برهان و اماره و دلیل معناسیله آیاتک آیتلری دییه تکرار ایله **﴿تِلْكَ آيَاتُ الْكِتَابِ﴾** فرمان ایدهرک نظر دققی قرآن حسابنه بو عصره و بو عصرده کی رسائل النوره چویریور اعتقاد ایدیورم.

اوت هر بر جهت ایله عینِ شعور اولان آیاتِ قرآنیه نك بویله یگرمی وجهله و یگرمی پارمقله عین شیئه متفقاً ایشارتلری تصریح درجه سنده بکا قناعت ویریور. بنم قناعتمه اشتراك ایتمه یین بو إتفاقه نه دییه جک و نه دییه ییلیر؟ هانگی قوت بو إتفاقی بوزار؟ رسائل النور بو عصره گلن ایشاراتِ قرآنیه یه خصوصی بر مدارِ نظر اولدیغنه کیمک شبهه سی وارسه، قرآنک قرق وجهله معجزه سنی اثبات ایدن معجزاتِ قرآنیه نامنده کی یگرمی بشنجی سوز و یگرمنجی سوزک ایکنجی مقامنه و حشره دائر اوننجی سوز و یگرمی طوقوزنجی سوزلره باقسین، شبهه سی ازاله اولمازسه گلکسین پارمغنی گوزیمه صوقسون.

یگرمی ایکنجی آیت و آیتلر: هم یونس، هم یوسف، هم رعد، هم حجر، هم شعراء، هم قصص، هم لقمان سورهلرینک باشلرنده بولونان **﴿تِلْكَ آيَاتُ الْكِتَابِ﴾** اعلانِ قدسیسیدر. یگرمی برنجی آیتک خاتمه سنده بونک مناسبتِ معنویه سی بر درجه بیان ایدیلمش. جفریسی ایسه، بو آیتده اوچ "ت"

پیک ایکی یوز ایدر و ایکی "ک" ایکی "ل" یوز ایدر؛ یکونی پیک اوج یوز. بر "ی" بر "ب" درت ویا بش "ألف" مجموعی پیک اوج یوز اون آلتی ویا اون یدی (۱۳۱۶-۱۳۱۷) ایدهرک رسائل النور مؤلفی بر إنقلاب فکری ایلر علوم متنوعه یی قرآنک حقائقنه چیقماق ایچون باصامقلا یاپدیغی بر تاریخه تام تامنه توافقی مناسبت معنویه سنک قوتنه إستنادا دیرز:

او توافق رمز ایدر که: بو عصرده رسائل النور دینیلن اوتوز اوج عدد سوز و اوتوز اوج عدد مکتوب و اوتوز بر عدد لمعلر، بو زمانده، کتاب مبین ده کی آیتلرک آیتلریدر. یعنی، حقائقنک علامتلیدر و حق و حقیقت اولدیغنک برهانلریدر. و او آیتلرده کی حقائق ایمانیه نک غایت قوتلی حجتلریدر. و ﴿تِلْكَ﴾ کلمه قدسیه سنک إشارت حسیه سیله گوزلر دخی گورونه جک درجه ده ظاهر اولدیغنی إفاده ایدن بویله إشارته لایق دلیلریدر دییه رمزاً رسائل النوری بر إشاری معناسنک کلی دائره سنه خصوصی و مدار نظر بر فردی اولارق داخل ایدیور.

الحاصل: ناصلکه بو آیتده بولونان إشاری معنا یدی سورده یدی إشارت حکمنده اولوب دلالت، بلکه صراحت درجه سنه چیقیور. عیناً اوپله ده:

﴿صِرَاطٍ مُسْتَقِيمٍ﴾ ده کی رمز دخی، یدی سکز سورهلرده بولونمقله یدی سکز رمز حکمنده اولارق او رمزی إشارت، بلکه دلالت، بلکه صراحت درجه سنه چیقاریور.

إخطار: کلفتسز اولمق اوزره بردن خاطره گلن إشارات قید ایدیلدی. تکلفه گیرمه مک ایچون، إشارتلی اوتوز اوج آیتک چوق إشاراتی قید ایدیلمدی.

یگرمی اوچنجی آیت: ﴿عَسَىٰ رَبُّنَا أَنْ يُبَدِّلَنَا خَيْرًا﴾ شو آیت هر عصره

باقیدیگی گبی بو عصره ده باقیور و بو عصره کابوسلی بر رؤیا گبی مصیبتلره دوشن و رب رحیمندن اوئی خیره تبدیل ایتمه سنی رجا ایدنلر ایچنده رسائل النور شاکردلرینه خصوصی رمز ایتدیگنه بر اماره سی شودر که: بو آیتک مقام جفریسی اولان بیٹ اوچ یوز قرق بشده (۱۳۴۵) اُهمیتلی رساله لر تألیف ایله برابر، فوق العاده حادثه لر وقوعه گلیمگه حاضرلاندیلر. و او رسائل النورک مرکز انتشاری اولان بارلا قریه سنده زیاده صیقنتی مؤلفنه ویریلدی. و خصوصی کوچک مسجدینه ایلشلدیگی زمان رسائل النور شاکردلری قوتلی بر رجا ایله درگاهِ اِلهیه یه إلتجا ایدوب "یا رب! بو مدهش رؤیایی خیره تبدیل ایله" دیوب یالواردیلر. هر کسک مأیوسیتلرینه مقابل پک قوتلی بر اُمید و رجا ایله مسلمانلرک قوّه معنویه لرینی تقویه ایتدیلر. بو آیتک بردن کلفتسز خاطره گلنی بو قدردر. یوقسه اُسراری چوقدر. تکلف اولماسین دییه قیصه کسدم.

یگرمی دردنجی آیت و آیتلر: هم سورهُ زُمر، هم سورهُ جاثیه، هم سورهُ

أَحْقَافُكْ باشلرنده بولونان ﴿تَنْزِيلُ الْكِتَابِ مِنَ اللَّهِ الْعَزِيزِ الْحَكِيمِ﴾ آیاتِ عظیمه لیدر. شو آیتلر دخی یگرمی ایکنجیده کی آیتلر گبی رساله النورک اسمنه و ذاته، هم تألیف و انتشارینه بر معناء رمزیه باقیورلر.



ایضاحدن اول مهم بر إخطار

(لزوملی درت بش نقطه بیان ایدیلہ جک.)

برنجی نقطه: حدیثہ وارد اولدیغی گبی، "هر بر آیتک معنا مرتبه لرنده بر ظاهری، بر باطنی، بر حدی، بر مطّلعی واردر. بو درت طبقه دن هر بریسنک (حدیثجه "شجون و غصون" تعبیر ایدیلن) فروعاتی، إشاراتی، دال و بوداقلری واردر." مثالنده کی حدیثک حکمیلہ، قرآن حقّنده نازل اولان بو آیت قدسیہ، فرعی بر طبقه دن و بر معنای إشاریسیله ده قرآن ایله مناسبتی چوق قوّتلی بر تفسیرینه باقمق، شأنه بر نقیصه دگل، بلکه او لسان الغیبہ کی إعجازِ معنویسنک مقتضاسیدر.

ایکنجی نقطه: بر طبقه نك معنای إشاریسنک کلّیتنده کی أفرادینک بو عصرده تظاهر ایدن و مناسبتی پک قوّتلی بر فردی رساله النور اولدیغی، اونى اوقویان هرکس تصدیق ایدر. أوت بن، رساله النورک خاص شاکردلرینی إشهاد ایدهرک دیرم:

رسالة النور سائر تألیفات گبی علوم و فنوندن و باشقه کتابلردن آیینمامش. قرآندن باشقه مأخذی یوق، قرآندن باشقه استادی یوق، قرآندن باشقه مرجعی یوقدر. تألیف اولدیغی وقت هیچ بر کتاب مؤلفنک یاننده بولونمیوردی. طوغریدن طوغری یه قرآنک فیضندن مُلْهُمْدِر و سماءِ قرآنیدن و آیاتنک نجموندن، ییلدیزلردن اینیور، نزول ایدیور.

اوچنجی نقطه: رسائل النور باشند إسم حکیم و رحیمک مظهری اولدیغندن بو اوچ آیتک آخرلری إسم حکیم ایله و گله جک یگرمی بشنجی دخی

رحمن و رحیم ایلہ باغلاملری مناسبتِ معنویہ یی جَدًّا قَوَّتَلندیر ییور. ایشته بو قَوَّتلی مناسبتِ معنویہ یه بناءً دیرز که: «تَنْزِيلُ الْكِتَابِ» جمله سنڭ صریح بر معناسی عصرِ سعادتده وحی صورتیله کتابِ مبینڭ نزولی اولدیغی گبی، معنایِ اِشاریسیله ده، هر عصرده او کتابِ مبینڭ مرتبۀ عرشیه سندن و معجزۀ معنویہ سندن فیض و اِلهام طریقیله اونڭ گیزی حقیقتلری و حقیقتلرینڭ برهانلری اینیور، نزول ایدیور دییه رك شو عصرده بر شاکردینی و بر لمعه سنی جناحِ حمایتنه و دائرۀ حریمه بر خصوصی اِلتفات ایلہ آلییور.

دردنجی نقطه: ایشته بو رسالهدہ مذکور اوتوز اوج آیتِ مشهوره نڭ بِالْإِتْفَاقِ تَكْلَفَسز، معناه و جفرجه رسائل النورڭ باشنه پارمق باصمالری و باشده آیت النور اون پارمقله اوڭا اِشارت ایتمه سی و اُسکیدن بری علما اورتہ سنده و اَدیلر مابینده مشهور بر دستور و حقیقتلی بر مدارِ اِستخراجات و حتّی خصوصی تاریخلرده و مزار طاشلرنده اَدیلرڭ اِستعمال ایتدکلری معروف بر قانونِ علمی ایلہ در. اُگر او قانونه تصنّع قاریشمازسه، اِشارتِ غیبیه اولاییلیر. اُگر صنعی و قصدی یاییلسه، یالکز بر لطافت، بر ظرافت، بر جزالت اولور.

اوت اَدیلر خصوصی و شخصی تاریخلرده اونڭ تقلیدینی یایمقله کلاملرینی گوزللشدیردکلری، هم جفر علمنڭ اُڭ اُساسلی بر قاعده سی و مهمّ بر آناختاری اولان مقامِ اُجدی ایلہ اِشارت ايسه؛ هر جهتله عینِ شعور و نفسِ علم و محض اِرادۀ و تصادفی حاللری اولمیان و لزومسز مادّه لری بولونمیان قرآنڭ بو قدر آیاتِ مشهوره سی اِجماع ایلہ و اِتّفاقله رسالۀ النوره اِشارت و توافقلری صراحت درجه سنده اونڭ مقبولیتنه بر شهادتدر و حق اولدیغنه بر اِمضادر و شاکردلرینه بر بشارتدر.

بشنجی نقطه: بو حساب اُجدی، مقبول و عمومی بر دستور علمی و بر قانون ادبی اولدیغنه دلیلر پک چوقدر. بوراده یالکز درت بش دانه سنی نمونه ایچون بیان ایده جگز:

برنجیسی: بر زمان بنی اسرائیل عالمرندن بر قسمی حضور پیغمبریده سورهرک باشلرنده کی **﴿الْم * کَهِیَصَ﴾** گبی مقطعات حروفیه یی ایشیتدکلی وقت، حساب جفری ایله دیدیلر: "یا محمد! سنک امّکک مدّتی آذر." اونلره مقابل دیدی: "آز دگل." سائر سورهرک باشلرنده کی مقطعاتی اوقودی و فرمان ایتدی: "داها وار." اونلر صوصدیلر.

ایکنجیسی: حضرت علی رضی الله عنک اُک مشهور قصیده جلعلوتیه سی، باشند نهایته قدر بر نوع حساب اُجدی و جفر ایله تألیف ایدیلمش و اويله ده مطبعه لرده باصیلمش.

اوچنجیسی: جعفر صادق رضی الله عنه و محی الدین عربی (رض) گبی أسرار غیبیه ایله اوغراشان ذاتلر و أسرار حروف علمنه چالیشانلر، بو حساب اُجدی یی غیبی بر دستور و بر آناختار قبول ایتمشلر.

دردنجیسی: یوکسک اُدیبلر بو حسابی، ادبی بر قانون لطافت قبول ایدوب، اُسکی زماندن بری اونی استعمال ایتمشلر. حتّی لطافتک خاطر ایچون، ارادی و صنعی و تقلیدی اولماق لازم گلیرکن، صنعی و قصدی بر صورته او غیبی آناختارلرک تقلیدینی یاپیورلر.

بشنجیسی: علوم ریاضیه علماسنک مناسبت عددیه ایچنده اُک لطیف دستورلری و عوامجه خارقه گورونن قانونلری، بو حساب توافقیکنک جنسنددرلر.

حتیٰ فطرتِ اشیاده فاطرِ حکیم بو توافقی حسابی بی بر دستورِ نظام و بر قانونِ وحدت و انسجام و بر مدارِ تناسب و اتفاق و بر ناموسِ حُسن و اِتِّساق یاپمش. مثلاً؛ ناصلکه ایکی اَلْک و ایکی آیاغْک پارمقلری، أعصابلری، کمیکلری، حتیٰ حجیراتلری، مساماتلری حسابجه بربرینه توافق ایدرلر. اوپله ده؛ بو آعاج، بو بهارده و گچن بهارده کی چیچک، یاپراق، میوه جه توافق ایتدیگی گی، بو بهارده دخی آز بر فرقله گچن بهاره توافق و اِستقبال بهارلری دخی ماضی بهارلرینه اِختیار و اِرادۀ اِلهیه یی گوسترن سرلی و آز فرقله موافقتلری، صانعِ حکیم ذو الجمالْک وحدتنی گوسترن قوْتلی بر شاهدِ وحدانیتدر.

ایشته مادام بو توافقی جفری و اُبجدی، بر قانونِ علمی و بر دستورِ ریاضی و بر ناموسِ فطری و بر اصولِ ادبی و بر آناختارِ غیبی اولویور. اَلْبته منبعِ علوم و معدنِ اُسرار و فطرتْک ترجمانِ آیاتِ تکوینیه سی و ادبیاتْک معجزۀ کبراسی و لسانِ الغیب اولان قرآنِ معجز البیان، او قانونِ توافقی یی اِشاراتنده اِستخدام، اِستعمال ایتمه سی اِعجازینْک مقتضاسیدر.

اِخطار بیتدی، شیمدی صده گلیورز.

سورۀ زُمر، جائیه، اَحْقافْک باشلرنده کی ﴿تَنْزِيلُ الْكِتَابِ مِنَ اللَّهِ الْعَزِيزِ

الْحَكِيمِ﴾ اولان آیتلر، سابق اِخطارْک ایکنجی نقطه سنده، مناسبتِ معنویه سی بیان ایدیلدیگندن بوراده یالْکْز جفری رمزینی بیان ایده جگْز.

شویله که: ایکی "ت" سکز یوز، ایکی "نون" یوز، ایکی "م" سکسان، ایکی "ک" قرق، اوچ "ز" یگر می بر، اوچ "ی" اوتوز، بر "ب" بر "ح" اون، "لفظ الله" آتشمش یدی، بر "ع" یتشمش، درت "ل" درت "ألف" یوز یگر می درت اولوب یکوئی یلْک اوچ یوز قرق ایکی (۱۳۴۲) ایدهرْک بو عصرْک شو تاریخنه

نظر دقتی جلب ایتمکله برابر، قرآنک تنزیله چوق علاقه‌دار بر نوره پارمق باصییور. و او تاریخن آز صوگره معجزات احمديه (عصم) رساله‌سی و یگرمنجی و یگرمی دردنجی مکتوبلر گبی رساله النورک اڭ نورانی جزءلری میدان انتشاره چیقمالری و قرآنک قرق وجهله إعجازینی اثبات ایدن معجزات قرآنیّه رساله‌سیله حشره دائر اوننجی سوزک ایکسینک قرق ایکیده انتشارلری و قرق آلتیده فوق العاده اشتهارلری عین تاریخن اولماسی بر قوتلی اماره‌در که، بو آیت اوڭا خصوصی بر التفاتی وار. هم ناصلکه بو آیتلر تألیف و انتشارینه ایشارت ایدرلر، اوپله ده؛ یالکز **﴿تَنْزِيلُ الْكِتَابِ﴾** کلمه‌سی رساله النورک اِسمنه (شده‌لی "نون" بر "نون" صایلمق جهتیه) غایت جزئی بر فرقله توافق ایدوب رمزًا باقار، کندینه قبول ایدر. چونکه **﴿تَنْزِيلُ الْكِتَابِ﴾** کلمه‌سی طوقوز یوز اَللی بر (۹۵۱) ایدهرک رساله النورک مقامی اولان طوقوز یوز قرق سکزه (۹۴۸) سرلی اوچ فرقله توافق نقطه‌سندن باقار.

بردن خاطره گلدی که: بو اوچ فرقک سَرّی ایسه رساله النورک مرتبه‌سی اوچنجیده اولماسیدر. یعنی وحی دگل و اولاماز. هم عمومیتله دخی إلهام دگل، بلکه اکثریتله قرآنک فیضیه و مددیه قلبه گلن سنوحات و استخراجات قرآنیّه‌در.

جای دقتدر که، برنجی **﴿حَم﴾** اولان سورهُ مؤمنده **﴿تَنْزِيلُ الْكِتَابِ مِنْ**

اللّٰهِ الْعَزِيزِ الْعَلِيمِ﴾ مقام جفریسی، بعض مهم آیتلر گبی بیڭ اوچ یوز یتمشه (۱۳۷۰) باقییور. عجباً اون بش یگرمی سنه صوگره باشقه بر نور قرآن ظهور می ایده‌جک، یاخود رسائل النورک بر انکشاف فوق العاده ایله بر فتوحاتی می اولاجق بیلمدیگمدن او قپوی آچامیورم.

یگرمی بشنجی آیت: ﴿حَمَّ ۖ تَنْزِيلٌ مِنَ الرَّحْمَنِ الرَّحِيمِ﴾ آیت

قدسیه سیدر. بو آیتك معنایِ إشاریسی، رسائل النور ایله مناسبتی چوق قوتلیدر. بر جهتی شودر که: رسالة النورک و شاکردلرینک مسلگی، درت أساس اوزرینه کیدیور.

برنجیسی تفکدر؛ حکیم اسمنه باقیور.

بری ده شفقتدر، حدسز اولان فقرینی حسن ایتمکدر که؛ رحمن و رحیم اسملرینه باقیور.

هم شو آیت ناصلکه رسائل النورک تألیف و تکمّل تاریخنه توافقه پارق باصیور، اوپله ده ﴿تَنْزِيلٌ﴾ کلمه سیله (وقف محلی اولمادیغندن تنوین "نون" صایلمق جهتیله) مقامی بش یوز قرق یدی (۵۴۷) اولارق سوزلرک ایکنجی و اوچنجی اسمی اولان رسائل النور و رساله نورک عددی اولان بش یوز قرق سکر ویا قرق طوقوزه (۵۴۸-۵۴۹) شده لی "نون" بر "نون" صایلمق جهتیله پک جزئی و سرلی بر ویا ایکی فرقه توافق ایدهرک رمزًا اوکّا باقار، دائره سنه آلیر.

هم ﴿حَمَّ ۖ تَنْزِيلٌ مِنَ الرَّحْمَنِ الرَّحِيمِ﴾ ک مقام جفریسی، بر وجهله، یعنی تنوین "نون" صایلمسه و شده لی ایکی "ر" ده کی لام اصلی حساب ایدیلسه ﴿حَمَّ﴾ ﴿حَامِمْ﴾ تلفظه اولدیغی گبی اولسه، بیك اوچ یوز اَللی درت ویا بش (۱۳۵۴-۱۳۵۵) ایدر. و دیگر بر وجهده، یعنی تنوین صایلمازسه بیك اوچ یوز درت (۱۳۰۴) ایدر؛ اوچنجی وجهده، یعنی تلفظه بولونمیان ایکی "ل" حسابه گیرمزه بیك ایکی یوز طقسان درت (۱۲۹۴) ایدر. برنجی وجهده تام تامنه رسائل النورک تألیفجه بر درجه تکمّلی و فوق العاده اهمّیت کسب ایتمه سی و فورطنه لره طوتولماسی و شاکردلری قدسی بر تسلی یه محتاج اولدقلری عربی تاریخله

شو بیك اوج یوز اَللی بش و اَللی درت تاریخنه، هم اوتوز بر عدد لمعه لردن عبارت اولان "اوتوز برنجی مکتوب" کُ تألیف زمانه، هم او مکتوبک اوتوز برنجی لمعه سنک وقت ظهورینه و او لمعه دن برنجی شعاعک تألیفنه و او شعاعک یگرمی طوقوز مقامنده اوتوز اوج عدد آیاتک رسالهُ نوره إشارتلی إستخراج ایدیلدیگی هنگامنه و یگرمی بشنجی آیتک رسالهُ نوره ایمالری یازیلدیگی شو زمانه، شو دقیقه یه، شو حاله تام تامنه توافقی ایسه، قرآنک إعجازِ معنویسنه یاقیشیور. غایت لطیف و مژده لی بر توافقدِر.

ایکنجی وجهده، یعنی بیك اوجیوز درت (۱۳۰۴) مقامیله رسالهُ نورک ترجمانی، رسالهُ نورک باصامقلری اولان مبادیِ علومه بسمله کش اولدیگی و فتوحاتِ نوریّه ده بسمله سنی چکدیگی و فاتحه حیاتِ علمیّه ده ﴿بِسْمِ اللَّهِ الرَّحْمَنِ الرَّحِيمِ﴾ اوقودیگی زمانه تام تامنه توافقه پارمق باصیور، آرقه سنی صیواتیور، "هایدی گیت، سلامتله چالیش" رمزاً دیور.

اوجنجی وجهده، یعنی بیك ایکی یوز طقسان اوج ویا درت (۱۲۹۳-۱۲۹۴) اولان مقامِ جفریسیله او ترجمانک بسمله حیاتِ دنیویه سنک إبتداسنه تام تامنه توافق سرّیله ایما ایدر که، اونک حیاتی چوق دهشتلی دغدغه لری و فورطنه لری گورمک و چکمکه برابر دائما رحمن و رحیم إسملرینک مظهری اولارق رحمتله محافظه و شفقتله تربیه ایدیله جگنی رمزاً منعمانه خبر ویریور. بو صورتله قرآنک معنوی إعجازندن إخبارِ غیبی نوعنک بر شعاعنی گوستریور.

یگرمی آلتنجی آیت: سورهُ هودده ﴿فَمِنْهُمْ شَقِيٌّ وَسَعِيدٌ﴾ آیتنک ایکی سطر صوگره گلن ﴿وَأَمَّا الَّذِينَ سُعِدُوا فَمِنَ الْجَنَّةِ﴾ آیتیدر. شو آیتک شدّه لی "م" و شدّه لی "ل" و شدّه لی "ن" ایکیشر صایلمق و ﴿الْجَنَّةِ﴾ ده کی "ت"

وقفده اولديغندن "ه" اولمق جهتيله مقام جفريسي بيك اوچ يوز اُللى ايكي (۱۳۵۲) اولمقله تام تامنه رسائل نور شاكردلرينك اُكْ مأيوسيتلى و مصيبتلى زمانلرى اولان بيك اوچ يوز اُللى ايكي تاريخنه تام تامنه توافقله او آجينه جق حاللرنده قدسى و سماوى بر تسلى، بر بشارتدر. و آيتك مناسبت معنويهسى بر ايكي رسالهده، يعنى كراماتِ علويهده و غوثيهده بيان ايديلمشدر.

﴿وَأَمَّا الَّذِينَ سَعِدُوا﴾ ده كى ﴿سَعِدُوا﴾ كلمهسى ﴿فَمِنْهُمْ شَقِيٌّ وَسَعِيدٌ﴾

ده كى ﴿سَعِيدٌ﴾ كلمه سنده قرآن صحيفه سنده تام موازى و مقابل كلمهسى، بو توافقه بر لطافت داها قاتار. بو آيتك كللى و چوق گنیش معنای قدسيسنك جزئياتندن رساله نور شاكردلرى گي تسلى يه چوق محتاج بر جزئيسى بو عصرده بيك اوچ يوز اُللى ايكيده بولونديغنه تام تامنه توافقله إشارت ايدهرك باشنه پارمق باصبيور.

اگر ﴿فَفِي الْجَنَّةِ﴾ كلمه سنده وقف ايديلمزسه و ﴿خَالِدِينَ﴾ كلمه سييله

ربط ايديلسه، او وقت "ة"، "ه" اولماز. فقط داها لطيف تسليكار بر توافق اولور. چونكه ﴿وَأَمَّا الَّذِينَ سَعِدُوا﴾ قاعده نحويه جه مبتدادر. ﴿فَفِي الْجَنَّةِ﴾

﴿خَالِدِينَ﴾ اونك خبريدر. بو خبر ايسه، مقام جفريسي اولان بيك اوچ يوز قرق

طوقوز (۱۳۴۹) عدديله، بيك اوچ يوز قرق طوقوز تاريخندن بشارتله رمزاً خبر ويرر.

و او تاريخده بولونان قرآن خدمتكارلرندن بر طائفه نك اصحاب جنّت و اهل

سعادت اولديغنى معنای إشاريسييله و توافق جفري ايله إخبار ايدر و بو تاريخده

رساله نور شاكردلرى قرآن حسابنه فوق العاده خدمتلى و تنورلى و چوق مهم

رساله لرك تأليفلى و باشلرينه گلن شيمديكى مصيبتك، دشمنلى طرفندن

إحضاراتی تظاهر ایتدیگندن، ألبته بو تاریخه متوجّه و إشاری، تسلیکار بر بشارت قرآنیّه اُكْ اُول اونلره باقدیغنی گوسترر.

أوت ﴿فَفِي الْجَنَّةِ خَالِدِينَ﴾ ده شدّه لی (نون) بر (نون) صایلمق جهتله (ت) درت یوز، (خ) آلتی یوز؛ یك ایدر. ایکی (ن) یوز، بر (ی) ایکی (ف) بر (ل) ایکی یوز؛ دیگر (ل) اوتوز، ایکنجی (ی) اون، ایکی (ألف) ایکی، بر (ج) اوچ، بر (د) درت، قرق طوقوز ایدر که؛ یکونی یك اوچ یوز قرق طوقوز (۱۳۴۹) ایدر.

بو مژده قرآنیّه نك بیگدن بر وجهی بزه تماسی، یك خزینه دن زیاده قیمتداردر. بو مژده نك بر مژده جیسی، بر سنه اُول گورولمش بر رؤیای صادقهدر. شویله که: إسپارطه ده باشمزه گلن بو حادثه دن بر آی اُول بر ذاته رؤیاده (اوڭا) دینیلیور که: "رسائل النور شاکردلری، ایمان ایله قبره گیره جکلر، ایمانسز وفات ایتمزلر."

بز او وقت او رؤیایه چوق سؤیندك. دیمك او مژده، بو مژده قرآنیّه نك بر مژده جیسی ایمش. (حاشیه)

یگرمی یدنجی آیت: سورّه صفّه ﴿يُرِيدُونَ لِيُطْفِئُوا نُورَ اللَّهِ بِأَفْوَهِهِمْ وَاللَّهُ مُتِمُّ نُورِهِ وَلَوْ كَرِهَ الْكَافِرُونَ﴾ در. بو آیتده کی ﴿نُورَ اللَّهِ بِأَفْوَهِهِمْ وَاللَّهُ مُتِمُّ نُورِهِ﴾ جمله سنك مقام جفریسی، یك اوچ یوز اون آلتی ویا یدیدر (۱۳۱۶-۱۳۱۷).

(حاشیه): جهان سلطنتدن داها زیاده قیمتدار بر مژده قرآنیّه، بر بشارت سماویه بو صحیفه ده واردر.

و بو تاریخ ایسه؛ سابقاً یگرمی برنجی آیتک خاتمه سنده ذکر ایدیلن انقلاب فکری صد دنده؛ آوروپانک بر مستملکات ناظری، قرآنک نورینی سوندورمه سنه چالیشماسی تاریخنه و رسائل النور مؤلفی دخی اوکثا قارشی او انقلاب فکری سایه سنده او نوری پارلاتمغه چالیشماسی عین تاریخه، هم یدی سوره ده یدی دفعه **﴿تِلْكَ آيَاتُ الْكِتَابِ﴾** عین تاریخه، هم **﴿طَسَّ تِلْكَ آيَاتُ الْقُرْآنِ﴾** دخی عین تاریخه، هم **﴿هَدَيْنِي رَبِّي إِلَى صِرَاطٍ مُسْتَقِيمٍ﴾** دخی عین تاریخه، هم **﴿إِنَّ رَبِّي عَلَى صِرَاطٍ مُسْتَقِيمٍ﴾** دخی شدلی "نون" بر "نون" صایلمق و تنوین صایلماق جهتیه عین تاریخه، هم **﴿فَاعْرِضْ عَنْهُمْ﴾** فرمانی دخی عین تاریخه، هم **﴿نُورَ اللَّهِ بِأَفْوَهِهِمْ وَاللَّهُ مُتِمُّ نُورِهِ﴾** دخی عین تاریخه بالاتفاق موافقتلری آلبته رمزدن، إشارتدن، دالالتدن زیاده بر صراحتدر که؛ رسالۀ نور او نور إلهینک بر لمعه سی اولاجغنی و دشمنلری طرفندن گلن شبهات ظلماتی طاغیده جغنی معنای إشاریسیله مژده لیور. هم بو جفری و متعدد و معنیدار توافقلر ایسه، قوتلی بر مناسبت معنویه إستناد ایدرلر.

أوت رسائل النورک یوز یگرمی طوقوز رساله لری، یوز یگرمی طوقوز ألتکتریق لامبالرینک شیشه لری مثللو قرآن نور أعظمندن اوزانان تلرک باشلرینه طاقیلوب او نوری نشر ایتدکلری میدانده در. رسالۀ نورک یاری إسمی ایکی دفعه بو جمله آیتده بولونماسیله او مناسبتی لطافتلندیریور.

یگرمی سکرنجی آیت: سورۀ توبه ده: **﴿يُرِيدُونَ أَن يُطْفِئُوا نُورَ اللَّهِ بِأَفْوَهِهِمْ وَيَأْبَى اللَّهُ إِلَّا أَن يُتِمَّ نُورُهُ وَلَوْ كَرِهَ الْكَافِرُونَ﴾** آیتنده کی **﴿نُورَ اللَّهِ بِأَفْوَهِهِمْ وَيَأْبَى اللَّهُ إِلَّا أَن يُتِمَّ نُورُهُ﴾** جمله سی، قوتلی و لطافتلی مناسبت

معنویہ سیلہ برابر شدہ لی "لاملر" برر "ل" و شدہ لی "م" اصل کلمہ دن اولدیغندن ایکى "م" صایلمق جھتیلہ ییڭ اوچ یوز یگرمی درت (۱۳۲۴) ایدہ رک، آوروپا ظالملى دولتِ اسلامیہ نڭ نورینی سوندورمک نیتیلہ مدھش بر سوء قصد پلانی یاپدقلى و اوڭا قارشى تورکیہ حمیت پرورلى، حرّیتی یگرمی درتده إعلانیلہ او پلانی عقیم بیراقمغه چالیشدقلى حالده، مع التأسف آلتی یدی سنہ صوڭره، حربِ عمومی نتیجہ سنده ینہ او سوء قصد نیتیلہ ثور معاہدہ سنده قرآنڭ ضررینہ غایت آغیر شرائطلہ کافرانہ فکرلرینی ینہ اجرا ایتمک اولان پلانلرینی عقیم بیراقمق ایچون تورک ملّیت پرورلى جمهوریتی إعلانلہ مقابلہ یہ چالیشدقلى تاریخی اولان ییڭ اوچ یوز یگرمی درده، تا اوتوز درده، تا ألى درده تام تامنہ توافقله، او هرج و مرج ایچنده قرآنڭ نورینی محافظہ یہ چالیشانلر ایچنده رسائل النور مؤلفی یگرمی درتده (۱۳۲۴) و رسائل النورڭ مقدماتی اوتوز درتده (۱۳۳۴) و رسائل النورڭ نورانی جزئلى و فداکار شاکردلى ألى درتده (۱۳۵۴) مقابلہ یہ چالیشمالرى گوزہ چارپیور. حتّی حقیقتِ حالى بیلمه ین بر قسم اهلِ سیاستی تلاشہ سوق ایتدیلر. و بو إطفاء سوء قصدینہ قارشى تنویر وظیفہ سنی تام ایفا ایتدکلرندن بو آیتڭ معنایِ إشاریسی جھتنده بر مدارِ نظری اولدقلىنہ قوّتلى بر أماره در. شیمدی اسلاملر ایچنده نور قرآنہ مخالف حالتلرڭ اکثریسی، او سوء قصدلرڭ و ثور معاہدہ سى گبی غدارانہ معاہدہ لرڭ وخیم نتیجہ لریدر.

اگر شدہ لی "م" دخی شدہ لی "لاملر" گبی بر صاییلسه، او وقت ییڭ ایکى یوز سکسان درت (۱۲۸۴) ایدر. او تاریخده آوروپا کافرلى دولتِ اسلامیہ نڭ نورینی سوندورمگہ نیت ایدہ رک اون سنہ صوڭره روسلرى تحریک ایدوب روسڭ طقسان اوچ (۱۲۹۳) محاربهٔ مشئومه سیلہ عالمِ اسلامڭ پارلاق نورینہ موقت بر بلوط پردہ ایتدیلر. فقط بونده رسائل النور شاکردلى یرنده مولانا خالدڭ (قس) شاکردلى او بلوط ظلماتنى طاغیتدقلىرندن بو آیت بو جھتده اونلرڭ باشلرینہ

رمزاً پارمق باصییور. شیمدی خاطره گلدی که؛ اگر شدّه لی "لاملر" و "م" ایکیشر صاییلسه، بوندن بر عصر صوگره ظلماتی طاغیده جق ذاتلر ایسه، حضرت مه‌دینک شاکردلری اولاییلیر. هر نه ایسه... بو نورلی آیتک چوق نورانی نکته‌لری وار. ﴿الْقَطْرَةُ تَدُلُّ عَلَى الْبَحْرِ﴾ سَرَّیله قیصه کس‌دک.

یگر می طوقوزنجی آیت: سورّه ابراهیمک باشنده ﴿الرَّكَابُ أَنْزَلْنَاهُ إِلَيْكَ لِتُخْرِجَ النَّاسَ مِنَ الظُّلُمَاتِ إِلَى النُّورِ بِإِذْنِ رَبِّهِمْ إِلَى صِرَاطٍ الْعَزِيزِ الْحَمِيدِ﴾ آیتیدر. شو آیتک درت بش جمله‌سنده درت بش ایما وار. مجموعی بر إشارت حکمنه گچر.

برنجیسی: ﴿إِلَى النُّورِ بِإِذْنِ رَبِّهِمْ﴾ جمله‌سی إفاده ایدر که: "کتابِ مبین واسطه‌سیله، اون دردنجی عصرده کی ظلماتدن، انسانلر بِإِذْنِ اللَّهِ قرآندن گلن بر نوره چیقارلر." بو مثال و خصوصاً نور لفظی، رسائل النوره مطابق اولدیغی گبی؛ مقام جفریسی شدّه لی "نون" ایکی "نون" اولمق اوزره بیك اوج یوز اوتوز سکز ویا طوقوز (۱۳۳۸-۱۳۳۹) ایدهرک حربِ عمومی ظلماتنده تألیف ایدیلن رسائل النورک فاتحه‌سی اولان إشارات الإعجاز تفسیری، او ظلمتلر ایچنده کی ظهوری تاریخنه تام تامنه توافقی و آیتده کی نور کلمه‌سی رسالّه نوره کی نور لفظنه ایما ایله باقییور.

ایکنجیسی: ﴿إِلَى صِرَاطٍ الْعَزِيزِ الْحَمِيدِ﴾ جمله‌سی اولکی جمله‌ده کی نوری تعریف ایدهرک دیر: او نور، جنابِ حَقِّ عَزَّت و محمودیتنی گوسترن یولدر. بو جمله‌نک مقامِ أبجدیسی بش یوز قرق سکز ویا أَللی (۵۴۸-۵۵۰) اولارق رسائل النورک شدّه لی "نون" بر "نون" اولمق اوزره عددی اولان بش یوز قرق سکزه تام

تامنہ توافق ایدر. اگر اوقونمیان ایکی "الف" صایلسه، مرتبه سنه إشارت ایدن ایکی فرقله ینه تام تامنه توافق ایدر. بو ایمای تأیید ایدن، هم لطافتلندیرن بر مناسبت وار. شویله که:

عالم اسلام ایچون اُك دهشتلی عصر آلتنجی عصر ایله هلاکو فتنه سی و اون اوچنجی عصرک آخری و اون دردنجی عصر ایله حرب عمومی فتنه لری و نتیجه لری اولدیغی مناسبتیله بو جمله مقام اُجدیلده آلتنجی عصره و اُولکی جمله گبی «الْعَزِيزُ الْحَمِيدُ» کلمه لری ایله بو عصره، سلطان عبد العزیز و سلطان عبد الحمید دورلینه ایما ایدر.

هم سابق آیتلرده ایسه، رسائل النورک ایکنجی اسمنه توافقله إشارت ایدن عموم او آیتلر، دهشتلی عصر اولان هلاکو و جنگیز عصرینه دخی ایما ایدرلر. حتّی او آیتلرک هم او عصره، هم بو عصره ایمالری ایچوندر که، حضرت علی (رض) أرجوزه سنده و غوثِ اعظم (رض) قصیده سنده رسائل النوره کرامتکارانه إشارت ایتدکلری وقت هم او عصره، هم شو عصره باقوب حدّتله إشارت ایتمشلر.

اوچنجیسی: «مِنَ الظُّلُمَاتِ» کلمه سنده کی «الظُّلُمَاتِ» کُ عددی ییك اوچ یوز یتمش ایکی (۱۳۷۲) ایدهرک بو عصرک ظلملری، ظلمتلی نه وقته قدر دوام ایده جگنی، او ظلمتکُ ایچنده بر نور دائما تنویره چالیشه جغنه ایما ایله رسالهُ نورک تنویرینه رمزًا باقار.

دردنجیسی: «لِتُخْرِجَ النَّاسَ» جمله سی دییور که: "یك اوچ یوز قرق بشده (۱۳۴۵) قرآندن گلن بر نور ایله انسانلر قراکُلفلردن ایشیقلمه چیقاریله جق." بو

مثال ایسه، پیک اوچ یوز قرق بشده فوق العاده تنویره باشلایان رسائل النوره تام تامنه جفرجه، هم مثالجه موافق و مطابق اولمقله رساله نورک مقبولیتنه ایما بلکه رمز ایدیور.

بشنجیسی: ﴿الرَّكَابُ أَنْزَلْنَاهُ إِلَيْكَ﴾ ده کی ﴿إِلَيْكَ﴾ کلمه سی قرآنه

خاص باقدیغی ایچون خارج قالمق اوزره، ﴿الرَّكَابُ أَنْزَلْنَاهُ﴾ جمله سنک مقامی رساله نورک برنجی اسمنه تام تامنه توافق ایتمه سی رساله نورک، کتاب منزلک تام بر تفسیری و معناسی اولدیغی و اوندن یابانی اولمادیغی رمزاً إفاده ایدر. چونکه ﴿الرَّ﴾ اوچ یوز سکسان ایکی، ﴿كَابُ﴾ درت یوز یگرمی اوچ، ﴿أَنْزَلْنَاهُ﴾ یوز قرق درت، یکونی طوقوز یوز قرق طوقوز (۹۴۹)؛ اگر تنوین "نون" صاییلسه طوقوز یوز طقسان طوقوز (۹۹۹) ایده رک رساله نورک (اگر شده لی "نون" بر "نون" صاییلسه) عددی اولان طوقوز یوز قرق سکزه، اگر شده لی "نون" ایکی "نون" اولسه طوقوز یوز طقسان سکزه (۹۹۸) سرلی (یعنی وحی اولمادیغی إفاده ایچون) بر تک فرقله توافق ایدوب اوکّا ایما ایدر.

الحاصل: بو بر تک آیتده مذکور بش جمله نك مناسبت معنویه پی گوزه تهرک بش عدد ایمالری بر قوتلی إشارت، بلکه بر دلالت حکمنه گچه بیلیر قناعتی بگا بونی یازدیددی. خطا ایتمشسه م کتاب مبینی شفاعتجی ایدوب أرحم الرّاحمیندن قصوریمك عفوبنی نیاز ایدرم.

﴿سُبْحَانَكَ لَا عِلْمَ لَنَا إِلَّا مَا عَلَّمْتَنَا إِنَّكَ أَنْتَ الْعَلِيمُ الْحَكِيمُ﴾



بسم الله الرحمن الرحيم

يگرمی طوقوزنجی آیتک سهوینه دائر تفصیلات

کوچک بر سهودن قوتلی بر إشارت غیبیه گوردم. اوندن بیلدم که، او سهو بونک ایچون ایمش.

شویله که: برنجی شعاع اولان إشارات قرآنیه نك یگرمی طوقوزنجی آیت سورۀ ابراهیمک باشنده، ﴿الرَّكَابُ أَنْزَلْنَاهُ إِلَيْكَ لِتُخْرِجَ النَّاسَ مِنَ الظُّلُمَاتِ إِلَى النُّورِ بِإِذْنِ رَبِّهِمْ﴾ ایچنده ﴿إِلَى النُّورِ بِإِذْنِ رَبِّهِمْ﴾ جمله سنه مقام جفریسی سهواً بیك اوچ یوز اوتوز درت (۱۳۳۴) ایدهرک رسالۀ نورک فاتحه سی اولان إشارات الإعجاز تفسیرینک ظهوری و طبعی تاریخنه توافقله باقار دینیلمش. حالبوکه ملفوظ حرفلرینک مقامی، بیك اوچ یوز اوتوز طوقوز (۱۳۳۹) اولوب او تفسیرک فوق العاده إشتهاری و دار الحکمت طرفندن اکثر مفتیلره گوندریلن نسخه لر، متعدّد و مادّی و معنوی إنقلابلرک صارصینتیلرندن وقایه نقطه سنده (چوق أماره لر و مفتیلرک إعتراfile) برر قلعه و اکثر مفتیلرک أَلرنده برر أَلماس قلنج حکمنه گچمه لری تاریخنه توافقله تقدیرکارانه باقار. اوقومیان ایکی "ألف" صاییلسه، بیك اوچ یوز قرق بر (۱۳۴۱) ایدوب رسالۀ نورک مبدأ ظهورینه تام تامنه توافقله باقار.

بو کوچک سهو شویله بر معنایی بردن قوتلی إخطار ایتدی که: او سورۀ ابراهیمک باشنده کی آیتک رسالۀ نوره رمزًا باقان یالکز اونک درت جمله سی دگل، بلکه او برنجی صحیفه آخرینه قدر مناسبات معنویه جهتنده بر معنای رمزیه

(أَفَرَادٍ كَثِيرَةٍ سِئِلَ رِسَالَةُ نُورِهِ كِزْلِي بِرِ خُصُوصِيَّةِ اِيْلِهِ اِيْمَا اِيْدِرْ، رَمْزًا بِاقَارِ. بِنِ شِيْمِدِيْلِكْ اَوْ حَقِيْقَةِ رَمْزِيَّيْ بِيَانِ اِيْدِهِم. يَالْكَزْقِيْصَهْ بِرِ اِشَارَتِ اِيْدِيْلِهِ جِكْ.

أَوْتِ رِسَالَةُ نُورِكْ مَاهِيَسِي وَ مَشْرَبِي تَفَكَّرْ وَ شَفَقَتِ اُولْدِيْغِي جِهْتَلَهْ، حَضْرَتِ اِبْرَاهِيْمَكْ (عَس) خُصُوصِي مَشْرَبِي اُولَانِ تَفَكَّرْ وَ شَفَقَتِ نَقْطَهْ سِنْدَهْ تَامِ تَوَافُقِ اِيْتَمَكْ سَرِّيْلَهْ شُو سُوْرَهْ دَهْ دَاھَا زِيَادَهْ رِسَالَةُ نُورِي قُوْجَاغْنَهْ اَلِيْيُوْر. بَاشْدَهْ كِيْ اَيْتِ، دَرْتِ جَمْلَهْ اِيْلَهْ اَكْ قَرَاكْلُقْ بِرِ عَصْرَكْ قَرَهْ قَرَهْ اِيْچَنْدَهْ، ظَلَمْتِ ظَلَمْتِ اِيْچَنْدَهْ اِنْسَانْلَرِيْ نُورَهْ چِيْقَارَانِ وَ قَرَاَنْدَنْ چِيْقَانِ بِرِ نُورَهْ پَارْمُقْ بَاَصْدِيْغِيْ كِيْ؛ اَكْ قَرَاكْلُقْ اِيْچَنْدَهْ بُولُونَانِ وَ رِسَالَةُ نُورِكْ جَرِيَانَنَهْ مُخَالَفِ كِيْدَنْلَرِيْ تَعْرِيفِ اِيْدِرْ.

اوپنچى آيت: ﴿الَّذِينَ يَسْتَحِبُّونَ الْحَيَاةَ الدُّنْيَا عَلَى الْآخِرَةِ وَيَصُدُّونَ

عَنْ سَبِيلِ اللَّهِ وَيَبْغُونَهَا عِوَجًا أُولَئِكَ فِي ضَلَالٍ بَعِيدٍ﴾ بو دخى ، اوچ
جمله سيله بعض مناسبات معنويه و موافقت مفهوميه جهتنده و هم رساله نورك
مسلگنه، هم ملحدلرك مسلگنه ايماء باقار. و برنجى جمله سيله دير كه: "او
بدبختلر، بعض اهل ايمانك (ايمانلرى برابر اولديغى حالده) و بر قسم اهل علمك
(آخرتى تام بيلدكلرى حالده) اونلره إلتحاق دلاتيله، بيلهرك و سوهرك حيات
دنيويه ي دينه و آخرته، يعنى الماسى طانيديغى و بولديغى حالده بش پارهلق
شيشه يي اوڭا ترجيح ايتمك گي؛ سفاهت حياتى، دينى حسياته معندانه ترجيح
ايدوب دينزلرك ايله افتخار ايدرلر. " بو جمله نك بو عصره بر خصوصيتى وار.
چونكه هيچ بر عصر بويله بر طرزي گوسترمه مش. سائر عصرلرده او اهل ضلالت
آخرتى بيلميور و انكار ايديور. الماسى الماس بيلميور، دنيائي ترجيح ايديور.

و ايكنجى جمله سى اولان ﴿وَيَصُدُّونَ عَنْ سَبِيلِ اللَّهِ﴾ ايله دير كه: "او

بدبختلرک ضالاتی، محبت حیاتدن و تمرددن نشئت ایتدیگی ایچون کندی حالری ایله طور میورلر، تجاوز ایدیورلر. بیلدکلری و اونک ایله أجدادلری باغلی اولان دینه عداوتکارانه، منبعلرینی قورومتق و اساساتی بوزمق و قپولرینی و یوللرینی قیاتمق ایسته یورلر.

و اوچنچی جمله سی اولان ﴿وَيَبْغُونَهَا عِوَجًا﴾ ایله دیر که: "اونلرک ضالاتی فندن، فلسفه دن گلدیگی ایچون عجیب بر غرور و غریب بر فرعونلق و دهشتلی بر أنانیت اونلره ویروب نفسلرینی اوילה شیمارتمش که، کائناتی إدارة ایدن إلهی قانونلرک شعاعلرینی و انسان عالمنده او حقائقک دستورلرینی سفلی هوساتلرینه و مشتھیاتلرینه مساعد گورمدکلرندن (حاشا! حاشا!) آگری، یا کلیلش، نقصان بولمق ایسته یورلر.

ایشته بو آیت، اوچ جمله سیله معنا بو عصرده عجیب بر طائفه ضالیه تام بر توافق معنوی ایله معنای إشاریسیله چوق افرادی ایچنده خصوصی باقدیغی گبی، توافق جفریسیله دخی باشلرینه پارمق باصیور. اوت اولکی جمله اولان ﴿الَّذِينَ يَسْتَحِبُّونَ﴾ نك مقامی بیك اوچ یوز یگرمی یدی (۱۳۲۷)؛ اگر شده لی "ل" و "ب" ایکیشر صاییلسه عربی تاریخیه بیك اوچ یوز ألی طوقوز (۱۳۵۹) ایدوب او طعیانلی طائفه نك صولتلی زمانی گوسترهك تام توافقله باقار. ﴿وَيَبْغُونَهَا عِوَجًا﴾ نك مقامی، تنوین "نون" اولمق جهتیه بیك ایک یوز طوقوز (۱۲۰۹) ایدهك شریعت اسلامییه سوء قصد اولارق أجنی قانونلرینی عدلییه صومقم فکری و تشبثی تاریخنه تام تامنه توافقله باقار.

و بو أماره لر گبی چوق ایمالر ایله باشده کی آیتک قوتلی إشارت ایتدیگی

رساله نورك معارضلرينه ظاهر بر صورتده باقديغى گي، مفهوم مخالفى دلاتيله دخى رساله نوره تام باقار. حتى دردنجى آيتده رساله نورك توركجه اولماسنى تحسين ايدر و بشنجيده عربى و توركجه يي تام بيلمهين و مرشدلى و عالملى پریشان اولان ولايات شرقيه ده رساله نور إمدادلرينه و هر طائفه دن زياده باشلرينه گلن حادثه لر و آيتده ﴿بِآيَامِ اللَّهِ﴾ تعبير ايديلن أليم واقعه لرى خاطرلرينه گتيرمكله ايقاظ و إرشاد ايتمه لرينه بر معناي إشارى و رمزى ايله أمر ايدىيور. بو آخركى أهْمِيَّتلى إشارتى بيان ايتمه مه شيمدليك إذن اولماديغدن يالكز هر برينك بر تك رمزى غايت قيصة بيان ايديله جك. شويله كه:

دردنچى آيتك ﴿وَمَا أَرْسَلْنَا مِنْ رَّسُولٍ إِلَّا بِلِسَانٍ قَوْمِهِ لِيُبَيِّنَ لَهُمْ﴾

جمله سى مقام جفريسيله و باشده كى آيتك إشارتلى قرينه سيله، رسالت و نبوتك هر عصرده وراثت نقطه سنده نائبلرى، وكيللى بولونمق قاعده سيله، بر معنای رمزى جهتنده وظيفه إرثيتى ياپان رساله نورى أفرادى ايچنه خصوصى بر إلتفاتله داخل ايدوب لسان قرآن اولان عربى اوليه رق توركجه اولماسنى تقدير ايدىيور. أوت بونك مقامى ﴿رَسُولٍ﴾ ده كى تنوين "نون" صاييلمق و شده لى "ل" ايكى صاييلسه و شده لى "ى" بر صاييلسه يك اوچ يوز ألى سكر (۱۳۵۸)، هر ايكيى برر صاييلسه يك اوچ يوز يگرى سكر (۱۳۲۸)؛ شده ليلر ايكى صاييلسه، تنوين صاييلمازسه، يك اوچ يوز اون سكر (۱۳۱۸)؛ هم تنوين هم شده ليلر صاييلسه يك اوچ يوز آلتشم سكر (۱۳۶۸) ايدهرك رساله نورك بش دوره سنه و بش وضعيته رمزا و ايماء باقار.

بشنجى آيتده: ﴿أَنْ أَخْرِجَ قَوْمَكَ مِنَ الظُّلُمَاتِ إِلَى النُّورِ وَذَكَرَهُمْ بِآيَامِ

اللَّهُ ﴿إِلَى النُّورِ وَذَكَرَهُمْ بِآيَامِ اللَّهِ﴾ جملہ سنده مقام جفریسی، شدہ لیلر برر صایلمق جہتندہ بیٹ اوچ یوز اُللی بر (۱۳۵۱) ایدہ رک رسالہ نورک شیمدیلک بیانہ اذنم اولیان اُھمیتلی وظیفہ سنک و بو اوامر قرآنیہ یی اِمتثالنک تاریخنہ تام تامنہ توافق جفری و موافقت معنویہ قرینہ سیلہ و قصہ دن حصہ آلمق مناسبات مفہومیہ رمزی ایلہ رسالہ نورہ ایماء باقار. داھا یازیلہ جق چوق غیبی اِشارت لر وار، فقط اِذن ویریلمدی، شیمدیلک قالدی.



اوتوزنجی آیت

سورہ فصلت دہ ﴿وَمَنْ أَحْسَنُ قَوْلًا مِّمَّنْ دَعَا إِلَى اللَّهِ وَعَمِلَ صَالِحًا وَ

قَالَ إِنِّي مِنَ الْمُسْلِمِينَ﴾ آیتیدر. مقام جفریسی (شدہ لی م (ممن) دہ کی (من) من) در. اصلنہ نظرًا بر (م) بر (ن) و شدہ لی (ن) ایکی (ن) و تنوین (ن) اولمق اوزرہ) بیٹ اوچیوز یگرمی سکز (۱۳۲۸) ایدر کہ، او مدہش تاریخدہ بر طائفہ آیاغہ قالقوب جناب حقہ خلقی دعوت ایدہ جگنہ اِشارت ایدر کہ؛ او تاریخ ہم حریت اِنقلابنک صارصیتیلرندن، ہم حرب عمومی اِنقلابنک فورطنہ لرندن شریعت اُحمدیہ (عصم) و شعائر اسلامیہ اِنخسافہ اوغراماسیلہ، او طائفہ بتون قوت و غیرتیلہ اللہک یولنہ اِنسانلری دعوت ایتمکلہ برابر، کندیلری دہ سنت سنہ اوزرینہ عمل صالحہ چالیشوب اسلامیتلہ اِفتخار ایدر دیہہ رمزًا خبر ویریور.

و بو تاریخده بویله بر دعوت و قرآنک تحسینه لایق اولاجق گوزل سوز ایسه، شیمدیلک سوزلر نامنده کی رسالۀ نورک دعوت ایدیجی جزءلری باشده گورونویور.

﴿أَحْسَنُ قَوْلًا﴾ کلمۀ قدسیه سنک ترجمه سی، "داها زیاده گوزل سوزلی کیم اولاییلیر" دیر. دیمک بریسی او تاریخده غایت گوزل سوزلریله میدانه چیقہ جق. سوزلرینک گوزللیگیله خلقی تسخیر ایده جک. بو خاصّه ایسه، بو زمانده رسالۀ نورک سوزلر نامنده بلاغتجه و حسنِ جمالجه و تأثیر و تسخیرجه یوکسک بر مرتبه ده بولونان کلماتلری و قوتلی سوزلرنده بولونور. دیمک بو آیت، معنایِ إشاریسیله ده رسالۀ نوری تحسین ایدر.



اوتوز برنجی آیت

پدریله برابر رسالۀ نور طلبه لرندن صلاح الدین چلبینک رسالۀ نوره عائد بر آیتدن بر استخراجیدر.

﴿وَإِنْ كُنْتُمْ مَرْضَىٰ أَوْ عَلَىٰ سَفَرٍ أَوْ جَاءَ أَحَدٌ مِنْكُم مِّنَ الْغَائِطِ أَوْ لِمَسْتُمْ
النِّسَاءَ فَلَمْ تَجِدُوا مَاءً فَتَيَمَّمُوا صَعِيدًا طَيِّبًا﴾

معنایِ ظاهریسیله دییور که: صو بولامدیغکز وقت تمیز طوپراق ایله تیمم ایدیگکز دیر. و معنایِ إشاریسیله دییور که: یئک اوچیوز آللی یدی (۱۳۵۷) ده معنوی آبِ حیات منبعلری قیاتیلدیغی زمانده، تمیز طوپراغه قصد و توجه ایدیگکز. اونده بر منبعِ حیات و بر معدنِ نور بولورسکز.

بو آيتك اشارتی خصوصی بر صورتده رسالۀ نوره باقماسنه ايکي اماره وار:

برنجیسی: بو ﴿فَلَمْ تَجِدُوا مَاءً فَتَيَمَّمُوا صَعِيدًا﴾ آيتك مقام ايجدی و

جفریسی ييک اوچيوز ألی یدی (۱۳۵۷) ايدر. او تاريخلرده مدرسه و ارشادگاهلرک سدیله و أهل علم صاريقلرينک آچيلماسيله و معنوی صوسزلق باشلادیغی هنگامده، رسالۀ نور حقائق ایمانيه جهتنده اون بش سنهده قزانیلان ایمان تحقیقی یی اون بش هفتهده، بلکه اون بش گونده، بلکه تام مستعدلره اون بش ساعتده صارصيلمیه جق درجهده ایمان تحقیقی یی قزانديرماسی، قوی بر اماره در که، شو اشارت اوکا خصوصی باقار.

ایکنجی اماره: صاد و سین بربرینه تام قارداش اولماسی و بر کلمهده

بربرینک برینه گچمه سی مناسبتيله بو آیتده کی ﴿صَعِيدًا﴾ کلمه سنهده کی "ص"، "س" اوقونسه رسالۀ نورک ترجمانی گوسترمسی، هم بو جمله نك برنجی مقدمه سی اولان ﴿أَوَلَمْ تَسْتُمِ النِّسَاءَ﴾ فقره سنک اشارتيله، قادینلرک چپلاق باجاق اولارق ارککلره قاریشمق و رسالۀ نورک شدتلی تعرضلر ایچنده تستر لهنده قوتلی مقاومتی زمانه، شده لی (ن) ایکی (ن) اولق اوزره مقام ايجدیسی ﴿فَلَمْ تَجِدُوا﴾ ایله برابر ييک اوچيوز قرق یدی (۱۳۴۷) عددیله پارمق باصماسی، ﴿أَوْ عَلَى سَفَرٍ﴾ فقره سنک اشارتيله عمومی حربرک عصرنده هر ملت سفربرلک وضعيتنده بولونماسی و ﴿أَوْ جَاءَ أَحَدٌ مِنْكُم مِّنَ الْغَائِطِ﴾ فقره سنک عینا ييک اوچيوز ألی یدی (۱۳۵۷) مقام ايجدیسیله هم بو سنه نك تاريخی، هم ﴿فَلَمْ تَجِدُوا مَاءً فَتَيَمَّمُوا صَعِيدًا﴾ جمله سنک عین تاريخی گوسترمه سیله برابر

متعفن چوقور معناسنده اولان "غائط"دن، یعنی معنوی باتاقلقدن چیقدیغکز و تمیزلنمک ایچون صو آرادییغکز زمان معناسنی إفاده ایتمه سی، لطیف و قوتلی اماره در که ﴿فَلَمْ تَجِدُوا مَاءً فَتَيَمَّمُوا صَعِيدًا﴾ آیتک إشارتی بو عصره و رساله نوره بر خصوصیتی وار و رمزًا اوکا باقار. اوت مقام أبجدی و جفریسی تنوینلر حالت وقفده أفلر صایلمق و شدّلی بر صایلمق جهتله ییك اوچوز أल्ली یدی (۱۳۵۷) در. چونکه ایکی (ت) سکز یوز (۸۰۰). برنجی (ف) سکسان (۸۰). اوچ (م)، ایکنجی (ف) ایکی یوز (۲۰۰). دردنجی (م)، بر (ص)، بر (ع) ایکی یوز (۲۰۰). (ل) و ایکی (ی) أल्ली (۵۰). ایکی (و)، ایکی (د)، بر (ج)، درت عدد (أفلر) یگر می یدی (۲۷) ایدر. یکونی ییك اوچوز أल्ली یدی (۱۳۵۷) اولور. (حاشیه ۱) (حاشیه ۲) (حاشیه ۳) (حاشیه ۴) (حاشیه ۵)

(حاشیه ۱): یعنی ترابك معنوی خاصّه سی اولان محویت و ترك أنانیت و تواضع طویراقدن چیقان تمیز و شبهه سز بر صو ایله تمیزلنکز. ﴿فَامَسَحُوا بِوُجُوهِكُمْ وَ أَيْدِيكُمْ﴾ جمله سنك ایماسی و رمزیه او منبعدن گلن نوره یوزیگز ایله متوجّه اولوب، مطالعه و إستفاده ایدیگز. و أَلریگزده کی قلملر ایله نشر ایدوب خلقلری سقوط أخلاقدن صعوده و ترقّیه چیقمالرینه چالیشکز.

(حاشیه ۲): ﴿أَوَلَمْ تَسْتُمِ النِّسَاءَ فَلَمْ تَجِدُوا مَاءً﴾ مقام جفریسی اولان ییك اوچوز قرق یدی (۱۳۴۷) ایدوب، عین تاریخده جاذبه دار فتنه نسائیه أهل اسلامی ایچنه جذب ایتمی و رفع تستر رسمیلشمه سیدر. و رساله نورك تام مجاهده سی عین تاریخنه موافقی، بو اماره یی تام قوتلندیوریور.

(حاشیه ۳): بو درت جمله نك مناسبت معنویه لری ایله، اوچ جمله نك اوچ مقام أبجدیه بو زمانمزه کی رساله نورك خدمتنه تام مطابقتی او خصوصیتی إثبات ایدر.

(حاشیه ۴): صلاح الدین پدربله برابر، "بو آیتده بر إشارت وار" دییه إجمالاً حسن ایدوب صورتی. گیجه ده معنوی بر إخطار ایله بو جواب گلدی.

اوتوز برنجی آیتک برنجی مقدمہ سی اولان ﴿وَإِنْ كُنْتُمْ مَرْضَى﴾ جملہ سی،
 یٹ بشیوز (۱۵۰۰) کسور اولان مقام جفریسیلہ؛ اہل ضلالت طرفندن آشیلانان
 معنوی خستہ لقلرک قسم اعظمی، رسالہ نورک قرآنی علاجریلہ ازالہ ایدیله بیلیر
 دیہہ اشارت ایتمکلہ برابر؛ مع التأسف ایکی یوز سنہیہ قدر دنیانک عمری
 باقی قالمشہ، بر فرقہ ضالہ ده دوام ایدہ جگنہ ایما ایدیور. ﴿تَيَمَّمُوا صَعِيدًا﴾
 جملہ سنک معنای ایشاریسندہ، ایکنجی امارہ نک برنجی نقطہ سندہ "س" حرفی "ص"
 حرفنک آلتندہ گیزلنمہ سی و "ص" گورونمہ سنک ایکی رمزی وار:

بریسى: سعید (رض) تام طوپراق گبی محویت و ترک انانیت و تواضع
 مطلقده بولونمق شرطدر؛ تاکہ رسائل النوری بولانديرماسین، تأثیرینی قیرماسین.

ایکنجیسی: شیمدیکی باتاقلغه و معنوی طاعونه سقوطک سببی ایسه، ترقی
 ایتمک فکرنندن نشئت ایتدیگی جہتیلہ، اونلرک خطالرینی گوستروب؛ صعود و
 ترقی، مسلمان ایچون آنجق اسلامیتده و ایمانلی اولمقده اولدیغنه اشارت
 ایتمکدر.



(حاشیہ ۵): برنجی شعاعک اوتوز اوچ آیتندن اوتوز برنجی آیتی، درت سنہ صوگرہ
 ظهورینک سری؛ هر ایکی جملہ سیلہ بو سنہ نک عین تاریخی گوسترمسیدر. ﴿وَاللَّهُ أَعْلَمُ بِالصَّوَابِ﴾
 ﴿لَا يَعْلَمُ الْغَيْبُ إِلَّا اللَّهُ﴾

رساله نورک فعال بر شاکردی اولان احمد نظیفک بر فقره سیدر.

بونی هم برنجی شعاعک اوتوز ایکنجی آیتی اولارق، هم یگرمی یدنجی مکتوبک فقره لرنده قید ایتمک مناسب گورولدی.

او کندیسی دییور: گلن آیتلری حافظدن دیکلهدم. سورۀ احزابدن:

﴿يَا أَيُّهَا الَّذِينَ آمَنُوا اذْكُرُوا اللَّهَ ذِكْرًا كَثِيرًا ۖ وَسَبِّحُوهُ بُكْرَةً وَأَصِيلًا ۖ هُوَ الَّذِي يُصَلِّيْ عَلَيْكُمْ وَمَلَائِكَتُهُ لِيُخْرِجَكُم مِّنَ الظُّلُمَاتِ إِلَى النُّورِ وَكَانَ بِالْمُؤْمِنِينَ رَحِيمًا ۖ تَحِيَّتُهُمْ يَوْمَ يَلْقَوْنَهُ سَلَامٌ ۚ وَأَعَدَّ لَهُمْ أَجْرًا كَرِيمًا ۖ يَا أَيُّهَا النَّبِيُّ إِنَّا أَرْسَلْنَاكَ شَاهِدًا وَمُبَشِّرًا وَنَذِيرًا ۖ وَدَاعِيًا إِلَى اللَّهِ بِإِذْنِهِ وَسِرَاجًا مُّنِيرًا ۖ وَبَشِّرِ الْمُؤْمِنِينَ بِأَنَّ لَهُم مِّنَ اللَّهِ فَضْلًا كَبِيرًا ۖ صَدَقَ اللَّهُ الْعَظِيمُ﴾

بو آیتلرده رساله نوره ایما و رمز و بلکه إشارتلر وار، دییه حسن ایتدم. اوت مادام بو آیت گبی وظیفه رسالت و دعوته باقان آیتلر هر عصره باقییورلر، هر عصرده أفرادلری و ماصدقلری وار. و مادام بو آیتلرده رسول اکرم علیه الصلاة والسلامه ویریلن صفتلر و عنوانلر هر زمانده جریان و هر بر عصرده حکم ایتمک حیثیتله، او عنوانلرک آلتنده معنای رمزی ایله رساله نور گبی او وظیفه یی یرینه گتیرن اثرلر و ذاتلر بو گبی آیاتک دائرة شموللرینه گیرمه لرینه، قرآنده کی إعجاز معنویسنک شأنیدر بلکه مقتضاسیدر و لازمیدر. و مادام رساله النور، بو عجیب عصرده مستثنا بر صورتده بو آیتک إشارت ایتدیگی وظیفه یی یاییور و معناسنک دائرة کلیه سنده بر فردیدر. ألبته متعدد أماره لر و گیزلی قرینه لر ایله دییه بیلیرز که؛ بو آیتده دخی برنجی شعاعک سائر اوتوز بر عدد آیتلری گبی رساله نوره معنای إشاریله باقار. شویله که:

﴿لِيُخْرِجَكُم مِّنَ الظُّلُمَاتِ إِلَى النُّورِ وَكَانَ بِالْمُؤْمِنِينَ رَحِيمًا﴾ جمله سی،

معنایِ اشاریسیله، ییڭ اوچ یوز یتمشه (۱۳۷۰) قدر تجاوز ایدن اڭ قراڭلق بر ظلم، اڭ قراڭلق بر ظلمتدن سزی آی اهل ایمان و قرآن! قرآندن گلن نورلره و ایمانڭ ایشیققرینه چیقاران و اسمنده نور و معناسنده رحیمیت بولونان و اسم نور و اسم رحیمڭ مظهری اولان بر لمعه قرآنییه و بو عصریمزه باقوب ایما ایدیور. معنا مطابقتدن باشقه بر اماره و قرینه سی بودر که: ﴿إِلَى النُّورِ وَكَانَ بِالْمُؤْمِنِينَ رَحِيمًا﴾ فقره سنڭ مقام جفریسی (شده و تنوین برابر) طوقوز یوز قرق یدی (۹۴۷) ایدوب رساله النور و یا رسالت نور اولان اسمنڭ مقامی اولان طوقوز یوز قرق یدی (۹۴۷) عددینه تام تامنه توافق ایدیور.

﴿إِنَّا أَرْسَلْنَاكَ شَاهِدًا وَمُبَشِّرًا﴾ جمله سی، (شده صاییلماز و آخرکی تنوین

وقفدر، ألف صاییلیر) مقام جفریسی ییڭ اوچ یوز یگرمی اوچ (۱۳۲۳) تاریخی گوسترر. و او تاریخده، مرکز خلافتده دهشتلی بر انقلابڭ مبداء انفلاقی ایچنده یأسه دوشن اهل ایمانه مژده و یروب، اسلامیتڭ حقانیتنه و قوتنه قوتلی شهادت ایدن و وراثت نبوت نقطه سنده دعوتده بولونان بر شاهده اشارت ایدر.

﴿وَنَذِيرًا ۖ وَدَاعِيًا إِلَى اللَّهِ﴾ جمله سی (تنوینلر وقف اولمادیغدن صاییلیرلر)

مقام جفریسی ییڭ ایکی یوز اَللی آلتی (۱۲۵۶) تاریخی گوسترمک ایله، بو عصرده و بو زمانده کی اسلامیتڭ انخسافنی بر عصر اول احضار ایدن مقدماتنه

باقه‌رق، **﴿وَدَاعِيًا إِلَى اللَّهِ﴾** (حاشیه ۱) کلمه‌سی رساله نورک بر اسمی اولان بدیع الزمانک یوز طقسان بر (۱۹۱) عددینه تام تامنه توافقله ایما ایدر که؛ رساله نور دخی، او انخساف ایچنده بر "داعی إلى الله" در.

﴿بِإِذْنِهِ وَسِرَاجًا مُنِيرًا﴾ (حاشیه ۲) کلمه‌سی ایسه تام تامنه رسائل نورک بر اسمی اولان "سراج النور" ه لفظاً و معنأ و جفراً توافقله باقار. **﴿مُنِيرًا﴾** ده کی (م، ی)، **﴿النُّور﴾** ده کی شده لی "نون" ه مقابلدر. أوت إمام علی (رض) کرامت غیبیه‌سنده رساله نوره "سراج النور" نامنی ویرمه‌سی، بو آیتک بو فقره‌سندن ملهمدر دینیله‌بیلیر و چکینمیه‌رک دیرز.

(حاشیه ۱): **﴿وَدَاعِيًا إِلَى اللَّهِ﴾** کلمه‌سی، رساله نورک بر اسمی اولان بدیع الزمانک مقامنه تام تامنه توافقی و معنأ مطابقی اولدیغی گبی، یالکز **﴿وَدَاعِيًا﴾** کلمه‌سی ده، رساله نورک ترجمانی اولان سعید اسمنه اوچ حرف ایله إتحاد و اوچ فرقله توافقی ایدر. چونکه تنوین و ألف و واو مجموعی ألی یدیدر. "سین" دن اوچ فرق وار.

(حاشیه ۲): **﴿بِإِذْنِهِ وَسِرَاجًا مُنِيرًا﴾** بیك اوچیوز اوتوز (۱۳۳۰) ایدهرک رساله نورک فاتحه‌سی اولان إشارات الإعجاز تفسیرینک ظهورینه توافقی و **﴿بِإِذْنِهِ﴾** ده کی ملفوظ "ی" صاییلسه بیك اوچیوز قرق (۱۳۴۰) ایدوب، رساله نورک ظهورینه تطابقی و برنجی تنوین وقف اولمادیغندن "نون" صاییلسه، بیك اوچیوز سکسان (۱۳۸۰) ایدهرک رساله نورک او تاریخده إن شاء الله کُرهُ أرضی ایشیق‌لان‌دییره‌حق بر سراج نورانی اولاجغنه بر رمز قرآنیدر.

رساله نور شاکردلرندن تحسین

﴿وَبَشِّرِ الْمُؤْمِنِينَ بِأَنَّ لَهُم مِّنَ اللَّهِ﴾ جمله‌سی، شدّه صایلمق جهتيله مقام

جفریسی ییڭ اوچوز اَللی طوقوز (۱۳۵۹) تاریخی گوسترمکله بو عصریمزڭ تام بولوندیغمز بو سنه‌سنه باقهرق اهل ایمانه بر بیوک إحسانی وار دئییه معنای رمزيله خبر ویریور. بز باقیورز، بو زمانده اڭ بیوک إحسان، ایمانی قورتارمقدر. و گوروپورز، ایمانی خارقه برهانلر ایله قورتاران باشده رسالّه النوردر. دیمک بو زمانه نسه بر "فضل کبیر" اودر. بو إشارتی قوتلندیرن شودر:

﴿فَضْلًا كَبِيرًا﴾ ده کی (حاشیه) ﴿فَضْلًا﴾ کلمه‌سی طوقوز یوز آلتمش

(۹۶۰) ایدوب رسالّه نورڭ بو اسمی، إضافه‌دن توصیف طرزینه گچمکله "رسالّه نوریه" اولوب، طوقوز یوز آلتمش عددینه معنیدار ایکی فرقله توافقی، اونڭ باشنه رمزًا و ایماء پارق باصماسیدر.



(حاشیه): هم بوراده ﴿فَضْلًا﴾ کلمه‌سی رسالّه نورڭ مقامنه قوتلی توافقی و متعدّد آیتلرده

﴿ذَلِكَ فَضْلُ اللَّهِ يُؤْتِيهِ مَنْ يَشَاءُ﴾ ده کی ﴿فَضْلُ اللَّهِ﴾ کلمه‌سی شدّه صایلمازسه طوقوز یوز

قرق یدی (۹۴۷) ایدهرک رسالّه نورڭ مقام جفریسی اولان طوقوز یوز قرق یدی (۹۴۷) عددینه تام تامنه توافقی و تطابقی، إشارت درجه‌سندن بر رمزدرکه؛ رسالت نور بو ییڭ اوچوز اَللی طوقوز (۱۳۵۹) تاریخنده بر (فضل کبیر) در و بر (فضل الله) در و هر ایکی

آیتده بر مدار نظردر و قصداً داخلدر. ﴿اللَّهُ أَعْلَمُ بِالصَّوَابِ﴾

رسالّه نور شاکر دلرندن

حلمی

آخر زماندن خبر ویرن مهم بر حدیث شریف

﴿لَا تَزَالُ طَائِفَةٌ مِنْ أُمَّتِي ظَاهِرِينَ عَلَى الْحَقِّ حَتَّى يَأْتِيَ اللَّهُ بِأَمْرِهِ﴾

رمضان شریفده اوننجی گونک ایکنجی ساعتده بردن بو حدیث شریف خاطریمه گلدی. بلکه رساله نور شاکردلرینک طائفه سی نه قدر دوام ایده جگنی دوشوندیگمه بناء إخطار ایدیلدی.

﴿لَا تَزَالُ طَائِفَةٌ مِنْ أُمَّتِي﴾ (شده صاییلیر، تنوین صاییلماز) فقره سنک مقام جفریسی ییك بش یوز قرق ایکی (۱۵۴۲) ایده رک نهایت دوامنه ایما ایدر. ﴿لَا يَعْلَمُ الْغَيْبَ إِلَّا اللَّهُ﴾

﴿ظَاهِرِينَ عَلَى الْحَقِّ﴾ (شده صاییلیر) فقره سی دخی؛ مقام جفریسی ییك بش یوز آلتی (۱۵۰۶) ایدوب، بو تاریخه قدر ظاهر و آشکارانه، بلکه غالبانه؛ صوگره تا قرق ایکی یه قدر، گیزی و مغلوبیت ایچنده وظیفه تنویرییه سنه دوام ایده جگنه رمزه یاقین ایما ایدر. ﴿وَالْعِلْمُ عِنْدَ اللَّهِ * لَا يَعْلَمُ الْغَيْبَ إِلَّا اللَّهُ﴾

﴿حَتَّى يَأْتِيَ اللَّهُ بِأَمْرِهِ﴾ (شده صاییلیر) فقره سی دخی؛ مقام جفریسی ییك بش یوز قرق بش (۱۵۴۵) اولوب، کافرک باشنده قیامت قوپماسنه ایما ایدر. ﴿لَا يَعْلَمُ الْغَيْبَ إِلَّا اللَّهُ﴾

جای دقت و حیرتدر که، اوچ فقره بالإتفاق ییك بش یوز (۱۵۰۰) تاریخی گوسترملریله برابر، تام تامنه معنیدار، معقول و حکمتلی بر صورتده ییك بش یوز آلتیدن تا قرق ایکی یه، تا قرق بشه قدر اوچ انقلاب عظیمک آیری آیری

زمانلرینه تطابق و توافقلریدر. بو ایمالر گرچه یالکز بر توافق اولدیغندن دلیل اولماز و قوتلی دگل، فقط بردن إخطار ایدیللمسی بکا قناعت ویردی. هم قیامتک وقتنی قطعی طرزده بر کیمسه بیلمز؛ فقط بویله ایمالر ایله بر نوع قناعت، بر غالب إحتمال گله بیلیر. فاتحهده "صراط مستقیم" أصحابنک طائفه کبراسنی تعریف ایدن **﴿الَّذِينَ أَنْعَمْتَ عَلَيْهِمْ﴾** فقرهسی، شده سز بیك بش یوز آلتی ویا یدی (۱۵۰۶-۱۵۰۷) ایدهرک تام تامنه **﴿ظَاهِرِينَ عَلَى الْحَقِّ﴾** فقره سنک مقامنه توافقی و معناسنه تطابق و شده صایلیسه **﴿لَا تَزَالُ طَائِفَةٌ مِنْ أُمَّتِي﴾** فقره سنه اوچ معنیدار فرقله تام موافقتی و معنا مطابقتی بو حدیثک ایماسنی تأیید ایدوب رمز درجه سنه چیقارییور. و متعدد آیات قرآنیده "صراط مستقیم" کلمه سی، بر معنای رمزیله رساله النوره معناجه و جفرجه ایما ایتمه سی رمزه یاقین بر ایما ایله؛ رساله النور شاکردلرینک طائفه سی، آخر زمانده او طائفه کبراء أعظمک آخزلرنده بر حزب مقبول اولاجنی إشارت ایدر دییه دفعه بردن إخطار ایدیلدی.

﴿الْعِلْمُ عِنْدَ اللَّهِ * لَا يَعْلَمُ الْغَيْبَ إِلَّا اللَّهُ﴾



﴿أَلَمْ تَرَ كَيْفَ ضَرَبَ اللَّهُ مَثَلًا كَلِمَةً طَيِّبَةً كَشَجَرَةٍ طَيِّبَةٍ

أَصْلُهَا ثَابِتٌ وَفَرْعُهَا فِي السَّمَاءِ﴾

﴿كَلِمَةً طَيِّبَةً﴾ کلمه سی (توینلر صایلییر، شده صایلماز) بیك ایکی

(۱۰۰۲) ایدهرک رساله النورک مقامنه اون اوچ معنیدار فرقله توافقی و **﴿كَلِمَةً**

طَبِيبَةٌ مبارك و گوزل سوز معناسيله رسالۀ النورك گوزل سوزلرينه تطابقي و **كَشَجَرَةٍ طَبِيبَةٍ** (تنوینلر و شدۀ صاییلمازسه) یك اوچوز قرق درت (۱۳۴۴) ایدهرک تام تامنه رسالۀ النورك ظهور و انتشارینه و یوکسلمسنگ تاریخنه موافقتی و معناجه مطابقتی بر ایما، بلکه بر رمز، بلکه بر إشارتدر که، (کلمۀ طیبۀ) اولان رسالۀ نورك گوزل سوزلری بو آیتك بو عصرده بر مدار نظریدر. بو آیتك تام آرقه سنده **مَثَلُ كَلِمَةٍ خَبِيثَةٍ كَشَجَرَةٍ خَبِيثَةٍ** إلخ... آیتی رسالۀ النور معارضلرینك پیس مسلکلینه معنًا باقماسی، او ایمای تأیید ایدر. هم **أَصْلُهَا ثَابِتٌ وَفَرْعُهَا فِي السَّمَاءِ** معناسيله قرآنك طوبا آغاجی گبی اصلی کوکی سمادن، دالری و ثمراتی زمینده انتشارینه مقابل؛ او قرآنك بر تفسیری دخی اصلی کوکی زمینده، دال و بوداقلری سماواتده و حقائق الهیهده انتشارینی رمزًا إفاده ایتمک ایله او ایمای تام تأیید ایدر.



شهید مرحوم حافظ علی نك بر إستخراجیدر

(رسالۀ نوره إشارت ایدن اوتوز اوچنجی آیتك إستخراجنه دائر حافظ علی نك (رحمة الله علیه) بر فقره سیدر)

دون آقشام نمازینی قیلارکن ایکنجی رکعتنده، فاتحۀ شریفه دن صوگره **شَهِدَ اللَّهُ أَنَّهُ لَا إِلَهَ إِلَّا هُوَ وَالْمَلَائِكَةُ وَأُولُوا الْعِلْمِ قَائِمًا بِالْقِسْطِ لَا إِلَهَ إِلَّا هُوَ الْعَزِيزُ الْحَكِيمُ** آیتی اوقورکن، هیچ دوشونمدیگم، عقل و قلبمده بر شی، تحرّی یه بر سبب یوقکن، بردن بره روحك پنجره سنه شو عظیم آیت کریمه نك

رساله نوره و مؤلفه بر مناسبت معنویه ایله اشارتی گوستریلیدی. نمازدن صوگره بن دوشوندم. حقیقه قوتلی بر مناسبت معنویه سی وار. شوپله که:

بو کائناتده، وحدانیت إلهیه یی جن و إنسه و روحانیاته قارشی قطعی بر صورتده گوستروب إثبات ایدن برنجی، قرآن عظیم الشان اولدیغی گبی؛ بو عصرده ایکنجی، اوچنجی درجهده کمال عدالتله و صادق و مصدق حجتلرله وحدانیتی واضح و باهر بر صورتده، کائنات صفحاتنده انس و جنک أنظارینه عرض ایدوب إثبات ایدن رساله نور؛ بتون طبقات بشره هم مدرسه، هم مکتب، هم قیشله، هم حکیم، هم حاکم اولارق، ائک عامی عوامدن ائک اخص خواصّه قدر درس ویروب، تعلیم و تربیه ایتمه سی بزجه مشهود اولماسیله، بو آیت کریمه نئک بر موضوعی و بر ماصدقی ده رساله النور اولماسنه شبهه سز بر قناعت ویریور.

ایکنجی کلمه توحیددن صوگره "الْعَزِيزُ الْحَكِيمُ" إسملریله جناب حق (جلّ جلاله) ذاتی توصیف بیوروب، ایکنجی درجهده عین إسملرک مظهری اولان رساله النوره و ترجمانه اشارت ایتمه سی قرآن عظیم الشانک شأنه یاقیشیر بر کیفیتدهدر. چونکه بلکه بتون دنیایه مخالف اولارق فقر حالیه برابر عزّت شریعة إلهیه و عزّت علمیه یی محافظه ایچون ئولومدن بتر مصیبتلره قارشی گوگس گرن و تحمّل ایدن رساله النور مؤلفی اولدیغی گبی؛ زمینده و سماواتده حکمتله تصرفاتک معماسنی آچان ینه رساله النور اولدیغی صادق و مصدقدر. بو قوتلی مناسبت معنویه یی تأیید ایدن بر أماره سی شودر که: ﴿أُولُوا الْعِلْمِ﴾ مقام جفریسی ایکی یوز اون درت (۲۱۴) اولوب، رساله نورک بر إسمی اولان "بذیع الزمان"ک (شده لی "ز"، لام اصلی صاییلیر) مقامی اولان ایکی یوز اون درده

(۲۱۴) تام تامنه توافقی و مؤلفنك حقیقی و دائمی اسمی اولان ملا سعیدك مقامی اولان ایکی یوز اون بشه (۲۱۵) بر تك فرقله توافقی، البته بو کلمه قدسیه نك هر عصره باقدیغی گبی، بو عصره ده مدارِ نظر بر فردی رساله نور اولدیغنه بر اماره اولدیغی گبی؛ **﴿وَأُولُوا الْعِلْمِ قَائِمًا بِالْقِسْطِ﴾** (اوقونمیان و او و ایکنجی همزه صایلماز) مقامی اولان آلتی یوز بر (۶۰۱) عددیله، رساله نورك بش یوز طقسان طوقوز (۵۹۹) مقامنه و رسائل النور مقامنه یالکز ایکی فرقله، ایکی اسمنه توافقی دخی بر اماره اولدیغی و **﴿شَهِدَ اللَّهُ أَنَّهُ لَا إِلَهَ إِلَّا هُوَ وَالْمَلَائِكَةُ وَأُولُوا الْعِلْمِ﴾** جمله توحیدی قدسیه نك مقام جفریسی و أبجدیسی اولان یك اوچ یوز آلتمش (۱۳۶۰) عددیله (حاشیه) تام تامنه بو عجیب عصیان، طغیان و تمرد عصرینك، بو غریب کفران و غلیان و إلحاد زمانتك بو سنه سنه و بولوندیغمز بو تاریخه توافقی و تطابقی البته قوتلی بر اماره در كه؛ بو پك بیوك و گنیش و عام اولان توحید و شهادتك مدارِ نظر اهمیتلی افرادی و ماصدقلى، هر زماندن زیاده بو شهادته داها محتاج بو عصرك بو وقتنده بولونه جقدر. و شیمدیلك او شهادتی تأثیرلی بر صورتده إثبات ایدن رسائل النور او أفراددن بریسی و خصوصی مدارِ نظر اولدیغنه پك چوق اماره لر و إشارت لر و بشارت لر وارد.

﴿اللَّهُ أَعْلَمُ بِالصَّوَابِ ۖ وَالْعِلْمُ عِنْدَ اللَّهِ﴾
﴿سُبْحَانَكَ لَا عِلْمَ لَنَا إِلَّا مَا عَلَّمْتَنَا إِنَّكَ أَنْتَ الْعَلِيمُ الْحَكِيمُ﴾

حافظ علی
 (رحمة الله علیه)

سكزنجى شعاع

اوپچنجى بر كرامتِ علويه

بر إفادهٔ مرام

(معلوم اولسون كه؛ بن رسالهٔ نورك قيمتى و اهميتنى بيان ايتمكله قرآنك حقيقتلرينى و ايمانك ركنلرينى إعلان ايتمك و ضعفِ ايمانه دوشنلرى اونلره دعوت ايتمك و اونلرك قوتلرينى و حقانيتلرينى گوسترمك ايسته‌يورم. يوقسه، حاشا كندىمى و هيچ بر جهتله بگنمديگم نفسِ اماره‌مى بگنديرمك و مدح ايتمك دگلدرد. هم رسالهٔ نور ظاهرًا بنم اثرم اولمق حيثيتيله ثنا ايتمىيورم. بلكه يالكر قرآنك بر تفسيرى و قرآندن ملهم بر ترجمانِ حقيقيسى و ايمانك حجتلى و دلّالى اولمق حيثيتيله مزيتلرينى بيان ايدييورم. حتّى بر قسم رساله‌لرى اختيارم خارجنده يازديغم گيى، رسالهٔ نورك اهميتنى ذكر ايتمكده اختيارسز حكمنده‌يم. إمامِ على‌نك (رضى الله عنه) آيت الكبرا نامنى ويرديگى يدنجى شعاع رساله‌سنى يازمقده چوق زحمت چكديگمه بر مكافاتِ عاجله و بر علامتِ مقبوليت و بر مدارِ تشويق اولارق بو كرامتِ جلجلوتيه، عنايتِ إلهيه طرفندن ويريلديگنه شهبه‌م قالمامش. تحديتِ نعمتِ قبيلندن بونى سكزنجى شعاع اولارق يازدم. يوقسه حشره دائر مهمّ بر آيتك معجزه‌لى اولان برهانلرينى يازاجقدم.)



بسم الله الرحمن الرحيم

(إمام علی نك (رضی الله عنه) رسالۃ النورہ دائر اوچنجی بر کرامتیدر.)

أوت اون سکزنجی و یگرمی سکزنجی لمعه لده ایضاح و إثبات ایدیلن ایکی ظاهر کرامتی تأیید و تقویه ایدهرک قصیده جلجلوتیه سنده سراج النوردن صراحت درجه سنده خبر ویردیگی گی، ینه او قصیده ده سراج النورک اُک نامدار رساله لرینه پارمق باصییور، عادتاً آلفیشلا یور؛ و سکز عدد رمز ایله مشهور بر قسم رساله لرینی گوسترییور.

برنجیسی: رسالۃ النورہ تصریح ایدن ﴿تَقَادُ سِرَاجُ النُّورِ سِرًّا بَيَانَةً﴾

فقره سندن صوگره سُریانی لسانیلہ أسماءِ حسنی دن إستمداد و سُورِ قرآنیہ ایله بر مناجات یاپییور. تام اوتوز اوچ سوره لرله اوילה غریب و معنیدار بر طرزده ذکر ایدیور که؛ بر قسم سرلری و غیبی خبرلری دخی بیلدیرمک ایستدیگی آکلاشلیییور. بن صیقنتیلی بر زمانده إمام علی نك (رضی الله عنه) آیت الکبرا نامنی ویردیگی یدنجی شعاعی بیتیردیگم عین وقتده (إعتقادجه بگا عجله بر مکافات و بر اجرت اولارق) گیجه لین جلجلوتیه یی اوقودم. بردن بر إخطارِ غیبی گی قلبمه دینیلدی: إمام علی رضی الله عنه، رسالۃ النور ایله چوق مشغولدر. مجموعندن خبر ویردیگی گی قیمتدار رساله لرینه ده إشارت درجه سنده رمز ایدوب ایما ایدیور. اگر صریح بر صورتده غییدن خبر ویرمک (چوق ضررلری بولوندیغندن، حکمته منافی اولدیغی جهتله) حکمتِ إلهیه طرفندن یاساق اولماسه ایدی تصریح ایده جکدی. مثلاً؛ سوره لری تعداد ایدرکن، یگرمی بشنجی یه گلدیگی وقت دییور که:

﴿بِحَقِّ تَبَارَكَ ثُمَّ نُونٍ وَسَائِلٍ﴾ وَبِسُورَةِ التَّهْمِينِ وَالشَّمْسُ كُورَتْ
 ﴿وَبِالذَّارِيَّاتِ ذُرُوءًا وَالنَّجْمِ إِذَا هَوَىٰ﴾ وَبِاقْتَرَبَتْ إِلَى الْأُمُورِ تَقَرَّبَتْ
 ﴿وَبِسُورَةِ الْقُرْآنِ حِزْبًا وَآيَةً﴾ عَدَدَ مَا قَرَأَ الْقَارِئُ وَمَا قَدْ تَنَزَّلَتْ
 ﴿فَاسْأَلْكَ يَا مَوْلَايَ بِفَضْلِكَ الَّذِي﴾ عَلَى كُلِّ مَا أَنْزَلْتَ كُتُبًا تَفْضَلْتُ

ایشته بو فقره‌لرده آسکیشهر آغیر جزا محکمه‌سنی حیرته‌ده بیراقان و اوستنده گوز ایله گورونن بر کرامتیه و قیامت و حشری إثبات ایدن خارقه حجت‌لریله إشتهار ایدن یگرمی طوقوزنجی سوزه حضرت إمام علی رضی الله عنه ، ذکر و تعداد ایتدیگی سوره‌لرک یگرمی طوقوزنجی مرتبه‌سنده ﴿وَالشَّمْسُ كُورَتْ﴾ ایله اوکثا إشارت ایدر. چونکه قیامت قویماسندن غایت دهشتلی خبر ویرن ﴿إِذَا الشَّمْسُ كُورَتْ﴾ سوره‌سنه تام مطابق بر صورته‌ده او یگرمی طوقوزنجی سوز، قیامتک و خراب عالمک و موت دنیانک و حیات آخرتک و إحيای أمواتک قطعی حجت‌لرینی بیان ایدرکن، بو سوره‌نک دهشتلی تصویرینی ذکر ایتمسی؛ هم معناده، هم یگرمی طوقوزنجی مرتبه‌ده تطابق‌لری او إشارتی إثبات ایدر.

هم تحولات ذراتده بوغولان مادّیونلری صوصدیران و ذراتک تحولاتی و حرکاتنی، وظیفه و إنتظاملرینی أمثالسز بر طرزده إثبات ایدن اوتوزنجی سوز نامنده کی ذرات رساله‌سنه حضرت إمام علی رضی الله عنه، اوتوزنجی مرتبه‌ده ﴿وَبِالذَّارِيَّاتِ ذُرُوءًا﴾ قَسَمِیله اوکثا إشارت ایدر. أوت بو إشارته‌ده لفظاً و صورةً سورة ﴿وَالذَّارِيَّاتِ ذُرُوءًا﴾ و رساله ذرات، بربرینه مشابحت ایله برابر معنا جهتیله دخی مناسبت وار. چونکه سورة ﴿وَالذَّارِيَّاتِ﴾ کُ باشنده تصادفی و إنتظامسز

ظن ایدیلن تموجاتِ هوائیه، غایت حکمتلی و وظیفه‌دار اولارق ربویتیڭ تکوینی آمرلرینی اطرافه یتیشدیرر دییه إفاده ایتدیگی گبی؛ رساله ذرات دخی مادّیونلر طرفندن تصادفی و إنتظامسز تلقی ایدیلن حرکاتِ ذرات دخی، غایت حکمتلی و او ذره‌لر منتظم وظیفه‌لرله وظیفه‌دار اولدقلرینی غایت قوتلی و قطعی برهانلر ایله اثبات ایدیور.

هم معراج محمدی علیه الصلاة والسلامی دلائل عقلیه ایله غایت معقول و قطعی بر صورتده اثبات ایدن و اوتوز برنجی سوز نامنده و مرتبه‌سنده بولونان رساله معراج، حضرتِ إمام علی (رض) اوتوز برنجی مرتبه‌ده معراجِ أحمدی (ع صم) و قاب قوسین‌ده کی مشاهده و مکالمه‌ی صریح بر صورتده باشلایان سورة **﴿وَالنَّجْمِ إِذَا هَوَى﴾** نڭ باشنده بولونان **﴿وَالنَّجْمِ إِذَا هَوَى﴾** جمله‌سی ایله صراحته یاقین بر طرزده او رساله‌یه إشارت ایدر و سورة **﴿وَالطُّورِ﴾** ی بیراقرق **﴿وَالذَّارِيَّاتِ﴾** دن صوڭره **﴿وَالنَّجْمِ﴾** سوره‌سنی ذکر ایتمی بو إشارتی قوتلندیرر.

هم شقّ قمر معجزه‌سنی منکرلره قارشى قوتلی دلیللر ایله اثبات ایدن معراج رساله‌سنڭ ذیلی بولونان شقّ قمر رساله‌سی نامنده اوتوز برنجی مرتبه‌نڭ آخرنده اولان او رساله‌یه، حضرتِ إمام علی (رض) شقّ قمری نصّ صریح ایله ذکر ایدن سورة **﴿اقْتَرَبَتِ السَّاعَةُ وَانْشَقَّ الْقَمَرُ﴾** دن إقتباس ایده‌رك اوتوز برنجی مرتبه‌نڭ عقبنده ذکر ایدیلن **﴿وَبِاقْتَرَبَتْ إِلَى الْأُمُورِ تَقَرَّبَتْ﴾** فقره‌سیله صراحته یاقین إشارت ایدر.

معلومدر که؛ رساله نور باشده اوتوز اوچ عدد سوزلردر و سوزلر نامیله یاد ایدیلیر. فقط اوتوز اوچنجی سوز مستقل دگل، بلکه اوتوز اوچ عدد مکتوباتدن

عبارتدر و مکتوبات نامیلہ ذکر ایدیلیر. صوگره اوتوز برنجی مکتوب دخی مستقل دگل، بلکه اوتوز بر عدد لمعهلردن مرگبدر و لمعهلر آدی ایله مشتهددر. صوگره اوتوز برنجی لمعه دخی مستقل اولمامش، او ده إن شاء الله اوتوز بر عدد شعاعلردن مرگب اولاجق. الآية الکبرا یدنجی و بو رساله سکرنجی شعاعلیردر. دیمک سوزلرک خاتمه سی اوتوز ایکنجی سوزدر. هم رساله النورک ییلدیزلری ایچنده بر گونش حکمنده شاکرذرلرنجه تلقی ایدیلن اوتوز ایکنجی سوز نامنده کی اوچ موقفلی رساله خارقه و جامعہ و سوزلرک بر جهته خاتمه سی و جمعیتلی نتیجه سی اولان او رساله یه حضرت امام علی (رض) اونک فوق العاده اُهمیتی و جامعیتی گوسترمک ایچون قرآنک چوق سوره لریله بردن اوتوز ایکنجی مرتبه ده ﴿وَبِسُورِ الْقُرْآنِ حِزْبًا وَ آيَةً﴾ قَسْمِیله اوتوز ایکنجی مرتبه ده بولونان او جامع رساله یه إشارت ایدر. رساله النورک اوتوز اوچنجی سوزی ایسه، بوندن اَوّل بیان ایتدیگمز گی اوتوز اوچ عدد مکتوبلردن عبارت و مکتوبات نامنده اوتوز اوچ کتاب و یوزدن زیاده رساله لردر.

ایشته حضرت امام علی (رض) اوتوز اوچنجی مرتبه ده و قَسْمِنده اوتوز اوچنجی سوزک أجزالری اولان او یوز اون کتاب و مکتوباته بردن إشارت ایتمک ایچون یوز اون سماوی صحف نامنده یوز اون مختصر کتابلر و او بیوک مقدّس کتابلردن إستمداد معناسنده اولان شو:

﴿وَأَسْأَلُكَ يَا مَوْلَايَ بِفَضْلِكَ الَّذِي ﴿ عَلَى كُلِّ مَا أَنْزَلْتَ كُتُبًا تَفَضَّلْتَ﴾

کلامیله إشارت ایدر. معلومدر که؛ علم بلاغته ده و فِرّ بیانده اوزاق و گیزی معناره دلالت ایتمک ایچون قرینه تعبیر ایتدکلری أمارهلردن و مناسبتلردن بریسی بولونسه، اوزاق بر معنا و گیزی و إشاری اولان بر مفهوم، قرینه نك قوّتنه گوره

صریح و ظاهر معناسی گبی قبول ایدیلیر. ایشته بو قاعده یه بناءً، بو اشاری معنارک هر بریسنه متعدّد قرینه لر، اماره لر بولوندیغی گبی سائر آرقداشلی ده اوکا قرینه لر اولور. رساله النورک مجموعندن خبر ویرن صریح فقره لر دخی هر بریسنه قوتلی بر قرینه در.

ایکنجی رمز: قرآنک الآیه الکبراسی اولان ﴿تُسَبِّحُ لَهُ السَّمَوَاتُ السَّبْعُ

وَالْأَرْضُ وَمَنْ فِيهِنَّ وَإِنْ مِنْ شَيْءٍ إِلَّا يُسَبِّحُ بِحَمْدِهِ﴾ نك حقیقت کبراسنی و تفسیر اکبرینی گوسترن و رمضان شریفک إلهامی بر هدیه سی بولونان یدنجی شعاع رساله سنه حضرت إمام علی (رض) مکتوباته اشارتدن صوگره لمعه لره اشارت ایچنده شعاع لره باقهرق ﴿وَبِالْآيَةِ الْكُبْرَى آمَنِّي مِنَ الْفَجْتِ﴾ (حاشیه) دیوب علم بلاغتجه "مستتبعات التراکیب" و "معارض الکلام" دینیلن معنای ظاهرینک تبعتیله و پرده سنک آرقه سیله متعدّد قرینه لرک قوتنه گوره اشارت ایدر. و او عجیب و یوکسک و توحیدک حجة الکبراسی و الآیه الکبرانک بر علامت کبراسی و بر تفسیر اعظمی اولان رساله یه "آیت الکبرا" نامنی ویریور. و او نامله هم منبعی اولان آیت الکبرانک عظمتنی، هم بو یدنجی شعاع اولان وحدانیتک و توحیدک برهان اعظمک فوق العاده قوتنی إعلان ایدر، خبر ویرر. حضرت إمام علی نك (رض) بو بیوک إلتفاتنه، بو رساله نك لیاقتنه هر کیمک بر شبهه سی وارسه گل سین بر دفعه او رساله یی اوقوسون. اگر اوت لایقدر دیمزسه، بگا "توه" دی سین.

(حاشیه): إمام علی بو فقره ایله اشارت ایدر که، آیت الکبرا رساله سی یوزندن شاکردلی بر مصیبتنه دوشه جکلر و اونک کرامتی و برکتیله امنیت و سلامتیه چیقه جکلر. اوت بو کرامت علویه تام تامنه چیقدی که، او رساله ایچون حپسه دوشوب و اونک قوتلی حقیقتلری ایله قورتولدیلر.

أوت قرآنك عليهنده بيك سنه دن برى منتقمانه حاضرلانا دينسزلرك
 اعتراضلرينى و كافر فيلسوفلرك تراكم ايدوب شيمدى يول بولارق انتشار ايدن
 شبهه لرينى و قرآنك دهشتلى ضربه لرندن انتقام بسله ين معند يهوديلرك و مغرور بر
 قسم خرستيانلرك هجوملرينى دفع ايدوب مقابله ايدن و هر عصرده قرآنك پك
 چوق قهرمانلرى و معنوى قلعه لرى واردى. شيمدى احتياج بر ايكيدن، يوزه
 چيقمش. و مدافع لر يوزدن، ايكي اوچه اينمش. هم حقائق ايمانيه يي، علم كلامدن
 و مدرسه دن اوگرغك چوق زمانه محتاج بولونديغندن بو زمانده او قپو دخى
 قپاندى. هم چابوق، هم هر كس آكلايه جق بر طرزده اُك درين حقيقتلرى تعليم
 ايدن رساله نور، ألبته إمام على رضى الله عنك بو التفاتنه لايقدر.

هم إمام على (رض) اونجى مرتبه تعدادنده اونجى سوره اولارق و قيامت
 و ليلة برائته باقان ﴿وَبِسُورَةِ الدُّخَانِ فِيهَا سِرًّا قَدْ أُحْكِمَتْ﴾ ديبوب معنای
 إشاريسيله اونجى سوز نامنده و مرتبه سنده اولان حشر رساله سنه إشارتله برابر
 او رساله نك فوق العاده أهميتنى و غايت محكم اولديغنى و او زمانك دومانلى
 قراكلقلرينى إزاله ايدن بر ليلة برائك بر قنديللى حكمنده بولونماسنه و حشر و
 قيامتك بر علامتى اولان دخان، هم ليلة برائك سنوى اولارق حكمتلى تفريق و
 تقسيم امور نقطه لريله و باشقه قرينه لر ايله ايماء و رمزاً خبر ويريبور.

أوت اونجى سوز، چوق أهميتلى بر بلايى دفع ايتدى. حرّيت افكار
 سربستيتى و حرب عمومى صارصينيتيسى وقتنده حشرى إنكار ايدن منافقلىر،
 فرصت بولوب چوق يرلرده زهرلى فكرلرينى اظهاره باشلادقلرى بر زمانده، اونجى
 سوز چيقدى و طبع ايديلدى. بيك نسخه سى اطرافه ياييلدى. اونى گورن هر كس
 كمال اشتياق و مراقله اوقودى. زنديقلرك كافرانه فكرلرينى تام قيردى و اونلرى
 صوصدirdى. إمام على رضى الله عنك بو تقديرينه لياقتنى إثبات ايتدى. كيمك

شبهه سى وارسه گلسين اوني دقتله اوقوسون، حشر ك نه قدر قوتلى بر برهاني اولديغنى گورسون.

هم حضرت إمام على رضى الله عنه اون طوقوزنجى سوره اولارق سورة النورى ﴿بِسْمِ حَوَامِيمِ الْكِتَابِ جَمِيعَهَا﴾ عَلَيْكَ بِفَضْلِ النُّورِ يَا نُورُ أَقْسَمْتُ ﴿ فقره سيله ذكر ايدهر ك پك مختصر اولان اون طوقوزنجى سوزه و پك مكمل بولونان اون طوقوزنجى مكتوبه إشارت ايچون نور لفظنى تكرار ايتمكله مكتوبلر ك مرتبه سى، يعنى اون دردنجى مكتوب نقصان قالماسنه ايماء سورة نورى اون بشنجيده ينه ذكر ايتمسييله غايت لطيف و مدققانه خبر ويريور. و او ايكي رساله لرى رساله نور ك بيوك نور لرى اولدقلىنى بيلديرييور. أوت رسالت محمدية عليه الصلاة والسلامه دائر اولان اون طوقوزنجى سوز، هم اوچ جهتله كرامتلى و خارقه اولان اون طوقوزنجى مكتوب الحق رساله نور ك أ ك پارلاق برر نوريدرلر. و عائشه صديقه رضى الله عنهانك برائتى مناسبتيله، آيت نور ك ﴿مَثَلُ نُورِهِ﴾ كلمه سنده كى ضمير، اوچ وجهدن بريسى ايله محمد عليه الصلاة والسلامه راجع اولمق حيثيتيله سورة نور ذات محمدية عليه الصلاة والسلام ايله زياده علاقه دار بولونديغندن، او سوره ايله رسالت محمدية عليه الصلاة والسلامى إثبات ايدن او ايكي رساله يه ايكي نور لفظيله، بلكه اوچ نور كلمه لريله ينه عيناً رسالت أحمدية عليه الصلاة والسلامى إثبات ايدن معراج رساله سنه دخى إشارت ايتمش. بن إعتراف ايدويورم كه: اون دردنجى مكتوب نقصان قالدغيغنى اونوقتشم. حضرت إمام على (رض) عين سوره يي ايكي دفعه تكرار ايتمه سيله تحطّر ايتدم و إشاراتنده كى دقتنه حيران اولدم. فقط او تكرار، يالگز اون طوقوزنجى سوز و مكتوب ايچون صاييلير؛ اوندن صوگره كيلره نسبة صاييلماز.

اوجنچی رمز: یگر می سکزنجی لمعه ده ایضاح و إثبات ایدیلن

﴿تَقَادُ سِرَاجُ النُّورِ سِرًّا بَيَانَةً﴾ ﴿تَقَادُ سِرَاجُ السُّرُجِ سِرًّا تَنَوَّرَتْ﴾

﴿بُنُورِ جَلَالِ بَارِخٍ وَ شَرْنُطَخٍ﴾ ﴿بِقُدُوسِ بَرْكُوتٍ بِهِ النَّارُ أُخِمِدَتْ﴾

فقره لريله رساله نورك اوج اهميتلى وضعيتنى خبر ويرىيور. بو فقره لرك صراحته ياقين بر صورتده هم جفر، هم معنا جهتيله رساله نوره اشارتنى اون سکزنجى لمعه ده ايضاحنه بناء، بوراده ايسه، اوراده ذكر ايديلمهين و امام على رضى الله عنك نظر دقتنى جلب ايدن يالكز اوج سرى بيان ايديله جك.

برنجيسى: اسلاملر ايچنده، دللر آنده تشهير صورتنده گزديرمگه لايق اولان رساله نور، مع التأسف غايت گيزلى پرده آلتنده انتشار و إستتاره مجبور اولماسنه إشارة امام على رضى الله عنه، ايكي دفعه ﴿سِرًّا بَيَانَةً﴾ و ﴿سِرًّا تَنَوَّرَتْ﴾ كلمه لريله ﴿سِرًّا﴾ يعنى گيزلى انتشار ايديله ييلير. متعجبانه خبر ويرىيور.

ايكنجيسى: رساله نور، اسم اعظم جلوه سيله و اسم رحيم و حكيملك تجليسيه ظهور ايتديگندن امتيازلى خاصه سى ﴿الله اكبر﴾ دن إقتباسا جلال و كبريا و ﴿بِسْمِ اللهِ الرَّحْمَنِ الرَّحِيمِ﴾ دن إستفاضه مرحمت و شفقت، ﴿وَهُوَ الْعَزِيزُ الْحَكِيمُ﴾ دن إستفاده حكمت و إنتظامك اساسلى اوزرينه گيدييور. اونك روحى و حياتى اونلردر. سائر مشربلرده كى عشق يرنده، رساله نورك مشربنده مشتاقانه شفقتدر و رأفتكارانه محبتدر. ناصلكه حضرت امام على (رض) صريح بر صورتده سراج النورك تاريخ تأليفنى و تكمل زمانى و مشهور اسمنى ﴿تَقَادُ سِرَاجُ النُّورِ﴾ فقره سيله خبر ويرمش. اويله ده ﴿بُنُورِ جَلَالِ بَارِخٍ وَ

﴿شَرْنُطَخْ﴾ إلى آخر.. فقره سيله ده سراج النور ك أساسلرندن خبر ويرييور. چونكه
 ﴿جَلَالِ بَانِخْ﴾ عزّت، عظمت و جلال و كبريادر. ﴿شَرْنُطَخْ﴾ سريانيجه رُؤف و
 ﴿بَرْكُوتِ﴾ رحيمدر. ديمك حضرتِ إمامِ على رضى الله عنه سراج النورى تعريف
 ايدىيور. حياتنى و نورينى، كبريا و عظمت و رأفت و رحيميتدن آلييور ديه ممتاز
 خاصيتنى بيان ايدر.

اوجنچيسى: حضرتِ إمامِ على رضى الله عنه، بو فقره ده ﴿بِه النَّارُ﴾

﴿أُخْمِدَتْ﴾ جمله سيله دييور كه: يئك اوج يوز ألى درتده (۱۳۵۴) سراج النور
 (يعنى، رسالهُ نور ك نورى) ايله ضاللتك تجاوز ايدن نارى إِنْ شاءَ الله سونه جك.
 يعنى، فتنهُ دينيه آتشنى يا تخريباتدن واز گچيره جك ويا ايلرى تجاوزاتنى قيره جق.
 أكر هجرى تاريخى اولسه، بوندن ايكي سنه أَوَّل؛ "دينى دنيا دن تفريق" فرصتندن
 إستفاده ايله، دينك و قرآنك ضررينه اولارق ايلرلهين دهشتلى تصووراتك تجاوزاتى
 توقّف ايتمه سى، ألبته قارشيلرنده قوتلى بر سدك بولونماسندندر. او سد ايسه، بو
 زمانده چوق إنتشار ايدن رسالهُ نور ك كسكين حجّتلىرى و قوتلى برهانلىرى
 اولديغى، چوق أماره لر ايله حسن ايدىلييور. و بو ايكنجى إحتمالده كى إشارتِ
 عَلوْيه دخى اوْنى تأييد ايدىيور. (حاشيه)

(حاشيه): هم ده ﴿إِنَّا أَعْطَيْنَا﴾ نك سَرى قسمًا تحقّق ايتمش. چونكه سفيانيتك درت ركنندن

ألك قوتلىسى و دهشتلىسى بتون بتون چكىلدى. قبر آلتنده عذاب چكىيور. و ألك بيوگى دخى
 علاقەسى بالفعل چكىلמש. ماصون قوميتە سنك محكومى و ألتى اولوب عذابيله مشغولدر. يالكز
 اونك گولگه سى حكم ايدىيور. ايلرى تجاوز ايتمه مكله برابر قسمًا گريلييور. باقى قالان ايكي
 شخص ايسه، أَلرندن گلسه تعميره چاليشه جقلىر.

أوت جفرجه ﴿بِهِ النَّارُ أُخِمدَتْ﴾ (خ) آلتی یوز، (ت) درت یوز، (ر) ایکی یوز، شدہ لی (ن) یوز، (م) قرق، (د) و اوچ ألف یدی، (بہ) دہ کی (ب) ایکی، (ه) بش، یکونی پیک اوچ یوز آلی درت (۱۳۵۴) ایدر.

لله الحمد سراج النورک الآیة الکبراسی گبی چوق رسالہ لری وار. هر بری قوتلی برر لامبا حکمنده صراط مستقیمی گوستروب، إمام علی رضی الله عنہک خبرینی تصدیق ایتدیریورلر.

بو اوچنجی سَرک مناسبتیلہ عیناً ﴿بِهِ النَّارُ أُخِمدَتْ﴾ گبی پیک اوچ یوز آلی درت (۱۳۵۴) تاریخنه مقام جفریسیله باقان و سعیدک (رض) ایکی معروف لقبه رمزا و إسمًا ایما ایدن و "کندیکی محافظه ایت" آمرینی ویرن و او تاریخده هرکسدن زیاده متعدد تهلکه لره معروض بولونه جغنی تلویح ایدن "أرجوزه" نك آخرلرنده کی:

﴿فَاسْئَلْ لِمَوْلَاكَ الْعَظِيمِ الشَّانِ * يَا مُدْرِگَا لِذَلِكَ الرَّمَانِ﴾
﴿بَانَ يَقِيكَ شَرَّ تِلْكَ الْفِتْنَةِ * وَشَرَّ كُلِّ كُرْبَةٍ وَمِخْنَةٍ﴾

فقره سیله دیور: "یا سعید الکردی! پیک اوچ یوز آلی درت (۱۳۵۴) تاریخنه یتیشیرسهک مولای عظیمکدن، او زمانک و او عصرک فتنه و شرلندن محافظه کی ایسته و یالوار. "أوت اون سکرنجی لمعه ده برنجی کرامت علویه نك ایضا حنده، قصیده أرجوزیه نك رساله نور و مؤلفنه دائر إشارات غیبیه سی بیان ایدیلیمش. إسم أعظم و سکینه تعبیر ایتدیگی أسماء ستیه مشهوریله دائما مشغول اولان بر شاکردیله قونوشدیغی و تسلی و یردیگی و چوق أماره لر و قرینه لرله او شاکرد، سعید اولدیغی إثبات ایدیلیمش. و اوراده او شاکردینه دیمش: ﴿أَحْرَفُ عَجْمِ

سُطِّرَتْ تَسْطِيرًا * بَتَّ بِهَا الْأَمِيرُ وَالْفَقِيرَا﴾ یعنی، أجنبی حرفلری پیک اوچ یوز

قرق سکرنده (۱۳۴۸) تعمیم ایدیله جک، چولوق چوجق، أمرلر و فقیرلر إجبار صورتنده گيجه درسلیله اوگرنگه چالیشه جقلمر.

أوت ﴿سُطِّرَتْ تَسْطِيرًا﴾ جمله سی تام تامنه؛ ایکی (ت) سکرن یوز، ایکی (س) یوز یگرمی، ایکی (ر) درت یوز، ایکی (ط) اون سکرن، بر (ی) اون، مجموعی بیك اوچ یوز قرق سکرنر. عین تاریخده لاتینی حروفلینه گيجه درسلیله جبراً چالیشدیریلدی.

صوگره إمام علی (رض) سکینه ایله مشغول اولان سعیده (رض) باقار، قونوشور. عقینده ﴿يَا مُدْرِغًا لِذَلِكَ الزَّمان﴾ دیر. ایکی اوچ یرده قوتلی إشارت ایله سعید (رض) إسمی ویردیگی شاگردینه خطاباً "کندیگی سکینه ایله دعا ایدوب محافظه یه چالیش." یاءِ ندائیدن صوگره متعدد قرینه لر و أماره لر ایله "سعید" وار. دیمك ﴿يَا سَعِيدُ مُدْرِغًا لِذَلِكَ الزَّمان﴾ اولور. بو فقره ناصلکه ﴿مُدْرِغًا﴾ کلمه سیله "الْكَردی" لقبه هم لفظاً هم جفرّاً باقار. چونکه میمسز ﴿درگا﴾ کرد قلبیدر. (۱) میم ایسه، "ل" و "ی" یه تام موافقدر. اويله ده؛ دیگر بر إسمی اولان بدیع الزمان لقبه دخی "الزَّمان" کلمه سیله ایما ایتمکله برابر، بیك اوچ یوز ألی درت (۱۳۵۴) ویا بیك اوچ یوز ألی بش (۱۳۵۵) مقام جفریسیله سعیدك (رض) حقیقتِ حالنی و خلافِ عادت وضعیتی و حفظ و وقایه ایچون کثرتلی دعاسنی و خَلوت و إنزواسنی تمامیله تعبیر و إفاده ایتدیگندن صراحته یاقین بر صورتده پارمغنی اونك باشنه او قصیده ده تسلی ایچون باصییور. بوراده ده ﴿بِهِ النَّارُ أُخْمِدَتْ﴾ سَرینه مظهر اولان رساله نوری آلقیشلايور.

معلوم اولسون کہ؛ جلجلوتیہ نكْ اُساسی و روحی اولان ﴿الْقَسَمُ الْجَامِعُ﴾

وَالدَّعْوَةُ الشَّرِيفَةُ وَالِاسْمُ الْأَعْظَمُ﴾ إمام علی رضی اللہ عنہک اُکْ مہم و اُکْ مدقق اویسی بر شاکردی و اسلامیتک اُکْ مشہور و پارلاق بر حجّتی اولان إمام غزالی (رض) حجة الإسلام دیور کہ: "اونلر وحی ایله پیغمبره (عصم) نازل اولدیغی وقت إمام علی یه (رض) أمر ایتدی: "یاز." او ده یازدی. صوگره نظم ایتدی. " إمام غزالی (رض) دیور:

﴿إِنَّ هَذِهِ الدَّعْوَةُ الشَّرِيفَةُ وَالْوَفْقُ الْعَظِيمُ وَالْقَسَمُ الْجَامِعُ وَالِاسْمُ الْأَعْظَمُ وَالسِّرُّ الْمَكْنُونُ الْمُعْظَمُ بِلَا شَكِّ كَثُرَ مِنْ كُنُوزِ الدُّنْيَا وَالْآخِرَةِ﴾

إمام غزالی، إمام نور الدیندن درس آلاق بو جلجلوتیہ نكْ هم سُریانی کلمه لرینی، هم قیمتنی و خاصیتنی شرح ایتمش.

دردنجی رمز: إمام علی (رض) سراج النور دن خبر ویردکدن صوگره یینه اوتوز اوچ و بر جهتله اوتوز ایکی عدد سریانیجه اُسمایی تعداد ایدرکن رسالهُ النورک اُکْ قوتلی، اُکْ قیمتدار اولان معجزات قرآنیه رساله سنه و اوتوز ایکنجی سوزه قوتلی إشارت ایتدیگی گبی، سائر رساله لر ده رمزًا ویا ایماءً ویا تلویحًا باقار. اوت حضرت إمام علی (رض) رسالهُ النوره باقهرق سُریانی إسملری درج ایدهرک دیور:

﴿تُقَادُ سِرَاجُ النُّورِ سِرًّا بَيَانَةً ۞ تُقَادُ سِرَاجُ السُّجِّ سِرًّا تَنَوَّرَتْ﴾
 ﴿بِنُورٍ جَلَالٍ بَانٍ وَ شَرْنَطَخٍ ۞ بِقُدُوسٍ بَرَكُوتٍ بِهِ النَّارُ أُخِمدَتْ﴾
 ﴿بَيَاهٍ وَيَا يُوهُ نَمُوهُ أَصَالِيَا ۞ بِطَمْطَامٍ مِهْرَاشٍ لِنَارِ الْعِدَاسَمَتْ﴾
 ﴿بِهَالٍ أَهِيلٍ شَلَعٍ شَلْعُوبٍ شَالِعٍ ۞ طَهِيٍّ طَهُوبٍ طَيْطَهُوبٍ طَيْطَهَتْ﴾

﴿أَنُوحِ بِمَلُوحٍ وَأَبْرُوحِ أَقْسِمْتُ * بِتَمْلِيخِ آيَاتِ شَمُوحٍ تَشْمَخْتُ﴾

﴿أَبَاذِيخَ بَيَذُوحٍ وَدَيْمُوحٍ بَعْدَهَا * خَمَارُوحٍ يَشْرُوحِ﴾ (حاشیه)

بِشْرِخٍ تَشْمَخْتُ﴾ ﴿بَبْلُخٍ وَ سَمِيَانٍ وَ بَارُوحٍ بَعْدَهَا *

بِدَيْمُوحٍ أَشْمُوحٍ بِهِ الْكُونُ عُمِّرَتْ * بِشَلْمَخَتِ إِقْبَلِ دُعَائِي﴾

دیه دعا ایله ختم ایدر. حضرت امام علی (رض) باشده صراحت ایله خبر ویردیگی رساله النوری، سراج النور و سراج السرج نامیله برنجی مرتبهده آشکاراونی گوستروب تعداد ایدرکن، تا یگرمی بشه گلدیگی وقت ﴿بِتَمْلِيخِ آيَاتِ شَمُوحٍ تَشْمَخْتُ﴾ دیر. آیات قرآنیه نك إعجازلرینی بیان و قرآنك قرق وجهله معجزه اولدیغنی یدی عدد کلی وجهلرده إثبات ایدن رساله النورك اُك مشهور و پارلاق رساله سی اولان یگرمی بشنجی سوز نامنده کی معجزات قرآنیه رساله سنه إشارت ایدر. چونکه باشده سراج النورك برنجی مرتبهده صایلماسی، هم ﴿بِتَمْلِيخِ آيَاتِ﴾ فقره سنده ﴿آيَاتِ﴾ کلمه سنك بولونماسی، هم یگرمی بشنجی مرتبهده ذکر ایتمیسی، قوتلی بر قرینه درکه؛ پك چوق آیتلری ذکر ایدوب إعجازلری و سرلری بیان ایدن یگرمی بشنجی سوزه معنای مجازی ایله باقار. و سورلرك تعدادنده دخی ینه یگرمی بشنجی مرتبهده عبارهی دگیشدیروب باشدن باشلارگی ﴿بِحَقِّ تَبَارَكٍ﴾ دیهرک رساله نورك اُك مبارك و برکتلی اولان یگرمی بشنجی سوزك اهمیتی گوستریور.

(حاشیه): حشره دائر مشهور یگرمی طوقوزنجی سوزه، صوگره معراج و ذیلی شق قمره باقار.

صوگره یگرمی آلتی و یدیده «**آبَاذِنِخَ بِيْدُوخِ وَ دِيْمُوخِ بَعْدَهَا**» دیر. صوگره اوتوز و اوتوز برنجیده «**بِبَلِخِ وَ سَمِيَانِ وَ بَاوُوخِ بَعْدَهَا**» دیوب ینه عبارهی دگیشدیروب «**بَعْدَهَا**» کلمه سنی ذکر ایدر. غایت ظاهر و قوتلی بر قرینه ايله اجتهداده دائر یگرمی یدنجی سوزك صحابه لر حقّنده کی چوق مهمّ و قیمتدار ذیلنی و معراجیه دائر اوتوز برنجی سوزك شقّ قمره دائر و اوکا چوق احتیاج بولونان اُهمیتلی ذیلنی «**بَعْدَهَا**» کلمه سیله گوسترر گبی، قوتلی إشارت ایدر.

بن إعراف ایدیورم که؛ بن بو ذیللری اونوتمشدم. إمام علی نك (رض) بو إخطاری ايله تخطر ایتدم. شقّ قمری سابقا یازدم. شیمدی بو آنده صحابه لر حقّنده کی ذیلی خاطرلادم. ایشته مادام علم بلاغت و فنّ بیانده بر تك قرینه ايله مجازی بر معنا مراد اولونه بیلیر و بر تك مناسبتله، بر مفهومه إشارت بولونسه، او مفهوم بر معنای إشاری اولارق قبول ایدیلیر. ألبته ظاهر و چوق قرینه لردن و أماره لردن قطع نظر، یالکز بو ایکی یرده تام ذیللرک بولوندیغی عین مقامده و ذیل معناسنده اولان «**بَعْدَهَا**» کلمه سنی تکرار صورتنده إفاده بی دگیشدییره رک سویله مسی، تام بر قرینه در که؛ حضرت إمام علی (رض) معنای حقیقیسندن باشقه بر معنای مجازی و إشاری بی دخی إفاده ایتمک ایسته یور.

صوگره یگرمی طوقوزنجی مرتبه ده، هیبتلی بر طرزده «**خَاوُوخِ يَشْرُوخِ بِشْرِخِ تَشْمَخَتْ**» دیر. یگرمی بشده گچن و سرلری بيلمک معناسنده اولان «**تَشْمَخَتْ**» کلمه سنی تکرار ايله سابقا بیان ایتدیگمز خارقه لی یگرمی طوقوزنجی سوزه قوتلی بر قرینه ايله إشارت ایدر. صوگره اوتوز ایکنجی مرتبه ده سوره لرک تعدادنده اُهمیتله إشارت ایتدیگی رسالهٔ جامعه اولان اوتوز ایکنجی سوزه ینه نظر

دَقِّ قَوْتَلِ جَلْب ایتِمک ایچون ﴿ذِیْمُوخِ اَشْمُوخِ بِهْ اَلْکَوْنُ عُمِرَتْ﴾ و بر نسخه ده ﴿بِهْ اَلْکَوْنُ عَطِرَتْ﴾ یعنی اِسْمِ عدل و اِسْمِ حَکْمْ تَجْلِیْسِیله و عدالت و میزانیله و اِنتظام و حکمتیله دنیا تعمیر ایدیلیر، تخریدن قورتولور. ایکنجی نسخه ایله او ایکی اِسْمْ رَایحَه طیبَه سیله و چوق خوش قوقولریله، دنیا گوزل قوقولر آلیر. عَطَّار دَکَّانی گبی رَایحَه طیبَه ویرر.

ایشته اِسْمِ عدل و اِسْمِ حَکْمْ پارلاق بر آیینهلری و بر تفسیرلری حکمنده اولان اوتوز ایکنجی سوزه پارق باصییور و معنای مجازی صورتنده إفاده ایدر. ﴿ذِیْمُوخِ﴾ کلمه سنڭ تکراریله سوزلر اوتوز اوچ ایکن بر مرتبه سی مکتوبلردن عبارت اولدیغنه و اوتوز ایکنجی سوز صوڭ مرتبه سی بولوندیغنه ایما ایدر. بن سُرْیانی کلمهلرینڭ معنلرینی تمامیله بیله مدیگمدن و اِمَامِ غزالی (رض) دخی تمامیله ایضاح ایتمدیگندن حضرت اِمَامِ علی نڭ (رض) او کلمهلر ایله سائر رساله لره اِشاراتی شیمدیلک بیرا قییورم.

بشنجی رمز: مادام جَلْجَلوتیه وحی ایله پیغمبر علیه الصلاة والسلامه نازل اولمش. و عَلام الغیوبڭ علمیه إفادَه معنا ایدر. هم مادام جَلْجَلوتیه ﴿اَقْدُ کَوَّکَبِ﴾ و ﴿تَقَادُ سِرَاجُ النُّورِ﴾ فقرهلرنده معنای مجازی ایله او قصیده نڭ حقیقتی اِثبات ایدن رساله النوره صریحًا و اونڭ اون اوچ اَهْمِیْتلی رساله لرینه اِشارَه خبر ویرمکله برابر، ﴿فَیَا حَامِلَ الْاِسْمِ الَّذِی جَلَّ قَدْرُهُ﴾ ده دخی او قصیده نڭ بر اَسَاسی اولان ﴿اَلْاِسْمُ الْمُعَظَّمُ﴾ ایله چوق اِشتغال و اِستمداد ایدن رساله نور مؤلفنه و بونڭ اون اوچ اَهْمِیْتلی واقعات حیاتنه ایماء، رمزًا، اِشارَه معنای مجازی ایله خبر ویریور. هم مادام معنای مجازی ایله و مفهوم اِشارینڭ مراد

اولماسنه بر ضعیف قرینه و بر گیزی اماره و بر تك مناسبت کافی گلیور. هم مادام رساله نور و رساله لرینه و مؤلفی و احوالنه اولان اشارت لر بر برینه قرینه اولور. بلکه مسئله نك وحدتی اعتباریله عموم اشارت لر، قرینه لریله برابر هر بریسنه قوتلی بر قرینه و قوی بر اماره حکمنده در.

ألبته دییه بیلیرز که ؛ حضرتِ إمام علی (رض) ناصلکه باشد

﴿بَدَأْتُ بِبِسْمِ اللَّهِ رُوحِي بِهِ اهْتَدَتْ ۞ إِلَى كَشْفِ أَسْرَارِ بَاطِنِهِ انْطَوَتْ﴾

یعنی "خزینۀ أسرار اولان بسم الله الرحمن الرحيم ایله باشلادم. روحم، اونك ایله او خزینہ یی کشف ایتدی." دییه رك سائر اشاراتك قرینه سیله بر معنایِ اشاری و بر مدلول مجازی صورتندۀ رساله النورك بسم اللهی حکمنده و فاتحه سی و بسمله سی و "بسم الله" ده کی بیوك سرك حقیقتنی بیان ایدن و قیصه و غایت قوتلی برنجی سوز نامندۀ اولان بسم الله رساله سنه ایما، بلکه رمز، بلکه اشارت ایدیور. عینا او یله ده؛ سائر اشاراتك قرینه و مناسبتیله و حروف قرآنیه نك أسرارندن بحث ایدن و رموزات ثمانیه نامندۀ بولونان سکز كوچك رساله لرك ماهیتلرینی آکدیرر بر طرزده، عبارہ یی دگیشدیره رك حروف لرك أسرار یله إستمدا ایتمگه باشلاماسی قرینۀ لطیفه سیله معظم دعا و مناجات و جامع قسم إستمدا دینك آخرلرنده و سوزلره و مکتوبلره اشارتدن صوگره ﴿بَوَاحِ الْوَحَا بِالْفَتْحِ

وَالنَّصْرِ أَسْرَعَتْ﴾ فقره سیله یگرمی طوقوزنجی مکتوبك بر قسم أسرار حروف

قرآنیه یی بیان ایدن رموزات ثمانیه نامندۀ سکز كوچك رساله لرك اَكْ مهملری و فتح مگه و فتح شام و فتح قُدُس و فتح إستانبول گبی چوق فتوحاتِ اسلامیہ دن غیبی خبر ویرن سورۀ ﴿إِذَا جَاءَ نَصْرُ اللَّهِ وَالْفَتْحُ﴾ نك أسرارینی بیان

ایله، فتوحاتِ اسلامیہ نك پهلوانی اولان حضرتِ إمام علی نك (رض) نظر دقتنی

جلب ایدن فتح و نصر رساله سنه، هم سورۀ فتحك اَكْ مهمّ و اَكْ آخر آيتك بش وجه ايله اعجازيني بيان و اثبات ايله، قهرمانِ اسلام حضرتِ امامِ عليّ نك (رض) نظرِ دقّتي جلب ایدن غايت قيمتلي اولان آيتِ فتح رساله سي نامنده كي كوچك بر رساله يه ائما بلكه اِشارت ايدر، اعتقادنده يم. بويله اعتقاده اشتراك ايديلمزسه ده اعتراض ايديلمه ملي.

التنجي رمز: مادام حضرتِ امامِ عليّ (رض)، استادِ قدسي سندن آلدیغی درسه بناءً، قرآنه تعلق ایدن گله جك حادثاتدن خبر ويريور. و "بندن صور يكز" ديهه متعدّد و طوغری خبرلری و يروب بر شاهِ ولايت اولديغی ايله كرامت لرله اثبات ايتمش. و مادام بو عصرده آوروپا دينسزلى و اهلِ ضلالت منافقلى، دهشتلى بر صورتده قرآنه هجومى هنگامنده رساله نور او سيلِ ضلالته قارشى مقاومت ايدوب، قرآنك طلسملرينى كشف ايدهرك حقيقتنى محافظه ايديور. و مادام **﴿اَقِدْ كَوْكَبِي بِالْاِسْمِ نُورًا وَ بَهْجَةً * مَدَى الدَّمْرِ وَ الْاَيَّامِ يَا نُورُ جَلَجَلَتْ﴾** فقره سيله يگرى سكرنجى لمعه ده اثبات ايديلديكى گي صراحته ياقين بر صورتده رساله نور اِشارت ايتمكله برابر سورۀ نوره كي آيت النورك رساله نور اِشارته اِشارت ايدر. و مادام **﴿اَقِدْ كَوْكَبِي بِالْاِسْمِ نُورًا﴾** معنا و جفرجه تام تامنه رساله نور توافق ايديور. البته ديهه بيليرز كه؛ بو فقره نك عقينده:

﴿بَاجِ اُھُوجِ جَلْمُھُوجِ جَلَالَةٍ * جَلِيلِ جَلْجَلِيَّوْتِ جَمَآءِ تَمْھَرَجَتْ﴾
﴿بِتَعْدَادِ اَبْرُومِ وَ سِمَرَا زِ اَبْرَمِ * وَ بَهْرَةِ تَبْرِيزِ وَ اُمِّ تَبَرَّكَتْ﴾

فقره سيله رساله النورك بدايتده اون ايكي سوز نامنده اِشتهار و اِنتشار ایدن اون ايكي كوچك رساله لرينه **﴿اَقِدْ كَوْكَبِي﴾** قرينه سيله، بو فقره ده كي اون ايكي

سُریانی کلمه لر اونلره برر إشارتدر. گرچه ألیمده بولونان جلعلوتیه نسخه سی أڭ صحیح و أڭ معتمددر. إمام غزالی (رض) گبی چوق إماملر جلعلوتیه پی شرح ایتمشله. فقط بو سُریانی کلمه لرڭ معناسنی تام بیلمدیگمدن و نسخه لرده إختلاف بولوندیغندن، هر بریسنڭ وجه إشارتنی و مناسبتنی شیمدیلک بیلمدیگمدن بیرا قیورم.

الحاصل: حضرت إمام علی (رض) بر دفعه ﴿أَقِدْ کَوَکَبِی﴾ فقره سیله، آخر زمانده رسالهُ نوری دعا ایله اللّٰه دن نیاز ایدر، ایستر و بدایتده اون ایکی رساله دن عبارت بولوندیغندن یالڭزاون ایکی رساله سنه إشارت ایدیور. ایکنجی دفعه ده ﴿تَقَادُ سِرَاجُ النُّورِ﴾ فقره سیله داها صریح بر صورتده رسالهُ نوری مدح و ثنا ایله گوستره رک تکملنه إشاره، عموم سوزلری و مکتوبلری و لمعه لری رمزاً خبر ویرر. هم اون ایکی سوز نامی ایله چوق إنتشار ایدن او کوچوجک رساله لر، بو فقره ده کی کلمه لر گبی بربرینه إسمًا و صورَةً بڭزه دکلری گبی بدیع معناسنده اولان جلعلوتیه کلمه سنه مطابق اولارق هر بری غایت بدیع بر طرزده، گوزل بر تمثیل ایله، بیوک و درین بر حقیقت قرآنیه پی تفسیر و إثبات ایدر.

أگر بر معند طرفندن دینیلسه: حضرت إمام علی (رض) بو عموم مجازی معنالی إرادة ایتمه مش؟

بز ده دیرز که: فرضا حضرت إمام علی (رض) إرادة ایتمزسه، فقط کلام دلالت ایدر و قرینه لرڭ قوتیله إشاری و ضمنی دلالتله معنالی ایچنه داخل ایدر. هم مادام او مجازی معنالر و إشاری مفهوملر حقدَر، طوغریدر و واقعه مطابقدر و بو إلتفاتنه لایقدرلر و قرینه لری قوتلیدر؛ ألبته حضرت إمام علی نڭ (رض) بویله بتون إشاری معنالی إرادة ایده جک کَلّی بر توجّه ی فرضا بولونمازسه (جلجلوتیه

وحی اولق جهتيله) حقیقی صاحبی حضرتِ اِمَامِ علی نك (رض) استادی اولان پیغمبرِ ذی شانك (ع ص م) کَلّی توجّهی و استادینك استادِ ذو الجلالنك إحاطه لی علمی اونلره باقار، إرادة دائره سنه آلیر.

بو خصوصده بنم خصوصی و قطعی و یقین درجه سنده کی قناعتك بر سببی شودر که: مشکلاتِ عظیمه ایچنده، الآیه الکبرانك تفسیرِ اکبری اولان یدنجی شعاعی یازمقده چوق زحمت چکدیگمدن، بر قدسی تسلی و تشویقه جدّا چوق محتاج ایدم. شیمدی یه قدر مکرّر تجربه لر ایله بو گی حالتلرمده، عنایتِ إلهیه إمدادیمه یتیشیوردی. رساله یی بیتیردیگم عین وقتده (هیچ خاطریمه گلمدیگی حالده) بردن بو کرامتِ علویه نك ظهوری، بنده هیچ بر شبهه بیراقمدی که؛ بو دخی بنم إمدادیمه گلن سائر عنایتِ إلهیه گی، ربّ رحیمك بر عنایتیدر. عنایت ایسه آلداتماز، حقیقتسز اولماز.

یدنجی رمز: حضرتِ اِمَامِ علی (رض) ناصلکه

﴿و بِالْآیَةِ الْكُبْرَىٰ آمِنِي مِنَ الْفَجْتِ ۖ وَ بِحَقِّ فَقَجٍّ مَعَ مَخْمَةٍ يَا إِلَهَنَا﴾
 ﴿و بِأَسْمَائِكَ الْحُسْنَىٰ أَجْرُنِي مِنَ الشَّتِّ ۖ حُرُوفٌ لِّبَهْرَامٍ عَلَتْ وَ تَشَامَخَتْ﴾
 ﴿وَ اسْمُ عَصَا مُوسَىٰ بِهِ الظُّلْمَتُ انْجَلَتْ﴾

دیه برنجی فقره سیله یدنجی شعاعه إشارت ایتمش. او یله ده، عین فقره ایله عالی بر تفکرنامه و توحیده دائر یوکسک بر معرفتنامه نامنده اولان یگرمی طوقوزنجی عربی لمعه یه دخی إشارت ایدر. ایکنجی فقره سیله اسمِ اعظم و سکینه دینیلن اسماءِ ستّه مشهوره نك حقیقتلرینی غایت عالی بر طرزده بیان و إثبات ایدن و یگرمی طوقوزنجی لمعه یی تعقیب ایله یین اوتوزنجی لمعه نامنده آلتی نکتّه اسماء رساله سنه ﴿بِأَسْمَائِكَ الْحُسْنَىٰ أَجْرُنِي مِنَ الشَّتِّ﴾ جمله سیله إشارت ایتدیگندن

صوگره عقینده رسالهٔ آسمایی تعقیب ایدن اوتوز برنجی لمعه‌نک برنجی شعاعی اولارق، اوتوز اوج آیت قرآنیه‌نک رسالهٔ نوره اشاراتی قید ایدوب، حساب جفری مناسبتیله، باشند باشه علم حروف رساله‌سی گبی گورونن و بر معجزهٔ قرآنیه حکمنده بولونان رساله‌یه «حُرُوفُ لِبَهْرَامٍ عَلَتْ وَ تَشَامَخَتْ» کلمه‌سیله اشارت ایدوب، درعقب «وَ اسْمُ عَصَا مُوسَىٰ بِهِ الظُّلُمَاتُ انْجَلَتْ» کلامیله دخی، رسالهٔ حروفیه‌ی تعقیب ایدن و الآیة الکبرادن و باشقه رسائل نوریه‌دن ترگب ایدن و عصای موسی نامنی آلان و عصای موسی گبی، ضالالتک و شرکک سحرلرینی إبطال ایدن رسالهٔ نورک شیمدیلک اُک صوگ و آخر رساله‌سنه عصای موسی نامنی ویره‌رک اشارتله برابر، معنوی قراکقلری طاغیده‌جغنی مژده ایدیور.

أوت «وَ بِالْآیَةِ الْكُبْرَىٰ» کلمه‌سیله یدنجی شعاعه اشارتی، قوتلی قرینه‌لر ایله اثبات ایدیلدیگی گبی، عین کلمه، دیگر بر معنا ایله الحق رسالهٔ النورک آیت الکبراسی حکمنده و اکثر رساله‌لرک روحلرینی جمع ایدن و عربی بولونان یگرمی طوقوزنجی لمعه‌یه بو کلام، "مستتبعات التراکیب" قاعده‌سیله اوکثا باقیور، أفرادینه داخل ایدیور. اوילה ایسه حضرت إمام علی (رض) دخی بو فقره‌دن اوکثا باقوب اشارت ایدر دییه‌بیلیرز.

هم سائر اشاراتک قرینه‌سیله، هم مکتوباتدن صوگره لمعه‌لره باشقه بر طرز عباره ایله ایما ایده‌رک؛ لمعه‌لرک اُک پاراغنک تألیفی، دهشتلی بر زمانده و چپس و إعدامدن قورتولمق و امنیت و سلامت بولمق ایچون، معنای مجازی و مفهوم إشاری ایله، حضرت علی (رض) کندی لسانی، بیوک هله‌که‌لرده بولونان مؤلفک حسابنه استعمال ایده‌رک؛ «وَ بِالْآیَةِ الْكُبْرَىٰ أَمَّتِي مِنَ الْفَجْتِ» یعنی "یا رب! بنی قورتار، امان و امنیت ویر." دییه دعا ایتمه‌سیله، تام تامنه أسکیشهر

چپسخانه سنده إعدام و اوزون چپس تھلکه سی ایچنده تألیف ایدیلن یگرمی طوقوزنجی لمعه نځ و صاحبنځ وضعیتنه توافق قرینه سیله، کلام ضمنی و اشاری دلالت ایتدیگندن دییه بیلیرز که؛ حضرتِ إمام علی (رض) دخی بوندن، اوڭا إشارت ایدر.

هم اوتوزنجی لمعه نامنده و آلتی نکته اولان رسالۀ اُسمايه باقهرق **﴿وَبِأَسْمَائِكَ الْحُسْنَى﴾** دییوب، سائر إشاراتڭ قرینه سیله، هم یگرمی طوقوزنجی لمعه یه تعقیب قرینه سیله، هم ایکسنڭ إسمده و اُسما لفظنده توافق قرینه سیله، هم تشّتِ حاله و صیقنتیلی بر غربته و پریشانیتنه دوشن مؤلفی، اونڭ تألیفی برکتیله تسلی و تحمّل بولماسنه و معنای مجازی جهتنده، حضرتِ إمام علی نځ (رض) لسانیه کندینه دعا اولان **﴿وَبِأَسْمَائِكَ الْحُسْنَى أَجْرُنِي مِنَ الشَّتِّ﴾** یعنی إسم اعظم اولان او اُسما رساله سنڭ برکتیله بنی تشّتدن، پریشانیتدن حفظ ایله یا ربّی مثالی، تام تامنه او رساله و صاحبنځ وضعیتنه توافق قرینه سیله کلام مجازی دلالت و إمام علی (رض) ایسه غیبی إشارت ایدر دییه بیلیرز.

هم مادام جلجلوتیه نځ اصلی وحیدر و اُسرا لیدر و گله جک زمانه باقییور و غیبی امورِ إستقبالیه دن خبر ویریور. و مادام قرآن إعتباریله بو عصر دهشتلیدر و قرآن حسابیله، رسالۀ نور بو قراڭلق عصرده أهّیتلی بر حادثه در. و مادام صراحت درجه سنده چوق قرینه و اُماره لرله؛ رسالۀ نور جلجلوتیه نځ ایچنه گیرمش، اُڭ مهمّ یرنده یرلشمش. و مادام رسالۀ نور و اُجزالری بو موقعه لایقدرلر و حضرتِ إمام علی نځ (رض) نظرِ تقدیرینه و تحسیننه و اونلردن خبر ویرمسنه لیاقتلری و قیمتلری وار. و مادام حضرتِ إمام علی (رض) سراج النوردن ظاهر بر صورتده خبر ویردکدن صوڭره ایکنجی درجه ده پرده لی بر طرزده سوزلردن،

صوگره مکتوبلردن، صوگره لمعهلردن، رسالهلرده کی گبی عین ترتیب، عین مقام، عین نومرو تحتنده، قوتلی قرینهلرک سَوْقِیلَه کلام دلالت و حضرتِ إمام علی نځ (رض) إشارت ایتدیگنی إثبات آیله مش. و مادام باشده **﴿بَدَأْتُ بِبِسْمِ اللَّهِ رُوحِي﴾**

﴿بِهْ اهْتَدَتْ﴾ **﴿إِلَى كَشْفِ أَسْرَارِ بَاطِنِهِ انْطَوَتْ﴾** رسالهلرک باشی و برنجی سوز اولان بسم الله رساله سنه باقدیغی گبی، قَسَمِ جامع معظّمک آخرنده، رسالهلرک قسم آخرلی اولان صوگ لمعهلره و شعاعلره، خصوصًا بر آیت الکبرای توحید اولان یگرمی طوقوزنجی لمعه خارقۀ عربیه و رسالۀ أسماءِ ستّه و رسالۀ إشاراتِ حروفِ قرآنیّه و بِالْخَاصَّةِ شیمدیلک اُکْ آخر شعاع و عصایِ موسی گبی، ضالّلتلرک بتون معنوی سحرلرینی إبطال ایده بیلن بر ماهیتده بولونان و بر معناده آیت الکبرا نامنی آلان رسالۀ خارقیه باقییور گبی بر طرزِ إفاده گورونویور. و مادام بر تک مسئله ده بولونان أماره لر و قرینه لر، مسئله نځ وحدتی حیثیتیه، أماره لر بر برینه قوّت ویرر، ضعیف بر مناسبتله بر ترشّح دخی منبعنه إلحاق ایدیلیر. ألّبتّه بو یدی عدد اساسلره إستاندًا دیرز:

حضرتِ إمام علی (رض) ناصلکه مشهور سوزلره ترتیلری اوزرینه إشارت ایتمش و مکتوباتدن بر قسمنه و لمعهلردن اُکْ مهملرینه ترتیبله باقمش؛ اویله ده **﴿بِأَسْمَائِكَ الْحُسْنَى أَجَرْنِي مِنَ الشَّتِّ﴾** جمله سیله، اوتوزنجی لمعهیه، یعنی مستقل لمعهلردن اُکْ صوگ اولان أسماءِ ستّه رساله سنه تحسین ایده رک باقییور. و **﴿حُرُوفٌ لِبَهْرَامٍ عَلَتْ وَ تَشَامَخَتْ﴾** کلامیله دخی، اوتوزنجی لمعهی تعقیب ایدن إشاراتِ حروفِ قرآنیّه رساله سنی تقدیر ایدوب، إشارتله تصدیق ایدیور. **﴿وَاسْمُ عَصَا مُوسَى بِهِ الظُّلُمْتُ انْجَلَتْ﴾** کلمه سیله دخی شیمدیلک اُکْ آخر رساله و توحید و ایمانک أَلْنْدَه عصایِ موسی گبی خارقه لی، اُکْ قوتلی

برهان اولان مجموعه رساله سنى ثناكارانه رمزا گوسترييور گى بر طرز إفاده دن بلا پروا حكم ايدىيورز كه: حضرت إمام على (رض) هم رساله النوردن، هم چوق أهْمِيَتلى رساله لردن معنای حقيقى و مجازى ايله؛ إشارى و رمزى و ايمائى و تلويحى بر صورته خبر ويرييور. كيمك شبهه سى وارسه، إشارت اولونان رساله لره بر كره دقتله باقسين. إنصافى وارسه، شبهه سى قالماز ظن ايدىيورم.

بوراده كى معنای إشارى و مدلول مجازيلره، قرينه لرك اُك گوزلى و لطيفى؛ عين ترتيبى محافظه ايله ويريلن إسملرك مناسبتيدر. مثلاً: يگر مى طوقوز، اوتوز و اوتوز بر و اوتوز ايكي مرتبه تعدادده، يگر مى طوقوز و اوتوز و اوتوز بر و اوتوز ايكنجى سوزلره غايت مناسب إسملر ايله و باشده، سوزلرك باشى اولان برنجى سوزه، عين بسمله سريله و آخرده، شيمديلك رساله لرك آخرينه ماهيتنى گوسترر لايق برر إسم ويرهرك إشارت ايتمه سى گرچه گيزلى ايسه ده، فقط چوق گوزلدر و لطافتليدر. بن إعتراف ايدىيورم كه: بويله مقبول بر اُترك مظهرى اولق، هيچ بر وجهله او مقامه لياقتم يوقدر. فقط كوچك أهْمِيَتسز بر چكركدكن، قوجه طاغ گى بر آغاجى خلق ايتمك؛ قدرت إلهيه نك شأنندندر و عادتيدر و عظمتنه دليلدر. بن قَسْمله تأمين ايدر كه: رساله نورى ثنادن مقصدم، قرآنك حقيقترلينى و ايمانك ركنلرينى تأييد و إثبات و نشردر.

خالق رحيممه يوز بيكتر شكر اولسون كه؛ كنديمى كنديمه بگنديرمه مش، نفسمك عييلرينى و قصورلرينى بكا گوسترمش و او نفس اماره ي، باشقه لره بگنديرمك آرزوسى قالمامش. قبر قپوسنده بكله ين بر آدم، آرقه سنده كى فانى دنيايه رياكارانه باقماسى، آجينه جق بر حماقتدر و دهشتلى بر خسارتدر. ايشته بو حالت روحيه ايله، يالگز حقائق ايمانيه نك ترجمانى اولان رساله نورك طوغرى و حق اولديغنه لطيف بر مناسبت سويله يه جگم. شويله كه:

جلجلوتیه، سریانیجه بدیع دیمکدر و بدیع معناسنده در. عبارهلری بدیع اولان رسالۀ نور، جلجلوتیه ده مهمّ بر موقع طوتوب اکثر یرلرنده ترشحاتی گوروندیگندن، قصیده نڭ اسمی اوڭا باقیورگی ویریلمش. هم شیمدی آڭلایورم که؛ اُسکیدن بری بنم لیاقتم اولمادیغی حالده بڭا ویریلن بدیع الزمان لقبی بنم دڭلدی، بلکه رسالۀ نورڭ معنوی بر اسمی ایدی. ظاهر بر ترجمانه عاریۀ و امانة طاقیلمش. شیمدی او امانت اسم، حقیقی صاحبنه إعاده ایدیلمش. دیمک، سریانیجه بدیع معناسنده و قصیده ده تکررینه بناءً قصیده یه ویریلن جلجلوتیه اسمی إشاری بر طرزده، بدعت زماننده چیقان بدیع البیان و بدیع الزمان اولان رسالۀ نورڭ هم عباره، هم معنا، هم اسم نقطه لريله بدیع لکنه مناسبتدارلغنی إحساس ایتمه سنه و بو اسم بر پارچه اوڭا ده باقماسنه؛ بو اسمڭ مسمّاسنده، رسالۀ نور چوق یر إشغال ایتدیگی ایچون، حق قزانش تخمین ایدیورم. ﴿رَبَّنَا لَا تُؤَاخِذْنَا

إِنْ نَسِينَا أَوْ أَخْطَأْنَا﴾

سکرنجی رمز: بو رمزڭ بیانندن اَوّل اڭ مهمّ ایکی سؤاله جواب یازيله جق.

برنجی سؤال: بتون قیمتدار کتابلر ایچنده رسالۀ نور، قرآنڭ إشارتنه و إلتفاتنه و حضرت إمام علی نڭ (رض) تقدیر و تحسیننه و غوثِ اعظمڭ توجّه و تبشیرینه وجه إختصاصی نه در؟ او ایکی ذاتڭ کرامتله رسالۀ نوره بو قدر قیمت و اهمّیت ویرمه نڭ حکمتی نه در؟

الجواب: معلومدر که، بعض وقت اولور بر دقیقه؛ بر ساعت و بلکه بر گون، بلکه سنه لر قدر.. و بر ساعت؛ بر سنه، بلکه بر عمر قدر نتیجه ویرر و اهمّیتی اولور. مثلاً: بر دقیقه ده شهید اولان بر آدم، بر ولایت قزانیر؛ و صوغوغڭ

شدتندن إنجماد ایتمك زمانده و دشمنك دهشت هجومنده بر ساعت نوبت، بر سنه عبادت حكمنه گچه بیلیر. ایشته عینا اوپله ده: رساله نوره ویریلن اُهمیت دخی، زمانك اُهمیتندن، هم بو عصرك شریعت محمدیه به (عصم) و شعائر اُحمدیه به (عصم) ایتدیگی تحرییاتك دهشتندن، هم بو آخر زمانك فتنه سندن اُسكى زماندن بری بتون اُمت إستعاذه ایتمه سی جهتندن، هم او فتنه لر ك صولتندن مؤمنلر ك ایمانلرینی قورتارماسی نقطه سندن رساله نور اوپله بر اُهمیت كسب ایتمش كه؛ قرآن او ك ا قوتلی إشارتله إلتفات ایتمش و حضرت إمام علی (رض) اوچ كرامتله او ك ا بشارت ویرمش و غوثِ اعظم (رض) كرامتكارانه اوندن خبر و یروب ترجهانی تشجیع ایتمش. اوت بو عصرك دهشتنه قارشى، تقلیدى اولان إعتقادك إستناد قلعه لری صارصیلمش و اوزاقلشمش و پرده لنمش اولدیغندن؛ هر مؤمن، تك باشیله ضاللتك جماعتله هجومنه مقاومت ایتدیره جك غایت قوتلى بر ایمان تحقیقى لازمدر كه طایانه بیلسین. رساله نور بو وظیفه یی؛ اُك دهشتلى بر زمانده و اُك لزوملى و نازك بر وقتده، هر كسك اُكلايه جغى بر طرزده، حقائق قرآنیه و ایمانیه نك اُك درین و اُك گیزیلیرینی غایت قوتلى برهانلر ایله إثبات ایدهرك، او ایمان تحقیقى یی طاشییان خالص و صادق شاكردلری دخی، بولونقلری قصبه، قریه و شهرلرده (خدمت ایمانیه إعتباریله) عادتا برر گیزلی قطب گبی، مؤمنلر ك معنوی برر نقطه إستنادی اولارق، بیلینمه دكلری و گورونم دكلری و گوروشلم دكلری حالده، قوه معنویه إعتقادلری جسور برر ضابط گبی، قوه معنویه یی اهل ایمانك قلیبرینه و یروب، مؤمنلره معنا مقاومت و جسارت ویریورلر.

ایکنجی سؤال: کرامت إظهار ایدیلمزسه داها اولی اولدیغی حالده، نه دن

سن إعلان ایدرسك؟

الجواب: بو، بڻا عائد بر کرامت دگلدر. بلکه قرآنک إعجازِ معنویسندن ترشح ایدهرک خاص بر تفسیرندن کرامت صورتندہ بزلره و اهلِ ایمانه بر إکرام ربّانی و إنعام إلهیدر. ألبته معجزه قرآنیه و اونک لمعهلری إظهار ایدیلیر. و نعمت ایسه، شکر نیتیلہ إعلان ایتمک، بر تحدیثِ نعمتدر .

﴿وَأَمَّا بِنِعْمَةِ رَبِّكَ فَحَدِّثْ﴾ آیتی إظهارینه أمر ایدر. بنم ایچون مدارِ فخر و غرور اولاجق بر لیاقتم و إستحقاقم اولمادیغنی قَسَمَله إعتراف ایدیورم. بن چکردک گبی چورودم و قورودم. بتون قیمت و حیات و شرف او چکردکدن چیقان شجره رساله نور و معجزه معنویه قرآنیه گچمش بیلیورم. و اويله اعتقاد ایتدیگمدن إعجازِ قرآنی حسابنه إظهار ایدرم. بتون قیمت بر معجزه قرآنیه اولان رساله نورددر. حتّی أسکیدن بری طاشیدیغم بدیع الزمان إسمی اونک ایش، ینه اوڭا إعاده ایدیلدی. رساله نور ایسه، قرآنک مالیدر و معناسیدر.

بو رمزده خصوصی قناعتمی تأیید ایدن و کندیمه مخصوص چوق اماره و قرینه لر وار. فقط باشقه لره إثبات ایدهمدیگمدن یازهمیورم. یالڭز ایکی اوچنه إشارات ایتمگه مناسبت گلمش:

برنجیسی: بن جلجلوتیه یی اوقودیغم وقت، سائر مناجاتلره مخالف اولارق کندم بالذات حسنیاتمله مناجات ایدیورم دییه حسن ایدردم. و باشقه سنک لسانيله تقلیدکارانه اولمایوردی. بنم ایچون غایت فطری و دردلیمه علاقه دار و تفکراتِ روحیه مه خوش بر زمین اولویوردی. بر قاچ سنه صوڭره کرامتنی و رساله نور ايله مناسبتنی گوردم و آڭلادم که؛ او حالت، بو مناسبتدن ایلری گلمش.

ایکنجیسی: حضرتِ إمام علی (رض) باشده ﴿رُوحِي بِهِ اهْتَدَتْ إِلَى

كُشْفِ أَسْرَارِ بَاطِنِهِ انْطَوَتْ﴾ و اورته لرنده ﴿وَأَمْنِي يَا ذَا الْجَلَالِ كَرَامَةً﴾

بِأَسْرَارِ عِلْمٍ يَا حَلِيمُ بِكَ أَنْجَلْتُ» و آخرده «مَقَالُ عَلِيٍّ وَ ابْنِ عَمِّ مُحَمَّدٍ ❖ وَ سِرُّ عُلُومٍ لِلْخَلَائِقِ جُمِعَتْ» بر خزینہ علوم اولارق گوستریور. حالبوکه ظاهرنده یالکز بر مناجاتدر. حتّی امام علی نك (رض) حقیقت فشان سائر قصیده لری و علمی باشقه مناجاتلری گبی، اُسرار علمیه ایله تام مناسبتی گورونمیور. بنم خصوصی قناعتم شودر که: جلجلوتیه، مادام رسالۀ نوری ایچنه آلمش و سینه سینه باصوب معنوی ولد گبی قبول ایتمش، اَلْبَتَّه «وَ سِرُّ عُلُومٍ لِلْخَلَائِقِ جُمِعَتْ» فقره سی ایله، کندی خزینہ سنك بر قسم پیرلانطه لرینی آخر زمانده نشر ایدن رسالۀ النوری شاهد گوستروب جلجلوتیه یی بر خزینۀ علوم و بر دفینۀ علمیه در دییه بحقّ مدح و ثنا ایده بیلیر.

اوجنچیسى: معلومدر که، بعضًا غایت کوچك بر اُماره، بعض شرائط داخلنده غایت قوّتلی بر دلیل حکمنه گچر. یقین درجه سنده قناعت ویرر. بگا بویله قناعت ویرن چوق مثاللرندن یالکز سابق بیان ایتدیگم بر تك مثال بگا کافی گلییور. شویله که:

حضرتِ امام علی (رض) «تَقَادُ سِرَاجُ النُّورِ» فقره سیله رسالۀ نوری تاریخیله و اِسْمِیله و ماهیتیه و اُساسلریله و خدمتیه و وظیفه سیله گوستردکدن صوگره، سریانیجه اِسْمَلری تعداد ایده رك مناجات ایدر. اوتوز ایکی ویا اوتوز اوج عدد اِسْمَلرده ایکی دفعه «بَعْدَهَا» کلمه سنی تکرار ایدر. بری، یگرمی یدنجیده «وَ ذِیْمُوخٍ بَعْدَهَا» دیگری، اوتوز برده «وَ بَازُوخٍ بَعْدَهَا» دیر.

ایشته رسالۀ النورك سوزلری اوتوز اوج و بر جهته اوتوز ایکی.. و مکتوبات نامنده کی رساله لرك دخی بر جهته اوتوز ایکی و بر جهته اوتوز

اوج اولوب بو مناجاتله مطابق اولماسی و یالکز رساله شکلنده ایکی عدد ذیلری بولونماسی و او ذیللرک بریسی یگرمی یدنجی سوزک اُهمیتلی ذیلی و دیگر اوتوز برنجی سوزک قیمتدار ذیلی اولماسی و او ایکی ذیل رساله سنک مستقل مرتبه و نومرولری بولونماسی و ﴿بَعْدَهَا﴾ کلمه سی دخی عین یرده، عین معناده توافق ایتمه سی بکا ایکی کره ایکی درت ایدر درجه سنده قناعت ویریور که؛ حضرت إمام علی (رض) تبعی بر معنا ایله و إشاری بر مفهوم ایله رساله نوره، حتّی ذیلرینه باقمق ایچون او یله یاپمش. داها چوق قرینه لر و برر سوزه إشارت ایدن مناسبتلر وار. فقط گیزی و اینجه اولدقلرندن ذکر ایدیلمه دی. (حاشیه)

﴿لَا يَعْلَمُ الْغَيْبَ إِلَّا اللَّهُ ۖ وَاللَّهُ أَعْلَمُ بِالصَّوَابِ﴾



نورک بکجی

(حاشیه): مثلاً، یگرمی سکرنجی مرتبه ده **وَسُورَةُ التَّهْمِيْنِ** کلمه سیله یگرمی سکرنجی سوزک آخری اولان جهنم مسئله سنک چوق قوتلی بر برهانه إشارت ایدوب باشده کی جنت مسئله سنک یالکز ایکی اوج سؤال و جوابه دائر بحثی ایسه، باشقه یرده إشارت ایتدیگندن مناسبت گیزلنمش. هم مثلاً ایکنجی مرتبه ده **يَسْ** کلمه سیله، هم ایکنجی سوزه، هم ایکنجی مکتوبه، هم ایکنجی لمعه یه، هم ایکنجی شعاعه باقدیغندن مناسبت گیشلندیگندن گیزلنمش.

هم مثلاً: **وَكَافٍ وَهَا يَاءٍ وَعَيْنٍ وَصَادِهَا** یعنی **كَمِيعَصَ** بشنجی مرتبه ده بولونماسی، هم بشنجی سوزه، هم بشنجی مکتوبه، هم بشنجی لمعه یه و درنجی شعاع اولان آیت حسییه رساله سنه، هم اوچنجی شعاع اولان مناجاته باقدیغی جهتله مناسبت گیشلنمش، گیزلنمش. بوکا باشقه لری قیاس ایدیلسین.

﴿اَسْتَغْفِرُ اللهَ مِنْ خَطَايَ وَخَطِيئَاتِي وَمِنْ سَهْوِي وَغَلَطَاتِي وَالْحَمْدُ لِلّٰهِ عَلَى
 نِعْمَةِ الْاِيْمَانِ وَالْقُرْآنِ بَعْدَ حَاصِلِ ضَرْبِ حُرُوفِ رَسَائِلِ النُّورِ الْمَقْرُوَّةِ
 وَالْمَكْتُوبَةِ وَ الْمُتَمَثِّلَةِ فِي الْهَوَاءِ فِي عَاشِرَاتِ دَقَائِقِ حَيَاتِي فِي الدُّنْيَا وَ
 الْبَرْزَخِ وَالْآخِرَةِ﴾

﴿اَللّٰهُمَّ صَلِّ وَسَلِّمْ عَلَى مُحَمَّدٍ وَعَلَى اٰلِهٖ وَاصْحَابِهٖ بَعْدَهَا وَارْحَمْنَا وَ
 اَرْحَمْ طَلَبَةَ رَسَائِلِ النُّورِ بَعْدَهَا اٰمِيْنَ وَالْحَمْدُ لِلّٰهِ رَبِّ الْعَالَمِيْنَ﴾

﴿سُبْحَانَكَ لَا عِلْمَ لَنَا اِلَّا مَا عَلَّمْتَنَا اِنَّكَ اَنْتَ الْعَلِيْمُ الْحَكِيْمُ﴾



نورك بکجی

اوتوز برنجی مکتوبک اوتوز برنجی لمعه سنک اوتوز بر مسئله سندن بر مسئله در.

بر تک جمله اولان قیصه حق بر حدیثک بش لمعه
إعجازیه سنه دائر بر نکته در. بورایه بر مناسبتله گیرمش.

﴿الْخِلَافَةُ بَعْدِي ثَلَاثُونَ سَنَةً﴾ حدیث شریفک إخبار غیبی نوعندن تاریخچه
مصدق بش لمعه إعجازیه سی واردر.

برنجیسی: خلفای راشدینک خلافتلری ایله حضرت حسن رضی الله عنہک
آلتی آیلق خلافتک مدتی، اوتوز سنه اولاجغنی إخباردر. عینا چیقمش.

ایکنجیسی: اوتوز سنه لك خلیفه لری اولان حضرت أبو بکر رضی الله
عنه، حضرت عمر رضی الله عنه، حضرت عثمان رضی الله عنه و حضرت
علی رضی الله عنہک أبجدی و جفری حسابلری ییک اوج یوز یگرمی آلتی
(۱۳۲۶) ایدر که، او تاریخدن صوگره شرائط خلافت داها تقرر ایتمدی.
خلافت علیّه عثمانیه بیتدی.

اوچنجیسی: ﴿ثَلَاثُونَ﴾ کلمه سی، جفر حسابی ییک سکسان یدی
(۱۰۸۷) ایدر که، تاریخچه خلافت عباسیه نک إنقراضیله خلافت عثمانیه نک
تقررینه قدر اولان زمان فترت طی ایدیلسه ییک سکسان کسور قالیر. اگر
ناقص خلافتلر صاییلسه، ﴿ثَلَاثُونَ سَنَةً﴾ ده کی "سنه" لفظی علاوه اولور. او
حالده ییک ایکی یوز ایکی (۱۲۰۲) ایدر که، "رموزات ثمانیه قرآنیه" رساله لرنده
هم ﴿إِنَّا فَتَحْنَا لَكَ﴾، هم فاتحه، هم سورۀ نصر، هم سورۀ علق گبی چوق

پرلر ده عیناً خلافتله برابر دولتِ اسلامیہ نځ هم ترقي، هم غالبیت دوره سی اولان ييځ ايکي يوز ايکي (۱۲۰۲) تاريخي گوسترر. هم ناقص خلافتله برابر بتون مدّت خلافتِ اسلامیہ ييځ ايکي يوز ايکيدر که، تام تامنه توافقله خبر ويرر.

﴿وَإِنْ اسْتَقَامَتْ أُمَّتِي فَلَهَا يَوْمٌ وَإِلَّا فَنِصْفُ يَوْمٍ﴾ حديثك معجزانه إخبار غيبسني ايضاح ايدر. يعني بو حديث قيامتدن دگل، بلکه غالبانه حاکميتِ اسلامیهدن خبر ويرن اون سکرنجی لمعهده و باشقه يرده بو حديثك اوچ لمعه إعجازيه سني بيان ايتديگمدن بوراده قيصه کسيورز.

دردنجیسی: ﴿إِنَّ الْخِلَافَةَ بَعْدِي﴾ إلی آخر.. شدّلی ﴿إِنَّ﴾ يوز بر، ﴿الْخِلَافَةَ﴾ ييځ يوز قرق بر، ﴿بَعْدِي﴾ سکسان آلتی ايدر. يکونی: عربیجه ييځ اوچ يوز يگرمی سکز (۱۳۲۸) اولور و روميجه ييځ اوچ يوز يگرمی آلتيدر (۱۳۲۶) که، خلفای راشدينک إسملری ايکنجی وجهده گوستردیگی عين تاريخه و حرّيتك اوچنجی سنه سنده کی إنقطاع خلافتك تاريخنه تام تامنه توافق، ألبته او لسان الغیب اولان ذاتك لساننده تصادفی اولاماز؛ بلکه اونی ده گورمش، اوڭا ده إشارت ایتمش.

بشنجیسی: ﴿إِنَّ الْخِلَافَةَ﴾ شدّلی نون بر نون صایيلسه ييځ يوز طقسان ايکي (۱۱۹۲) ايدر که، عیناً ﴿ثَلَاثُونَ سَنَةً﴾ جمله سنك گوستردیگی گبی ييځ ايکي يوز ايکي (۱۲۰۲) تاريخنه اون فرقله تام توافق ایدهرک تام و ناقص بتون مدّت خلافتی گوسترمسی و يالکز "خلافت" کلمه سی ييځ يوز اون بر (۱۱۱۱) ایدوب تام خلافتك مدّته تام توافقله برابر او مدّته إشارت ايدر. ﴿ثَلَاثُونَ﴾

کلمه سنڱ جفری حسابی اولان بیڱ سکسان یدی (۱۰۸۷) عددینه، یگرمی درت گبی جزئی بر فرقله موافقت ایتمه سی، البته و هر حالده او مخبر غیبینڱ بر اشارت غیبیه سیدر و بر نوع معجزات غیبیه سنڱ بر لمعه سیدر. ایشته بو قیصه جق حدیثک جامعیتنه، سائر جوامع الکلم اولان حدیثلر قیاس ایدیلسین.

﴿سُبْحَانَكَ لَا عِلْمَ لَنَا إِلَّا مَا عَلَّمْتَنَا إِنَّكَ أَنْتَ الْعَلِيمُ الْحَكِيمُ﴾



نورک بلجی

ایکنجی کرامتِ علویہ

یگر می سکرنجی لمعه نك برنجی مسئله سی

أسكيشهر چيسخانه سنده إختلاطدن و قونوشمقدن
ممنوع اولديغم زمانده، قارشيمده كي قارداشليمه
تسلي ايچون يازديغم قيصه حق فقره لرك بر قسميدر.

بسم الله الرحمن الرحيم

چيسك بر لطيف خاطره سيدر كه: رساله نور گيزله نير فقط سونمز و سوندورولمز. بر عالم معنده حضرت إمام على رضى الله عنه ك علمندن صوردم: **﴿أَحْرَفُ عَجْمٍ سَطَرَتْ تَسْطِيرًا﴾** ديمشسك، مرادك نه در؟" ديدى: **﴿عُجْمٍ﴾** يعنى هجاوارى، تركيبسز و وفقرده رقموارى شكلسز حرفلدر كه؛ لاتينى حروفيدر. لا دينى زماننده تعمم ايدر. "صوكره صوردم: "أرجوزه كده بندن بحث ايله كنديكى محافظه ايت ديمشسك. هم تام وقتنده أمريكزى گوردك، فقط مع التأسف كنديمى محافظه ايده مدك، بو بلايه دوشدك. شخصمدن بيكلر دفعه داها أهميتلى اولان رساله نوردن بحث و إشارتك يوق مى؟" ديدم. ديدى: "يالكلز إشارت دكل، بلكه جلعلوتيه مده تصريح ايدىيورم." بن بو جوابدن صوكره، قصائد علويه دن أك مشهور و أك زياده أسرارلى اولان جلعلوتيه قصيده سنده بو فقره يي گوردم:

﴿تُقَادُ سِرَاجُ النُّورِ سِرًّا بَيَانَةً﴾ تُقَادُ سِرَاجُ السُّرُجِ سِرًّا تَنَوَّرَتْ ﴿ دَقَّتْ ایتدم،

صراحت درجہ سندہ رسالہ نورہ باقار۔ اُزجملہ: سراج النور بر تک فرق ایلہ تام و عیناً رسالہ نوردر۔ چونکہ سراج النورده ألف لام، جیم ایلہ برابر اوتوز درت ایدر۔ رسالہده "ل" و "ه" اوتوز بش ایدرکہ، بر تک فرق وار۔ او تک فرق ألفدر، او ده بیگہ اشارت ایدر۔

هم برنجی فقرہ جفر و أبجد حسابیلہ (شدہ صایلماز) یئک اوچیوز اُللی ایکی (۱۳۵۲) ویا اُللی (۱۳۵۰) ایدرکہ؛ بو تاریخ، رسالہ نورک گیزلمه سنه و گیزلی پارلاماسنه و إشتعالنه تام توافق ایدر۔ اگر ﴿بَيَانَةً﴾ کلمه سی صایلمازسه (حاشیه) او وقت ﴿سِرًّا﴾ کلمه سنک آخرنده کی تنوین (نون) صایلیر، یئک اوچیوز اوتوز اوچ (۱۳۳۳) ویا اوتوز بش (۱۳۳۵) اولورکہ؛ بو تاریخ، رسالہ نورک مبدأ إنتشاریدر۔

ایکنجی فقرہ اولان ﴿تُقَادُ سِرَاجُ السُّرُجِ سِرًّا﴾ ﴿سِرَاجُ السُّرُجِ﴾ ینہ اون فرقله رسالہ نورہ و فرقسز رسالہ نوری توافق ایتمکله برابر، تمام فقرہ جفر و أبجد حسابیلہ یئک ایکی یوز طقسان اوچ (۱۲۹۳) ایدرکہ؛ رسالہ نور مؤلفنک تاریخ ولادتیدر۔ و ﴿سِرًّا﴾ ده کی تنوین (نون) اولسه یئک اوچیوز قرق اوچ (۱۳۴۳) اولورکہ؛ رسالہ نوردن اونجی سوزک إنتشاری ایلہ پارلاماسی زمانیدر۔ اگر ﴿السُّرُجِ﴾ ده کی شدہ لی "س" ایکی "س" صایلیسه یئک اوچیوز اُللی اوچ (۱۳۵۳) ایدرکہ؛ بو تاریخ، رسالہ نورک بر مصیبت نتیجه سندہ موقت گیزلمه سنه و گیزلی پرده آلتنده پارلاماسنه و تنویرینه تام توافق ایدر۔

(حاشیه): ﴿بَيَانَةً﴾ کلمه سندہ کی ﴿ة﴾ وقفه راست گلدیگندن ﴿ه﴾ اولور۔

عجبا حضرت علی (رض) گبی اُسرارِ حروف و جفر علمنده استاد مطلق و جملوتیه گبی جفری، اُجدلی، سری بر قصیده سنده بو معنا جهتیه و جفر اعتباریه و حقیقت نقطه سنده و واقعہ مطابق حیثیتیه و مقتضای حالہ موافق اولان متعدّد و معنیدار توافقات عجیبه سی تصادف اولایلیر می؟ حاشا اولاماز. بلکه حضرت علی رضی اللہ عنہک بر کرامتیدر. ارجوزه ده کی چوق ظاهر اولان مشهور کرامتنی تأیید و اونکله تأیید ایدر.

جملوتیه نڭ رسالہ نوره اِشارتنی تأیید ایدن جای دقت بر توافق وار. شویله که: بو سری و جفری قصیده نڭ جفری و حسابی رقمیری هر سطرک آلتنده مطبوع اولارق یازیلیمش. او رقمیر آیری آیریدرلر. فقط رسالہ نوردن بحث ایتدیگی یرده او جفری رقمیر رسمًا قبول ایدیلن میلادی تاریخنه توافق ایدیور. و او تاریخک تاریخ قبولی و رسالہ نورک پرده آلتنده تنویرینک تاریخی گوستریور. ییک طوقوز یوز یگرمی طوقوزدن (۱۹۲۹) تا اوتوز طوقوزه (۱۹۳۹) تا قرق درده (۱۹۴۴) قدر گوسترر. اوتوز ایکی صحیفه دن عبارت اولان او قصیده نڭ یالکز بر ایکی یرده بو زمانک میلادی تاریخنی گوسترر. ظن ایدرم که، اوتہ کی یرده دخی بو زماندن بحث ایدیور. داها تام آکلامامشم.

هم باشده سورہ اِخلاص ایله اِشارت ایدیلن وفقِ مُثَلَّث ییک اوچیوز أُللی بر (۱۳۵۱) ایدر. هم بو اِشارتِ عَلَویہ یه بو ده ایما ایدر که؛ او قصیده نڭ نصفِ اُولنده یتمش فقره ده اون یدی دفعه نور (حاشیه) کلمه سنی تکرار ایدیور

(حاشیه): رسالہ نورک سببِ تسمیه سی اون یدی جهتله نور ایله علاقه دار اولدیغندن و اون عدددن زیاده رسالہ قدرک مسائلِ متفرقه سنک آخرنده ذکر ایدیلیمشدر. بو لطیف توافق معناسز اولاماز.

و متعدّد دفعه سریانیجه بدیع معناسنده اولان جلجلوتیه کلمه سنی اوپله اُهمیتله ذکر ایدر که؛ قصیده نڭ اِسمی جلجلوتیه اولمشدر. رسالۀ نور اُسماء حسنی ایچنده اِسم نور، اِسم حکیم و اِسم بدیع مظهریدر. ظاهرنده، طرز بیانده اِسم بدیع جلوه سی گورونویور. هم **﴿تُقَادُ سِرَاجُ النُّورِ﴾** فقره سندن ایکی سطر اول بو

فقرۀ رعنا، بلکه اُک اُهمیتلی و اُک پارلاق فقره اولان **﴿أَقْدُ کَوَکِبِی بِالْأَسْمِ نُورًا وَ**

بَهْجَةً ۞ مَدَى الدَّهْرِ وَالْأَيَّامِ يَا نُورُ جَلَجَلْتَ﴾ یعنی: یا رب! بنم ییلدیزی می نور ایله آخر زمانه قدر بدیع بر صورتده ایشیق لاندیر، شعله لندیر. اوت اِمام علی رضی الله عنہک شو دعاسی، بو زمانده رسالۀ نور ایله قبول اولدیغنی و رسالۀ نوری اراده ایتدیگنی شو بدیع، عجیب توافق اثبات ایدر. شویله که:

﴿أَقْدُ کَوَکِبِی بِالْأَسْمِ نُورًا﴾ تام تامنه عینا جفر و اُجد حسابیله رسالۀ نور

اولویور. چونکه نور کلمه سی هر ایکیسنده ده وار. **﴿أَقْدُ کَوَکِبِی بِالْأَسْمِ﴾** ایکی یوز طقسان آلتی (۲۹۶) ایدر. رسالۀ نورده کی "رساله" کلمه سی عینا ایکی یوز طقسان آلتی (۲۹۶) در. دیمک اِمام علی رضی الله عنه بتون علوم نڭ خزینه سی اولان قرآن معجز البیان نڭ بر شعلۀ اعجازی اولان رسالۀ نوری جناب حقندن آخر زمانده قرآنه چلیک بر سور و پارلاق بر ییلدیز اولارق ایسته مش. (حاشیه) و دعاسی قبول اولمش.

(حاشیه): **﴿تُقَادُ سِرَاجُ السُّرُجِ سِرًّا تَنَوَّرَتْ﴾** دن صوثره متّصل اولارق گلن شو سطر:

﴿يُنُورُ جَلَالٍ بَارِخٍ وَشَرَنْطَخٍ ۞ يَقْدُوسُ بَرْکُوتٍ بِدِ النَّارِ أُخْمِدَتْ﴾ ینه رسالۀ نوره پک ظاهر بر صورتده باقار. چونکه معناسی شودر: رسالۀ نور آخر زمانده پرده آلتنده گیزلیجه تنور ایدوب، نورلی اِسم **﴿شَرَنْطَخٍ يَقْدُوسٍ بَرْکُوتٍ﴾** یعنی رؤف رحیمدن اِسم اعظمک تأثیری آلتنده جلال و کبریانت عظمتلی نورندن اِقتباس ایدرک ضلالت و اِلحاد آتشی سوندوره جک. اوت بو معنا، رسالۀ نوره تام تامنه مطابقدر. چونکه رسالۀ نوری مطالعه ایدنلر بیلیرلر که؛

داها جلجلوتیه ده بو زمانه و رسالۀ نوره ایما ایدن متعّد اماره لر وار.
 حتّی حیرتمی موجب بر رؤیا: اُسکیشهر چپسندۀ إستنطاقمدن بر گیجه اُول
 گوروپورم که: جلجلوتیه نڭ سُریانی شو فقره سی ﴿بِهَالِ اِهیلِ شَلْعِ شَلْعُوْبِ شَالِجِ
 طِهِّي طُهُوْبِ طِيْطُهُوْبِ طِيْطَهْتِ﴾ إمدادیمه یتیشمش، بنی صیقنتیدن
 قورتارمش. بن بر قاچ دفعه تکرار ایدوب اوقویورم. اویاندم. یاتدم، ینه اونڭله
 مشغولم. صباحلین فوق المأمول إستنطاقه چاغیریلدم، هم فوق العاده جواب
 ویردم. مدافعاتمڭ اڭ مهمّ و مأمورلری حیرتده بیراقان پارچه سی تکلفسز تظاهر
 ایتدی. فقط او پارچه یی بن قلمه آلامدم. اونلر یازدیلر. هر نه ایسه... بوندن
 بو جلجلوتیه بزه باقار. بر خاطره گلدی، باقدم که؛ او سُریانی فقره نڭ تام
 آرقه سنده بر سطر اُول، حضرتِ إمامِ علی نڭ (رض) رسالۀ نوری تصریح
 ایتشم دییه باشده یازدیغم ﴿تَقَادُ سِرَاجُ النُّورِ سِرًّا بَيَانَةً﴾ و ایکی سطر اُول
 ﴿اَقْدُ کَوَکِبِي بِالْاِسْمِ نُورًا﴾ معنیدار، مژده لی کرامتکار فقره لری بولونویور.
 اڭلادم که، گیجه ده کی مشغولیت بونڭ ایچون ایمش.

الحاصل: جلجلوتیه بو إشاراتیله قصیدۀ ارجوزیه ده کی ظاهر کراماتِ
 علویه یی هم تأیید ایدر، هم اونڭله تأیّد ایدوب صراحت درجه سنه تقرّب
 ایدیور.

جای دَقّدر که: بن اویسی بر طرزده بر قسم علمِ حقیقتی، حجّة الإسلام

اونڭ ایکی منبعی وار. بری: اِسْمِ اَعْظَمُک کبریالی و عظمتلی جلوه سی. دیگر: اِسْمِ رَحیمُک
 شفقتلی و رأفتلی تجلیسیدر. و اونڭ نوریله فتنۀ دینیّه ناری و زندقه آتشی سونویور و
 سونه جک.

اولانِ اِمام غزالی دن (ق س) اَلْمَشْدَم . شیمدی آڭلایورم که؛ اِمام غزالی (ق س) عین درسی اویسی بر طرزده اِمام علی دن (رض) اَلْمَشْدَر . دیمک حضرت اِمام علی رضی الله عنہک مهمّ بر شاکردی اولان اِمام غزالی نڭ (ق س) باشی اوستنده بو بیچاره طلبه سنه شفقتکارانه، تسلّیدارانه، اُک صیقنتیلی بر زمانده باقماسی عجیب دگل، بلکه لازمدر. و اویله اولمق گرکدر.

رساله نوره اوچ فقره سنده قوّتلی اِشارت ایدن حضرت علی نڭ (رض) قصیده جَلْجَلوتیه سنڭ هیچ بر جهته تصادفه حمل ایدیلمز توافقلی بر کرامتنی بیان ایتمگه مجبور اولدم. شویله که: اوچ آیدن بری او قصیده یی اوقوبورم. یالڭز سکز صحیفه یی، حلّ ایده مدیگم بر وفقه دائر اولدیغی جهته اوقومیوردم. فقط آخرنده ﴿وَصَلِّ اِلَهِی﴾ دن باشلایان آخرکی ایکی صحیفه یی ده اوته کیلرله برابر اوقوردیم. یتمش دفعه قطعی، بلکه تخمینمه گوره یوزه یاقین دفعه لرده هر دفعه اِستثناسز، نه وقت اَلیمه آلوب باشدن اوقودقدن صوڭره آخرینی آچارکن، ﴿فَیَا حَامِلَ الْاِسْمِ الَّذِی جَلَّ قَدْرُهُ﴾ ایله باشلایان صحیفه آچیلییوردی. بن حیرت ایدیوردم. اونی اوقومیارق ایکی صحیفه صوڭره ﴿وَصَلِّ اِلَهِی﴾ ایله باشلایان ایکی صحیفه آخرینی اوقودقلمه ضمّ ایدرک هر نه وقت باشدن اوقودیغم و ترک ایتدیگم سکز صحیفه یه گلیرکن، کتابک باقی قالان یوزه یاقین صحیفه لری ایچنده آچدقجه ینه ﴿فَیَا حَامِلَ الْاِسْمِ﴾ صحیفه سی آچیلییوردی. حیرت ایچنده حیرت ایدیوردم. اَللی دفعه دن صوڭره دیدم: "عجبا بو صحیفه نه دن آچیلییور؟ اونی ده اوقوسهم نه اولور؟" باقدم که، قصیده جَلْجَلوتیه یی اوقودیغم مقصدک نتیجه سنی او صحیفه گوسترییور. بن ترک ایتدیگمدن خطا ایتدیگمی بیلدم. اوندن صوڭره اوقومغه باشلادم. اوندن صوڭره بلکه قرق دفعه دن فضله اَل آتدقجه ینه او صحیفه آچیلییوردی. نهایت آرقداشلمه حکایه

ایتم. اونلر ده حیرت ایچنده حیرته قالدیلر. دیدم: بو جلجلوتیه نڭ بر کرامتیدر. سزلی دگل باشقه لرینی إقناع ایده جڭ مادی دلیل ألیمه یوق. یالڭز بنم مشاهداتم وار. بنم مشاهداتم، باشقه سنه حجت اولاماز. بن ده شیمدی یه قدر دلیل سز دعوالری یازمق عادت دگلدی. فقط مادام بو توافق عجیدر. ألبته إشارتدر که؛ بنی یاز. اینانمیانہ کندینی ایناندره جق که، یازدیرمق ایسته یور.

جنابِ حقّه یوز ییڭ شکر ایدیورم که؛ بڭا هم بیوک بر تسلی، هم دعوامه بیوک بر دلیل گوستردی. و توافقڭ بش آلتی نوعی بزه و مسلگمه مدار إمتیاز و وسیله تشویق اولارق ویریلمش. و هر مایوسیت و گۆشکلک زمانزده بر قامچی تشویق و بر کرامت خدمت قرآنیه مدار بر توافق لطیفه إمدادیمزه یتیشدیگی گبی، بو دفعه ده یتیشدی.

أوت قلباً غایت علاقه دار اولدیغم قارداشلریمڭ مفارقت زماننڭ پک یاقین اولدیغی بر زمانده و چپسده یالڭز قالاجغم بر آنده و اوچ آیده یتمش دفعه عجیب بر طرزده بڭا آچیلان بر صحیفه نڭ کرامتنی دعوا ایتدیگم و دلیل سز قالدیغم بر هنگامده، حضرت علی نڭ (رض) جلجلوتیه قصیده سنڭ یتمش دفعه بلا إستثنا بڭا آچیلان ﴿فَيَا حَامِلَ الْأِسْمِ الَّذِي جَلَّ قَدْرُهُ﴾ دن باشلايان اوچ درت سطرده اوچ درت قوتلی أماره و دلیل واردر که؛ ﴿فَيَا حَامِلَ الْأِسْمِ﴾ خطاب عمومیسنده بزه خصوصی باقیور.

برنجی أماره: ﴿فَيَا حَامِلَ الْأِسْمِ الَّذِي جَلَّ قَدْرُهُ﴾ فقره سی هم مقام، هم معنا، هم جفر و أبجد حسابیله بو نداء عمومی علویده خصوصی بر طرزده بو زمانه و رساله نوره و رساله نورڭ مؤلفنه باقیور. چونکه ﴿فَيَا حَامِلَ الْأِسْمِ﴾

الَّذِي جَلَّ قَدْرُهُ جفر و أبجد حسابیلہ ییک اوچیوز اُللی اوچ (۱۳۵۳) سنہ سی زماننی تام گوستردیگی و او زمانده ده رسالہ نور و شاکردلرین اُک قورقولی بر زمانیدر که؛ آلتی سطرده یدی دفعه **«لَا تَخْشَ»** کلمه لرینی تکرار ایدیور. **«فَيَا حَامِلَ الْإِسْمِ»** فقره سنده کی **«حَامِلَ الْإِسْمِ»** ملا سعید (رض) **«فَيَا حَامِلَ الْإِسْمِ»** (ملا کرد) و (ملا سعید بدیع) یالکز اوچ فرق ایله توافق سربله گوستریور. و بو اسم صاحبی، بو خطابده خصوصی مراد اولدیغنه إشارت ایدیور. و معناسیله ده " ییک اوچیوز اُللی اوچ (۱۳۵۳) سنه سنک تاریخنده بو اسم اعظمک حاملی، یعنی اسم اعظمی کندینه محافظ إتحاذ ایدن شخص " دیمکله او عمومی خطابده بویله خصوصی بزه باقیور.

چونکه لله الحمد ییک اوچیوز اُللی اوچ (۱۳۵۳) تاریخنده هر یگر می درت ساعتده یوز یتمش بر دفعه **«الْإِسْمُ الَّذِي جَلَّ قَدْرُهُ»** اولان اسم اعظمی او قویوردم. و کندیمی اونکله محافظه یه چالیشیوردم. اوت قصیده ارجوزیه سنده سکینه تعبیر ایتدیگی اسم اعظم و جلجلوتیه سنده سربانی و عربی اولارق ینه متعدد طرزده **«الْإِسْمُ الْمُعْظَمُ قَدْرُهُ الَّذِي جَلَّ قَدْرُهُ»** گی تعبیرلرله بیان ایتدیگی أسماء ستّه مشهوره که؛ اسم اعظمدر. گوستردیگی ییک اوچیوز اُللی اوچ (۱۳۵۳) تاریخنده (حاشیه) یوز یتمش بر دفعه أسماء ستّه سی رسالہ نور مؤلفنک

(حاشیه): بلکه **«فَيَا»** ندا ایله چاغیردیغی **«حَامِلَ الْإِسْمِ الَّذِي جَلَّ قَدْرُهُ»** حساب أبجد و جفرله ییک اوچیوز اُللی درت (۱۳۵۴) ایدر که؛ بو عربی تاریخده رسالہ نورک قرقدن فضلہ شاکردلرینی و مؤلفنی إحقا ایتمک پلانی ایله چپسخانه یه آتدقلری زماندر و توقیف ایتدکلری تاریخدر. بو تاریخده بو خطابده تام مخاطب اولارق، یالکز بونلر گورونویورلر. چونکه وضعیتلری غایت قورقولی ایدی. حالبوکه خارقه اولارق سلامتہ چیقیدیلر. بو فقره ده حضرت علی (رض)

دائىمى وردىدر. و او يوز يىتمش بر دفعه اوقودىغم اسماء سته ايله برابر يىتمش بر آيتى يىگرمى درت ساعته اون طوقوز دفعه اوقويهرق يىكونى يىك اوچيوز آللى اوچ (۱۳۵۳)، هم بر جهته يىك اوچيوز قرق بر (۱۳۴۱) ايدر كه؛ بو اسم اعظمه يىك اوچيوز قرقدن (۱۳۴۰) برى دوام ايتديگمك تاريخنه توافق ايدىيور. هم بر دفعه سنده اون طوقوز آيت اسم اعظمه برابر اون طوقوز دفعه دائىمى اوقونور. و آيتلرك تكراراتك حروفاتك عددى آلتى يىك آلتى يوز آلتى يوز آلتى (۶۶۶۶) آيات قرآنيه توافق ايدىيور. سورة اخلاصك اوچ و فاتحه شريفه نك تكرر نزولى ايچون ايكى اولسه، ينه تام تامنه توافق ايدىيور.

ايكنجى اماره: ﴿فَيَا حَامِلَ الْإِسْمِ الَّذِي﴾ سطرندن صوگره ﴿فَقَاتِلْ وَلَا

تَخْشَ وَ حَارِبٌ وَلَا تَخَفْ﴾ فقره سى پك ظاهر و قطعى بر صورتده حرب عمومى يى گوستردىگى گبى، حرب عمومىده غايت تهلكهلى بر صورتده حربى اشتراك ايدن بو فقيرك ائق قورقونج زماننه باقار و تسلى ايدر، "قورقمه" دير. و بو عمومى خطابده خصوصى رساله نورك باشلانغىچى اولان اشارات الإعجازك مبدأ تأليفى ايله و عالم اسلامك ائق مدهش و قورقولى مصيبت زمانى معناسيله گوستردىگى گبى، جفر و أبجد حسابيله ده گوسترر. معنا ايله جفر

دييور: ﴿تَوَقَّى بِهٖ كُلَّ الْأُمُورِ سَلَمَتْ﴾ يعنى اسم اعظمك بركتيله هر بر تهلكه دن سلامتله قورتولا جقسكز. اوت، شكر قورتولدق. اگر ﴿الَّذِي جَلَّ﴾ ده كى ايكى شدهلى لامر برر لام صايبيله يىك ايكى يوز طقسان درت (۱۲۹۴) ايدر كه؛ او زمان، رساله نور مؤلفنك دنيايه گلدىگى تاريخدر و طقسان اوچ مدهش حربندن تا حرب عمومى يه قدر و يىك اوچيوز آللى درده (۱۳۵۴) قدر اولان تهلكهلى بر زمانده ياشايه جقسك و چوق تهلكه لره دوشه جقسك، فقط قورقمه قورتولا جقسك ديه اشارت ايدىيور.

حسابی اتفاق ایتدیگی یرده، ایما قوتله نوب إشارت درجه سنه چیقار. چونکه
﴿وَلَا تَخْشَ﴾ هجری بیك اوچیوز اوتوز یدی (۱۳۳۷)، رومی ایکی کسور فرق
ایدر. او حالده بیك اوچیوز اوتوز درده (۱۳۳۴) اینییور. او تاریخده یالکز تک
باشمله روسیه نك شمانده اُك قورقولی بر وضعیتده و اُسارتدن فرار ایتدیگمك
زمانیدر. **﴿فَقَاتِلْ وَلَا تَخْشَ﴾** برابر اولسه بیك طوقوز یوز قرق (۱۹۴۰) کسور
اولویور که؛ بونده الله اَعْلَمُ او تاریخده دیگر بر حرب عمومی چیقمه سنه إشارت
ایتمکله برابر، بویله بیوک یکونلرده اوچ درت فرقك اُهمیتی اولمادیغندن، هم
رومی یرینه عربی بو میلادی تاریخنه گیرسه بش آلتی سنه فرق اییدیور. ینه اوتوز
یدی تاریخی اولکی حسابنه توافق ایدوب، اُك قورقولی وضعیتمزده تسلی
ویریور. **﴿وَحَارِبْ وَلَا تَخَفْ﴾** ایسه پک صریح بر صورتده حرب عمومی یی
گوستریور. چونکه **﴿وَحَارِبْ وَلَا تَخَفْ﴾** معناسی، دهشتلی بر حرب آخر
زمانده قورقمه دیمکله برابر؛ جفر و أبجد حسابیله بیك اوچیوز اوتوز بر (۱۳۳۱)
ویا خود بیك اوچیوز اوتوز اوچ (۱۳۳۳) ایتدیگندن او عمومی خطابده
خصوصی بزه باقدیغی سائر اُماره لرله گوروندیگی گبی، او تاریخده حرب
عمومیده اُك مداهش بر وضعیتنه گرفتار اولمشدم. إشارات الإعجازك مسوده
اولیسی دشمنك اُنده پارچه پارچه اولمشدی. بن ده بر دفعه ده درت مرمی
وجودیحه إصابت ایدهرک بریسنده یاره لی، آیاغم قیریق، صو و چامور ایچنده
اوتوز درت ساعت ئولومه منتظر و اُطرفمده دشمن عسکری محاصره ایتدیگی
بر هنگامدر که، اُك قورقولی و اُك مایوسیتلی زمانمه باقیور. او یله ایسه او عموم

ایچنده خصوصی بزه إشارت ایدیور (حاشیه) دینیله بیلیر.

(حاشیه): ﴿فَيَا حَامِلَ الْإِسْمِ الَّذِي﴾ إلخ... درت سطرده بش آلتی وجهله رسالۀ نوره و مؤلفنه

إشارت ایتدیگی گئی، حیاتنده کی وقوعات مهمّیه پارمق باصییور. أزجمله: دردنجی سطرده ﴿فَلَا حَيَّةٌ

تَخْشَى﴾ فقره سیله ییڭ اوچیوز قرق سکر (۱۳۴۸) راده لرنده و رومی ایسه ییڭ اوچیوز قرق بشده (۱۳۴۵)

خواجه م طاغده کی جسیم بر قره آغاجه طایاندیغی ائناده، یاریم ساعت بر گورولتی ایشیدوب باقمادی.

صوڭره باقدی که، غایت مدھش اُدرھا گئی بر بیلان، آرقه سنده آغزینی آچمش بکله یور. هجوم ایده مییور.

بردن خواجه م او بیلانڭ اوئندن تارلا ایچنه چکیلدی. بیلان ایسه چور کلنمش و بر متره ده آیاغه قالمش

بر وضعیتده ایکن، اونڭ هجومه إنتظار ایدیوردی. حالبوکه خارقه اولارق او مدھش حیوان قیملدانه مدی.

چونکه خواجه مڭ او گون چوق دفعه اوقودیغی آیت الکرسی حمایتی او حیوانه گم وورمش گئی اوچ متره

مسافده طور دیردی. اُڭ نہایت چکیلدی گیتدی. بو معنای تأیید ایدن جفرجه ﴿حَيَّةٌ﴾ ده ﴿ت﴾ مؤنث

علامتی اولدیغی ایچون صاییلماز، چونکه او بیلان دهشتنه گوره مذکر ایمش. تعبیر حقّی ﴿حَيٌّ﴾ در. ﴿حَيٌّ﴾

اولسه او وقت ﴿فَلَا حَيٌّ تَخْشَى﴾ عربی ییڭ اوچیوز قرق سکر (۱۳۴۸) ایدر که؛ عین تاریخده بو حادثه

واقع اولمشدر.

هم اوچنجی سطرده ﴿وَخَاصِمٌ مِّنْ تَشَاءُ﴾ فقره سنده ﴿مِّنْ تَشَاءُ﴾ جفرجه، خواجه مڭ خصوصت

ایتدیگی آدم لرڭ عینِ إسم لرنڭ عددینه موافق گلییور. ایضاحاته اذن ویرمیدیگی ایچون بو قدر یازدیرلدی.

﴿وَحَارِبٌ وَلَا تَخَفُ﴾ دن صوڭره ﴿دُسْ كُلَّ أَرْضٍ﴾ (حاشیه) یعنی أراضه باصدیغڭ زمان که، جفرجه ییڭ

ایکی یوز طقسان بش (۱۲۹۵) عربی و طقسان اوچ رومی تاریخیدر که، تاریخ ولادتنه و روس حرب

مدھشنه توافقه برابر ﴿بِالْوُحُوشِ تَعَمَّرْتُ﴾ فقره سی إشارت ایدیور که؛ یره باصدیغڭ زمان زمین

وحشیلرله شنله نییور. یعنی وحشی روسلر عالمِ اسلامی خیر پالییور. قرق سنه صوڭره او وحشیلرڭ ألدنه أسیر

اولوب اولرڭ اُڭ وحشی مملکتنه گیده جکسڭ، خبر ویریور.

الحاصل: ﴿فَقَاتِلْ وَلَا تَخْشَ وَحَارِبٌ وَلَا تَخَفُ * دُسْ كُلَّ أَرْضٍ بِالْوُحُوشِ تَعَمَّرْتُ﴾ بو

سطرده درت کلمه ایله باشنه گلن درت وقوعات مهمّیه صراحته یاقین إشارت ایدیور.

حافظ توفیق

حاشیه: ﴿كُلَّ أَرْضٍ﴾ ده کی تنوین نون صاییلیر. (۱۲۹۵-۱۲۹۳)

اوچنجی اماره: بو اوچ گوز موسمیدر. عین زمانده مدارِ تسلی اوچ کرامتی گوروپورز:

برنجیسی: غوثِ اعظم (رض) **﴿يَا مُرِيدِي كُنْ قَادِرِي الْوَقْتِ لِلَّهِ مُخْلِصًا تَعِيشُ سَعِيدًا﴾** تعبیرله اونبش اماره قویه ایله بزه باقدیغی و تسلی ویردیگی **﴿فَقُلْ وَلَا تَخَفْ﴾** امریله قورقومزی ازاله ایتمش.

ایکنجی گوزده: عین موسمه حضرت علی (رض) عیناً او قدسی حفیدینک باشی اوستنده بزه باقوب قورقولی، مأیوسیتلی وضعیتمزدن و یاقینده باشمه گله جک مصیبه قارشی تحفظ ایچون اسمِ اعظمی درس ویروب **﴿وَيَا مُدْرِغًا لِذَلِكَ الرَّمَانِ﴾** تعبیرله بش قوتلی دلیلر ایله او عمومی خطابدن بزه خصوصی باقدیغنی گوردک.

بو اوچنجی گوزده: بزی ایقاظ ایتدیگی مصیبت باشمه گلدیگی و چپسه دوشدیگمز و بتون روحمله اُنسیت ایتدیگم آرقداشلریمک مفارقت زمانده ینه **﴿فَيَا حَامِلَ الْإِسْمِ الَّذِي جَلَّ قَدْرُهُ﴾** دییه کرامتکارانه بزه تسلی و قورقومزی ازاله ایدر بر طرزده بیاناتی گورولدی.

لطیف توافقندره که: اوچ گوز موسمنده عین زمانده سکرنجی و اون سکرنجی و یگرمی سکرنجی لمه لر بو اوچ کرامات عظیمه یه دائر اولدیغندن اختیاریمز اولمادن اونر فاصله ایله سکز، اون سکز، یگرمی سکزه توافق ایدیور.

بو آلتی سطرده یدی دفعه حضرتِ امام علی نك (رض) **﴿لَا تَخْشَ﴾**

دیہرک ییڭ اوچیز اوتوز یدیدن (۱۳۳۷) صوگره کی سنه لر قورقولی سنه لر اولدیغندن اڭ زیاده قرآن حسابنه پریشانیت و خوفه دوشمش اولانلره تسلی و تشجیع ایتمه سی، بو عمومی خطابده هر بر سنه یه بر **﴿لَا تَخْشَ﴾** کلمه سیله باقوب قرق ایک یه و داها صوگره سنه قدر رساله نورک مبداء انتشاری و تألیفی و بو فقیر، آرقداش لرمله برابر زمانک اڭ دهشتلی ضربه سنه معروض اولدیغمزدن بو عمومی خطابده بزه خصوصی باقدیغنه قوتلی بر اماره در. اگر **﴿لَا تَخْشَ﴾** معناسنده بولونان **﴿لَا تَخَفَ﴾**، **﴿لَا تَهَرَّبَ﴾**، **﴿وَخَاصِمٌ مِّنْ تَشَاءُ﴾** گبی درت بش کلمه داها علاوه اولسه، بزم و رساله نورک انتشاریله برابر اڭ قورقولی بر زمانده اولدیغمزدن ینه سائر اماراتک اشاراتیله بو فقره لر عمومی خطاب ایچنده خصوصی بر صورتده رساله نور شاکردلرینه باقار و بالخاصه بربرینه مقابل ملک لک، رئیس لک تجاوزندن و توقیفندن و إحاطه سندن قورقمه مثالنده اولان **﴿وَلَا تَخْشَ مِنْ بَاسِ الْمُلُوكِ وَلَوْ طَغَتْ ۖ وَلَا تَخْشَ بَاسًا لِلْمُلُوكِ وَلَوْ حَوَتْ﴾** ایک ی فقره ی شیمدی تام ایضاح ایده مدیگم متعدد اماره لر ایله حاکم لر، پادشاه لر، رئیس لک سکا قارش ی هجوم لرندن و أسارت لرندن و یاقالامال رندن قورقمه دیه اولان خطاب عمومیسنده خصوصی بزه باقیور. هم معناجه هم جفرجه حقیقی و لایق مخاطب اولاجق مصیبت زده لر ایچنده تام بزم گبی بو زمانده هیچ بر کیمسه گورولمیور. دیمک خصوصی بو ایک ی فقره بزه باقار.

هم **﴿فَيَا حَامِلَ الْإِسْمِ﴾** إلخ... فقره سنک آلتنده کی فقره اولان **﴿تَوَقَّى بِهِ كُلَّ الْأُمُورِ تَسَلَّمَتْ﴾** معناسیله ینه جفر و أبجد حسابیله **﴿بِهِ كُلُّ الْأُمُورِ تَسَلَّمَتْ﴾**

(حاشیه) یك اوچیز اَللی درت (۱۳۵۴) عربی تاریخنده اَك سَوْدیگم قارداش لرم له چپسده مایوسیتلی بر وقتده گونده یوز یتمش بر دفعه ﴿الْإِسْمُ الَّذِي جَلَّ قَدْرُهُ﴾ تعبیر ایدیلن اِسْمِ اعظمی اوقودیغم بر زمانده اَلْبته بو تسَلّی سلامت، جلجلوتیه نك عمومی مژده سنده خصوصی بزه باقدیغنی اهل انصاف ترّد ایتمه ملی. چونکه حَقْمزده کی دشمن پلانندن سلامتّه چیقماق خارقه در که؛ اونی گوسترییور. قصیده نك اورتە سنده اَك مهمّ و اَك پارلاق یرده اَك مهمّ دعاسنك نتیجه سنده اوچ فقره سنك هر برنده صراحتّه یاقین رسالّه نوری معناسیله و جفرله گوسترمسی، بوراده ﴿فَيَا حَامِلَ الْإِسْمِ﴾ فقره سنده دخی رسالّه نور شاگردلرینه تسَلّی و تأمینات و یرمکله خصوصی بر صورتده باقدیغنی قوتلی تأیید ایدیور.

بو اماره لری تأیید ایدن شو نقطه در که: قصیده جلجلوتیه عمومیتی اعتباریله سُریانی، عبرانی اَسْماءِ اِلْهییه و سُورِ قرآنییه شفاعتجی یاپوب خصوصی مناجات اولدیغی حالده، باشدہ ﴿بَدَأْتُ بِبِسْمِ اللَّهِ رُوحِي بِهِ اهْتَدَتْ اِلَى كَشْفِ اسْرَارِ بَاطِنِهِ انْطَوَتْ﴾ فقره سیله گوسترییور که: بعض اَسْرار غیبیه نك کشفندن بحث ایده جك. یالکز بر ایکی یرده خصوصی مناجات و دعادن اِستقباله باقار طرزی وار که؛ بریسی ﴿اَقْدُ كَوَكْبِي بِالْإِسْمِ نُورًا﴾ دن

(حاشیه): ﴿بِهِ كُلُّ الْأُمُورِ تَسَلَّطَتْ﴾ یك اوچیز یگرمی بشدر (۱۳۲۵). بو تاریخده او ﴿حَامِلَ الْإِسْمِ﴾ دیوان حربك دار آغاجنه آصیلماقندن مأمولك خلافتنه اولارق سلامتله قورتولدیغی گبی؛ ﴿حَامِلَ الْإِسْمِ الَّذِي جَلَّ قَدْرُهُ﴾ یك اوچیز اَللی درتده (۱۳۵۴)، بو تاریخده بو مدهش مصیبتدن خارقه اولارق سلامتله چیققدق.

باشلايور. او اوچ سطرده اوچ دفعه قوتلی إشارتله معنا و جفرله رسالۀ نوری گوستریور.

ایکنجی یر ایسه ﴿فَيَا حَامِلَ الْإِسْمِ الَّذِي جَلَّ قَدْرُهُ﴾ ایله باشلايان اوچ سطرده اوچ قوتلی إشارتله رسالۀ نور شاکردلرینه باقییور. یتمش دفعه یوز إحتمال ایچنده بر صحیفه نڭ آچیلمه سی تصادف اولمادیغی گبی؛ بو طرزده کی ایمالر، أماره لر، إشارت لر ألبته تصادفی اولماز. بلکه بر کرامت غیبیه در، قرآن حکیمک خدمتکارلرینه بر إکرامیدر.

سعید النورسی



حافظ توفیقک فقره سنه تتمه در

بکجی

رأفت، خسرو، رشدی یه هدیه در.

﴿فَيَا حَامِلَ الْإِسْمِ الَّذِي جَلَّ قَدْرُهُ﴾ إلخ... بو بش آلتی سطرده یدی فقره سیله یدی جهتله ده رسالۀ نور مؤلفنه إشارت ایتدیگی گبی؛ دیگر اوچ فقره ده گرچه اوتیه کی فقره لر گبی قوی بر إشارت دگل، فقط بر خفی ایمان خالی دگلدر. مادام بتون فقره لر إشارت ایدیورلر، بو اوچ فقره دخی اونلر گبی إشارت ایتمک گرکدر. أز جمله:

﴿أَقْبِلْ وَلَا تَهَرْبْ﴾ فقره سی بلکه آلتی سطرده کی اون اوچ فقره ده، إستقبالده گلن و مدهش قورقولره دوشن بریسنه خطاب ایدیور که، "قارشیلا!

قاچمه!" دییوب تشجیع ایدیورلر. سائر فقره لرک دلائیله بو عمومی خطابه خصوصی بر مخاطب سعید النورسی در. او حالده "یا سعید النورسی" ضمیمه ییڭ اوچیوز یگرمی بش (۱۳۲۵) ایدر. چونکه شده لی نون ایکی نون و (النورسی) ده کی شده لی یا ایکی یادر. ایشه او تاریخده اوتوز بر مارت حادثه سی مناسبتیه إستانبولدن قاچارق، موقت بر زمان مجاهدۀ معنویه یی بیراقمق نیئیه حرکت اوردوسندن فرار ایدوب ازمیته گلدیگی تاریخه توافق ایدیور. ﴿وَلَا عَقْرَبُ تَرَى﴾ فقره سنده دخی مخاطب خصوصی او "نورسی" اولدیغندن "یا نورسی" اظهار ایدیلهرک علاوه ایدیلسه، ییڭ اوچیوز قرق بر (۱۳۴۱) ایدر. ایشه او تاریخده بن بارلاده منفی اولارق انسان صورتنده کی عقربلرک تعجیزلری آلتنده عذاب چکرکن، خراب و خصوصی کوچک مسجدمده اطورورکن، سجّاده مک آلتنده یری بولونان و أمثالنی گورمه دیگم بیوک بر عقرب چیقدی. بر ذات اوئی تولدیردی. داها اوندن صوگره اون سنه در طاغلرده، عقربلی یرلرده قالدیغم حالده هیچ بر عقربی گورمدم. بو فقره نڭ تام معناسنه مظهر اولدم. اگر "یا نورسی" ده کی "یا" شده لی اولسه او وقت ییڭ اوچیوز ألی بر (۱۳۵۱) ایدر که، او تاریخده انسان عقربلرینڭ او نورسی نڭ محوینه و اعدامنه چالیشدقلری و فقط موفق اولامدقلری زمانه تام توافق ایدر. ﴿وَلَا أَسَدٌ يَأْتِي إِلَيْكَ بِمَهْمَتٍ﴾ فقره سنڭ مخاطبی متعدد اماره لرله "یا کردی" در.

چونکه حضرت إمام علی (رض) قصیده ارجوزیه سنده ﴿يَا مُدْرِگَا لِذَلِكَ الرَّمَانِ﴾ فقره سنده لفظاً و معنّا کردی نامنی ویریور. او حالده "یا کردی" ده کی "یا" شده سز اولسه او وقت ییڭ اوچیوز یگرمی بر (۱۳۲۱) ایدر. او تاریخده او کردی، باشیت نامنده کی مشهور طاغث باشنده بر طاش اوستنده آقشام نمازینی قیلدقدن صوگره یالڭز اولارق اطورورکن، او طاغث اُسدی و آرسلا نی

حکمنده اولان بر جاناوار قورد یاننه گلدی. بر آرقداش گبی اوڭا ایلیشمدی. اُگر "یا کردی" ده کی "یا" شده لی اولسه ییڭ اوچیوز اوتوز بر (۱۳۳۱) ایدر که، او تاریخده اُرمنی، روس قومیتیه سنڭ جاناوارلری هر طرفده او کردی پی صاردقلری و قتلنه چالیشدقلری و فقط موفق اولامدقلری تاریخه تام تامنه توافق ایدر.

ایشته ییڭ اوچیوز اوتوز بر (۱۳۳۱) تاریخه و او دهشتلی حربِ عمومینڭ شدتلی زمانه و سعیدِ کردینڭ اُڭ مصیبتلی و اُڭ قورقولی زمانه حضرتِ اِمَامِ علی (رض) بو آلتی سطرده آلتی دفعه ﴿لَا تَخْشَ لَا تَخْشَ لَا تَخْشَ﴾ دییه مکرراً او تاریخه اِشارت ایتمک، اَلْبته هیچ بر جهتله تصادف اولماز. و علمِ اُسرار و جفرده علامه اُمّت اولان حضرتِ علی (رض) سرلی و کرامتلی اولان مشهور قصیده جُلجُلوتیه سنده اِستقباله باقان آلتی سطرده آلتی دفعه مکرراً عین تاریخه و عین قورقولی وقتنه ﴿لَا تَخْشَ﴾ کلمه سنده جفر حسابیله و معناسیله گوسترمسی شکسز، شبهه سز بر کرامتِ غیبیه سیدر. رسولِ اکرم علیه الصلاة والسلامدن درس آلمش، اُمّته درس ویرمش. اوت ﴿لَا تَخْشَ﴾ جفر و اَبجد حسابیله ییڭ اوچیوز اوتوز بر (۱۳۳۱) ایدر. چونکه ﴿لَا تَخْشَ﴾ ده کی (خ) آلتی یوز، (ت) درت یوز، (ش) اوچیوز، (لا) اوتوز بر ایدر. مجموعی ییڭ اوچیوز اوتوز بر (۱۳۳۱) ایدر.

﴿لَا تَخْشَ مِنْ سَيْفٍ وَلَا طَعْنٍ خَنْجِرٍ﴾ فقره سنده کی ﴿مِنْ سَيْفٍ وَلَا طَعْنٍ خَنْجِرٍ﴾ جمله سی ﴿سَيْفٍ﴾ آخرنده کی تنوین نون صاییلماق شرطیله ییڭ اوچیوز

طوقوز (۱۳۰۹) ايدر. ايشته او تاريخ ايسه ﴿لَا تَخْشَ﴾ خطابنه مظهر اولان رسالۀ نور مؤلفنك عادت محليّه و سلاح ملي اولان سيف و خنچرك هجومنه هدف قالدیغی و سيف و خنچری برابرنده طاشیمغه مجبور اولدیغی و قيصقانجلق سببيله سערده عالملى و طلبه لرك بيوك بر منازعه و غاوغالرينه معروض بولونديغی هنگامه تام تامنه توافق ايدر. بو توافق ايسه سائر فقره لرك إتفاقيه قوتلينيور، ايمادن إشارت بلكه دلالت درجه سنه چيقييور.

﴿وَلَا تَخْشَ مِنْ رُمَحٍ وَلَا شَرُّ أَشْهَمَتْ﴾ فقره سنده کی ﴿وَلَا شَرُّ أَشْهَمَتْ﴾

جمله سنده شده لی "ر" ايکی "ر" و اوستنده کی تنوين "نون" صاييلمق شرطيله ييک ايکی يوز طقسان اوچ (۱۲۹۳) ايدر. ايشته بو تاريخ روسك عالم اسلامك فلاكتنه سبب اولان طقسان اوچ دهشتلی حربك زماننه و رسالۀ نور مؤلفنك تاريخ ولادتنه تام تامنه توافق، شبهه سز قصدی بر إشارت غيبه در. اگر شده لی "ر" بر صاييلسه و تنوين صاييلمازسه او وقت ﴿وَلَا تَخْشَ مِنْ رُمَحٍ وَلَا شَرُّ أَشْهَمَتْ﴾ سطرنده کی ﴿رُمَحٍ وَلَا شَرُّ أَشْهَمَتْ﴾ فقره سی ييک ايکی يوز طقسان بر (۱۲۹۱) ايدر. يالکز ايکی فرق ايله عين تاريخی گوسترر.

بو فقره نك جفری إشارتنه معناسی قوت ويرديگی گبی، صورت معنا دخی لطافتلنديرييور. چونكه "رمح" مزراق "سهم" اوقدر. مزراق و اوقی حربده إستعمال ایدن، عرب ايله أسکی زمان بدوی آدمليدر. طقسان اوچ حربی ايسه عصر بدويته ياقين اولمقله برابر، منطقه حاره أهلی اولان مزراقلی و اوقلی عربلر او دهشتلی حربده ممالك بارده ده، قيشده چارپيشدقلى حالدۀ دولت اسلاميه نك مغلوبيتيله نتیجه لنمسی و او حربده عربك آجینه حق وضعيتلرینی سيّد عرب اولان حضرت إمام علی (رض) گورمش گبی إفاده ایدیور. أوت

استادِ قدسیسی اوڻا گوسترمش، او ده گورمش و قهرمانلق طمارینه طوقومش. شدتله "قورقمه" دییه تشجیع ایتمش.



کرامتِ علویه نځ نتیجه سی

مادام حضرتِ علی (رض) **«أَنَا مَدِينَةُ الْعِلْمِ وَ عَلِيٌّ بَابُهَا»** حدیثه مظهردر. هم مادام شاهِ ولایت عنوانی آلاق خارقه کرامتلی گوسترمشدر. هم آخر زمانده گلن حادثه لره قارشی، قرآن و آل بیت جهتنده هرکسدن زیاده علاقه داردر. هم مادام اُسرارلی قصیده اُرجوزهده و مشهور قصیده جلجلوتیه سنده واقعاتِ استقبالیه دن خبر ویریور. و اُسرار غیبیه ی بدن صورتیگز دییه ادعا ایدره ک قسمًا دعواسنی اخباراتِ صادقۀ غیبیه ایله اثبات ایتمشدر. هم مادام او ایکی قصیده سنده تعقیب ایتدیگی اُک مهم اُساس و اُک بیوک درس اسمِ اعظمدر. و اسمِ اعظم ایله مشغول اولانلر ایله قونوشور، تسلی و تشجیع ایدر. هم مادام او قصیده لر استقباله باقدقلى وقت؛ چوق اماره لر و اشارتلیر ایله، هم معنالر ایله، هم جفری حسایله شو زمانمزی و شو زمانده کی حادثاتِ عجیبیه پارمق باصییور و عین حادثه یی مکرراً اشارتله گوستریور. هم مادام رسالۀ نور بو زمانده ایمان و قرآن خدمتده حضرتِ علی نځ (رض) نظرینه چارپه جق اُک اهمیتلی بر حادثه در. و حضرتِ علی (رض) تأسیسنده خارقه علمیه و خارق العاده شجاعیتله جهان پسندانه خدمت ایتدیگی و اوستنده تیره دیگی حقائقِ ایمانیه و قرآنیه خارقه بر طرزده قطعی برهانلیله اثبات ایدن رسالۀ نور او قدسی حقیقتلی گونش گی گوسترمشدر.

هم مادام حضرت علیٰ نك (رض) قدسی استاندن (عصم) آلدیغی و بو اُمته ویردیگی اُك مهم درس، بو ایکی قصیده غیبیه سنك موضوع و اساسی و روحی اولان سکینه یی و اسم اعظمی بو زمانده هرکسدن زیاده کندینه ورد ایدن و اون اوچ سنه دن بری اسم اعظمه برابر یك بر اسماء الهیه ایچنده بولونان جوشن الکبیری ایله و او اسماء ایله علوم قرآنیه نك خزینه سنی آچان یوز یگرمی رساله یی او اسمانك فیضی ایله قرآنه تفسیر یاپان و یگرمی درت ساعتده یوز یتمش بر دفعه سکینه و اسم اعظم دینیلن اسماء ستّه مشهوره یی یك اوچیوز مکرر آیاتله اوقویان و آل یتك معنوی غایت مهم بر میراثی و بر معدن فیضی اولان جوشن الکبیری کندینه استاد ایدن و بدایتده هرگونه بر دفعه و بعضاً ایکی اوچ دفعه تمامی اوقویان و طلبه لرینه توصیه ایدن آدم، رساله نور مؤلفیدر. هم مادام ایکی قصیده نك صراحته یاقین آلتی یرنده اوندن خبر ویریور. حتّی یالکز ﴿فَيَا حَامِلَ الْإِسْمِ الَّذِي جَلَّ قَدْرُهُ﴾ مقامنده دخی آلتی سطرده آلتی دفعه

﴿لَا تَخْشَ﴾ ایله بو زمانك اُك مدهش حادثه سی اولان برنجی حرب عمومی یی گوستروب او حربده علمجه و شریعتجه و شخصجه قورقورله دوشن بر شاگردینی تشجیع ایدن بو آلتی سطر بلا إستثنا اون اوچ جمله سیله اون اوچ دفعه عین شاگردینك باشنه پارمق باصییور. و اون اوچ سنه دن بری اسم اعظمه دوام ایدن او شاگردك تاریخ حیاتك اون اوچ واقعات مهمه سنه اون اوچ صورتده إشارت و عموم إشارتله بربرینه قوّت و یروب إتفاق ایتدکلی آدم، رساله نور مؤلفیدر. ألبته بو مذکور طوقوز حقیقت غایت قطعی بر صورتده نتیجه ویررکه؛ حضرت علی (رض) أرجوزه و جلجلوتیه سنده رساله نوری آلقیشلا یور، خبر ویریور و مؤلفی ایله قونوشویور، تسلی ایدیور. ﴿أَلْعِلْمُ عِنْدَ

اللّٰهُ ۞ وَاللّٰهُ أَعْلَمُ بِالصَّوَابِ﴾

(حاشیہ): بو کرامتِ علویہ یا تفصیلاتیلہ اوٹا گوستریلمش، او ده إخبار ایتمشدر که؛ ظاهرده بودر. ویاخود اجمالی بیلدیریلیمش، تفصیلاتی بیلدیریلیمه مش. بلکه إنطاقِ بالحق نوعندن جنابِ حق اونی سویلتدیریمش. او حالده اوٹا بر کرامت و رسالۃ نوره بر اِکرامِ اِلهی اولارق کلامنده بو إخبارِ غیبی بولونمش. اوت کرامت ایکی قسمدر: اَلنده ظاهر اولان ذات بعضاً بیلیر. بعضاً تفصیلاً بیلدیریلیمز. ایکیسی ده کرامتدر. بلکه بیلدیریلیمزسه داها سلامتلیدر.

﴿اللَّهُمَّ صَلِّ عَلَى مَنْ قَالَ: أَنَا مَدِينَةُ الْعِلْمِ وَعَلَىٰ بَابِهَا وَعَلَىٰ إِلِهِ وَصَحْبِهِ
أَجْمَعِينَ أَمِينَ وَالْحَمْدُ لِلَّهِ رَبِّ الْعَالَمِينَ﴾



نورک بکچی

برنجی کرامتِ علویه

جایِ دقت

شو عجیب لمعه نځ اُهمیتی اوچ نقطه دن گلیور:

برنجیسی و اُکْ مهمّی: گیزلی قالمش، غیبی، مهمّ بر معجزه
أحمدیه یی (عصم) (حاشیه) بیان ایدر که؛ جوامع الکلم نوعندن ایکی
جمله دن عبارت بر حدیث شریف ایکی صحیفه قدر حقائق تاریخیه یی
و ایکی دولت عظیمه اسلامیه نځ خاتمه لیرنی إفاده ایدیور.

ایکنجیسی: کرامات اولیاء حق اولدیغنه قطعی بر برهان
گوسترن حضرت علی رضی الله عنہک لاتین حروفنځ قبولنی تام
تاریخیه و طرز تطبیقنی ایکی کلمه ایله گوسترمسیدر.

اوچنجیسی: رساله نور شاکردلرینه و ناشرلرینه قارشى
حضرت علی رضی الله عنہک إرشادکارانه و توجّهکارانه باقماسی
و إشارت ایتمه سیدر.

(حاشیه): معجزاتِ أحمدیه یه (عصم) دائر اولان اون طوقوزنجی مکتوبنځ جزء اولنده
ذکر ایدیلن حدسز إخبارات غیبیه أحمدیه (عصم) نوعندن سکسان معجزه غیبیه أحمدیه
(عصم) بونځله سکسان بر اولور.

اون سکزنجی لمعه

بسم الله الرحمن الرحيم

حضرت غوثِ اعظم شیخ گیلانی نك (رض) صراحت درجه سنده کی کرامتِ غیبیه سنی تأیید و تقویه ایدن حضرتِ اُسدِ الله الغالب علی ابن اُبی طالب رضی الله عنه و کرم الله وجهه، قصیده اُرجوزه مشهوره سنده عیناً اخباراتِ غوثیه یی تصدیق ایدوب اِشارت ایدیور.

مجموعه الأَحزابك (۵۸۲) نجی صحیفه سندن (۵۹۷) نجی صحیفه سنه قدر او اُرجوزه در. او اُرجوزه نك موضوعی و ایچنده کی مقصدِ اصلی؛ اِسْمِ اعظمی تضمّن ایدن آلتی اِسْمُكْ اَهْمِیْتِنِ بیان ایتمك، هم او مناسبتله اِستقبالده کی بر قسم امورِ غیبیه و تأسیسِ اسلامیتده بر قسم مجاهداتنه اِشارت ایتمكد.

أوت حضرتِ إمام (رض) استادی اولان حبیب الله علیه الصلاة والسلامدن آلدیغی درسك بر قسمنی اِشاری بر صورتده ذکر ایدیور. فتح خیبرده کی هم معجزه نبویه هم کرامتِ علویه اولان خارقه واقعه یی بحث ایتدیگی گبی، تأسیسِ اسلامیتده تماس ایدن مهمّ نقطه لری ده بحث ایدیور. صوگره اِستقباله باقیور.

پیغمبرِ ذی شان علیه الصلاة والسلامدن آلدیغی درسله، بر قسم اعرابك اوڭا قارشى عصیانلردن حدّت ایدهرك دیمش:

﴿فِي عِلْمٍ تَسْمَعِينَ حِسَابَ الْفَارِسِيِّ * مِنْ بَعْدِ قَرْنٍ تَاسِعِ الْمَعَاصِي﴾
 ﴿سَتَظْهَرُ الْفُرْسُ عَلَى الْأَعْرَابِ * تَقْتُلُهُمْ كَقَتْلَةِ الدَّوَابِّ﴾
 ﴿تَكُونُ مَبْدَأُ فِتْنٍ عَوَائِسِ * مُظْلِمَةٌ كَظُلْمَةِ الْحَنَادِسِ﴾

یعنی: طوقوز قرن صوگره "فرس" یعنی، اقوام شرقیه اعراب اوزرینه هجوم ایدہ جک. غلبہ ایدوب، حیوان گبی اعرابی کسه جک. اوپله مدہش فتنہ لر، قراکقلی مصیبتلر کہ، اُک قراکقلی گیجہ لر دن داها زیادہ قراکقل اولاجق.

ایشته حضرت علی نك (رض) بر کرامتِ باهره سی کہ؛ کندندن بش یوز سنہ صوگرہ گلن و عرب دولتِ عباسیہ سنی محو ایدن و حدسز کتبِ اسلامیہ یی نھرِ فراتہ دوکن و اعرابی غایت ظالمانہ قتل ایدن ہلاکو وقعہ مشہورہ سنی خبر ویریور. چونکہ مشہور اولان قرن، قرق سنہ دگل، او زمان اصطلاحنجہ اُغلبِ عمر اولان آلتمش سنہ دن عبارتدر. چونکہ بر دور، آلتمش سنہ دہ دگیشیر. بو صورتلہ امام علی نك (رض) ہجرتدن اوتوز سنہ صوگرہ کوفہ دہ یازدیغی بو أرجوزہ دہ کی طوقوز دفعہ آلتمش، اوتوزہ علاوہ ایدیلسہ بش یوز یتمش (۵۷۰) اولویور کہ؛ جنگیزک و ہلاکونک هجوم و تخریبات زمانیدر.

صوگرہ حضرت جبرائیلک علی نبینا و علیہ الصلاۃ والسلام حضور نبویدہ گتیروب حضرت علی یہ (رض) سکینہ نامیلہ بر صحیفہ دہ یازیلی اسمِ اعظم، حضرت علی نك (رض) قوجاغنہ دوشمش. حضرت علی (رض) دییور: بن جبرائیلک شخصنی یالکز علائم السماء صورتندہ گوردم، سسنی ایشیتدم، صحیفہ یی آلد، بو اسملری ایچندہ بولدم؛ دیہرک بو اسمِ اعظمدن بحث ایلہ، بعض حادثاتی ذکر دن صوگرہ تحدیثِ نعمت صورتندہ دییور کہ:

﴿فَكُلُّ مَعْنَا مِنْ عُلُومٍ فَآخِرَةٍ * مِنْ مَبْدَأِ الدُّنْيَا لِيَوْمِ الْآخِرَةِ﴾

﴿قَدْ صَارَ كَشْفًا عِنْدَنَا عَيَانًا ۖ فَكُلُّ ذِي شَكٍّ غَدًا مُهَانًا﴾

یعنی: اوّل دنیادن قیامته قدر علوم اُسرارِ مهمّه بزه شهود درجه‌سنده
إنکشاف ایتمش. کیم نه ایسترسه صورسون! سوزیمزه شبهه ایدنلر ذلیل اولور.

صوگره ینه اسم اعظم ایچنده بولونان او آلتی اُسماءِ حسنی دن بحث ایدوب،
بردن بره عیناً غوث گیلانی نڭ إخبارِ غیبیسی گبی، هلاکو عصرندن بو
عصریمزه باقییور. ایکنجی بر کرامتِ غیبیه بی إظهار ایدیور و دییور که:
﴿أَحْرَفُ عَجْمٍ سَطَرَتْ تَسْطِيرًا﴾ (حاشیه) ﴿بَتْ بِهَا الْأَمِيرُ وَالْفَقِيرَا﴾ یعنی: اون

دردنجی عصرِ محمدیده (عصم) بیڭ اوچیوز قرق طوقوز (۱۳۴۹) و رومیجه بیڭ
اوچیوز قرق یدیده (۱۳۴۷) عربی حروفنی ترک ایدوب، أجنبی و عجمی حروفنه
إسلام ایچنده باشلانه‌جق. هم عموم، هم فقیر و زنگین، امیر و ایشجی، چولوق
و چوجق گیجه درسلیله او حروفی جبراً اوگرنه‌جکلر. چونکه بر نسخه‌ده
﴿بَاتَ﴾ در. ﴿بَاتَ﴾ ایسه گیجه چالیشماسیدر. ﴿بَتْ﴾ ایسه قطعی و جبری
إفاده ایدیور. ﴿أَحْرَفُ عَجْمٍ﴾ فقره‌سنده کی ﴿عَجْمٍ﴾ ایسه او زمانڭ
إصطلاحنجه عربک غیری لاتینجه و فرنکی حروف دیمکدر.

(حاشیه): حضرت علی نڭ (رض) شو کرامتی پک ظاهردر. چونکه حروفِ أجنبيه نڭ
إسلام ایچنده جبراً قبول ایتدیریلدیگی زمانی، ﴿سَطَرَتْ تَسْطِيرًا﴾ جمله‌سیله تام تامنه عین تاریخی
گوسترییور. جفرله حساب اُیجده فقره نڭ معناسنی تقویه ایدیور. شویله که: ایکی "س" (۱۲۰)،
ایکی "ط" (۱۸)، ایکی "ت" (۸۰۰)، ایکی "ر" (۴۰۰)، بر "ی" (۱۰)، بر "ألف" (۱): بیڭ
اوچیوز قرق طوقوزدر (۱۳۴۹). شیمدی عربی بیڭ اوچیوز أल्ली اوچدر (۱۳۵۳). بو حروفڭ
جبراً قبولی و رمضان گیجه‌لرنده چولوق و چوجق و قادینلره اوقوتدیرلمسی درت سنه اولدر.

صوگره دیور: ﴿فَمَنْ أَرَادَ اللَّهُ أَنْ يُعِينَهُ أَتَحَفَهُ بِهَذِهِ السَّكِينَةِ﴾ یعنی:

کیم عنایتِ إلهیهیه مظهر ایسه، حضرت جبرائیلُ تعبیریلہ بو سکینہٗ قدسیہ اولان
إسمِ أعظمی جنابِ حق اوکا ہدیہ ایدر. اونکله او زمانک شر و فتنہ لرندن
قورتاریر.

بو سوزدن درت صحیفہ اُول ینہ دیمش :

﴿فَكُلُّ مَنْ لَاحَتْ لَهُ السَّعَادَةُ * كَانَ لَهُ فِي الْجِيدِ كَالْقِلَادَةِ﴾

یعنی: کیم سعادتہ مظهر ایسه؛ سعید ایسه شقی دگلہ، او اسمِ أعظم اونک
بوینده مبارک بر گردانلق حکمنده بر نسخه اولور. صوگره دیور:

﴿ثُمَّ اَعْلَمُوا مَعَاشَرَ الْاِخْوَانِ * اَنَّ غَوَاتَ اٰخِرِ الزَّمَانِ
﴿هُمْ عُلَمَاءُ ذَوَّقُوا اَفْوَاهَهُمْ * ثُمَّ اَنْشَنُوا وَاتَّبَعُوا اَهْوَاءَهُمْ﴾

یعنی: او بدعہلر و عجمی و أجنبي حروفک انتشاری زمانی اولان او آخر
زمانک فنا آدملری، بر قسم علماء السؤدرکہ؛ حرص سببیلہ بطنلرینی حراملہ
طولدیرمق ایچون، بدعہلرہ یاردیم و فتوا ویرنلردر.

صوگره بر قسم علماء السوءی طوقاتالماق ایچنده، بریسیلہ قونوشویور. دیر:

﴿فَاسْئَلْ لِمَوْلَاكَ الْعَظِيمِ الشَّانِ * يَأْمُرُكَ لِذَلِكَ الزَّمَانِ
﴿بَانَ يَقِيكَ شَرَّ تِلْكَ الْفِتْنَةِ * وَشَرَّ كُلِّ كُرْبَةٍ وَمُحْنَةٍ﴾

یعنی: یا او زمانہ یتیشن و عالملردن اولان انسان! جنابِ حقدن او فتنہنک
شرندن محافظہ ایچون سکا درس ویردیگم اسمِ أعظم ایله دعا ایت!

﴿فَإِنَّمَا نَحْنُ عَلَى التَّحْقِيقِ * غَوْتُ لِكُلِّ كُرْبَةٍ وَضِيقٍ﴾

یعنی: بز آل بیتدن هر کربت و شدّت زماننده برر غوث چيقوب إمداد ایدیورز.

أسد الله الغالب حضرت علی ابن ابی طالب کرم الله وجهه، إخبارات غیبیه عائد شو قصیده سنک بر قسمنده رساله نور شاکردلرینه، بالخاصّه باقدیغنه متعدّد أماره لر وار. او ده غوث گیلانی گبی، رساله نورک مقبولیتنی إمضا ایدیور و آلقیشلايور.

برنجی أماره: لاتین حروفنک إسلامر ایچنده جبرًا قبول ایتدیرلدیگی تأسفله بحث ایدوب و علماء السوءی طوقاتلادیغی یرده، بردن بره بریسیله إرشادکارانه قونوشویور. و دیور که: «يَا مُدْرِگَا لِذَلِكَ الزَّمانِ» سکا و یردیگم درس ایله حفظ دعاسنی ایت!

ایشته بو «مدرک» عینًا حضرت غوثک قصیده مشهوره سنده «مریدی» دیدیگی آدمک عینیدر. چونکه ایکسی ده عین فتنه دن بحث ایدوب، عموم ایچنده خصوصی بر آدمه إلتفات گوستریيور لر. قصیده غوثیه ده «مریدی» علم جفر و اون یدی أماره ایله "ملا سعید" هم "الکُردی" اولدیغی تحقّق ایتمش.

رساله نورک بر واسطه نشری اولان استادیمزک هم إسمی، هم لقبی «مریدی» لفظنده اولدیغی گبی، عینًا حضرت علی نك (رض) «يَا مُدْرِگَا لِذَلِكَ الزَّمانِ» (حاشیه) علم جفرله و حساب أبجدله عینًا هم منلا سعید، هم الکُردی

(حاشیه): «یا مدرگا» تنوین نون صایلمق شرطیله، (۳۲۵) اولوب «نورسی» بر فرق ایله (۳۲۶) ایدیور. او فضله ألف بیگه إشارت ایتدیگی ایچون (۳۲۵) قالوب، هم «یا مدرگا» ه تام توافق ایدیور، هم فتنه لرك باشلانغیجی و او نورسی نك مجاهده سنک باشلانغیجی تاریخنی گوستریيور.

اولویور. هر بریسی ایکی یوز آلتمش بش ایدیور. **«مدرگا»** اوستنده کی تنوین وقفده آلفه إنقلاب ایتدیگی ایچون **«آلف»** اولویور. **«مدرگا»** لفظی میمسز یوقاریدن اوقونماسیله **«کرد»** اولدیغی گبی، **«الزمان»** لفظی ده بدیع الزمانک بر پارچه سنی اوقومقله بو أماره یی لطافتلندیوریور. دیمک او زمانه یتیشنلرک آراسنده و حضرت علی نك (رض) خطابنه مظهر چوق أفراد ایچنده، رساله نور ناشرینه خصوصی بر إلتفاتی وار.

ایکنجی أماره: حضرت علی (رض) حرص و طمع یولنده بدعه لره تابع اولان بر قسم علماء السوءی طوقاتلادیغی وقت، علما ایچنده بریسیله مرحمتکارانه قونوشمغه باشلادی. استادیمزی بیلنلره معلومدر که: آنقره رؤسası إستانبولده اونك إنگیلزله قارشى مجاهداتنى تقدیر ایده رك اونى ایستدیله. آنقره یه گیتدی. واندۀ مدرسة الزهراء نامنده کندی دار الفنونه یوز ألى یك بانقنوط ایکی یوز مبعوثدن یوز آلتمش اوچنك إمضاسیله إعطاسی قرارلشدیریلان لایحه قانونیه قبول ایدیلیمکله برابر، شیخ سنوسی مقامنده ولایات شرقیه واعظ عمومیلگی و هم دار الحکمتك أعضالری اوراده دیانت ریاستك أعضالری اولمقله، او ده ایچنده بولونمقله برابر مبعوث اولق و داها نه ایسترسه یاپیلاجق دییه تکلیف ایتدکلری حالده؛ صرف سنت سنیه یه مخالف حرکت ایتمه مک ایچون او تکلیفلری قبول ایتمه یوب، شیمدی یگرمی بش سنه إشکنجه لی بر أسارتی قبول ایدن استادیمزه ألبته حضرت علی نك (رض) علماء السوءه حدت ایتدیگی زمان اوکأ قارشى خصوصی إلتفاتی اولاجق و او معنوی مجلسده اونى اوقشایه جق. اونك ایچون بو حال بر أماره در که؛ حضرت علی (رض) حضرت غوث گیلانی (رض) گبی عموم مخاطبلری ایچنده بو رساله نورک بر واسطه سی اولان خواجه مزه إشارۀ إلتفات ایدیور. **«نَحْنُ عَلَى التَّحْقِيقِ غَوْثٌ لِكُلِّ كُرْبَةٍ»**

فقره سنده "غوٹ" لفظیله غوٹ گیلانی نك (رض) مریدینه شفقتله باقماسنه حضرت علی نك (رض) باقدیغنی ایما ایدیور.

اوچنجی أماره: علماء بحثنك أولكى سطرنده دیور: ﴿فَمَنْ أَرَادَ اللَّهُ أَنْ يُعِينَهُ﴾ (حاشیه ۱) ﴿أَتَحَفَهُ بِهَذِهِ السَّكِينَةِ﴾ (حاشیه ۲) إسم أعظم بحثنده

(حاشیه-۱): بو سطرده غوٹك ﴿تَعِيشُ سَعِيدًا﴾ فقره سنده کی سعید لفظی ﴿يُعِينُهُ﴾ دخی عیناً ﴿سَكِينَةً﴾ ینه عیناً گوستریورلر. هر بریسی ﴿سَعِيدًا﴾ اولویور. دیمك غوٹ گئی، بو فقره سعید ایله قونوشویور. (ه) حرفی بشدر. دردی (د) در، بری (د) اوستنده کی تنویدن گلن وقف ایچون ألفه مقابلدر.

(حاشیه-۲): جای دقتدر که؛ بو ایکی سطر معنا إعتباریله طوغریدن طوغری به رسالۀ نور ناشرینه باقدیغنی گئی، جفر و أبجد حسابیله ینه باقییور. چونکه ﴿أَتَحَفَهُ بِهَذِهِ السَّكِينَةِ﴾ جفر و أبجد حسابیله بیك اوچیز قرق طوقوز (۱۳۴۹) تاریخی گوستریور که؛ رسالۀ نورك غالبانه إنتشار و تكمل تاریخیدر. ایکنجی سطر ﴿فَكُلُّ مَنْ لَاحَظَ لَهُ السَّعَادَةَ * كَانَ لَهُ فِي الْجِدِّ كَالْقِلَادَةِ﴾ ینه جفر و أبجد حسابیله بیك اوچیز یگرمی طوقوز (۱۳۲۹) ایدیور که؛ رسالۀ نور ناشرینك حقیقی مبدأ مجاهده سی تاریخیدر. یالکز بو ﴿السَّعَادَةُ﴾ و ﴿الْقِلَادَةُ﴾ ده کی ایکی "ت" وقفه راست گلدکلی ایچون قاعدة "ه" صاییلرلر.

الحاصل: بو ایکی سطر اوچ جهته رسالۀ نور ناشرینه باقییور.

برنجیسی: إسم أعظمی تضمّن ایدن آلتی إسمك اوٹا هدیة ایدیلدیگنی و اونكله محافظه ایدیلمیسی عیناً واقع اولمش و اولمقددر.

ایکنجیسی: ﴿يُعِينُهُ﴾ جفرجه سعید، ﴿السَّكِينَةِ﴾ جفرجه ینه سعید، ﴿السَّعَادَةُ﴾ معنا و لفظجه ینه سعید اولویور.

اوچنجیسی: أولكى سطر رسالۀ نورله مجاهده نك بوگوننی، ایکنجی سطر مجاهده نك مبدئی تام تامنه تاریخیله گوستریور. ایشته بو ایکی سطر رسالۀ نور ناشرینك یگرمی سنه لك مجاهداتك بری مبدأ، دیگرى منتهاسنی گوسترمسی ألبته تصادف اولاماز. بلکه مجاهده نك مقبولیتنه بر إشارات غیبیه در و حضرت علی نك (رض) بر سگۀ تصدیقیدر.

﴿فَكُلُّ مَنْ لَاحَتْ لَهُ السَّعَادَةُ ۖ كَانَ لَهُ فِي الْحَجِيدِ كَالْقِلَادَةِ﴾ یعنی: کیم عنایتہ

و سعادتہ مظهر ایسہ، او آخر زمان فتنہ لرندن بو آلتی اِسمی ویردیگم درس طرزندہ ورد ایدنلر محفوظ قالیر. حضرت علی (رض) حروفِ اُجنبیہ پی اسلاملر ایچندہ جبراً قبول ایتدیرمک حادثہ سی ایله علماء السوئک بدعہ لره یاردیم لرندن تأسفله بحث ایدوب، او ایکی حادثہ اورتہ سنده إرشادکارانه بعض لرندن بحث ایدیور کہ؛ او سکینہ اولان اِسمِ أعظم له اُجنبی حروفنه قارشی مقابله ایدیور و هم علماء السوئہ مخالفت ایدیور.

ایشته بو زمانده او آدملر رسالۃ نور شاکردلری و ناشرلری اولدقلری شبهہ سزدر. چونکہ اونلردر کہ؛ خطِ قرآنی محافظه ایدیورلر و بدعہ کار بر قسم علمالره قارشی ده مقاومت ایدیورلر.

أوت بز خواجه مزدن آکلامشز کہ: اون اوچ سنہ اَوّل حضرت علی نك (رض) بو قصیدہ سنك سَرینی بیلمه دن یدی سنہ اَوّل بو آلتی اِسمی إمام غزالی دن درس آلاق و کندینہ دائما ورد ایدہ رك، بتون اُورادلری تبدل و تحوّل ایتدیگی حالده، بو سکینہ تعبیر ایدیلن آلتی اِسمه حضرت علی نك (رض) ویردیگی درس طرزندہ متمادیا ترک ایتمه دن دوام ایتمش. بو طرزده دوام ایدنلری ایشیتمه مشز. هم خلافِ عادت بر طرزده یگر می سنہ ظرفنده یگر می فتنۃ عظیمه یه دوشدیگی گی و تأثیرلی بر صورتده حیاتِ اجتماعیۃ اسلامیه یه قاریشدیگی حالده خارقه بر محفوظیت آلتنده اولدیغنی گوزیمزله گوردیگمزدن، حضرت علی نك (رض) آخر زمانده کی خطاب ایتدیگی دوستلری ایچندہ بالخاصّه اوکثا روی إلتفاتی اولدیغنی حسّ ایدیورز. هم ﴿لَاحَتْ لَهُ السَّعَادَةُ﴾ لفظیله یعنی سعید اولمق و

علما بحثنه متّصل بریسنه عنایتہ مظهر اولدیغنی و ﴿يَا مُدْرِگًا لِذَٰلِكَ الزَّمَانِ﴾

فقره سی حساب اُجدله اون اوچنجی عصری گوستروب، او عصرده دنیایه گلن علمادن سعید (رض) اِسمنده بریسنه لطیفانه بر ایما، بو اماره یی زیتلندیور.
(حاشیه)

دردنجی اماره: حضرت غوث گیلانی فتنه آخر زمانده سنت سنییه و اُسرار قرآنییه محافظه و نشره چالیشان بر مریدینه اونبش اماره ایله اِلتفات ایدر و اونکله قونوشورسه، اَلَبته اِسلامیتک تأسیسنده "اَسَد الله" عنوانی آلان و علوم اُسراریده «اَنَا مَدِیْنَةُ الْعِلْمِ وَعَلَىٰ بَابِهَا» حدیثنه مظهر بولونان و کرامات خارقه ایله اِشتهار ایدن و وهابیلرک اُجدادی اولان خارجیلری قلنجدن گچیرن و غوث اَعْظَمک جدی و استادی اولان حضرت علی (رض) اَلَبته آل بیته بر جهته دشمن اولان وهابیلرک حریم شریفینی اِستیلاسی هنگامنده و خارجیلردن داها برباد بر طرزده سنت سنییه مخالفت ایدن بر قسم علماء السوء و ظلمه لرک اِستیلاسی زماننده، رساله نور واسطه سیله رساله نور شاکردلری بتون قوتلریله سنت سنییه نك محافظه سنه و آل بیتک حرمتنه و مودتنه چالیشمالری و او مدهش مهالکه قارشى صارصیلمدقلری حالده، اِمداد روحانییه و قوّه معنویه نك تقویه سنه پک چوق محتاج اولدقلری بر زمانده، او علوم اُولین و آخیرینی بیلدیگی مفتخرانه اِدعا ایدن حضرت علی (رض) ممکن میدرکه، اولادندن اولان غوث

(حاشیه): «يَا مُدْرِگَا» تنوین نون صایلمق شرطیله، ییک اوچیوز یگرمی بش (۱۳۲۵)

تاریخی اولان حریتک ایکنجی و اوچنجی سنه لرده خلافت اِسلامیه یی قالدیرمغه تشبته، او خلافتک قیریلما سندن فتنه لرک قپوسی آچیلدیغنک زمانیدرکه؛ حضرت علی (رض) او زمانه دهشتلی باقییور.

گیلانی دن (رض) گری قالسین، شجاعتِ حیدرانه سیله رسالۃ النور شاکردلرینک امدادینه یتیشمه سین؟ آلبته بو صورتله یتیشیر و یتیشدی.

معلومدر که؛ مثلاً عموم بر جماعت ایچنده بری حرکت ایتسه، بری دیسه: "ای انسان بگا باق!" او "إنسان" لفظِ عمومیسندنه قرینۃ حال ایله، او معین آدمه خطابدر. مادام مقتضای حال و قرینۃ حال ایله حضرت علی نك (رض) عموم مخاطبلری ایچنده اَكْ زیاده محتاج و اَكْ زیاده حضرت علی نك (رض) مقصدی لهنده حرکت ایدن، رسالۃ نور شاکردلریدر. آلبته او ذاتِ إستقباله باقوب و ﴿يَا أَيُّهَا الْإِخْوَانُ﴾ تعبیری ایله قونوشدیغی جماعت ایچنده اَكْ زیاده متحرک و قوۃ معنویه نك تقویه سنه محتاج اولانلره خصوصیتله باقار.

بشنجی أماره: أجنبی حروفاتی اهلِ اسلامك اَكْ مهمم حكومتی رسمی بر صورتده قبول و نشر و جبر ایتدیگی حالده، رسالۃ نور شاکردلری بتون قوتلریله خطّ قرآنی یی خارقه بر صورتده نشر و تعمیم ایله محافظه سنه چالیشدقلری بر زمانده، حضرت علی (رض) تاریخیه اوندن خبر ویرمکله غیبی کراماتی بیان ایتدیگی یرده علماء ایچنده بریسنه إلتفات گوستریور. آلبته بو إلتفاتك گرچه چوق افرادی اولاییلیر. فقط بو قرینۃ حال گوستریور که؛ رسالۃ نور شاکردلری بر خصوصیت کسب ایتمش که، حضرت علی (رض) إلتفاتیه رسالۃ نوری آلفیشلایور.

آلتنجی أماره: قوتلیدر فقط یازامايز.

یدنجی أماره: ظاهر در فقط گوستره میوزر.

الحاصل: حضرت علی کرم الله وجهه أجنبی حروفنه قارشى شدتلى

تأسف و حدت ایتدیگی و بدعه‌یه طرفدارلق ایدن بر قسم علماء السوءه قارشى شدتلى نفرت و حدت ایتدیگی یرده، إرشادکارانه بعضرله قونوشویور. و حضرت جبریلک تعبیرله سکینه اسمی ویریلن و اسم اعظم صندوقچه‌سی اولان اسماء سته‌یه دوام ایدنی إرشاد ایدیور، تلطیف ایدیور.

ایشته او اسماء سته‌نک دوامندن ترشح ایدن و او اسمانک لمعاتی اولان رساله نور و او رساله نور کندی شاکردلریله لا اقل یوزر قلمله یوز پارچه رساله نورک أجزالریله و انتشار ایدن یگرمی ییک نسخه‌سیله لا اقل یوز ییک آدمی حروف قرآنیله لهنه و سنت سنییه‌یه إتباعه و ایمانلرینک تقویه‌سنه و حضرت علی‌نک (رض) حدت ایتدیگی ایکی جریانه قارشى تمامیه مقاومت ایتدکلرندن، ألبته حضرت علی‌نک (رض) ﴿يَا أَيُّهَا الْإِخْوَانُ﴾ تعبیر ایتدیگی إخوانلری ایچنده خصوصی بر صورتده اولره باقیور.

أوت حضرت علی‌نک (رض) بو ظاهر کرامات غیبیه‌سی حضرت پیغمبر علیه الصلاة والسلامک إرشادیه اولدیغی ایچون، باشقه شکلده بر معجزه پیغمبریه (عصم) اولدیغی مناسبتیه، عین کرامت غوثیه و إشارات خارقه علویه گبی بشنجی عصرله، اون دردنجی عصرک فتنه‌لرینه إشارات ایدن و گیزلی قالب معناسی آکلاشیلیمیان بر معجزه غیبیه نبویه‌یی بیان ایتمگه مناسبت گلییور. شویله که:

حدیث صحیحده واردر که، رسول اکرم (عصم) فرمان ایتمش : ﴿إِنْ اسْتَقَامَتْ أُمَّتِي فَلَهُمْ يَوْمٌ وَإِلَّا فَنِصْفُ يَوْمٍ﴾ (أو کما قال) شو حدیث شریفه هر ناصلسه قیامته إشارات صورتده معنا ویریلمش؛ معجزه نبویه گیزلنمش، آکلاشیلیمامش. هم شیخ گیلانی (رض)، هم حضرت علی‌نک (رض)

إرشاد نبوی ایلہ، بشنجی و آلتنجی و اون دردنجی عصرلرک فتنہ لرندن کرامتکارانہ بحثلری گوستریور کہ؛ بو حدیث شریف اونلرک بو زمانہ باقمق ایچون بر تلسقبولریدر کہ، بو ایکی عصرہ باقیورلر.

أوت حدیثده "یوم" تعبیری، **﴿إِنَّ يَوْمًا عِنْدَ رَبِّكَ كَأَلْفِ سَنَةٍ مِّمَّا**

تَعُدُّونَ﴾ آیتک دلاتیلہ بیك سنہ دن عبارتدر. خلافتِ اسلامیہ و حکومتِ عربیہ، حدیث موجبہ تامہ استقامتہ گیتمدیگی ایچون، تام نصفِ یوم اولان بش یوز کسور سنہده (حاشیہ) ہلاکو ہجومیلہ خاتمہ ویریلدی. اوچ درت عصر زمان فترتن صوگرہ **﴿يَأْتِي اللَّهُ بِقَوْمٍ يُحِبُّهُمْ وَيُحِبُّونَهُ﴾** آیتک سرینہ مظهر اولان عثمانلی عادل پادشاہلری، حدیث شریفہ کی استقامتی یرینہ گتیرمگہ چالیشدقلرندن، حدیث حکمیلہ اُمت ایچون بیك سنہ خلافتِ اسلامیہ ی و شرع شریف اوزرنده گیدن حکومتک ادامہ سنہ واسطہ اولدیلر. حدیثک ایکنجی جہتی کہ، **﴿فَلَهُمْ يَوْمٌ﴾** ده تحقق ایدیور.

و إستانبولک فتحندن تقریباً یگرمی سنہ اول ینہ خلافتِ اسلامیہ زمین إحضار و تام عموم عالم اسلامک مرکز حکومتی اولاجق بر وضعیت آلمغہ و مژده و ثناء نبویہ مظهر اولان سلطان فاتحک واسطہ سیلہ إستانبولک فتحی تاریخندن فترت زمانی طی ایدوب عبّاسیلر نرہدن بیراقمشلرسہ اورادن

(حاشیہ): حدیثک حکمیلہ حکومتِ عربیہ بش یوز سنہ یاشایہ جق. حالبوکہ، بش یوزدن بر مقدار گچر. بونک سَری شودر کہ: یزید، ولید، حجاج ظالم گبی ظلمہنک و أبو مسلم خراسانینک تحکمی و اُمویلرک إنقراضندن صوگرہ عبّاسیلرک تام تقریرینہ قدر اولان زمان حکومتِ عربیہنک فترت زمانی صایلدیغندن، بو فترت زمانی طی ایدیلمکلہ تام بش یوز قالیر.

باشلايه رق عالم اسلامك بالاستحقاق باشنه گچديلر. ينه حديث شريفك حكميله اگر استقامتله گيتسه ييك سنه دن عبارت اولان بر گون، يوقسه ياريم گون دوام ايده جك. ايشته عينا عباسيلر گي تام ياريم گون يعني بش يوز سنه دوام ايتدى.

بو معجزه نبويه پك پارلاق بر صورتده تظاهر ايدييور. ايشته خلافت عربيه تام استقامته مظهر اولماديغندن يالكز ياريم گوني آلدی. عثمانلى دولتي دخي تك باشيله آخرلنده اجنبيلرك و منافقلك مداخله لري يوزندن تام استقامتي محافظه ايده مديگي ايچون او ده ياريم گون اولان بش يوز سنه يي آلدی. بو ايكي قارداش اولان ايكي عنصرك اتحادلرندن تام استقامته مظهريت سري واردر كه، ييك سنه اولان بر گوني تمام آديلر.

سؤال: رؤيای صادقه واسطه سيله ويا حقيقي كشف جهتيله حضرت على (رض) و غوث اعظم (رض) گي ذوات قدسيه جزئي ايشلره دائر عامي آدملرله ده تماس ايده بيليرلر و بعض شيلري خبر ويرييورلر. نه دندر كه؛ بونلرك بر اشارت غيبيله ريني غايت اهميتله ييك كشف و بيكلر رؤيای صادقه قدر طوتوبورسكز، اهميت ويرييورسكز؟

الجواب: سکز يوز و ييك اوچيوز سنه مسافه ده، وراثت نبوت مقامنده عالم اسلامك استقبالي نقطه نظرنده كلّي بر نظره او اوزون مسافه ده گورونن حادثاتك البته چوق اهميتي اولاجق، طاغ گي بر بيوكلكي اولاجق كه؛ او اوزون مسافه ده و او كلّي نظرده عالم اسلامك منفعتي نقطه نظرده اوزاقدن گورونسون و او ثا دقت ايديلسين و وجوده گلهمه دن اول اوندن خبر ويرييلسين. رؤيای صادقه و كشف ايسه جزئي و خصوصيدر و وجوده گلدكدن صوگره ياقيندن

باقمقدر. البته بویله کشف جهتنده روحانی تمثّل اعتباریله یاقیندن باقیلدیغی وقت ذره لر دخی گورونه بیلیر. عادی آدم لر ده اونلرک روحانی مثالریله گوروشه بیلیرلر و غایت اُهمیتسز شیلر ده مدارِ نظر اولاییلیر. اوت بر آیینده مثالی گونشله مناسبتدار اولمق و صحبت ایتمک نرده؟ حقیقی سماده کی گونشله مناسبتدار اولمق نرده؟ آیینده کی گونشی هرکس اَلنه آلا بیلیر، اِلتفاتنه مظهر اولاییلیر. قونوشه بیلسه بلکه قونوشدیره بیلیر. فقط سماده کی گونشک اِلتفاتنی جلب ایدن و کندیسيله قونوشدیران کیمسه، قمره چیقمالی، مقامی قمرده اولمالی ویا قمرگی بر وظیفه گورملی؛ یوقسه او سلطانِ سماوینک حشمتلی نظری آلتنده هیچ گورونمیه جک درجه ده گیزلنه جکدر.

رساله نور شاکردلری نامنه

بکر بک، عاصم، کچه جی مصطفی، مصطفی، مصطفی، علی، سلیمان
 رشدی، عبدا لله، خسرو، رأفت، سلیمان، صبری، خلوصی، باباجان
 محمد علی، مسعود، حسین، غالب، حافظ علی، کوچک لطفی، ذکائی،
 عبد الباقي، شاملی حافظ توفیق، یعقوب جمال وسائره



سکرنجی لمعه

غوٲ اعظمك حزب القرآنہ دائر كرامٲ غيبه سيدر. (حاشيه)

شو رساله ايچنده كي إمضالر ايله گوستريلديگي گبي، خدمت قرآنيه ده كي
آرقداشليمه اشتراكم وار. بر قسمي بنم إمضام ايله در. بر قسمي اونلرك تصويب
و استخراجيله و تصديقليله اولديغندن بكا عائد حدمدن فضله حصّه يي اونلرك
خاطري ايچون سكوت ايله قبول ايتدم. يوقسه بو رساله نك باشنده سويله ديگم
گبي، بونده اويله بر حصّه شرفه حقم يوقدر. اون سنه مقدم، او قصيده غيبه يي
گوردكجه بكا معنوي بر إخطار گبي "دقت ايت!" ديه قلمه گليوردى. او
خاطره يي ايكي جهتله ديگله ميوردم:

برنجيسى: بنم گبي اهميتلى عمرى شان و شرف پرده سى آلتنده حبّ جاه
زهريله زهرلنوب ئولديگي ايچون، يگيدن بو صورتله نفس اماره يه ديگر بر
شرف قپوسى آچمق ايسته مه مكدى.

ايكنجى جهت: بو معنّد زمانده، بديهى دعوالرى و ظاهرى حجّتلىرى

(حاشيه): استادهمزك شخصنه صريحًا إشارات ايدن بو گبي غيبى كرامت و إشاراتك نشريني
استادهمز بديع الزمان سعيد النورسى حضرتلى آرزو ايتميور. فقط بزلر دوشوندك كه؛ بو گبي
دلالت درجه سنده اولان غيبى إشاراتلرك اهل ايمانجه بيلينمه سنه بو زمانده قطعى لزوم و إحتياج
وار. بوگا بناء نشر ايدويورز.

قبول ایتمه‌ینلره قارشى، بویله إشاراتِ غیبیه نوعندن خودفروشانه بر طرزده إظهار ایتمك خوشمه گیتمه‌مكدى.

أڭ نهایت أسارتمك سکنجى سنه‌سنده، أڭ إشکنجه‌لى و أڭ صیقنتیلی بر زمانده غایت قوّتلى بر تسلّی و تشویقه محتاج اولدیغمزدن بڭا إخطار ایدیلدى که: "بونی، تحدیثِ نعمت و بر شکرِ معنوی نوعندن إظهار ایت. هم قورقمه، قناعت ویره‌جك درجه‌ده قوّتلیدر." بو إظهارده أڭ مهمّ مقصدم، أسرارِ قرآنییه عائد اولان رساله‌لرک مقبولیتنه غوثِ أعظمك إضا باصماسی نوعندن اولدیغیدر.

ایکنجی مقصدم، او قدسی استادیمك کرامتنی إظهار ایتمکله، کراماتِ اولیایی إنکار ایدن ملحدلری إسکات ایدوب، خدمتِ قرآنییه فتور ویره‌جك چوق أسبابه معروض و چوق عوائقه هدف اولان آرقداشلریمك قوّه معنویه‌سنی تقویه و شوقلرینی تزئید و فتورلرینی إزاله ایتمك ایدی.

بنم ایچون بر نوع خودفروشلق نوعندن اولدیغی ایچون اهمّیتی ضرردر. فقط او ضرریمی، او قدسی استادم و آرقداشلریمك خاطری ایچون قبول ایتدم. شو "کرامتِ غوثیه رساله‌سی" تدریجًا إستخراج ایدیلدیگی ایچون، بر قاج پارچه و تتمّه‌لره إنقسام ایتدی. گیتدکجه بربرینی تنویر و تأیید ایتدکجه وضوح پیدا ایدیور. إشاراتک بعضسنده ضعف وارسه ده، سائر آرقداشلرینک إتفاقندن آلدیغی قوّت، او ضعفی إزاله ایدر.



شایانِ حیرت بر تَفْأَل و مهّم بر إخبارِ غیبي

صبری، سلیمان، بکر، غالب و توفیقُ فقره سیدر. هم خسرو، حافظ
علی و رَأفت و عاصمُ و قله او کُندن مصطفی لَرُکُ فقره سیدر.

لطیف و مژده لی بر تَفْأَل: استاد، غالب و سلیمان، اُمّی سنان دیواننده
مسلگمه و سوزلره دائر تَفْأَل ایدیلدی، شو بیتلر چیقدی. باقدق، "سوزلر"
لفظی، بتون دیواننده یالکُز بو قافیه لرده گورونویور. دیمک سوزلر، "حق سوز"
هم "نور سوز" اولویور.

دیرم که یار دیمجم الله،
شفاعتجیم رسول الله.
که برهانم کتاب الله،
بودر بنده کی حق سوز.

سنک قیو کُده قول چوقدر،
حسابی، حدّی هیچ یوقدر،
ولکن بر دخی یوقدر،
سنان اُمّی گبی نور سوز.



مهم بر اخبار غیبی

(شیخ گیلانی نك كندندن سكر يوز سنه صوگره غیب آشنا
گوزيله گوروب خبر ویردیگی بر حادثه قرآنیه در.)

قرآن معجز البیانك خدمتنده کی قدسیت، کرامتکارانه سكر يوز كسور
سنه اول "غوث اعظم" عنوانيله بحقّ اشتهار ایدن قطب اعظم شیخ گیلانی،
﴿نَظَرْتُ بَعَيْنِ الْفِكْرِ فِي حَانَ حَضْرَتِي * حَبِيبًا تَجَلَّى لِلْقُلُوبِ فَجَنَّتِ﴾ فقره سیله
باشلایان قصیده سنك آخرنده "مجموعه الأحزاب" ك برنجی جلدینك بشیوز
آلتمش ایکنجی صحیفه سنده، بش سطرله شو زمانده خدمت قرآنیه ده کی
هیئته و باشنده بولونان استادیمزه بش وجهله باقییور و گوسترییور. ایشته او
بش سطر شودر:

تَوَسَّلْ بِنَا فِي كُلِّ هَوٍ وَشِدَّةٍ * أَغِيثُكَ فِي الْأَشْيَاءِ دَهْرًا بِهَمَّتِي
أَنَا لِمُرِيدِي حَافِظًا مَا يَخَافُهُ * وَأَحْرُسُهُ فِي كُلِّ شَرٍّ وَفِتْنَةٍ
مُرِيدِي إِذَا مَا كَانَ شَرْقًا وَمَغْرِبًا * أَغِيثُهُ إِذَا مَا سَارَ فِي آيِّ بَلَدَةٍ
فِيَا مُنْشِدًا نَظْمِي فَقُلْهُ وَلَا تَخَفْ * فَإِنَّكَ مَحْرُوسٌ بِعَيْنِ الْعِنَايَةِ
وَكُنْ قَادِرِي الْوَقْتِ لِلَّهِ مُخْلِصًا * تَعِيشُ سَعِيدًا صَادِقًا بِمُحَبَّتِي

بشنجی سطر دن صوگره گلن خاتمه قصیده: ﴿وَجَدِّي رَسُولُ اللَّهِ أَغْنِي
مُحَمَّدًا * أَنَا عَبْدُ الْقَادِرِ دَامَ عِزِّي وَرَفَعَتِي﴾ ایشته اولکی بش سطرده، بش
وجهله و بش توافقه شیمدی خدمت قرآنیه نك باشنده بولونانی گوسترییور.

برنجی وجه: آخرده کی سطرده ﴿تَعِيشُ سَعِيدًا﴾ اسمی صراحتله خبر ویرمکله برابر، معیشت خصوصنده عزّت و سعادتله گچینه جگنی خبر ویریور. اوت خواجه مز، کوچکلگندن بری فقرِ حاليله إستغناء تام ايله برابر، معیشت خصوصنده اُک مسعود بر ذاتدر.

ایکنجی وجه: عین سطرک باشنده ﴿وَكُنْ قَادِرِيَّ الْوَقْتِ﴾ فقره سیله او مریدینه دیور که: "وقتک عبد القادریسی اول." بو ﴿قَادِرِي﴾ کلماتی، حساب اُجدی ايله اوچ یوز یگرمی بش (۳۲۵) ایدر. استادیمزک لقبی "نورسی" اولدیغی جهتله، "نورسی" نڭ مقام اُجدیسی اوچ یوز یگرمی آلتی (۳۲۶) ایدیور. بر تک فرق وار. او تک اُفدر. ییڭ معناسنده "ألف" ه رمز ایدر. دیمک ییڭ اوچ یوز یگرمی بشده (۱۳۲۵) شیخ گیلانی یه منسوب بر ذات، شیخ گیلانی طرزنده حقیقت قرآنییه مدافعه ایتمگه چالیشه جق. حقیقه استادیمز، ییڭ اوچ یوز یگرمی آلتی (۱۳۲۶) سنه سنده (حریتک ایکنجی سنه سی) مجاهدّه معنویه یه آتیلمشدر.

اوچنجی وجه: اونڭ ایکی اسمی وار: "سعيد"، "بديع الزمان." بو ایکی اسمک مجموعنڭ مقام اُجدیسی "الزمان" ده کی شدّه صاییلمازسه اوچ یوز یگرمی طوقوز (۳۲۹) ایدیور. ایکی "دال" بر صاییلسه اوچ یوز یگرمی بش (۳۲۵). عیناً ﴿وَكُنْ قَادِرِيَّ الْوَقْتِ﴾ ده کی مخاطب او اولماسنه إشارت ایدیور، بلکه دلالت ایدیور. اگر "الزمان" ده کی اوقونمیان ألف لام صاییلسه، قاعده ﴿قَادِرِي﴾ یه دخی بر ألف لام داخل اولمق لازم گلیر. چونکه تعریف ایچون، مضاف الیه قالدقدن صوگره ألف لام لازم گلیر، او حالده دخی مساوی اولورلر.

دردنجی وجہ: بو بش سطرده حضرت شیخ، إستقبالده بر مریدینه تأمینات ویریور. **﴿قُلْ وَلَا تَخَفْ﴾** "قورقمه، سوزلریکی سویله" دیور. "سن شرق و غربه گیده جکسک؛ چوق فتنه لره و شرله گیروب، عمومنده أسباب عادیه نك فوقنده بر طرز ایله قورتولارق محفوظ قالاجقسک. "أوت، بو خدمت قرآنیه ایچنده کی ذات، حقیقه أسارتله شرقه گیتدی. وینه عجیب بر أسارتله آسیانك غربنده اون طوقوز سنه قالدی. حضرت شیخك دیدیگی گبی، چوق شهرلی گزدی. مجاهده سی سوزلرده. **﴿قُلْ وَلَا تَخَفْ﴾** حکمیله، چکینمیه رك حضرت شیخك دیدیگی گبی یاپمش. یگرمی سنه ظرفنده یگرمی فتنه و مهالك عظیمه یه دوشدیگی حالده، بر حفظ غیبی ایله حضرت شیخك دیدیگی گبی محفوظ قالمش. هم فوق المأمول، بر غربت دیارنده فوق العاده عنایته مظهریتی او درجه یه گلمش که، بر رساله صرف او عنایاتك تعدادنده یازیلمشدر. حضرت غوثك دیدیگی گبی، بز اونك اطرافنده **﴿مَحْرُوسٌ بِعَيْنِ الْعِنَايَةِ﴾** فقره سنك مثالی گوزیمزله گوروپورز.

بشنجی وجہ: استادیمز کندسی سویله یور که: "بن سکز طوقوز یاشنده ایکن، بتون ناحیه مزده و اطرافنده أهالی نقشی طریقتنده و اوراجه مشهور غوث هیزان نامیله بر ذاتدن إستمداد ایدرکن، بن أقربامه و عموم أهالی یه مخالف اولارق "یا غوث گیلانی" دیردم. چوجقلق إعتباریله ألیمدن بر جویر گبی أهْمیتسز بر شی غائب اولسه، "یا شیخ! سکا بر فاتحه، سن بنم بو شیئمی بولدیر." عجیدر و یمین ایدیورم که، یك دفعه بویله حضرت شیخ، همت و دعاسیله إمدادیمه یتیشمش. اونك ایچون بتون حیاطده عمومیتله فاتحه و اذکار نه قدر اوقومش ایسه، ذات رسالتدن (عصرم) صوگره شیخ گیلانی یه هدیه

ایدیلیوردي. بن اوج درت جهتله نقشی ایکن، قادری مشربی و محبتی بنده
 اختیارسز حکم ایدیوردي. فقط طریقتله اشتغاله، علمک مشغولیتی مانع
 اولویوردي.

صوگره بر عنایتِ الهیه امدادیمه یتیشوب غفلتی طاغیتدیغی بر زمانده،
 حضرت شیخک "فتوح الغیب" نامنده کی کتابی حسن تصادفله الیمه گچمش.
 یگرمی سکرنجی مکتوبده بیان ایدیلدیگی گبی، حضرت شیخک همت و ارشادیله
 أسکی سعید (رض) یکی سعیده انقلاب ایتمش. او فتوح الغیبک تفالنده اؤ
 اول شو فقره چیقدی:

﴿أَنْتَ فِي دَارِ الْحِكْمَةِ فَاطْلُبْ طَبِيبًا يُدَاوِي قَلْبَكَ﴾ یعنی، "ای بیچاره!

سن دار الحکمة الاسلامیهده بر اعضا اولمق جهتله گویا بر حکیمسک، اهل
 اسلامک معنوی خسته لقلرینی تداوی ایدیورسک. حالبوکه اؤ زیاده خسته
 سنسک. سن اول کندیگه طبیب آرا، شفا بول؛ صوگره باشقه سنک شفاسنه
 چالیش. "ایشته او وقت، او تفال سرّیله، مادّی خسته لغم گبی معنوی خسته لغمی
 ده قطعیا آکلادم. او شیخمه دیدم: "سن طبیب اول. "الحقّ او طبیب اولدی.
 فقط پک شدتلی عملیات جراحیه یاپدی. "فتوح الغیب" کتابنده "یا غلام!"
 تعبیر ایتدیگی بر طلبه سنه پک مدهش عملیات جراحیه یاپیور. بن کندیمی او
 غلام یرینه وضع ایتدم. فقط پک شدتلی خطاب ایدیوردي. "ایّها المنافق" "ای
 دینی دنیایه صاتان ریاکار" دییه دییه یاریسنی آنجق او قویه بیلدم. صوگره او
 رساله یی ترک ایتدم. بر هفته باقه مدم. فقط عملیات جراحیه نك آرقه سندن بر
 لذت گلدی؛ اشتیاق ایله او مبارک اثری آجی تریاق گبی ویا صولفاتو گبی

ایچدم. الحمد لله قباحتریمی آڭلادم، یاره لریمی حسن ایتدم، غرور بر درجه قیریلدی. "خواجه مزك سوزی بیتدی.

ایشته خواجه مزك بو ماجرای حیاتیه سی گوستریور که، حضرت شیخك متوجه اولدیغی و اهمیتله بحث ایتدیگی و إستقبالده گله جك مریدی بو اولق ایچون قوتلی بر إحتمالدر. حضرت شیخك وفاتندن سوڭره حیاته ده اولدقلری گبی تصرّفی اهل ولایتجه قبول ایدیلن اوچ اولیاء عظیمه نك اَكْ أعظمی، او حضرت غوث گیلانی در. و دیمش: **﴿أَفَلَتَ شُمُوسُ الْأَوَّلِينَ وَشَمْسُنَا أَبَدًا عَلَى فَلَكِ الْعُلَى لَا تَغْرُبُ﴾** فقره سیله بَعْدَ الممات دعا و همّتیه مریدلرینك آرقه سننده و اوڭنده بولونماسیله، بویله خارقه کرامت عجیبه ایله مشهور بر ذات، البته بویله بر زمانده قیمتدار بر خدمت قرآنیه بر مریدینك واسطه سیله اولاجغنی اونك گورمسی و گوسترمسی شأندندر. حضرت شیخك بحث ایتدیگی اهمیتلی مریدی و طلبه سی و حمایه گرده سی اولان شخص؛ بیڭدن سوڭره، اون دردنجی عصرده گله جگنه بر ایمادر.

سلیمان، صبری، ذکائی، عاصم، رأفت، علی، أحمد خسرو، مصطفى أفندی (رح)،
 رشدی، لطفی، شاملی توفیق، أحمد غالب (رح)، زهدی، بکر بك، لطفی (رح)،
 مصطفى، مصطفى، مسعود، مصطفى چاوش (رح)، حافظ أحمد (رح)،
 حاجی حافظ (رح)، محمد أفندی (رح)، علی رضا.



شیخ گیلانی نك فقره سیله کرامتکارانه ویردیگی خبر غیبینك تتمه سیدر.

﴿أَنَا لِمُرِيدِي﴾ فقره سنده ﴿مُرِيدِي﴾ "منلا سعید" کلمه سنه تام توافق ایدیور. یالکز بر ألف فرق وار. ألف ایسه، قاعدۀ صرفیه جه "أَلْفٌ" اوقونور. أَلْفٌ ایسه، بیگذر. دیمك یك ایکی یوز طقسان درتده (۱۲۹۴) دنیایه گله جك بر مریدی، بو ﴿مُرِيدِي﴾ لفظنده مراددر. چونکه ﴿لِمُرِيدِي﴾ ده لام صاییلسه ایکی یوز طقسان درت (۲۹۴) ایدر که، بر تك فرق ایله سعیدك تاریخ ولادتته توافق ایدر. أساس عربی صاییلسه فرق یوقدر. لامسز ﴿مُرِيدِي﴾ ایسه ایکی یوز آلتمش درت (۲۶۴) ایدر. "منلا سعید" دخی ایکی یوز آلتمش بش (۲۶۵) ایدر. "منلا" ده کی ألف، بیگه إشارت اولدیغی ایچون متباقیسی ایکی یوز آلتمش درت (۲۶۴) قالیر.

الحاصل: شو زمانده دلال قرآن و خادم فرقان اولان او آدمك ایکی ایسمی و ایکی لقبی وار. "الْكَرْدِي" لقبی ایله "منلا سعید" ایسمی، ﴿أَنَا لِمُرِيدِي﴾ فقره سنده ظاهر گورونویور. "نورسی" لقبیله "بدیع الزمان سعید" ایسمی ﴿كُنْ قَادِرِي الْوَقْتِ﴾ فقره سنده آشکار گورونویور. حتّی خدمت قرآنیّه ده اَكْ مهمّ بر آرقداشی و خالص بر طلبه سی اولان خلوصی بگه ﴿لِلّهِ مُخْلِصًا تَعِيشُ سَعِيدًا صَادِقًا بِمُحَبَّتِي﴾ فقره سنده إشارت اولدیغی گبی، دیگر بر قسم طلبه لرینه إشارت لر وار.

رسالۀ نور طلبه لری نامه

رشدی، خسرو

سعید کندی سویله یور:

حضرتِ شیخ گیلانی، خدمتِ قرآنیه یه نظرِ دَقّتی جلب ایتمک و او خدمتِ قرآنیه آخر زمانده طاغِ گبی بیوک بر حادثه اولدیغنه اِشارت ایچون، کرامتکارانه شو خدمتمده اِستعداد و لیاقتمک پک فوقنده بولونماسی و فداکار، چالیشقان قارداشلرمله چالیشدیغمزه فضیلت نقطه سندن دگل، بلکه سبقتیت نقطه سندن اِسممی بر درجه گوسترمسی بنی اُپی زماندر دوشوندیریوردی. عجا بونک اِظهارنده معنوی بر ضرر بگا ترتّب ایدر، بر غرور، بر خودفروشلق گتیرر دییه سکز اون سنه در توقّف ایتدم. بوگونلرده اِظهاره بر اِخطار حسّ ایتدم.

هم قلبمه گلدی که: حضرتِ شیخ بگا بر پایه ویرمدی. بلکه سعید اِسمنده بر مریدم مهّم بر خدمتمده بولونه جق، فتنه و بلالردن اِذنِ اِلهی ایل و شیخک دعاسیله و همتیله محفوظ قالا جق.

هم اوزاق یرده طاشلر گورونمز، طاغلر گورونور. دیمک سکز یوز سنه بر مسافه ده گورونن، خدمتِ قرآنیه نك شاهقه سیدر؛ یوقسه سعید گبی قارینجه لر دگل. مادام بو کرامتِ غوثیه یی اعلان و اِظهارندن، قرآن شاکر دلرینک و خدمتکارلرینک شوقی آرتییور، اَلبته آرقه لرنده شیخ گیلانی گبی قهرمانلر قهرمانی ذاتلر همت و دعالریله و اِذنِ اِلهی ایل و حمایه ایتدکلرینی بیلسه لر، شوق و غیرتلی داها آرتار.

الحاصل: بونی، قارداشلریمی فضله شوقه و زیاده غیرته گتیرمک ایچون اِظهار ایتدم. اَگر قصور ایتمش ایسه م، جنابِ حق عفو ایتسین. ﴿إِنَّمَا الْأَعْمَالُ

بِالنِّيَّاتِ﴾

شو آخرکی بیت **﴿وَكُنْ قَادِرًا الْوَقْتِ لِلَّهِ مُخْلِصًا ۖ تَعِيشُ سَعِيدًا صَادِقًا بِمُحَبَّتِي﴾** (حاشیه ۱) سعید نورسی پی ایکی اوچ وجهله گوستردیگی گبی، مدارِ امتیازی اولان إخلاصی ایما ایدهرک و خدمتده ایکنجی اولمق جهتیهله ایکی فرقله **﴿مُخْلِصًا﴾** کلمه سی خلوصی بگه توافقهله إشارت ایدیور. **﴿قَادِرًا الْوَقْتِ﴾** ده **﴿قَادِر﴾** کلمه سی اوچ فرق ایله اوچنجه آرقداشی تقدیر و إستحسان ایله خلوصی ثانی اولان صبری یه (حاشیه ۲) توافقهله إشارت ایدیور. **﴿صَادِقًا﴾** کلمه سیله خارقه بر صداقتله ممتاز دردنجی آرقداشی اولان سلیمانده درت فرق ایله توافق جهتیهله إشارت ایدیور. **﴿صَادِقًا﴾** کلمه سنده کی تنوین داخل ایدیلسه، خدمتِ صادقانه ده ممتاز اولان بکر آغایه "بکر بک" عنوانیه بر فرق ایله إشارت ایدر. مادام بو بیتِ آخر بو هیئتک افرادینه باقار. بعضرینه صراحته یاقین إشارت وار. اوته کیلره أدنا بر ایما دخی قناعت ویرر که، اونلر دخی مراددر.

الحاصل: بو درت ذات، بو فقیرله برابر خدمتده سبقت ایدوب خلوصی إخلاصیهله، صبری تقدیریهله، سلیمان صداقتیهله، بکر خدمت و غیرتیهله خدمتِ

(حاشیه ۱): **﴿صَادِقًا بِمُحَبَّتِي﴾** فقره سنده ناصلکه صادق ایکی قارداشزه إشارت ایدیور. او یله ده: **﴿بِمُحَبَّتِي﴾** کلمه سیله ده سعیدک برنجی و اَکْ مَهْم طلبه سی و إشارات الإعجازک تألیفنده مخاطب، مسود، مَبِیض اولان شهید مرحوم ملا حبیبه (رحمة الله علیه) ایمادن خالی دگلدر.

(حاشیه ۲): صبرینک حقیقی إسمی محمد صبریدر. بو إسم حسابِ أبجدله تک بر فرق ایله عبد القادری اولور. دیمک ایکنجی خلوصی برنجی خلوصی گبی برنجیدر. هم حافظ علی و قله اوکونده مصطفی لر، هم ده ذکائی و کوچک لطفی اونلر گبی إشارتِ غوثیه ده ظاهر در.

قرآنیہ ده بولونديلر. هم مرتبه لرینه ائما صورتنده بو بيت اخبار ايدييور. ألبته دينيله بيلير كه؛ حضرت شيخ اونلري اذن إلهيله سعيدك أطرافنده گورمش، خبر ويرمش. داها سائر آرقداشله إشارتله وار. (حاشيه) شيمدى إظهاره مأذون اولماديغمدن بگا تام گورونغييور. ﴿لَا يَعْلَمُ الْغَيْبَ إِلَّا اللَّهُ﴾

﴿فَيَا مُنْشِدًا نَظْمِي﴾ فقره سنده دخى حضرت شيخك (رض) مخاطبي شبهه سز بديع الزمان ملا سعيددر (رض).

الحاصل: شو عجب قصيده سنك آخرنده كى شو بش بيتده بش كلمه، مدار نظر شيخ و محل خطاب غوثيدر. و او بش كلمه ايسه، ﴿لِمُرِيدِي وَ مُرِيدِي وَ مُنْشِدًا وَ قَادِرِي وَ سَعِيدًا﴾ لفظلريد. سعيدك دخى ايكي لقبى اولان "نورسى"، "الكُرْدِي"؛ ايكي اسمى "منلا سعيد"، "بديع الزمان" بو بش كلمه ده بولونور. حضرت غوثك مدار توجه و خطابى اولان شو بش كلمه سنده، آشكار بر صورته، مذكور ايكي اسم و لقب، علم جفر قاعده سنده مقام أبجد ايله گورونمى شبهه بيراقمبيور كه، حضرت شيخ قصيده سنك آخرنده اونكله قونوشويور، اوگا تسلى ويروب تشجيع ايدييور. ﴿وَالْعَاقِبَةُ لِلْمُتَّقِينَ﴾ سريله موفقيتنه تأمينات ويريور. ﴿لَا يَعْلَمُ الْغَيْبَ إِلَّا اللَّهُ﴾ وَ اللَّهُ أَعْلَمُ بِالصَّوَابِ ﴿

﴿فَيَا مُنْشِدًا نَظْمِي﴾ فقره سنده، ﴿نَظْمِي﴾ كلمه سى، مقام أبجديسى ييك اولوب؛ ﴿رِسَالَةُ النُّورِ﴾ ايكي فرقله، ﴿رَسَائِلُ كِتَابِ النُّورِ﴾ ك (ايكي مده

(حاشيه): سليمان اوج فرق ايله سعيدده داخل اولديغى گي، عبد الله (*) إسمنده بر قاچ مهم قارداشليمز، مسعود ايله برابر سعيدك ايچنده درلر.

(*) بِالْخَاصَّةِ إِسْلَامْ كويلي و عطا بگلي عبد الله لر.

صایلمازسه و شده ده لام صایلسه) مقام اُجدیسی ینه بیگدر . دیمک
 ﴿فَيَا مُنْشِدًا نَظْمِي فَقُلْهُ وَلَا تَخَفْ﴾ فقره سنک مثال غیبیسی شودر که :
 ﴿يَا مُؤَلِّفَ رِسَالَةِ النُّورِ جَاهِدْ بِهَا فَقُلْ وَلَا تَخَفْ﴾ یعنی "قورقمه، سوزلرینی
 سویله، نشرینه چالیش." ﴿وَالْعِلْمُ عِنْدَ اللَّهِ﴾.

اما ﴿فَقُلْهُ وَلَا تَخَفْ﴾ فقره سنده شایان حیرت بر توافق وار که: علم جفر
 قاعده سیله مقام اُجدیسی بیگ اوچ یوز اوتوز ایکی (۱۳۳۲) ایدر. شو حالده
 ﴿يَا مُنْشِدًا نَظْمِي فَقُلْهُ وَلَا تَخَفْ﴾ مثال غیبیسی "یا رساله النور و سوزلر
 صاحی! بگا باق. غافل طاورانمه! بیگ اوچ یوز اوتوز ایکیده مجاهده یه باشلا؛
 سوزلری قورقمه یاز، سویله!" فی الحقیقه سعید (رض) حریتدن صوگره آز بر
 زمانده مجاهده سنده توقّف ایتمش ایسه، بیگ اوچ یوز اوتوز ایکیده إشارات
 الإعجازی تألیف ایله برابر اُسکی سعیددن صیریلحق نیت ایدوب، یگی سعید
 صورتنده بتون قوتیله مجاهده معنوییه باشلایوب، ایکی اوچ سنه صوگره ده دار
 الحکمت الإسلامیه ده بر ایکی سنه حضرت غوث گیلانی نك شو وصیتی و
 آمرینی إمتثال ایدهرک أنوار قرآنیه یی نشر ایتمش. لله الحمد، شیمدی یه قدر دوام
 ایدیور.

بو شایان حیرت فقره ده جای دقت شو نقطه وار که؛ حضرت غوث،
 طوغریدن طوغری یه آلتنجی عصردن شو عصریمزه باقییور. او آلتنجی عصرک
 آخرلرنده هلاکو فلاکتی گبی فجیع، دهشتلی مشهور فتنه نك چوق الیم و فجیع
 و قبورده کی أمواتی آغلاندره حق درجده دهشتلی بر نوعی، شو اون دردنجی

عصرده بولونویور. بو ایکی عصر بربرینه توافق ایدیور که، حضرت شیخ اوندن بوکّا باقیور.

رسالهٔ نور طلبه‌لری نامنه

رأفت، خسرو، حافظ علی، صبری



شو کرامتِ غوثیه مناسبتیه اوچ نقطه بیان ایدیله جک:

برنجی نقطه: حضرت غوثک قصیده سنک باشنده بو بش سطرده اول، عجیب، پک غریب، چوق بلیغ، نازدارانه تحدیثِ نعمت صورتنده بر دعوایِ افتخارکارانه إفاده ایدن ایکی صحیفه‌لک قصیده‌سنده کی خارقه دعواسنه دلیل اولارق بر کرامتِ باهره‌یی، عادتاً معجزه‌یه یاقین بر خارقه‌یی گوسترمک لازم گلیوردی. ایشته او عقللری حیرته بیراقان مرتبه‌یه لایق اولدیغنی گوسترر بر کرامتِ اظهار ایتدی که؛ سکز یوز سنه بر مسافده جنابِ حَقّک اذنیله، إعلامیله زمانزی تفصیلاتیله گورور طرزنده، بزم گبی عاجز، ضعیف طلبه‌لرینه درس ویروب تشویق ایدر. ایشته حضرت غوثک دعواسنه بو اخبارِ غیبسی اُک باهر برهان اولدیغی گبی، رسالهٔ نورک اُجزالرنک حَقّانیت و علویته بر حجتِ قاطعه حکمنده در. اوت حضرت شیخ، بو قصیده‌سیله سوزلرک حَقّانیتنی امضا ایدیور.

ایکنجی نقطه: اهل طریقت و حقیقتجه متفق علیه بر اساس وار که:

طریقِ حقده سلوک ایدن بر انسان، نفسِ اماره سنک اُنانیتنی و سرکشلگنی قیرمق

ایچون لازم گلیر که؛ نظرنی نفسندن قالدیروب شیخنه حصر نظر ایده ایده تا فنا فی الشیخ حکمنه گلیر. "بن" دیدیگی وقت، شیخنک حسیاتیلہ قونوشور و هکذا.. تا فنا فی الرسول، فنا فی اللہ قدر گیدر. مثلاً: ناصلکه غایت فداکار و صادق بر خدمتکار، بر یاور، أفندیسنک حسیاتیلہ گویا کنديسی کنديسنک أفندیسیدر و پادشاهیدر گبی قونوشور. "بن بویله ایسته یورم" دیر؛ یعنی "بنم سیّد، استادم، سلطانم بویله ایسته یور." چونکه کندينی اونوتمش، یالکز اوئی دوشونویور. "بویله أمر ایدیور" دیر. اویله ده غوث گیلانی، او خارقه قصیده سنک تضمّن ایتدیگی أذواق فوق العاده، حضرت شیخنک سرّ عظیم اهل بیتک إرثیتیلہ آل بیتک شخص معنویسنک مقامی نقطه سنده و ذات احمديه عليه الصلاة والسلامك وراثتیلہ حقیقت محمدیه سنده (عصم) کندينی گوردیگی گبی، فناء مطلق ایلہ جناب حقّ تجلّی ذاتیسنه مظهریت نقطه سنده، قصیده سنده او سوزلری سویله مش. اونک گبی اولیان و او مقامه یتیشمه یین اوئی سویله یه مز؛ سویله سه مسئولدر.

حضرت شیخ وراثت مطلقه نقطه سنده، رسول اکرم علیه الصلاة والسلامك قدم مبارکئی اوموزنده گوردیگی ایچون، کندي قدمی اولیانک اوموزینه او سرددن بیرا قیور. قصیده سنده ظاهر گورونن تمدّح و إفتخار دگل، بلکه تحدیث نعمت و عالی بر شکر در. یالکز بو قدر وار که، محبیت مقامی اولان مقام نیازدن، محبوبیت مقامی اولان نازدارلق مقامنه چیقمش. یعنی طریق عجز و فقردن، مشرب عشق و استغراقه گیرمش. و کندينه اولان نعم عظیمه إلهیه یی یاد ایدوب، بحق مفتخرانه شکر ایتمشدر.

اوچنجی نقطه: کرامت، معجزه گبی جناب حقّ فعلیدر، هدیه سیدر، إحسانیدر و إکرامیدر؛ بشرک فعلی دگلدر. او کرامته مظهر اولان ذات ایسه

بعضاً بیلپور، بعضاً بیلپیور (وقوعندن سوځره بیلر). کرامته مظهریتنی قبل الوقوع بیلن و اِکرامِ اِلهی یه اِختیاریله توفیقِ حرکت ایدن قسم، اَگر اُنانیتدن بتون بتون تجرّد ایتمش ایسه و حضرتِ غوث گبی قدسیت کسب ایتمش ایسه، جنابِ حقّ اِذنیله، او کرامتک هر طرفنی بیلهرک کندیسی صاحب چیقار، بیلر و بیلدیرر. فقط بونکله برابر، مادام او کرامت اِکرامدر؛ بتون تفصیلاتیله کرامت صاحبنه ده مشهود اولمق لازم دگلدر. بو سرّه بناءً حضرتِ شیخِ اِعلام ربّانی و اِذنِ اِلهی ایله بو عصری گورمش و خدمتِ قرآنیه‌نک اُطرافنده بزلری مشاهده ایدوب نظرِ شفقتیله باقمش. او بش سطر، صرف بر کرامت و اِنطاقِ بالحق و بر اِکرامِ اِلهی و وراثتِ نبویه اِعتباریله ظهور ایتدیگندن؛ معجزه‌واری، قدرتِ بشر فوقنده بر شکل آلمش. صنعی، اِرادۀ شیخ ایله اولدیگی دگلدر. چونکه اِنطاقدر. روحِ قدسیسی حسنِ ایتمش، گورمش. اِرادۀ و اِختیار یتیشه‌میور. عقل ایسه روحک حرکاتی اِحاطه ایده‌مز. لسان، نه قدر عقلک دقائقِ تصوّراتنک ترجمه‌سندۀ عاجز ایسه، اِختیار دخی روحک دقائقِ حرکاتنک درکنده او درجه عاجزدر.

حضرتِ غوث، او درجه یوکسک بر مرتبه‌یه مالک و او درجه خارقه بر کرامته مظهردر که، کافرلرک بر قسمی دیمش: "بز اِسلامیتی قبول ایده‌میورز؛ فقط عبد القادر گیلانی‌ی ده اِنکار ایده‌میورز." هم اُولیای اِنکار ایدن وهّاینک مفراط قسمی دخی، حضرتِ شیخی اِنکار ایده‌میورلر. اُولیاء اونک درجۀ جلالته یتیشمدیگی، بتون اهلِ طریقتجه تسلیم ایدیلمشدر.

ایشته بویله گونش گبی بر معجزۀ محمّديه (علیه الصلاة والسلام)، یوکسک و سونمز بر بارقۀ اِسلامیت اولان بر ذات نوراینک غیب‌آشنا نظریله عصریمزی گوروب، بویله بر کرامت اِظهاریله تسلّی و یروب تشجیع ایتمک شأننددر.

عجبا هیچ ممکن میدر که؛ "سلطان الأولیاء" مقامی إحراز ایتمش و حمیت اسلامیہ ایلہ زمانندہ کی پادشاہلری تیرہتمش و قوۃ قدسیہ ایلہ ماضی و مستقبلہ حاضر گی إذنِ اِلہی ایلہ گورمش و ممانندہ دخی حیاتندہ کی گبی دائمی تصرفی بولوندیغی تصدیق ایدیلمش اولان بر قهرمان ولایت، بو عصریمزه و بو عصر ایچندہ کی کمالِ عجز و ضعف ایلہ قرآنک خدمتندہ چالیشان و انصافسز دشمنلرک هجومنه معروض و تسلّی و تأمینہ محتاج بیچارہ قرآنک خادمترینہ و طلبہلرینہ لاقید قالاییلیر می؟ هیچ ممکن میدر که، بزملة مناسبتدار اولماسین؟ سکز، طوقوز، بلکه اونبش قوتلی دلیلدن قطع نظر، أدنا بر إشارت کلامندہ بولونسه، بزه باقدیغنه دلالت ایدر؛ خفی بر إشارت ایتسه کافیدر. چونکه مقام إقتضا ایدیور، مطابق مقتضایِ حالدر و مناسبت قویدر.

أی بنمله برابر حضرت شیخک توجه و دعاسنه مظهر قارداشلم! شو استادیمز، بزى إستقبالده عدم ظلماتی ایچندہ دوشونوب بزملة مشغول اولورکن، بز او ماضیده موجود و نور پردهلری ایچندہ استادیمزى و استادیمزک استادی و جدی اولان فخر العالمین علیه الصلاة والسلام أفندیمزک توجّهلرندن غفلت ایتمک، اونلره إستناد ایتمه مک لایق میدر؟ مادام اونلر بزى دوشونویورلر؛ بز ده بتون قوت و روحملزه اونلره إعتما دایدوب و آمرلرینه بلا قید و شرط إطاعت ایتملی یز.

أهلِ دنیانک تلسز تلغراف و تلفونلری شرقدن غربه گیتدیگی گی، ایشته أهلِ حقیقتک ده ماضیدن، طوقوز یوز سنه مسافه عظیمه دن مستقبله بویله معنوی تلفونلری ایشله یه بیلیر و معنوی تلسقوبلری گوره بیلیر. معلومدر که ضعیف أماره لر إجتمع ایتدکجه قوت بولور، دلیل حکمنه گچر. اینجه جک ایپلر، إجتمع ایتدکجه قویماز خلاط اولور. کلی عمومی قیدلر، إجتمع ایتدکجه

خصوصیت پیدا ایدوب تعین ایدر. بو سرّہ بناءً، حضرت شیخ بو بش سطرندہ سکز طوقوز قوتلی إشارتک إجماعندہ هیچ شک و شبہہ بیراقمدی کہ؛ حضرت شیخ، شیمدیکی قرآن حکیمک شاکردلرینہ بِإِذْنِ اللَّهِ استادلُق ایدیور، بِحَوْلِ اللَّهِ شَفَقَتِي آلتندہ حمایہ ایدیور.

جمع قطبیت و فردیت و غوثیت

ایله اوچ ستون اوزرنه طورور

رایت علویت شیخ حقانیدر خطاب عبد القادر

إلهام خدا کتاب عبد القادر

باز الأشهب فرد فرید دوران

غوث أعظم جناب عبد القادر.

سعید النورسی



رساله نور شاکردلرینک بر فقره سیدر

﴿وَكُنْ قَادِرِي الْوَقْتِ لِلَّهِ مُخْلِصًا * تَعِيشُ سَعِيدًا صَادِقًا بِمُحَبَّتِي﴾

علم جفر ایله معناسی: آی سعید! سن، زمانک عبد القادری اول، إخلاص تامی قزان، فقرکله برابر معیشتکی دوشونمه، ناسدن منت آله، إسمک "سعید" اولدیغی گبی معیشتده ده مسعود اولاجقسک! محبتده صادق اولدیغکدن و إخلاصه چالیشدیغکدن، خلوصی گبی مخلص طلبه لر و یاردیمجیلر و سلیمان، بکر گبی صادق خدمتکارلر و صبری گبی تام تقدیر ایدیجی و جدی مشتاق

طلبه لر سزه ویریلمش. "أوتِ لِلّٰهِ الْحَمْدُ، غوثُكُ صِرَاحَتِ درجه سنده إخبار ایتدیگی حال وقوع بولمشدر. غوثِ أعظم، "سعید" نامیله تسمیه ایتدیگی مریدینک تاریخچه حیاتنده اَكْ مهمّ نقطه لری بیان ایتمکله برابر، علمِ جفر أَسْرَارِیله سکز طوقوز جهتهده سعیدک باشنه پارمغنی باصییور. بیتلرک معنای ظاهرسی ایله معانی جفریه سی بربرینه چوق یاقین اولمقله، طوقوز وجهده کی إشارت لر بربرینی تأیید ایتدیگندن صِرَاحَتِ درجه سنه چیقمش.

﴿أَنَا لِمُرِيدِي حَافِظًا مَا يَخَافُهُ ۖ وَأَخْرُسُهُ فِي كُلِّ شَرٍّ وَفِتْنَةٍ﴾

علمِ جفر ایله معناسی: اون دردنجی عصرده "الْكَرْدِي" لقبیله یاد ایدیلن ملا سعید، بنم مریدمدر. او فتنه و بلا عصرینک هر شر و فتنه سندن، اللَّهُكُ إِنْزِیله و حول قَوْتِیله اونك محافظییم. "أوتِ حَرِیتدن یگرمی اوتوز سنه صوگرهیه قدر، یگرمی فتنه عظیمه ایچنده فوق العاده بر صورتده غوثک او مریدی محفوظ قالمشدر. قورقدیغی شر و مهالکدن بر حفظ غیبی ایله قورتولمشدر.

﴿مُرِيدِي إِذَا مَا كَانَ شَرْقًا وَمَغْرِبًا ۖ أَغْنَاهُ إِذَا مَا سَارَ فِي أَيِّ بَلَدَةٍ﴾

علمِ جفر ایله معناسی: او غوثک مریدی اولان سعید الکردی، روسیهده أَسَارْتله آسیانك شرقِ شمالیسنده و أَهْلِ بدعهنك أَلِیله آسیانك غربنه نفی اولونه رق قالدیغی مقدارجه و سیریا طرفلرندن فرار ایدوب فوق العاده چوق بلادی سیر و سیاحت ایتمگه مجبور اولدیغی زمان، اللَّهُكُ إِنْزِیله، حول و قَوْتِ رَبَّانِی ایله اوڭا إمداد ایتمشم و إستمدا دینه یتیشمشم. "أوتِ حضرت غوثک مریدی عنوانیله إرادة ایتدیگی سعید (رض)، اوچ سنه أَسَارْتله آسیانك شرقِ شمالیسنده مهالك ایچنده محفوظ قالب، اوچ درت آیلق مسافه یی فرار صورتیله قطع ایدهرک چوق شهرلری گزوب غوثک دیدیگی گبی محفوظ قالمشدر.

﴿فِيَا مُنْشِدًا نَظْمِي فَقُلْهُ وَلَا تَخَفْ﴾ فَإِنَّكَ مَحْرُوسٌ بِعَيْنِ الْعِنَايَةِ

علم جفرله معناسی: بدیع الزمان ملا سعید نامیلہ یاد اولنان و اُوراد منتظمہ سنی اوقویان مریدینہ دیر کہ: "بنم نظممی، یعنی مسلک و مشرعی و مجاہداتمی گوسترن مقالاتمی سویلہ. یعنی نظممدن مراد، سنک رسالہ لرک و سوزلرک و مکتوباتکدر. ﴿فَقُلْهُ وَلَا تَخَفْ﴾ ییک اوچ یوز اوتوز ایکیدہ (۱۳۳۲) او سوزلر ایلہ مجاہدہیہ باشلا. سن عنایتِ إلهیہنک حفظندہ سک.

أوت ﴿مُنْشِدًا﴾ علم جفرله "ملا سعید"ی گوستردیگی گی، ﴿نَظْمِي﴾ ﴿ظ﴾ ایلہ رسالۃ النوری گوستر. و ﴿مِي﴾ ایلہ ہم مکتوباتی ہم ﴿کَلِمَاتُ سَعِيدِ الْکُرْدِي﴾ گوستر. "کلمات" سوزلر دیمکدر. ﴿فَقُلْهُ وَلَا تَخَفْ﴾ ییک اوچ یوز اوتوز ایکی پی (۱۳۳۲) گوستر. او تاریخ، مبدأ جهادیدر. او تاریخده إشارات الإعجاز تفسیرینک نشریلہ مجاہدہیہ باشلامش.



کرامتِ غیبیہ غوثیہنک إشاراتی تأیید ایدن اوچ رمز:

برنجی رمز: ﴿أَنَا لِمُرِيدِي حَافِظًا﴾ علم جفر إعتباریلہ، مقام أبجدی حسابیلہ، ییک اوچ یوز اوتوز آلتی پی (۱۳۳۶) گوستر. دیمک حضرت غوث، بو تاریخده إستقبالده گلہ جک مریدینی أمرِ إلهی ایلہ محافظہ ایدہ جک دیور. أوت بو بیچارہ سعید دخی دیور: نوع بشره گلن أك بیوک بر مصیبت حرب عمومی هنگامندہ، چوق تهلکهلرہ معروض قالدیم. حضرت غوثک گوستردیگی عربی

تاریخده ویا آز اَوَّل، خارقه بر صورتده قورتولدیم. حتّی بر دفعه، بر دقیقهده اوچ گله ئولدیره جک یره مقابل بڭا إصابت ایتدیگی حالده تأثیر ایتمدیلر. بیتلیسک سقوطنده، بر مقدار طلبه لرم له روس عسکرلرینک بر طابوری ایچنه دوشدک. بزى صار دیلر، هر طرفه اَل اَله آتش ایدیلدی. درت دانه سی مستثنا، بتون آرقداش لرم شهید اولدقدن صوگره، طابورک درت صیره لرینی یاردق؛ ینه اونلرک ایچنده بر یره گیردک. اونلر اوستمزده، اطرافمزده سسمزی، او کسور و گمزی ایشیتدکلری حالده بزى گورمیوردیلر. اوتوز ساعت، او حالده چامور ایچنده، بن یاره لی ایکن حفظِ اِلْهی ایلَه إستراحتِ قلب ایچنده محافظه ایدیلدیم. بونک گبی متعدّد تهلکه ده حضرتِ غوثک گوستردیگی تاریخ عربی اعتباریله، حقیقه بر حفظِ اِلْهی ایچنده بولوندیغمی حسنّ ایدیوردیم. دیمک جنابِ حق او قدسی استادیمی، بر ملائکه صیانت گبی بڭا محافظ قیلمش.

ایشته بو **«أَنَا لِمُرِيدِي حَافِظًا»** فقره سی، بو فقیرک مهمّ سرگذشتلرینه إشارت ایتدیگی گبی، بو فقیرک اطرافنده خدمتِ قرآنیه ایشنده طویلانان آرقداشلرندن طوقوز طلبه سنی "حافظ" اسمیله إشارت ایدیور. **«وَأَخْرُسُهُ فِي كُلِّ شَرٍّ وَفِتْنَةٍ»** فقره سنده ایکی حکم وار. بری شردن، دیگری فتنه دندر. دیمک ایکنجیسی **«أَخْرُسُهُ فِي كُلِّ فِتْنَةٍ»** و بو جمله **«كُلِّ»** ده کی شده صاییلماز سه ییک اوچ یوز قرق درت (۱۳۴۴) ایدر. اوت، بو تاریخدن شیمدییه قدر چوق فتنه مهمّەدن، بر حمایتِ غیبی ایلَه محفوظ قالدیغمی "تحديثًا لِلنعمه" إعلان ایدیورم.

ایکنجی رمز: **«مُرِيدِي إِذَا مَا كَانَ شَرْقًا وَمَغْرِبًا * أَغْثُهُ إِذَا مَا سَارَ فِي أَيِّ بَلَدَةٍ»** فقره سنده بحث ایتدیگی و قونوشدیغی مریدی ایسه شرقه أساره

گیتدیگی تاریخی گوستردیگی گبی، غربه نفی اولدیگی تاریخی ده گوسترر. شویله که:

شو فقره نك حقیقی تعبیری ﴿إِذَا مَا كَانَ مُرِيدِيَّ أَسِيرًا فِي شَرْقٍ﴾

اولویور. دیمك زمانِ أسارت ﴿مَا كَانَ مُرِيدِيَّ أَسِيرًا فِي شَرْقٍ﴾ ده چیقیور. و یك اوچ یوز اوتوز یدی (۱۳۳۷) ایدیور. ایشته بو فقیر، او تاریخ عربیده روس أسارتنده، تك باشمله پتروغراددن بر آی شمال شرق طرفندن فرار ایدوب، چوق انواع مهالك واركن، روسجه بیلمدیگم حالده، بر محافظه غیبیه آلتنده پك چوق بلادی سیر و سیاحت ایتدم. تا وارشووا، آووستریا طریقیله إستانبوله گلوب اوزون بر دائره أرضده سیاحت ایتدم. حضرت غوثك دیدیگی گبی، او أسارت شرقیه و او سیر بلاد کثیره ایچنده إذنِ إلهی ایله إستغاثه مه مدد گورویوردیم. دیمك إذنِ إلهی ایله حضرت غوث، ملك گبی بو وظیفه بی دعاسیله یاپمش.

اما ﴿مَا كَانَ مَغْرِبًا﴾ قیدی، تاریخ عربی اولارق یك اوچ یوز ألی بر (۱۳۵۱)، مشهور رومی تاریخیه ایکی سنه فرق وار. ایشته (حضرت غوثك دیدیگی گبی) بو فقیر، تاریخ عربی ایله یك اوچ یوز ألی برده (۱۳۵۱)، شعائرِ اسلام ایچنده مهم تحولات زماننده بتون قوتمله شعائرک محافظه سنه خدمتله مکلف اولدیغم حالده، او معنوی هرج و مرجده کی فورطنه لر بزی صارصمدی.

هم ﴿مَغْرِبًا﴾ کلمه سی، آخرده کی تنوین ایله برابر یك ایکی یوز طقسان

ایکی (۱۲۹۲) ایدر که، بو فقیرک دنیایه گلمه سندن بر سنه أول ویاخود رحم

مادرده کی تاریخه إشارتله برابر، ﴿كَانَ مَغْرِبًا﴾ ییڭ اوچ یوز اون درت (۱۳۱۴) ایدر. ییڭ اوچ یوز اون درت سنه‌لرنده موضوع بحث اولان مریدی، مهم ورطه‌دن قورتولمسنه غوث (رض) إشارت ایدیور، اونڭ إمدادینه یتیشدم دییور. حیاتنده اولان اُسکی طلبه‌لرم بیلیورلر که؛ ییڭ اوچ یوز اون درت، ییڭ اوچ یوز اون بش اون آلتی سنه‌لرنده، وان قلعه‌سی که، ایکی مناره یوکسکلگنده صرف طاغ گبی بر طاشدن عبارتدر، اُسکیدن قالمه اوطه گبی بر این قپوسنه گیدیوردق. آیاغمدن قوندوره‌لر قایدی، ایکی آیاغم بردن قایدی. تهلکه یوزده یوز... باشقه‌جه نقطه إستناد قالمادیغی حالده، بیوک بر إستاده باصمش گبی اوچ متره‌لک بر قوسله او مغاره‌نڭ قپوسنه آتیلیمشم. هم بن، هم برابرمده کی اوراده حاضر آرقداش‌لرم، أجل گلمدیگی ایچون صرف بر حفظِ إلهی، خارقه بر إمداد غیبی تلقی ایتدک.

ایشته حضرت غوث، مادام بو قصیده‌سنده سرگذشتِ حیاتمڭ مهم نقطه‌لرینه إشارت ایدیور؛ البته بو عجیب و اڭ تهلکه‌لی بر سرگذشتِ حیاته شو جمله‌سیله إشارت ایدیور دینیله‌بیلیر.

الحاصل: حضرت غوثڭ مذکور کلماتلری، بو فقیرڭ تاریخِ حیاتمه گچن اڭ مهم نقطه‌لری معناسیله إفاده ایتدکلری گبی، حسابِ أبجد مقامیله مهم نقطه‌لرڭ تاریخ و قوعلرینه توافقلری، البته تصادفی و تصادف ایشی اولاماز. سائر إشاراتڭ قوتی، قطعیتی، تصادفی محال درجه‌سنه گتیرمشددر. مادام بو بش سطر قصیده‌سی، بر کرامتدر؛ کرامت ایسه معجزه گبی جناب حق طرفندندر، إنطاقِ بالحق نوعندندر، داها بیان ایتدیگمز چوق اُسراری حاویدر، اختیار بشر یتیشه‌مز.

اوپنچی رمز: خدمتِ قرآنیدہ کی آرقداشلرک بر قسمی "حافظ" لقبیلہ، بر قسم "مخلص" کلمہ سیلہ اشارت ایدیلدیگی گی، "صادق" کلمہ سندہ سلیمان، بکرہ اشارت اولونقلہ برابر؛ عیناً اونلرگی صداقتده ممتاز و قلمی بر الماس قلنج گی عاصمه دخی اشارت ایدیور. هم مقامیلہ برابر فداکار آرقداشلرک آلتنجیسی اولدیغنه اشارت ایدیور. عاصم گی الماس قلمی أحمد خسروی ﴿تَعِيشُ سَعِيدًا﴾ جملہ سی بشنچی گوستریور. رأفت بك ﴿صَادِقًا بِمُحَبَّتِي﴾ جملہ سیلہ، مقامنه اشارتله عاصم گی آلتنجی آرقداش اولدیغنه آلتی فرق ایله گوسترمشدر. و هکذا سائر خاص آرقداشلر ده ایچنده مندرجدر. حتّی ﴿تَعِيشُ سَعِيدًا﴾ ده کی "سعید" کلمہ سندہ بش آلتی قارداشلرم داخل اولدیغی، بنجه قطعی بر صورتده تحقّق ایتمشدر.

سعید النورسی



نورک بلجیسی

لطیف بر تفأل

شیخ سعدی شیرازینک "بوستان" ندن سوزلر حقّنده بن، حافظ خالد، غالب، سلیمان نیت ایدوب آچدق.

تفأل بو چیقدی:

﴿نِگَر تَا گِلِسْتَان مَعْنَا شُکُفْت﴾ ﴿بُرُو هِیچ بُلْبُلُ چِنِینْ خُوشْ نَکُفْت﴾
 ﴿عَجَبْ گَر بِمِیَرْدُ چِنِینْ بُلْبُلِی﴾ ﴿کِه اَز اُسْتُخَوَانَشْ نَرُویدْ گَلِی﴾

مثالی: یعنی "گل، باق، گلر باغی شکنده حقیقت گلری آچیلمش.
 بویله حقیقت باغچه سنده هیچ بر بلبل، بویله شیرین، خوش نغمه ایتمه مشدر.
 ناصل اولویور که، بویله بر بلبل ئولدکدن صوگره اونک کمیکلرندن گلر
 آچیلمه سین."

بو مثال، مقصدیمزه او قدر یاقیندر که تعبیره لزوم یوقدر. یالکز گلستانمز؛
 أبدی قرآن جئتندندر، اوندن گلمشدر.

محمد توفیق، غالب، سلیمان،

حافظ خالد، سعید



بسم الله الرحمن الرحيم

غوٹ، مشهور قصیده سنده (صراحت درجه سنده) بزلردن، یعنی حزب
 القرآنندن خبر ویردیگی گبی، داها بر قاچ یرده ینه إشاری بر طرزده خبر
 ویریور.

أزجمله، او قصیده نك آرقه سنده "مجموعة الأحزاب" ك (۵۶۳) نجی
 صحیفه سنده، ینه او معلوم مریندن بحث ایدیور و بیتنده دیور که:
 ﴿فَمُرِّدِي إِذَا دَعَانِي بِشَرْقٍ أَوْ بَغْرِبٍ أَوْ غَارٍ فِي بَحْرِ طَامِي أَعْثُهُ﴾ "غریده بنی
 چاغیردیغی وقت، اونك إمدادینه یتیشه جگم." أوت طوغریدر. عربی تاریخ ایله

یہ اوج یوز اوتوز طوقوزده (۱۳۳۹) مدھش بر بحرانِ روحی و دھشتلی بر
 ہیجانِ قلبی و دغدغہ لی بر تشوشِ فکری گچیردیگم صیرہلرده، پک شدتلی بر
 صورتده حضرتِ غوثدن استمداد ایلدم. بر ایکی یرده بحث ایندیگم گی،
 "فتوح الغیب" کتابی ایلہ و دعا و ہمتیلہ امدادیمہ یتیشدی و او بحرانی گچیردم.
 ایشته او مریدی ایسہ، بیچارہ سعید الکردی اولدیغنی مشہور قصیدہ سندنہ
 قطعی گوستردیگی گی، بو قصیدہ دہ **﴿فمریدی﴾** دن مراد اودر. چونکہ
﴿دعائی بغرب﴾ ابجد حسابیلہ ییک اوج یوز اوتوز طوقوز (۱۳۳۹) ایدر. او
 زمان مملکتہ نسبۃً غرب صاییلان استانبولده ایدم. **﴿دعائی بغرب﴾** مقام
 ابجدیسی زمانِ استمدادیمہ توافق ایدیور. حسابدہ **﴿إذا﴾** لفظی داخل اولماز.
 چونکہ **﴿إذا﴾** زمانی گوستریور، **﴿دعائی بغرب﴾** جملہ سی او مبہم زمانی تعین
 ایدیور.

ہم ازجملہ، "مجموعۃ الأحزاب" ک ایکنجی جلدینک (۳۷۹) نجی صحیفہ سندنہ
 حضرتِ غوثک "ورد العشاء" نامندہ کی مناجاتندہ شو فقرہ وار: **﴿فَالْوَاصِلُ﴾**
﴿إِلَى سَاحِلِ السَّلَامَةِ هُوَ السَّعِيدُ الْمُقَرَّبُ﴾ (حاشیہ ۲) **﴿وَذُو الْهَلَاكِ﴾**

(حاشیہ ۱): **﴿فَالْوَاصِلُ﴾** کلمہ سی متعدی اولق جھتیلہ، سوزلریلہ سلامتہ ایصال ایدیچی

دیمکدر.

(حاشیہ ۲): **﴿الْمُقَرَّبُ﴾** مشدد راء بر صاییلہ، استادیمزک لقی اولان "التورسی"
 کلمہ سنک عینیدر. یالکز عطف ایچون "واو" وار. تام توافقلہ، مُقَرَّبِدن مراد نورسلی اولدیغنی
 گوستریور. **﴿الْمُقَرَّبُ﴾** دہ شدہ لی راء ایکی صاییلہ "بدیع الزمان النورسی" یاءِ محققلہ
 عینیدر. یالکز ایکی فرق وار. ایکی ہمزہ وصل صاییلہ، تام تامنہ توافقلہ **﴿الْمُقَرَّبُ﴾** طوغریدن
 طوغری یہ اوکا اشارت ایدیور.

شاملی توفیق، سلیمان، علی

هُوَ الشَّقِيُّ الْمُبْعَدُ وَالْمُعَذَّبُ﴾ ایشته غوثک شو فقره سی، ﴿فَمِنْهُمْ شَقِيٌّ وَ سَعِيدٌ﴾ آیتک بر نوع تفسیریدر. شو کلی آیتک بر قسم افرادی، آلتنجی عصر و اون دردنجی عصرده آیتک کلّیتنده داخل بر قسم افراد مخصوصه بی إرائه ایتدیگنه متعدّد أماره لر وار. آیتک کلّیتنده (حاشیه) توافق سرّیله ﴿فَمِنْهُمْ شَقِيٌّ﴾ کلمه سنده بو زمانک اُلک بیوک شقیلرندن اوچنه جفرجه توافق ایتمه سی، او کلی آیتده بونلر دخی قصداً مراد اولدقلرینه أماره در، بلکه إشارتدر. ایشته حضرت غوث بو آیتده کی بو أماره دن، بو زمانه باقمش. مذکور فقره سنی کلی آیته بر نوع خصوصی تفسیر یاپارق، قصیده سنده کرامتکارانه بحث ایتدیگی فتنه آخر زمان ایچنده کی شاکردلرینی گوروب، او زمانک شقیلرینک شرندن محافظه ایدیلدیگی و بوراده مناجاتنده دخی او قصیده نک مثالنه باقییور.

شو فقره غوثیه ده بر ایما وار. بوراده کی "سعید" لفظنده، مشهور قصیده سنده کی ﴿تَعِيشُ سَعِيدًا﴾ کلمه سنه خفی بر إشارت اولدیگی گبی؛ ﴿ذُو الْهَلَاكِ هُوَ الشَّقِيُّ الْمُبْعَدُ﴾ فقره سیله کندیسندن صوگره وقوع بولان و علوم اسلامییه بی محو ایتمک نیتیه کتبخانه لری دجله و فرات نهرینه آتان هلاکو فلاکتی خبر ویرمکله برابر؛ هلاکو گبی علوم اسلامییه پرده چکن شقیلری دخی، مذکور آیته إستناداً خبر ویریور.

(حاشیه): آیتک کلّیتنده سعادت نقطه سنده مظهریتنه ماصدق اولمق ایچون میلیارلر درجه دن یالکز بر درجه مراد اولدیغمزی آکلاسه ق، أبده قدر شکر ایتسه ک او نعمت لک حقی ادا ایدمه یز. حضرت غوثک إشارتندن آکلاشیلییور که، او محیط آیتک دگرندن بر قطره قدر حصّه مز وار. ﴿الْحَمْدُ لِلَّهِ هَذَا مِنْ فَضْلِ رَبِّي﴾

أوت ﴿فَالْوَاصِلُ إِلَى سَاحِلِ السَّلَامَةِ﴾ فقره سیله حزب القرآنّه إشارت ایتدیگی گبی، ﴿ذُو الْهَلَاكِ هُوَ الشَّقِيُّ الْمُبْعَدُ وَ الْمُعَذَّبُ﴾ فقره سیله علوم اسلامییه یی إحا نیتیلّه هلاکو و وزیراسی گبی طاورانان بعض معلوم إنسانلرکُ إسملری علم جفرجه دخی مذکور آیتکُ إشارتنه إستناداً تام توافق ایدیور، گوستریور.

معلومدر که توافق، علم جفرکُ آناختارلرندن مهمّ بر آناختاردر. اگر بر توافق ایسه، دلالت دینیلمز؛ فقط خفی بر ایما اولور. اگر ایکی جهت ایله عین مسئلهیه توافق گلسه، ایمادن رمز درجه سنه چیقار. اگر ایکی اوچ جهتلّه عین مسئلهیه گلسه إشارت اولور. اگر معانی أفاظ، إشارات حرفیهیه مناسب گلسه و إشارتلّه بحث ایدیلن إنسانلرکُ أحوالی او معنایه مطابق و موافق اولسه، او إشارت او وقت دلالت درجه سنه چیقار. اگر آلتی یدی وجهله توافقلّه برابر، معنای کلمات إشارت حرفیهیه موافق گلسه و مقتضای حالّه ده مطابق اولسه، او دلالت او وقت صراحت درجه سنه چیقار. ایشته بو دستورّه بناءً، شیخ گیلانی او مشهور قصیده سنده صراحت درجه سنده حزب القرآندن بحث ایتدیگی گبی، ﴿وَرْدُ الْعِشَاءِ﴾ مناجاتنده دخی مذکور آیتّه إستناداً حزب القرآنکُ بر خادمی تصریحاً و آرقداشلیقینی ده إشارت درجه سنده خبر ویریور.

غوثِ أعظمکُ إستقبالدن خبر ویردیگی نوعدن، مشهور شیخ الإسلام أحمد جامی دخی إمام ربّانی (رض) اولان أحمد فاروقیدن خبر ویردیگی گبی، جلال الدین رومی نقشبندیلردن خبر ویرمش. دها بو نوعدن چوق اولیالر، واقعّه مطابق خبر ویرمشلر. فقط اونلرکُ بر قسمی صراحتّه یاقین خبر ویرمشلر، دیگر بر قسمی خبرلری چندان بر درجه مبهم، مطلقدر؛ فقط بحث ایتدکلری

ذاتلر مقام صاحبی و بیوک اولدقلرندن، بیوککلری و تعینلری جهتیه او مبهم اخبار غیبی بایلاستحقاق کندیلرینه آملشر. مثلاً: أحمد جامی (قس) دیمش که: "هر درت یوز سنه باشنده مهم بر أحمد گلیر. بیك تاریخی باشنده کی أحمد اُك مهمیدر." یعنی او ألفك مجددیدر. ایشته بویه مطلق بر صورتده سویله دیگی حالده، امام ربانینك (قس) بیوکلگی و تشخصی، او خبر غیبی قطعیا کندینه آملش. حضرت مولانا جلال الدین رومی (قس) ده نقشبندیدن مبهم بر صورتده بحث ایتمش؛ فقط نقشیلرک بیوکلگی و یوکسکلگی و تشخصلری، او خبری ده بایلاستحقاق کندیلرینه آملشر.

ایشته بو کرامتکارانه اخبار غیبی نوعندن غوث اعظم (قس) دخی، حزب القرآنندن (إشاری بر صورتده) خبر ویردیگی گی؛ حزب القرآنك بر خادمی اولان بو بیچاره سعیدی (رض) ایکی یرده صراحة خبر ویریور. مبهم و مطلق بیر اقمیدنك سری بودر که: بو بیچاره سعید، مقام صاحبی اولماش ایکن و بیوک دگل ایکن و مطلق تعبیری تشخیص ایده جک بر تشخص یوقکن، لطفِ إلهی ایله بیوک بر مقامك خدمتنده بولونماسیدر. عاداتا بر نفر ایکن، مشیریت مقامی خدمتنده بولونماسیدر. ایشته کوچکلگی و اهمیتسزلگی ایچوندر که، حضرت غوث اوته کی اولیا به مخالف اولارق یالکز إشارتله قالمه یوب (صراحت درجه سنده) پارمغنی اونك باشنه باصیور.

سرگذشتِ حیاطمه گچن و چوغنی گیزلدیگم چوق خارقه واقعه لر واردی. کندیمی هیچ بر وجهله کرامته لایق گورمه دیگم ایچون اونلری بعضاً تصادفه، بعضاً ده باشقه أسبابه إسناد ایدیوردم. شیمدی قناعتم گلیور که، او خارقه لر، غوث اعظمك بر سلسله کرامتنی تشکیل ایدرلر. دیمك اونك دعاسیله، همتیه، اوکا کرامه و بزه اکرام نوعندن، بر نوع عنایتِ إلهیه مظهر اولمشز.

أزجمله: بن منفی اولارق إستانبوله گتیریلدیگم وقت، بر زمان مشیختِ اسلامیة دائره‌سنده بولونان دار الحکمة الإسلامیة‌ده کی خدمتِ قرآنیة‌یه چالیشدیغم ایچون، او علاقه‌دارلق جهتنده "مشیخت دائره‌سی نه حالدۀ‌در؟" دییه‌ صوردم. آیواه! اوילה بر جواب آلدیم که؛ روحم، قلبم و فکرم تیتره‌دیلم و آغلادیلم. صوردیغم آدم دیدی که: "یوزر سنه أنوارِ شریعتک مظهری اولمش اولان او دائره، شیمدی بیوک قیزلرک لیسه‌سی و ملعبه‌گاهیدر." ایشته او وقت اوילה بر حالتِ روحیه‌یه گرفتار اولدم که، دنیا باشمه ییقلمش گی اولدی. قوتم یوق، کرامتم یوق، کمالِ مأیوسیتله آه واه دیهرک درگاهِ إلهیه‌یه متوجّه‌ اولدم. و بزم گی قلبری یانان چوق ذاتلرک حرارتلی آهلری، بنم آهیمة إلتحاق ایتدیلم. خاطریمه گلمیور که، عجباً شیخ گیلانی‌نک دعاسنی و همتنی، دعامزه یاردیم ایچون ایستدم می، ایسته‌مدم می بیلمیورم. فقط هر حالدۀ‌ او اُسکیدن بری نورلر یری اولمش بر یری ظلمتدن قورتارمق ایچون، بزم گبیلرک آهلرینی آتشلندیرن اونک دعاسیدر و همتیدر. ایشته او گیجه مشیخت قسمًا یاندى. هرکس وا اُسفا دیدی. بن و بنم گی یانانلر، الحمد لله دیدک. ظن ایدرم که، بو فقیر ملّته ایکی یوز میلیون ضرر ویرن عدلیه دائره‌سنده کی یانغینده ده بویله بر معنا وار. إن شاء الله بو ده بر ایفاظ و إنتباهی ویره‌جکدر. آتش بعضًا صودن زیاده تمیزلک یاپار.

حقیقتلی بر لطیفه: سلطان سلیمان قانونی، کثرتلی قرق چشمه‌ صولرینی إستانبوله گتیردیگی وقت، شیخ الإسلام زنبیلی علی أفندی اوڭا دیمش: "خلافِ شریعت قانونلری آوروپادن گتیردیگک جهته، إستانبوله اوילה بر بوق صیچدک که؛ او گتیردیگک صولرک جمله‌سی اوزرندن آقوب گچسه، یوز سنه‌ده تمیزله‌یه‌مز."

سؤال: غوثِ اعظم گئی بیوک و لیلر، بعض اوقاتده، ماضی و مستقبلی حاضر گئی مشاهدہ ایدرلر. نه دن ماضی یه عائد جهتده صراحت صورتنده خبر ویریورلر ده، إستقبالدن خفی رمزله، گیزی إشارتله بحث ایدیورلر؟

الجواب: ﴿لَا يَعْلَمُ الْغَيْبَ إِلَّا اللَّهُ﴾ آیتله ﴿عَالِمُ الْغَيْبِ فَلَا يُظْهِرُ عَلَىٰ

غَيْبِهِ أَحَدًا إِلَّا مَنِ ارْتَضَىٰ مِنْ رَسُولٍ﴾ آیتی إفاده ایتدکلری قدسی یاساغه قارشى عبودیتکارانه بر حسنِ أدب طاقینمق ایچون تصریحدن إشارت مسلگنه گیرمشلر. تا که إشارتله ایله، رمز ایله آکلاشیلسین که، إختیارسز نیّتسز بر صورتده تعلیمِ إلهی ایله اولمشدر. چونکه إستقبالی اولان غیبیات، نیّت و إختیار ایله ویریلمدیگی گئی نیّت ایله ده مداخله ایتمک، او یاساغه قارشى عدمِ إطاعتی إشمام ایدیور.



نورک بکجی

**حضرت غوثک کرامتِ غیبیه سنی تأیید ایدن
بر آیتک إشاراتنده کی بر نکته إعجازیه در**

قرآندن ترشح ایدن او سوزلر و رساله لر، قرآن حکیمک بر نوع مستقیم تفسیری و حقائق ایمانیه نك إستقامتلی و قوّتلی دلیللری اولدیغندن؛ او رساله لر و سوزله گلن شرف و تقدیر و تحسین، قرآنه و حقائق ایمانه عائددر. مادام اویله در بلا پروا دیرم که: ﴿وَلَا رَطْبٌ وَلَا يَابِسٌ إِلَّا فِي كِتَابٍ مُّبِينٍ﴾ سَرَّیله، قرآنده ألبته بو إستقامتلی تفسیرینك إستقامتنه إشارت وار. أوت وار. قرآن

او تفسیرینه خصوصی باقیور. چونکه آیاتِ مهمّه دن سورهُ هودده کی (حاشیه)
﴿فَمِنْهُمْ شَقِيٌّ وَسَعِيدٌ﴾ آیتی بولونان صحیفه نك قارشیسندۀ **﴿فَاسْتَقِمْ كَمَا**
أُمِرْتَ﴾ آیتی، فای عطف خارج اولارق **﴿إِسْتَقِمْ كَمَا أُمِرْتَ﴾** مقام اُجدیسی
 یك اوج یوز ایکیدر (۱۳۰۲). دیمك **﴿إِسْتَقِمْ﴾** ده کی امرِ خاص ایچنده
 بولونان خطابِ عامك حدسز مستقیم افرادلری ایچنده، او یك اوج یوز ایکی
 (۱۳۰۲) تاریخنده بر فردك بر جهتهده إستقامت آمرینك إمتثالی بر خصوصیت
 قرانه جق. دیمك اون دردنجی عصرده قرآندن إقتباس ایدوب، إستقامتسز سقیم
 یوللر ایچنده صراطِ مستقیم گوستره جك آثاری نشر ایدن بر آدمی، او حدسز
 افراد ایچنده داخل ایدیور. هم او إستقامتك بر خصوصیتی وار که، تاریخله
 إشارت ایدیور. حالبوکه، او عصرده شخصاً إستقامتده ممتاز بر خصوصیت
 کسب ایتمك چوق اوزا قدر. دیمك، شخصی إستقامت دگل. او یله ایسه، او
 آدمك تشبیهله نشر ایدیلن أَسْرارِ قرآنیه، او عصرده إستقامتده إمتیاز کسب
 ایده جك. او آدم شخصاً غیر مستقیم اولدیغی حالده، مستقیملر ایچنه إدخالی،
 او إمتیازه رمز ایدر.

مادام حقیقت بودر، بن قطعی بر صورتده إعتراف ایدیورم که؛ حیاتم
 إستقامتسز گیتمش، قلم سقامتدن قورتولمامش، او قدسی آمرك إمتثالندن بلکه
 یوز درجه اوزاغم. فقط **﴿وَأَمَّا بِنِعْمَةِ رَبِّكَ فَحَدِّثْ﴾** سَرِیله او نعمته بر شکر

(حاشیه): حتّی رسولِ اکرم علیه الصلاة والسلام فرمان ایتمش که: **﴿شَیْبَتْنِی سُوْرَةُ هُوْدٍ﴾**

یعنی سورهُ هودده کی **﴿فَاسْتَقِمْ كَمَا أُمِرْتَ﴾** آیتی بنی إختیار لاتدیردی. چونکه اُهمیتی عظیمدر.
 إستقامتِ تامّه بی امر ایدیور.

اولارق دیرم که: او ییک اوچ یوز ایکی (۱۳۰۲) تاریخی ایسه، (عربی تاریخ اعتباریله اولسه) قرآن اوقومغه باشلادیغم عین تاریخه توافق ایدر. و رومی تاریخی حسابیله، علمه باشلادیغم تاریخه توافق ایدر. او یله ایسه او ایما ایدیلن فرد اولایلیرز. حالبوکه شخصاً بتون حیاتی سقیم و إستقامتسز اولان بر فرده إستقامتله ایما ایدیلسه و غیر مستقیم ایکن مستقیملر ایچنه إدخال ایدیلسه، البته او فردک مظهر اولاجی آثارک إستقامتنه ایمادر. و او آثارک إستقامتی، او تاریخده باشلایوب ضلالت یوللری و ظلمات طریقلری ایچنده صراطِ مستقیمى گوستره جک **﴿إِسْتَقِمْ كَمَا أَمَرْتَ﴾** امرینی إمثال ایده جک دیمکدر. اوت لله الحمد رساله نور أجزالری، قرآنک بو معجزانه ایماء غیبسنی بالفعل گوسترمش، میداننده در.

شو آیتک گیزی ایماسنی **﴿إِنَّ حِزْبَ اللَّهِ هُمُ الْغَالِبُونَ﴾** آیتی تأیید ایدیور. چونکه **﴿إِنَّ﴾** ده کی شده لی نون بر صاییلسه تام اولکی آیته توافق ایله، حزب القرآنک فعالیتنه واسطه اولان بر خادمک قرآن اوقومغه باشلادیغی ییک اوچ یوز ایکی (۱۳۰۲) تاریخنه، ایکی فرق ایله توافق ایتمکله برابر، شده لی نون ایکی نون صاییلسه، ییک اوچ یوز اللی (۱۳۵۰) ایدر که، بو تاریخده قرآندن مقتبس اولان رساله نور أطرافنده طویلانان، بتون قوتلریله قرآنک خدمتلینه چالیشان حزب القرآنک فعالیتی و ضلالت و زندقیه معناً غلبه ایتدکلی بر زمانه توافقی ایسه، إستقبالده تام غلبه لیرینه بر ایماء غیبدر.



کرامتِ غیبیہ غوثیہ ناک بر تتمہ سیدر.

﴿تَوَسَّلْ بِنَا فِي كُلِّ هَوٍّ وَشِدَّةٍ ۖ أَغِيثُكَ فِي الْأَشْيَاءِ دَهْرًا بِهَمَّتِي﴾ حضرت

غوث ناک کرامتِ غوثیہ سنده بش سطر دن بحث ایدیلمشدی. او بشدن دردی، هر بری بر جهته حزب القرآنہ اشارت ایتدیگنی آکلامشدق. بوراده یازیلان باشدہ ﴿تَوَسَّلْ﴾ ایله باشلایان سطر دن ایسه، هیچ بر اشارتنی آکلامامشدق. اونک ایچون اونک آلتنده حاشیہ اولارق بر شی یازیلمامشدی.

بو دفعہ اوطہ مدہ تعلیق ایدیلن او لوحہ یہ باقدم. بردن برہ قلبہ إخطار ایدیلدی کہ: "باشدہ کی سطر ک سزہ عائیتی وار. علم جفر ک قاعدہ لرلہ سزہ باقییور. نہ ایچون دقت ایتمیورسک؟" بن دقت ایتدم، بر شی آکلامدم. تکرار إخطار ایدیلدی کہ: "بو سطر بریسنہ أمر ایدیور، ندا ایدیور. هر حالده بر آدمک اسمی یاء ندا ایله برابر عرفا و مقاما و قاعده معنا جهتنده موجود بولونق لازم گلیر. بوندن صوگرہ گلن بیتلرده مدار خطاب اولان مرید کلمہ سندن مراد کیم ایسه، بوراده دخی او مراددر. اویلہ ایسه ﴿تَوَسَّلْ﴾ کلمہ سندن صوگرہ بر اسم ندا ایله مراد و مقدردر. هم ﴿أَغِيثُكَ﴾ ده کی خطاب کیمہ عائد اولدیغی آکلاشیلیمق ایچون، ندا ایله بر اسم ذکر ایتمک لازم گلییور. مادام هر حالده بر اسم لازمدر. ألبته او اسمہ دلالت ایدن بر قرینہ، بر أمارہ واردر."

او وقت بر أمارہ آرادم. گوردم کہ: آخرده کی سطرده سعید اسمی یاء ندا ایله برابر بو ایکی یرده مراد اولدیغنه ایکی دلیل وار:

برنجی دلیل: بو بیتک درت آرقداشی، سعید اسمنه إشارت لریدر.

ايكنجى دليل: هم برنجى، هم ايكنجى فقره ده عين يىڭ ايكى يوز طقسان درت (۱۲۹۴) ايدر كه؛ متعدّد يرده جناب غوڭڭ اِشارتِ غيبه سندن فتنه آخر زمانڭ باشلانغىچى اولان تارىخى گوسترييور. او تارىخ ايسه هم بو اسم صاحبنڭ عربى تارىخ ولادتنه، هم عالم اسلامڭ باشنه گلن حادثات اَليمه نڭ، هول و شدتڭ اَڭ بيوك سببى اولان طقسان اوچ روس حربنڭ شدت تارىخنه تصادف ايدىيور. او وقت هم طاعون و وبا و قحط و غلا و هم روسڭ ظلم و استيلا زمانه تصادف ايدىيور. حضرت غوث بو بيتنده و بو قصيده سنده فتنه آخر زمانه باقىيور. او فتنه نڭ باشلانغىچى اولان يىڭ ايكى يوز طقسان اوچ و درت تارىخنه **«تَوَسَّلْ»** سطرينڭ هر فقره سى "يا سعيد" كلمه سيله برابر عين تارىخى گوسترييور. برى يىڭ ايكى يوز طقسان درت (۱۲۹۴)، ديگرى يىڭ ايكى يوز طقسان بش (۱۲۹۵) تارىخى گوسترييور. او تارىخ رومى حساب ايله اولسه، سعيدڭ مبدأ طفوليتنه؛ اگر عربى تارىخيله اولسه ولادت زمانه توافق ايدىيور. اگر فقره اولى ده كى **«هَوَلْ»** كلمه سنڭ اوستنده كى تنوين و ايكنجى فقره ده كى **«دَهْرًا»** كلمه سنده كى تنوين نون صاييلسه لر، او وقت هر بر فقره يىڭ اوچيوز قرق درت و بش تارىخى گوستره جڭ. فتنه آخر زمانڭ معنويات جهتنده اَڭ اَليم زمانه و اِذنِ اِلهى ايله حمايه و همت و دعاى غوثيه ده بولونان سعيدڭ دخى اَڭ اَليم، اَڭ صيقتىلى زمان اَسارتنه توافق ايدىيور.

بو **«تَوَسَّلْ»** يىتنڭ اِشارتِ غيبه سى چندان ضعيف ايسه، اوته كى درت يىتنڭ صراحته ياقين اِشارتلى بونڭ ضعيف اِشارتنى تقويه ايدىيور. چونكه غايت ضعيف و اينجه جڭ ايلركڭ اجتماعنده قوپاريلميه جق بر درجه ده قوّت

بولدیغندن، ألبته بر ضعیف أماره، قوی إشارتلك إشارت ایتدكلری عین شیئه إشارت ایتسه، دلالت درجه سنده بر إشارتدر دینیله بیلیر.

مختصر بر تحلیل: «تَوَسَّلْ بِنَا فِي كُلِّ هَوَلٍ وَ شِدَّةٍ» فقره سی «شِدَّةٍ»

لفظنده کی (تاء)، کلمه سنك حروف أصلیه سندن اولمادیغندن وقف وقتنده قاعده (ها) یه قلب اولدیغی جهتله او (تاء) (ها) صاییلیر. باشده کی «تَوَسَّلْ» ده (تاء) ایله «شِدَّةٍ» ده کی (شین) یدی یوز (۷۰۰)، شده لی (سین) یوز یگرمی (۱۲۰)، (فی) ده کی (فاء) سکسان (۸۰). مجموعی طوقوز یوز (۹۰۰). درت (لام) یوز یگرمی (۱۲۰)، (نون، باء، اوچ واو، ایکی ها، کاف، یا و بر الف) یوز اون بر (۱۱۱)، «شِدَّةٍ» ده کی شده لی (دال) سکز (۸)، مجموعی بیك یوز اوتوز طوقوز (۱۱۳۹). «تَوَسَّلْ» دن أول ویاخود صوگره (یا سعید) کلمه سی یوز ألی بش (۱۵۵) ایدیور. یکونی بیك ایکی یوز طقسان درت (۱۲۹۴) ایدر.

ایکنجی فقره: «أَغِيثُكَ فِي الْأَشْيَاءِ دَهْرًا بِهَمَّتِي» فقره سنده «أَغِيثُكَ»

کلمه سی حسابه داخل دگلدر. او کلمه ده کی کاف خطابدن مراد سعید اولدیغندن، ألبته (یا سعید) کلمه سی مقدّردر. اويله ایسه «أَغِيثُكَ يَا سَعِيدُ فِي

الأَشْيَاءِ دَهْرًا بِهَمَّتِي» عیناً أولکی فقره گبی بیك ایکی یوز طقسان بش (۱۲۹۵)

ایدر. اگر اوقونمیان همزه وصل صاییلمازسه بیك ایکی یوز طقسان درت (۱۲۹۴) ایدر. چونکه (شین) ایله (تاء) یدی یوز (۷۰۰)، (راء) ایکی یوز (۲۰۰). (فاء)، ایکی (یا) ایله برابر یوز (۱۰۰)، اولدی بیك (۱۰۰۰). مشدد (میم) سکسان (۸۰)، دال، باء، درت الف، بر (ی) ایله برابر یگرمی (۲۰)، او سکسان (۸۰) ایله یوز (۱۰۰) ایدوب أولکی یكون ایله بیك یوز (۱۱۰۰). (لام) اوتوز، ایکی

(ها) ایلہ برابر قرددر. (یا سعید) ده اولان یوز اُللی بش (۱۵۵) ایلہ برابر ییک ایکی یوز طقسان بش (۱۲۹۵). اُگر ساقط اولان همزه وصل صایلمازسه ییک ایکی یوز طقسان درت (۱۲۹۴) ایدر. عیناً اُولکی فقره ایلہ تام توافق ایدوب، هر بریسی فتنه آخر زمانک هم باشلانغیجی تاریخنه که؛ ییک ایکی یوز طقسان درت (۱۲۹۴) در. هم تنوینلر ایلہ برابر او فتنه نك اُك قراڭقلی زمانی اولان ییک اوچوز قرق درت (۱۳۴۴) تاریخنه و فتنه لرك ایچنده محفوظیتله برابر پك چوق چالقانان بیچاره سعیدك هم تاریخ ولادتنه هم إشکنجه لی تاریخ أسارتنه توافق ایدیور. هر حالده بو عجیب توافق، إتفاقی و تصادفی بر توافق دگلددر.

﴿لَا يَعْلَمُ الْغَيْبَ إِلَّا اللَّهُ﴾

سؤال: سن بو زمانك حادثاتنه، فتنه آخر زمان دیورسك. حالبوکه حدیثده وارد اولمش که: "آخر زمانده الله الله دینیلیمیه جك؛ صوگره قیامت قوپاجق".

الجواب: اولاً: فتنه آخر زمانك مدتی اوزوندر، بز بر فصلنده یز.

ثانیاً: یرده الله الله دینیلیمیه جكدن مراد؛ الله ایمان قالقه جق دیمك دگلددر (حاشیه). بلکه الله نامنی دگیشدیره جكلر دیمكدر. ناصلکه یرده الله الله دینیلیمزه قیامت کبرا قوپاجق، بر مملکتده ده الله الله دینیلیمزه بر نوع قیامت

(حاشیه): چونکه حدیثده وارددر که، ﴿لَا تَزَالُ طَائِفَةٌ مِنْ أُمَّتِي ظَاهِرِينَ عَلَى الْحَقِّ إِلَى

قِيَامِ السَّاعَةِ﴾. بو حدیث، دیگر حدیثی تقیید ایدیور.

قوپماسنه إشارتدر. (حاشیه)

﴿تَوَسَّلْ بِنَا فِي كُلِّ هَوٍ وَشِدَّةٍ * أَغِيثُكَ فِي الْأَشْيَاءِ دَهْرًا بِهَمَّتِي﴾ علم

جفرله معناسی: "یا سعید! آخر زمانك فتنه لرینه یتیشوب دوشدیگك زمان، بنم دعا و همتی کندیگه وسیله و شفاعتجی یاپ. إِنْ شَاءَ اللَّهُ سنك هر شیئگده و هر ایشگده اوزون بر زمانده، یعنی طفولیت زمانكدن تا إختیارلغك وقتنده إشکنجهلی أسارتگه قدر.. یعنی، ییك ایکی یوز طقسان درتدن (۱۲۹۴) تا ییك اوج یوز قرق بش (۱۳۴۵)، بلکه آلتمش درده (۱۳۶۴)، داها زیاده بر زمانه قدر اللَّهك إذنیله و قوتیله سنك إمدادیگه یتیشه جگم." ﴿رَبَّنَا لَا تُؤَاخِذْنَا إِنْ

نَسِينَا أَوْ أَخْطَأْنَا﴾

سعید النورسی



رأفت، مصطفى، مصطفى، رشدی، حافظ خالد، مسعود
و سلیمانك و خسروك بر نکته سیدر

﴿فَإِنَّكَ مَحْرُوسٌ بِعَيْنِ الْعِنَايَةِ﴾

شویله که: بو فقره ﴿إِنَّكَ﴾ خطاییله بریسیله قونوشویور. ﴿أَغِيثُكَ﴾ ده کی گبی ﴿یا سعید﴾ بوراده دخی مقدردر. ذاتاً ﴿إِنَّكَ﴾ آلتنده کی مبارک توافقك

(حاشیه): یدی سنه اول یازیلان بو إشارت غیبیه عیناً وقوعه گلدی. هرکس گوردی. أوت بو گچن زلزله، قیامتك زلزله کبراسندن خبر ویررگی صارصدی؛ فقط عقللری باشلرینه گلمدی.

نهایتی گورونن سعید، ﴿إِنَّكَ﴾ ده گورونمه یین ﴿یا سعید﴾ ی گوستریور.

شو حالده ﴿فَإِنَّكَ يَا سَعِيدُ مَحْرُوسٌ بِعَيْنِ الْعِنَايَةِ﴾ ییڭ اوچیوز اون درت (۱۳۱۴) ایدر (اگر شده لی نون بر تڭ صاییلسه). اگر ایکی نون صاییلسه، ییڭ اوچیوز آلتمش درت (۱۳۶۴) ایدر. دیمک سعید ألی سنه لك مدّته عنایتہ مظهر اولاجقدر. ییڭ اوچیوز اون درتده (۱۳۱۴) واندہ تدریسه باشلاماسی و آوروپادن گلن افکار باطله یه قارشى مجاهده سی او تاریخده باشلایور. شیمدی یه قدر او أساس اوزرینه عنایت فیضی آلتنده ییڭ اوچیوز ألی ایکی یه (۱۳۵۲) قدر دوام ایتمش. دیمک داها اون ایکی سنه إشارات غوثیه ایله عنایتہ مظهر اولماسنی رحمت إلهیه دن بکله یورز. کندیسى بو دنیادن گیتسه ده، اونڭ یرنده اونڭ طلبه لری و آثاری او عنایتہ الی ماشاء الله مظهر اولماسنه بر ایمادر.

إجمالاً بر تحلیل: ﴿فَإِنَّكَ﴾ ده کی شده لی ایکی نون صاییلسه ایکی یوز بر (۲۰۱). ﴿مَحْرُوسٌ﴾ اوچیوز اون درت (۳۱۴). ﴿بِعَيْنِ﴾ یوز اوتوز ایکی (۱۳۲). ﴿الْعِنَايَةِ﴾ بش یوز آلتمش ایکی (۵۶۲). ﴿إِنَّكَ﴾ دن صوڭره کی "یا سعید" لفظی یوز ألی بش (۱۵۵). یکونی ییڭ اوچیوز آلتمش درت (۱۳۶۴). اگر شده لی نون بر نون اولوب، ألی طرح ایدیلسه ییڭ اوچیوز اون درت (۱۳۱۴) قالیر.

جای دقتدر که؛ غوڭڭ بو بش سطرنده اوچ یرنده "یا سعید" لفظیله سَرّ غیبسی تظاهر ایدیور. "یا سعید" یرینی باشقه سی طوتمیور. دیمک بو بش سطرنده درت سعید إسمی تصریح ایدیلشم حکمنده در. مدار حیرتدر که؛

شیخک بو بش سطرندہ سکز اون دفعہ شو زمانگری و سعیدک باشنه گلن آک
مهم حادثاتک عین تاریخی گوستریور.

﴿وَكُنْ قَادِرِي الْوَقْتِ لِلَّهِ﴾ شو فقرده اولان ﴿وَكُنْ﴾ خطاب ایدیور. هر
حالده سائر فقره لرك إشارتيله ﴿وَكُنْ يَا مُرِيدِي﴾ ویاخود ﴿وَكُنْ يَا سَعِيدِ
كُرْدِي﴾ ویاخود ﴿كُنْ يَا نُورِي﴾ معناسنده و تقدیرنده اولاجق. چونكه بو
اوج اسم اوج فقرده ایکیسی صراحة، بریسی ضمناً مراد اولدیغندن؛
بوراده کی آمده ده اونلردن بریسی هر حالده مقدردر. بلکه اوجی ده برابر
مراد اولایلیر. ایشته شو فتنه آخر زمانک اوج اهمیتلی تاریخلرینه و شو بیچاره
سعیدک آک مهم اوج حادثه حیاتیه سنک تاریخلرینه بو اوج اسمله برابر شو فقره
تام توافق ایدیور. شویله كه: ﴿وَكُنْ يَا مُرِيدِي قَادِرِي الْوَقْتِ لِلَّهِ﴾ مشدد لام
ایکی لام صایلمق جهتيله تام بیك اوجیوز طوقوز (۱۳۰۹) تاریخنه توافق ایدیور
كه؛ او تاریخ، بو عصر عجیبك مبدأ باشلانغیجی، هم خدمت قرآنیه ایچون
یاشایان سعیدک دخی اون سنه مدرسه اصولنجه اوقونان علومى اوج درت آیده
پك خارقه بر صورتده تحصیل ایتدیگی بر تاریخدر.

الحاصل ﴿كُنْ﴾ آمرندن صوگره ندا ایله بر اسم معنا وار. هم بو اوج اسمک
بو اوج تاریخه توافقی قطعياً تصادف اولاماز. هم اونلرك یزنده باشقه بر اسم
بولونق هیچ مناسبت، هیچ بر أماره، هیچ بر نتیجه گورونمیور ویاخود
گورمیورز. دیمك قصدی بر توفیقدر. هم سائر فقره لرده بولونان اونبش إشارتله
تأید ایدن بر إشارت غیبیه در. هم ده سعیدک آک صیقتیلی و إشکنجه لی اولان
شیمدیکی بو مصیبت زماننده غوثک بو إشارت غیبیه سنک ظهوری و

آکلاشیلماسی، قدسی و اُکْ مهَم بر تسلیدر. ﴿وَكُنْ يَا سَعِيدُ كُرْدِي قَادِرِي﴾
 ﴿الْوَقْتُ﴾ جفر و أبجد حسابیله تام بیك اوچوز یگرمی یدی (۱۳۲۷) تاریخ
 مشهوره سنه و او انقلابِ عظیمك و سعیدك مبدأ مجاهده سنه توافق
 ایتدیگی گبی؛ ﴿وَكُنْ يَا نُورِي قَادِرِي الْوَقْتُ لِلَّهِ﴾ مشدد لام بر صایلمق شرطیله
 شو بیك اوچوز اُللی بر (۱۳۵۱) تاریخ عجیبه سنه و سعیدك بر جهته منتهای
 مجاهده سنه توافق ایدیور. بو صورتده ﴿لِلَّهِ﴾ کلمه سی وار، اونکله اِشارت ایدر
 که؛ اِنْ شاء الله بدایتده اولدیغی گبی وقت و زمانه اویمق دگل، بلکه الله ایچون
 مجاهده ایده جك و ایدیور. هم کرامتِ غوثیه اِشارتلی و بو اِشارتِ غیبیه سی
 عین بو مصیبتلی تاریخده و اُکْ صیقتیلی بر زمانده آکلاشیلماسی و اِنتشار
 ایتمه سی، بیوک بر لطفِ اِلهیدر و قرآن خدمتکارلرینه قوتلی و قطعی بر تسلیدر.
 یوقسه بو چوق صیقتیلی مصیبت ایسه، چکیلیر بلالردن دگلدر. تام غوث
 کندی مریدینك و او مریدك ارقداشلرینك امدادینه بو صورتله یتیشوب تسلی
 ایتدی. ﴿الْحَمْدُ لِلَّهِ هَذَا مِنْ فَضْلِ رَبِّي﴾

عبد الله (رح)، مصطفی (رح)، مصطفی (رح)، رشدی (رح)، خسرو
 (رح)، رأفت (رح)، مصطفی چاوش (رح)، عبد الله چاوش (رح)،
 دائمی خدمتکاری سلیمان (رح)



رساله نوردن پارلاق فقره لر و بر قسم گوزل مکتوبلر

عزیز، صدیق قارداشلرم!

لطیف، معنیدار و بشارتلی ایکی حادثه‌ی بیان ایدیورم:

برنجیسی: مایوسانه بر خاطره دن مژده لی بر إخطار:

بوگونلرده خاطریمه گلدی که: حیات اجتماعی‌یه گیرن هانگی شیئه تماس ایتسه، اکثریتله گناهلره معروض قالیور. هر جهتله گناهلر سربستجه إنسانی صاریورلر. بو قدر گناهلره قارشى انسانلرک خصوصى عباداتی و تقوایی ناصل مقابله ایده بیلیر؟ دییه مایوسانه دوشوندم.

حیات اجتماعی‌ده کی رساله النور طلبه لرینک وضعیتلرینی تحظر ایتدم. رساله نور شاکردلری حقّنده نجاتلرینه و اهل سعادت اولدقلرینه دائر قوّتلی إشارات قرآنییه و بشارت علویه و غوثیه‌ی دوشوندم. قلباً دیدم که: "هر بری ییک یردن گلن گناهلره قارشى بر دیل ایله ناصل مقابله ایدر، غلبه ایدر، نجات بولور؟" دییه متحیر قالدیم. بو تحیرمه مقابل إخطار ایدیلدی که:

رساله النورک حقیقی و صادق شاکردلری ماییننده کی دستور اساسی اولان إشتراك أعمال أخرویه قانونیله و صمیمی و صادق تساند سرّیله هر بر خالص و حقیقی شاکرد بر دیل ایله دگل، بلکه قارداشلری عددنجه دیللریله عبادت ایدوب إستغفار ایدر. ییک طرفدن هجوم ایدن گناهلره قارشى، ییک دیل ایله مقابله ایدر. إخلاص و صداقت و سنت سنیه‌یه متابعت و خدمت درجه‌سنه گوره او کّلی عبودیتیه صاحب اولور.

بو بیوک قزانجی آلدن قاچیرمامق گرکدر. بعض ملائکه‌نک قرق ییڭ دیل
ایله ذکر ایتدکلری گبی؛ خالص و حقیقی، متقی بر شاکرد دخی، قرق ییڭ
قارداشنک دیلریله عبادت ایدر، نجاته مستحق اولور، إن شاء الله.

ایکنجیسی: أسکی زمانده، اون درت یاشنده ایکن إجازت آلمانک علامتی
اولان استاد طرفندن بر جبّه بڭا گیدیرمک وضعیتنه مانعلر بولوندی. یاشمک
کوچکلگیله، مملکتمزده بیوک خواجه‌لره مخصوص کسوه گیمک یاقیشم‌دیغنی؛

ثانیاً: او زمان بیوک عالم‌لر، بڭا قارشى استادلق وضعیتینی دگل، یا رقیب
ویا خود تسلیمیت درجه‌سنه گیردکلری ایچون، بڭا بر جبّه گیدیرمک و استادلق
وضعیتینی آلاحق کندیلرینه گووه‌نلر بولونمادی. و اولیاء عظیمه‌دن درت بش
ذاتک ده وفات ایتمه‌لری جهتیله، ألی آلتی سنه‌در إجازتک ظاهر علامتی اولان
جبّه‌یی گیمک، بر استادک ألی اوپمک، استادلغنی قبول ایتمک حقمی بوگونلرده،
یوز سنه‌لک بر مسافه‌ده حضرت مولانا ذو الجناحین خالد ضیاء الدین کندی
جبّه‌سنی، پک غریب بر طرزده بڭا گیدیرمک ایچون گوندردیگنی بعض أماره‌لرله
بڭا قناعت گلدی. بن ده او مبارک یوز یاشنده (حاشیه) جبّه‌یی گییورم. جناب
حقّه شکر ایدیورم.

سعید النورسی



(حاشیه): رسالۀ نور شاکردلرندن و آخرت همشیره‌مزدن (آسیه) نامنده بر خانم أیله او
مبارک أمانتی ألدیم.

أَمین و فیضی نكٔ اسپارطه ده کی قارداش لرینه استاد لرینكٔ خسته لغی حقّنده بر مکتوب لریدر.

رمضان شریفده بش گون صوم وصال ایچنده غذا اولارق، اُکمکسر محَلّی اوچ و بش آلتی قاشق صوغوق یوغرت. اوچنجی گیجه، یاریم قاشق محَلّی و دردنجی گیجه إفطارده صولی شهریه دن بش قاشق و بش قاشق ده ینه او شهریه دن سحورده و یوغرت کذا اوچ درت قاشق، بشنجی گیجه، دانه سز گی غایت خفیف شهریه بش آلتی قاشق، سحورده ایسه ینه بش آلتی قاشق. ایشته بش گونده پرنج چورباسی صو صایلماق شرطیله شهریه دن بش درهم، یوغرت سوزولسه اون درهم، محَلّی صوسز آلتی یدی درهم، مجموعی اوتوز درهم غذا ایله بش گون صوم وصال، یالکز تراویح نقصان اولارق سائر وظیفه لرکٔ یاپیلماسی، رسالة النور شاکردلرینه إحاطه ایدیلن عنایاتکٔ خارقه لرندن بر کرامتنی گوردک.

هم استادیمزدن هیچ گورمدیگمز ایکیمز یعنی فیضی، أَمین؛ بارلا، اسپارطه سلیمانلری گی اینجه دن اینجه یه خسته لق حدّتلرینی تحریک ایتمه مکٔ ایچون إحتیاط ایده مدیگمزدن، شدّتی حدّتی گوردک. بو خسته لغنده ینه اثرِ رحمتدر که؛ هیچ خیال و خاطره گلمه ین عشرِ آخرکٔ غایت مهمّ گیجه لرنده، استادیمزکٔ تام ایفا ایده مدیگی وظیفه یرنده بو حوالیده هر بر شاکرد، کندی خصوصی چالیشماسدن باشقه، بر ساعتی استاد حسابنه رسالة النورکٔ شاکردلرینكٔ مجاهدۀ معنویه لرینه اشتراك و اونلری هدف ایدوب اونلرکٔ دفترِ أعمالنه گچمگه، عین استاد گی چالیشمغه باشلادیلر. حتّی استادیمز دییوردی: اُهمّیتسزلگمله برابر اسپارطه و حوالیسندن قارداش لریمزکٔ أعمالِ أُخرویه سنه بر مدار مهیج حکمنده بنم قصورلی چالیشمام کافی گلمییوردی؛ دیمکٔ استاد یرنده

اونڭ بر قاچ ساعت چالیشماسنه بدل، پك چوق ساعتلر عین وظیفه‌ی گورمگه باشلادیلر. جناب حق رحمتیله، بو خسته‌لق وسیله‌سیله بر شخص معنوی و قوتلی بر مدار اولاجق بو تدبیری احسان ایلدی، جزئیتدن کلیته چیقاردی.

هم بو خسته‌لق لطائفندندر که؛ استادیمرڭ هیچ سسی چیقیمیوردی، قونوشامییوردی. هیچ بکله‌نیلمه‌دن، بردن إفطار وقتنده بر دوقتور گلدی، ألی طوتدی. استادیمرڭ دیدی که: "بن خسته‌لغمی معاینه ایتدیرمه‌م، بن حکیملره محتاج دگلم. حکیم، جناب حقدر." بردن جانلانندی، سسی چیقمغه باشلادی. گویا کندیسسی بر دوقتور شکلی آلدی. دوقتور ایسه، بر خسته حکمنه گچدی. دوقتوره اهمیتی بر مکتوبی اوقودی، دوقتورڭ دردینه دوا اولاجق بر علاج اولدی. صوڭره طوپ آتیلدی. دوقتوره دیدی: "بوراده إفطار ایت." دوقتور دیدی: "بوگون قصور ایتشم، اوروج طوتامدم" دیمه‌سیله چوق حیرت ایتدیگمز استادیمرڭ وضعیت، اوروجی بوزمش بر دوقتورڭ طب نقطه‌سنده حاکمانه وضعیتنی قبول ایتمدی که، او وضعیت اوڭا ویریلدی.

أوت رسالۀ نورڭ شخص معنویسندن گلن شفا دعاسی، اويله یوز ییڭ دوقتوره مقابل گلیر دییه بز ده تصدیق ایتدک. هم بو خسته‌لغڭ لیله قدرده رسالۀ النور طلبه‌لری، خصوصًا معصوملر ایتدکلری شفا دعالری اويله بر درجه‌ده خارقه بر صورتده تأثیرینی گوستردی که، استادیمرڭ صحت حالندن داها ایلری بر صورتده بر وضعیت ویریلدی. لیله قدره لایق بر طرزده چالیشمغه باشلادی. رسالۀ نور شاکردلرندن گلن بو دعاء شفا، خارقه بر معجزه گبی بر کرامت اولدیغنی بز گوزیمزله گوردک.

رسالۀ نور شاکردلرندن

أمین، فیضی

بزدن بر آی اوزاقده بولونان رساله النور شاکردلری،
استادیمزک خسته لغنک عین زمانده خسته لغنک وضعیتنی رؤیاده
عیناً گوردکلری گبی؛ صبری و حافظ علی نك طائفه لری ده عین
وقته بوراده یعنی قسطمونیده اولدیغی گبی، خسته اولان
استادیمزک حسابنه داها مهم بر طرزده چالیشمشلر. شویله که:

صبرینک مکتوبنک بر پارچه سیدر

استادم أفندیم!

راحتسزلغنکز آنده اوراده کی منبع نورک مجاهدلری بر ساعت مساعی
معنویه لرینی خادم قرآن حسابنه یاپدقلری گبی، بو حوالیده ده بو سنه یه مخصوص
ایفا ایدیلن مساعی دینیّه تحدیث نعمت ضمننده ذکره وسیله اولدیغی فقیره بو
سنه لیله قدردن بر گون اول إخطار ایدیلدی که: "بو سنه لیله قدری ایکی
گیجه یاپ." بنده لری ده جماعته شویله سویله دم که: "استادم (سَلَّمُ الله و عافاه)
بعض بو گبی مبارک گیجه لری بعض مقصدلره بناء او لیله مبارکه یی إحیا ایچون
بر گیجه اول، حتی معهود گیجه دن بر گیجه صوگره داها إحیا یه سعی
ایدرلردی. بز ده او إثره إتباعاً اونک حسابنه لیله قدری ایکی گیجه یاپاجغز دییه
نیّت و قرار ایتدک. برنجی گیجه ده أوراد بهائیّه و تسبیحات و سکینه و دلائل
الخیرات و جوشن الکبیر گبی درس و وردلیمزه چالیشدق. ایکنجی گیجه کذا؛
هم نصیحت... دیمک إتباع جهتیله استادیمزک حسابنه یوز جماعته "تَقَبَّلَ الله"
چالیشدیریلمشز. صوگره إسپارطه، عطابک، اسلام کوی، قله اوئی و سائر گبی
محللرده ده سائر وظائفدن ماعدا هر گون قرآنک جزء لرینی تقسیم صورتیله ختم
قرآن، استاد حسابنه بتون رمضانده و آیت الکرسی ختملری کذا... شو

حالده، بو سنه‌یه مخصوص یاپیلان عبادات معروضه‌لرک بر حکمتی وارمش که، بیلمدیگمز حالده قسطمونیلی قارداش‌لریمز گبی استاد حسابنه چالیشدیریلمشز. فی ما بعد ربم اوزون عمرلر احسان ایتسین، معمر، ابدی شفا و دوا و عنایتلر احسان بیورسون، آمین!

طلبه‌کُز صبری



نماز تسبیحاتک فضیلتنه عائد اسپارطه‌یه گوندریلن بر مکتوبدر

بوگونلرده اینجه بر مسئله قلبمه گلدی. وقتنده قلمه آلامدم. وقت گچدکدن صوگره او اهمیتی حقیقته بر ایشارت ایدرز:

قارداش‌لریمزدن بریسنک نماز تسبیحاتنده تکاسلنه بناء دیدم: نمازدن صوگره کی تسبیحاتلر، طریقت محمدیه‌در (عصم) و ولایت احمدیه‌نک (عصم) بر اوردیدر. او نقطه نظرده اهمیتی بیوکردر. صوگره، بو کلمه‌نک حقیقی بویله انکشاف ایتدی: ناصلکه رسالته انقلاب ایدن ولایت احمدیه (عصم) بتون ولایتلرک فوقنده‌در؛ او یله ده، او ولایتک طریقتی و او ولایت کبرانک اورد مخصوصه‌سی اولان فرض نمازلرک عقبنده کی تسبیحات، او درجه سائر طریقتلرک و اوردلرک فوقنده‌در. و بو سر دخی شویله انکشاف ایتدی:

ناصل ذکر دائره‌سنده بر مجلسده و یاخود ختمه نقشیه‌ده بر مسجدده بربر یله علاقه‌دار هیئت مجموعه‌ده نورانی بر وضعیت حسن ایدیلیور. او یله ده قلبی هشیار بر ذات، نمازدن صوگره ﴿سُبْحَانَ اللَّهِ سُبْحَانَ اللَّهِ﴾ دیوب تسبیحی

چکرکن، او دائرہ ذکرک رئیس اولان ذاتِ اُحمدیہ نځ (عصم) مواجهہ سنده، تسبیح اُندہ یوز میلیون آدم تسبیح چکدکلرینی معنًا حسّ ایدر؛ او عظمت و علویتله **﴿سُبْحَانَ اللَّهِ سُبْحَانَ اللَّهِ﴾** دیر. سوځره او سرذاکرک امرِ معنویسیله او کما إتباعًا **﴿الْحَمْدُ لِلَّهِ الْحَمْدُ لِلَّهِ﴾** دیدیگی وقت، او حلقه ذکرک و او گنیش دائرہ سی بولونان ختمه اُحمدیہ نځ (عصم) دائرہ سنده یوز میلیون مریدلرک **﴿الْحَمْدُ لِلَّهِ الْحَمْدُ لِلَّهِ﴾** لردن تظاهر ایدن عظمتلی بر حمدی دوشونوب ایچنده **﴿الْحَمْدُ لِلَّهِ الْحَمْدُ لِلَّهِ﴾** ایله اشتراک ایدر و هکذا... **﴿اللَّهُ أَكْبَرُ اللَّهُ أَكْبَرُ﴾** و دعادن سوځره **﴿لَا إِلَهَ إِلَّا اللَّهُ لَا إِلَهَ إِلَّا اللَّهُ﴾** اوتوز اوچ دفعه او طریقت اُحمدیہ نځ (عصم) حلقه ذکرنده و ختمه کبراسنده او سابق معنا ایله او إخوان طریقتی نظره آلوب، او حلقه نځ سرذاکری اولان ذاتِ اُحمدیہ (عصم) متوجّه اولوب **﴿أَلْفُ أَلْفِ صَلَاةٍ وَأَلْفُ أَلْفِ سَلَامٍ عَلَيْكَ يَا رَسُولَ اللَّهِ﴾** دیر، دیه آڭلادم و حسّ ایتدم و خیالاً گوردم. دیمک تسبیحاتِ صلاتیه نځ چوق اُهمیتی وار.

سعید النورسی



حافظ علی نځ بو دفعه کی مکتوبنده چوق مبارک و یوکسک دعاسی بزى اُڭ درین روحزدن مسرور ایدوب شکره سَوَق ایتدی. و هر مصیبتزدهیه و حزن و کدرلره دوشنلره معنایِ اِشاریسیله مددرس و خلاصکار و شفادار و مدارِ سُرور اولان **﴿الْمُ نَشْرَحْ لَكَ صَدْرَكَ﴾** و **﴿إِنَّ مَعَ الْعُسْرِ يُسْرًا﴾** هر

مصیبت‌زده‌یه باقدیغی گبی، بو گچن خسته‌لق جهتیله بزه ده باقدیغی یازیور. اوت حافظ علی (رح) او نقطه‌یی تام گورمش. بن ده تصدیقاً دیرم که: اگر او خسته‌لق یگرمی درجه تضاعف ایتسه ایدی، بزلره قراندیردیغی نتیجه‌یه نسبتاًینه اوجوز دوشردی و رحمت اولوردی. فقط حافظ علی‌نک (رح) استادی حقّنده، بنم حدمدن چوق فضله اسناد ایتدیگی مزیت و معصومیتی؛ اونک معصوم لسانيله حقمده مدح اولارق دگل، بلکه بر نوع دعا اولارق تصوّر ایدیورز.

هم حافظ علی‌نک، صاوه گبی یرلر، قریه‌لر و إسپارطه، بر مدرسه نوریه حکمنه گچمه‌سی و رساله نورک صادق شاکردلری خارق العاده اولارق گوندن گونه یوکسلمه‌لری، تنور ایتمه‌لری، بزلری بلکه آناتولی‌یی بلکه عالم اسلامی مسرور و مفرّح ایدن بر حقیقتلی خبر تلقی ایدیورز.

آخر فقره‌سنده، مخبر صادق خبر ویردیگی "معنوی فتوحات یایمق و ظلماتی طاغیتمق، زمان و زمینی همان همان گلمش" دییه فقره‌سنه، بتون روح و جانمزه رحمت‌إلهیه‌دن نیاز و تمّی ایدیورز. فقط بز رساله النور شاکردلری ایسه: وظیفه‌مز خدمتدر، وظیفه‌إلهیه‌یه قاریشمه‌مق و خدمتمزی اونک وظیفه‌سنه بنا ایتمکله بر نوع تجربه یایمامق اولمقله برابر؛ کمیته دگل، کیفیته باقمق؛ هم چوقدن بری سقوط اخلاقه و حیات دنیویه‌یی هر جهتله حیات اُخرویه‌یه ترجیح ایتدیرمگه سوق ایدن دهشتلی أسباب آلتنده رساله النورک شیمدی‌یه قدر فتوحاتی و زندقه‌لرک و ضال‌لرک صولت‌لرینک قیریلما‌سی و یوز بیگلر بیچاره‌لرک ایمان‌لرینی قورتارما‌سی و هر بری یوزه مقابل بیگلر حقیقی مؤمن طلبه‌لری یتیشدیرمسی، مخبر صادق اخبارینی عیناً تصدیق ایتمش و وقوعات اثبات ایتمش و ایدیور و إن شاء الله داها ایده‌جک. هم اوילה

کوکلشمش که؛ اِنْ شاءَ الله هیچ بر قوّتِ آناتولینک سینه‌سندن اونی چیقاراماز. تا آخر زمانده، حیاتک گنیش دائره‌سنده أصل صاحب‌لری (یعنی مهدی و شاکردلری)، جنابِ حَقِّکْ اِذنیله گلیر، او دائره‌ی گنیش‌لندیرر و او تخم‌لر سنبله‌نیر. بزلر ده قیریمزده سیر ایدوب، الله شکر ایدرز.

سعید النورسی



عزیز، صدیق قارداش‌لرم!

بوگونلرده رموزات ثمانیه‌یه عائد ایکی رساله‌ی اُهمیتی طلبه‌لره، بر یره گوندردم. یول قپاندی، گیتمه‌دی. او ایکی رساله‌ی تکرار دَقْتله مطالعه ایتدم. فکراً دیدم که: "بو ذوقلی و گوزل و مراقلی، شیرین بر مقصده گیدن بو توافقلی یولده نه ایچون سوق ایدیلمه‌دن پرده ایندی، باشقه یولده سوق ایدیلدک، چالیشدیریلدق."

بردن اِخطار ایدیلدی که: او غیبی اُسراری آچاجق اولان مسلکدن یوز درجه داها اُهمیتی و قیمتلی و عمومی اِحتیاجه مدار و هرکس بو زمانده اوکا شدتله محتاج و اسلامیتک تمّل طاشلری اولان حقائقِ ایمانیه خزینه‌سنه خدمت ایتمگه و اِستفاده‌یه ضرر گله‌جکدی. چونکه او اُسرارِ غیبیه، ذوقلی و مراقلی اولدیغی ایچون نظری کندینه چکه‌جکدی. اُکْ بیوک و اُکْ یوکسک مقصد اولان حقائقِ ایمانیه‌ی، ایکنجی درجه‌ده بیراقه‌جقدی. اونکْ ایچون ایدی که، سورهُ **﴿اِذَا جَاءَ نَصْرُ اللَّهِ﴾** رمزنده، اُسرارِ غیبی گوستریلدی؛ بردن قپاندی، پرده ایندی. هم بو سرّ ایچون ایدی که، او یولده اِستخدام ایدیلمدک، یالکُز او

مسلكِ توافقيه‌نڭ ترشحاتندن رساله نورڭ حَقَانِيْتَنَه بر إمضا و جزالتنه بر زينت و حروفِ قرآنيه‌نڭ إنتظامندن و وضعيتندن تظاهر ايدن بر نوع إعجاز چيقدی. داها او يولده چالیشدیريلمقد.

سعيد النورسی



رؤيا حَقْنده إسپارطه‌یه گوندریلن بر فقره‌در.

عزیز، صدیق قارداشلم!

هدیه‌نڭ قسطمونی‌یه گله‌جگی آنده رؤیاده گوردم که؛ بزره بر فرمان شاهانه معنوی بر جانبدن گلیور، کمالِ حرمتله آلرنده طوتوب بزه گتیریورلر. بز باقدق که؛ او فرمانِ عالی، قرآنِ عظیم الشان اولارق چيقدی. او حالدّه بو معنا قلبه گلدی: قرآن یوزندن رساله النورڭ شخصِ معنویسی و بز شاکردلری، بر ترفیع و ترقّی فرمانی عالم غییدن آلاجغز.

شیمدی تعبیری ایسه؛ او فرمانی تمثیل ایدن معصوملرڭ قلمیله معنوی تفسیرِ قرآنی‌بی آلدیغمزدر. بو رؤیانڭ شیمدیکی تعبیری چیقمه‌دن بر ایکی ساعت اؤل، فیضی ایله آمینڭ گوستردکلری تعبیر دخی حقدَر، اَهْمِیتلیدر.

هم بو مدارِ سُرور و فرح اولان هدیه نوری‌یی، بر حسّ قبل الوقوع ایله بنم روحم تام حسّ ایتمش، عقله خبر ویرمه‌مش ایدی که او گلمه‌دن ایکی گون اؤل، فیضی و آمینڭ فقره‌سنده بیان ایدیلن رؤیایی گوردیگم گیجه‌نڭ گوننده، صباحدن آقشامه قدر و ایکنجی گوننده قسماً، هیچ گورمه‌دیگم بر طرزده بر

سَوینج، بر سُرور حسّ ایدوب متمادیا بر بھانه ایلہ فرحمی اِظھار ایدوب، اوتوز قرق دفعہ تبسم ایلہ گولدم. هم بن هم فیضی تعجّب و حیرت ایتدک. اوتوز گونده بر دفعہ گولہ‌ین، بر گونده اوتوز دفعہ گولک بزلی حیرتده بیراقدی.

شیمدی آکلاشیلدی که؛ او سُرور، او سَوینج، مذکور معنوی فرمانی تمثیل ایدن معصوملرک و اُمیلرک قلملرینک یازیلری نسل آتینک صحائف حیاتلرینه، عالم اسلامک صحیفه مقدّراتنه و اهل ایمانک استقبالنک دفترلرینه نشر انوار ایده‌جکلرینک و او معصوملرک خالص و صافی عمللری و خدمت‌لریله صحیفه اُعمالمزده حسنا‌ت‌لرینی یازوب قید ایتمه‌سنک و رساله نور شاکردلرینک استقبالنک مقدّراتنی مسعودانه اِدامه‌سنک خبرینی ویرن او هدیه‌دن، و دها کلمه‌دن گلییوردی. بن او عظیم یکوندن حصّه‌مه دوشن بیگدن بر جزئی روحًا حسّ ایتمش ایدم که، بنی مسرورانہ هیجانه گتیرمشدی.

اوت بویله یوزر معصوملرک مقبول عمللری و ردّ ایدیلمز دعالری سائر قارداش‌لریمک دفترلرینه گچمه‌سی مثللو، بنم‌گی گناهکارک صحیفه اُعمالنه دخی گیرمه‌سی، بیگلر سُرور و سَوینج ویره‌ییلیر. بویله قراکلق بر زمانده، بو آغیر شرائط آلتنده بویله معصومانه و قهرمانانه چالیشمق ایچون بز، هم او معصوملری هم او اُمیلری هم اونلرک معلّم‌لرینی، هم پدر و والده‌لرینی، هم کویلیلرینی، هم آناتولی‌یی، هم مملکت‌لرینی تبریک ایدرز.

او مبارک معصوملرک و اُمیلرک هر بریسنه برر خصوصی تشکر و تبریک‌نامه یازمق اَلیمدن گلسه ایدی یازاجقدم.

أمين و فيضى نك إسپارطه لى قارداشلىرىنه گوندريلمش بر فقره سيدر.

إسپارطه ده بولونان قارداشلىرىمزه!

لطيف بر رؤيانك، قدره عائد بر مسئله يي شهود درجه سنده بزه قناعت و يردىگى گي، او لطيف رؤيانك ايكنجى پارچه سى، بزلره معنوى بر مژده و بشارت و يردىگى جهتله، سز قارداشلىرىمزه بيان ايدىيورز. شويله كه:

استادىمز رؤياده گوروپور كه: بن يعنى فيضى ايله برابر گزمگه چيقييورز. گيدر كن، بردن استادىمزه سويله يورم كه: بوراده بن آينك تسبيحنى طويلايه جغم. استادىمز ده باقىيور كه، بياض ايلرگى طولاشمش بر شى گوروپور. بو عجب گولديره جك سوزمدن و آييه تسبيح اسناد ايتمك وضعيتمدن چوق شدتلى گولهرك اويانمش. اوياندىقن صوگره ده گولمش. آقشامه قدر هيچ گورولمه مش بر طرزده، يگرىمى اوتوز دفعه او حادثه نومييه يي گولهرك بنمله ملاطفه ايتدى. مناسبتى اولميان بعض شيلرله تعبيره چاليشدقسه ده، مناسبت طوتمه دى. صوگره عين ايكنجى گونك عين ساعتده بكا بگزهي بن دوست (كه، رؤياده استادىمه بنم صورتده گورونمش) استادىمزك ياننه گلدى ديدى كه: "آينك ياغنى طويلايانلردن آلوب مؤذن و تسبيح ياپان بر آدم توصيه سييله مهم بر آدمه، هر صباح خسته لق ايچون يوتمه سنى ناصل گورييورسكز؟" استادىمز ده، رؤياده گولديگى گي عين اويله گولمش. بردن رؤيا خاطرينه گلوب بو عجب و عين عينه تعبيري كمال تعجب و حيرتله قارشىلايوب، اوگا ديمش: "صاقين استعمال ايتمه سين."

يگرىمى سكزنجى مكتوبك برنجى رساله سنك آلتنجى نكته سنده؛ رؤيائى صادق، قدر الهى هر شئى احاطه ايتديگنه بر حجت قاطعه حكمنده. استادىمزك

بیگلر تجربہ ایلہ گوردیگی گبی، عیناً بو واقعہ دخی بزلرہ شہود درجہ سندہ قطعی اثبات ایتدی کہ؛ حادثات، وجودہ گلمزدن اُول مقدردر، معلومدر، معیندر۔ قدرِ إلهینک میزانلریلہ گلیور دییہ، بو رکنِ ایمانیہ بزہ غایت قطعی بر نمونہ اولدی۔

هم رؤیانک ایکنجی طبقه سندہ استادیمز دیور کہ؛ اوکا و رسالہ نورک هیئتہ بر فرمان گلیور۔ بردن گلدی، او قدسی فرمان قرآن چیقدی۔ بونک تعبیری، عین گونک عین تجربہ ساعتندہ، حزب الکبر قرآنی اُمید ایدیلمدیگی او وقتندہ، آسیہ خانمک خانہ سندہ تزیین ایچون گوندریلن حزب الکبر یوز سنه لك گوزل بر قاب ایچریسندہ، او قابک اوزرنده صیرما ایلہ پادشاهک مهم فرمانلرده کی طرہ شاهانہ ایشلنمش گوردک۔ استادیمز دیدی کہ: فرمان گلدی دییہ قرآن چیقدی۔ شیمدی ده، قرآنک حزب الکبری گلدی۔ اوستندہ فرمان طرہ سی بولوندیغندن، رسالہ النورک هیئتہ بشارتلی و مدار فیض و ترقی و بر فرمان ربّانی حکمنہ گچہ جگنی رحمتِ إلهیہ دن بکلرز۔ هم بو تعبیردن آز صوگرہ سزلرک قیمتدار ہدیہ لریکزی آلدق کہ، رؤیانک تام تعبیری چیقدی۔ اورادہ بولونان عموم قارداشلریمزہ سلام، عرضِ حرمت ایدر، دعالریکزی ایسترز۔

رسالہ النور شاکر دلرندن

أمین، فیضی



إسپارطیه گوندریلن بر مکتوب

عزیز، صدیق قارداشلرم!

نماز تسبیحاتنک سَرینه گوره: ناصلکه نمازدن صوگره تسبیح و ذکر و تهلیل ایله ختمه معظمه محمدیه (عصم) و ذکر و تسبیح ایدن و روی زمین قدر کنیش بر حلقه تحمیدات احمدیه (عصم) دائره سنه تصوّرًا و نیّه گیرمک مدار فیوضات اولدیغی گبی؛ بز دخی، رساله النورک کنیش دائره سنه و حلقه انوارنده درس آلان و چالیشان بیگلر معصوم لسانلرک و مبارک إختیارلرک دعالرینه و أعمال صالحه لرینه حصّه دار اولمق و آمین دیمک حکمنده اولان، طی مکان ایدهرک، غیابًا اوموز اوموزه، دیز دیزه بولونمق خیالیه و نیتیه و تصویریله کندیمری فوق الحدّ بختیار بیلیورز. خصوصًا آخر عمرمه بویله قیمتدار، معصوم، معنوی اولادلری و یوزر عبد الرحمانلری بولمق، بنم ایچون دنیاده بر جنت حیاتی حکمنه گچیور.

گچن رمضان شریفده، خسته لق مناسبتیه، هر بر قارداشم بنم حسابمه بر ساعت چالیشماسنک بیوک بر نتیجه سنی عین الحقّ و حقّ الیقین گوردیگمدن؛ بویله دعالری ردّ ایدیلمز معصوملرک و مبارک إختیارلرک و استادلرینک، بنم حسابمه اولان دعالری و چالیشمالری، بنم رساله نوره خدمتک اُخروی بر نتیجه باقیه سنی دنیاده گوستردی.

﴿الْبَاقِي هُوَ الْبَاقِي﴾

قارداشکز

سعید النورسی

رسالہ نورک کوچک و معصوم شاکردلری

رسالہ نورک کوچک و معصوم شاکردلرندن اُللی آلتمش طلبہ نځ یازدقلری نسخہ لری بزه گوندریلمش، بز ده او پارچه لری اوچ جلد ایچنده جمع ایتدک. هم او معصوم شاکردلرک بعضلرینی اسملریله قید ایتدک. مثلاً:

عمر اون بش یاشنده، بکر طوقوز یاشنده، حسین اون بر یاشنده، حافظ نبی اون ایکی یاشنده، مصطفی اون درت یاشنده، مصطفی اون اوچ یاشنده، أحمد ذکی اون اوچ یاشنده، علی اون ایکی یاشنده، حافظ أحمد اون ایکی یاشنده.. بو یاشده داها چوق چوجقلر وار، اوزون اولماسین دییه یازیلما دی.

ایشته بو معصوم چوجقلرک رساله النور دن آلدقلری درس لرینک و یازدقلرینک بر قسمنی بزه گوندرمش لر. بز ده اونلرک اسملرینی بر جدولده درج ایتدک. بونلرک بو زمانده بو جدی چالیشمالری گوستریور که: رساله النورده او یله معنوی بر ذوق و جاذبه دار بر نور وار که؛ مکتبلرده کی چوجقلری اوقومغه شوقله سوق ایتمک ایچون ایجاد ایتدکلری هر نوع اگلنجه و تشویقلره غلبه ایده جک بر لذت، بر سرور، بر شوق رساله النور ویریور که چوجقلر بویله حرکت ایدیور لر. هم بو حال گوستریور که؛ رساله النور کوکله شیور. ان شاء الله، داها هیچ بر شی اونی قوپارامیه جق، أنسال آتی هده دوام ایده جک.

عیناً بو معصوم کوچک شاکردلر گبی، رساله النورک جاذبه دار دائره سنه گیرن اُمی اختیارلرک دخی قرق اُللی یاشندن صوگره رساله النورک خاطر ی ایچون یازی یه باشلایوب یازدقلری قرق اُللی پارچه یی، ایکی اوچ مجموعه ایچنده درج ایتدک. بو اُمی اختیارلرک و قسمًا چوبان و افه لرک بو زمانده، بو عجیب شرائط ایچنده هر شیئه ترجیحًا رساله نوره بو صورتله چالیشمالری

گوستریور که: بو زمانده رساله النوره اُکمکدن زیاده احتیاج وار که؛
خرمانجیلر، چیفتجیلر، چوبانلر، یوروک آفه‌لری حاجاتِ ضروریه‌دن زیاده رساله
النوره چالیشمالری، رساله النورک حَقانیتی گوستریورلر.

بو جلدده آز سائر آلتی جلدِ آخَرده معصوملرک و اختیار اُمیلرک یازیلرینک
تصحیح‌کنده چوق زحمت چکدم؛ وقت مساعده ایتیمیوردی. خاطرمه گلدی و
معنًا دینیلدی که: صیقيلمه! بونلرک یازیلری چابوق اوقومدیغندن، عجله‌جیلری
یواش یواش اوقومغه مجبور ایتدیگندن، رساله نورک غذا و طعام حکمنده کی
حقیقتلرندن هم عقل، هم قلب، هم روح، هم نفس، هم حس، حصّه‌لرینی
آلابیلرلر. یوقسه یالکُز عقل جزئی بر حصّه آلیر، اوته کیلر غداسز قالابیلرلر.
رساله نور، سائر علملر و کتابلرگی اوقومغاملی. چونکه اونده کی ایمان تحقیقی
علملری، باشقه علملره و معرفتله بکُزه‌مز. عقلدن باشقه چوق لطائف
إنسانیه‌نک ده قوت و نورلریدر.

الحاصل: معصوملرک و اُمی و اختیارلرک نقصان یازیلرنده ایکی فائده وار:

برنجیسی: تائی و دقتله اوقومغه مجبور ایتمکدر.

ایکنجیسی: او معصومانه و خالصانه صمیمی و طاتلی دیلرلرندن،
درس‌لرندن رساله نورک شیرین و درین مسئله‌لرینی لذتلی بر حیرتله دیگله‌مک و
درس‌المقدّر.

سعید النورسی



إسپارطیه گوندریلن بر فقره در

رسالة النور کندی صادق و ثباتکار شاکردلرینه قزانیدیریغی چوق بیوک کار و قزانج و پک چوق قیمتدار نتیجهیه مقابل فیآت اولارق، او شاکردلردن تام و خالص بر صداقت و دائمی صارصیلماز بر ثبات ایستر. اوت رسالة النور اون بش سنهده مدرسهده قزانیلان قوتلی ایمان تحقیقی بی، اون بش هفتهده و بعضلره اون بش گونده قزانیدیریغنه، یگر می سنهده یگر می بیك ذات تجربه لریله شهادت ایدر لر.

هم اشتراك اعمال اُخروییه دستوریله، هر بر شاکردینك، هر بر گونده بیك لر خالص لسانلریله ایدیلن مقبول دعالری و بیك لر اهل صلاحك ایشلدکلری اعمال صالحه نك مثل ثوابلرینی قزانیدوروب، هر بر حقیقی، ثابت و ثباتکار شاکردلرینی عملجه بیك لر آدم حکمنه گتیردیگنی؛ کرامتکارانه و تقدیرکارانه امام علی نك اوچ اخباری و کرامت غیبیه غوث اعظمده کی تحسینکارانه و تشویقکارانه بشارتی و قرآن معجز البیانك قوتلی إشارتله، او خالص شاکردلر اهل سعادت و اهل جنت اولاجقلرینی مژده سی پک قطعی إثبات ایدر لر. البته بویله بر قزانج، اویله بر فیآت ایستر.

مادام حقیقت بودر. رساله نور دائره سنك یاقیننده بولونان اهل علم و اهل طریقت و صوفی مشرب ذاتلر، اونك جریاننه گیرمک و علم و طریقتدن گلن سرمایه لریله اوکا قوت ویرمک و گنیشلنمسنه چالیشمق و شاکردلرینی تشویق ایتمک و بر بوز پارچه سی اولان آنانیتنی، تام بر حوضی قرائمق ایچون، او دائرهده کی آب حیات حوضنه آتوب اریتمک گرکدر و اُزمدر. یوقسه باشقه بر

چیغیر آچمقله هم او ضرر ایدر، هم بو مستقیم و متین جادّه قرآنیه یه بیلیمیه رک ضرر ویرر؛ بلکه زندقیه یه بیلیمیه رک بر نوع یاردیم حسابنه گچر.

سعید النورسی



لطیف بر توافقه إشارت ایدن بر فقره‌در

اوتوز آلتی یاپراقدن عبارت و إمام علی نك فوق العاده تقدیرینه مظهر اولان اوتوز ایکنجی سوزك کندی کندینه گلن بش ییك یدی یوز اون بش (۵۷۱۵) توافقی، رساله النورك بو حوالیده کی غایت مهم بر طلبه‌سی اولان أحمد نظیفك نسخه‌سنده چیقمشدر. دیمك او رساله‌نك خط حقیقیسینه راست گلمش که، بو خارقه کرامتی گوسترمشدر.

هم ایکی خسروی رساله نور دائره‌سینه و بکر صدقی‌یه کرامتنی گوستروب ایمانه گتیرن و طلسم کائناتك اوچده بریسنی حل ایدن، اون بش یاپراقدن عبارت اولان اوتوزنجی سوز ینه قهرمان نظیفك نسخه‌سنده تکلفسز اوچ ییك سکر یوز اوتوز بش (۳۸۳۵) توافقی؛ بز گوزیمزله بو کرامت توافقیه نوریه‌یی گوردك. (حاشیه)

خلیل، حلمی، صلاح الدین، امین، فیضی،
سعید النورسی

(حاشیه): بو رساله‌ده ألفلرک مجموعی یوز قرق درت (۱۴۴) چیقمش؛ تام تامنه "سعید" اولوب مؤلفنك إمضاسنی گوستریور.

حافظ مصطفیٰ ننگ بر فقرہ سیدر

عزیز استاد!م

او جریاننگ هجومی آنده کومزده ناحیه مدیری و داهّا ظاهرّا مهمّ مأمورلر بولوندیغی حالده، شفاهاً إسملیمزله إخبار ایدوب تحری ایتدیرمک ایستدکلری حالده، حضرت اُسد الله علی کرم الله وجهه و غوث اعظم گبی چوق معنوی استادلیمزک معنوی یاردیملریله عقیم قالوب؛ حتی او مأمورلری علیهمزه دگل، لهمزه معنوی ضربه لریله چویردیلر. ﴿أَلْفُ أَلْفِ الْحَمْدُ لِلَّهِ هَذَا مِنْ فَضْلِ رَبِّي﴾

مکتوبی مطالعه ایتدک. عجیبدر که، بزم قصوریمزدن و اوفاجق احتیاطسزلغمزدن گلن او تأثیرسز جریانی خبر ویریور گوردک. چونکه "بر قسم عوام ناس و بدعهلره تابع بر قسم علماء ظاهر، حقیقه کندیلرینک پیس و ضلالت باتاقلغندن گیدن یوللرنده آرقداشلق ایتمهین و بر جاده کبرای بولان رساله النور شاکردلرینی ذمّ ایدیور" دییه سزدن گلن او مکتوب خبر ویریوردی. حقیقه او یله اولدی. مکتوبدن بر گون صوگره، مراقی موجب اوزریمزده هیچ بر تأثیر قلمادی.

طلبهگز حافظ مصطفیٰ



أمین و فیضنگ إسپارطهده کی قارداشلرینه یازدیغی بر فقره در

أوت إسپارطهده بولونان قارداشلیمزک خبر ویردکلری بو اُهمیتی حادثه تعرضیهیه تشبث وقوعی زماننده مخابره مز کسیدلیگی حالده، متمادیا هر وقت

استادیمز، عین تعرضه معروض بولونویورز گبی بزى، (یعنی فیضی و آمینی) ایقاپز ایدیوردی: "دقت ایدیگز، درت جهته بزه تعرض وار. دمیر گبی ثبات ایدیگز. بر خلط ایده‌مزلر." بز ده باقیوردق که؛ بزده بر شی یوق، حسن ایتمیوردق. هم او غیبی حادثه‌یی برطرف ایتمک ایچون، مطابق بر مکتوب بزه یازدیردی، سزه گوندرلدی.

رسالة نور شاکر دلرندن

آمین، فیضی



خلوصی بگک بر فقره‌سیدر

لاحقه‌نک بو دفعه إرسال بویوریلان قسمی آلم. لَهُ الْحَمْدُ قدسی وظیفه‌ده إستخداممز دوام ایدیور. حقیقهٔ انسان، سیدینک متنوع خدمت‌لر آراسنده بویله نورلی و نورانی خدمتده بولوندیرماسنی حسن ایدنجه، ذاتاً اجرتنی پشین آلان بر کوله اولدیغنی ده نظر دقته آنجه، بتون ذرات کائنات قدر دیل ایله حمد ایتمک ایسته‌یور. یعنی قلبنده یانان الحمد لله قندیلی، هر شیئی مسبح و حامد گوستریور و گوزل بر نیتله، او حامد لرك حمدینی و مسبح لرك تسبیحینی و او شاکر لرك شکرینی برابرجه سیدینه تقدیمه بر اشتیاق حسن ایدیور.

نورلی و قدسی مکتوبلریگز یکدیگرینی تعقیب ایتدکجه، حقیقهٔ تحقیقی ایمانک کماله طوغری سیران ایتدیگی گورولویور. بو عاجز قارداشگز شبهه‌سز بر صورتده ایمان ایتدم که: شریعت غراء احمديه عليه الصلاة والسلامك حقائقنه، روحنه نفوذ ایتمه‌نک اُك قیصه، اُك خطر سز، اُك ذوقلی طریقی، رسالة النوره إنتسابله‌در.

اوت بختیار اودر و اوٹا دیرلر که: رسالۃ النورہ إنتساب ایتمش بتون مؤمنلری کندیسنه تام حقیقی قارداش بیلوب بو ظلمتلی عصرده ایمان تحقیقی نوریلہ جادۃ کبرای اُحمدیه یی (ع ص م) بولویور. نهایتسز شکللره، قاریشیققلره رَغْمًا بسم الله ایلہ آچیلان رسالۃ النور قپوسندن گیرنجہ، طُفل ایکن "اُمّتی" دیین شفیعنی جدی سومک، یعنی سَنّتِ سنیہ سنہ اِتّباع ایلہ مه نْک معجّل مکافاتنی اولارق بولویور. هر امری ایشلرکن، بو امری جانبِ حقْدن بو اُمّته گتیرنی؛ هر نْهی یاپمامغه جبر ایدرکن، بو نْهی طرفِ اِلْهیدن بو اُمّته گتیرنی دوشونه دوشونه، درسلرده گچدیگی گبی، بتون عمر دقیقه لری عبادت اولاییلر. و او حبیبِ خدا، او شفیعِ روزِ جزایی هر ایشنده نمونه ایتْمک عزمندن متولّد محبّت، او حبیبْک بولوندیغی عالمه گوجمه یی سَوْدیره جْک حاله گتیریور و بویله جه ﴿مُوتُوا قَبْلَ أَنْ تَمُوتُوا﴾ سَرّی تظاهر ایدیور.

تذکّر موت ویا رابطۃ موت، ﴿تَفَكَّرْ سَاعَةً خَيْرٌ مِنْ عِبَادَةِ سَنَةِ﴾

الحاصل: نه آراسهق، هپ رسالۃ النورده گونش گبی گورونویور. رسالۃ النور شاکردلری دَقّت ایتسه لر، داها بو فانی عالمده ایکن لواء الحمد اُحمدی (علیه الصلاة والسلام) آلتنده بولونقلرینی عنایتِ حق ایلہ آکْلا رلر.

عاجزانه فهم ایده بیلدیگم شو آنده قلبمه گلن حقیقتلره اِستناداً دییه جگم که: بو ضالالت و بدعه لرْک و دینسزلگْک طاعون و وبادن داها زیاده و داها شدّتلی ساری علّتلرینه قارشی رسالۃ النورْک گتیردیگی و تعلیم و تفهیم ایتدیگی چوق حقیقتلردن سَنّتِ اُحمدیه یه (ع ص م) تمسّک درسنی اُکْ حقیقی اولارق آلان، رسالۃ النور شاکردلریدر. اونلر بو تمسّک و اِنتسابلرینْک، ایکی کَرّه ایکی درت ایدر قطعیتنده مظهر اولدقلری عنایتِ ربّانیه شهادتیلہ، معجّل مکافاتلرینی

گورو یورلر. یعنی بوراده سنتی ايله ضلالت و بدعت و دینسزلك آتشلرندن قورتاران، منسوب اولدیغمز شریعتك مبلّغی؛ بوراده خلاص و مقاومتله، آخر حیاتمزه ایمان ايله، حشر اکبرده شفاعتيله إن شاء الله ابدی سَویندیره جکدر دیورلر، دییه‌یلورلر. ﴿الْحَمْدُ لِلَّهِ هَذَا مِنْ فَضْلِ رَبِّي﴾

مادام که بویله اولمشدر؛ او حالده شبهه‌سز رساله النورک إنتشارنده کی مقصد، شو زمانک إنسانلرینه تحقیقی ایمانی درس ویرمک، متحریرلینی قورتارمق، متحریرلینی تقویه و ترصین ایتمک، زندقه و اهل الحادی إسکات و إلزام ایتمکدر. اما فتنه آتشلری آفت حالی آلان بو زمانده، جام ايله الماسک برابر صاتیلدیغی بر چارشوده بو مبارک نورلری، یعنی شاننده ﴿إِنَّا نَحْنُ نَزَّلْنَا الذِّكْرَ وَإِنَّا لَهُ لَحَافِظُونَ﴾ بویوریلان قرآن معجز الیپانک حقیقی تفسیرلری اولان رساله النورک حقارتدن صیانتی ایچون، هم ﴿سِرًّا تَنَوَّرْتُ﴾ سِر تنویرینی رحیم و کریم ربّمز إرادہ و تقدیر بیورمش.

رساله نور شاکردلرندن

خلوصی



خلیل ابراهیمک رساله نوره خطابا یازدیغی بر فقره‌در.

﴿الْحَمْدُ لِلَّهِ عَلَى الرِّسَالَةِ النُّورِيَّةِ﴾ شمس قرآنک أنوارلرندن إنعکاس ایدن أجرام علویه، سیارات و ثوابت کوکیبه و ازهار مزینّه روضه صفائیّه و حقائق آشنا

ایله مملو در مکنونه، **﴿الْمُؤَيَّدُ بِالذَّلَالِ الْعَقْلِيَّةِ وَالتَّسْلِيمِيَّةِ﴾** اولان رساله نوریه، أسرار کتاب الله، عالمی ضیالاندردی و إن شاء الله دائمی ضیالاندره جقدر. و او یله بر شاه اتردر که، سلف صالحینک اترلرینک صوکنده گلمکله هپسندن ایلریده در. او یله مبذول بر فیض وار که، اُک ظلمتلی قلمبری دخی نور ایمان ایله نورلاندریر. و او یله بر معرفتِ إلهیهی سرد و بیان ایلر که، کورلره بیله گوستردی.

او بنم گوزیمک نوری، قلمک سروری، گوکلمک بلبللی، روحمک غداسی، لطائفمک إنجلاسی، جانمک جانی... بن اونک هر بر حقیقتنه بیک جان ویرسه م، إن شاء الله بر جانه مقابل باقیده بیک جان آلاجغم. او بنم قبرده أنیسم، برزخده رفیقم و میزنده أعمالم، صراطده براقم، جنتده یولداشم...

بن اونک حقنده ناصل تعریف ایده بیلیرم؟ یگر می سکرنجی مکتوبده سرد ایدیلن **﴿وَمَا مَدَحْتُ مُحَمَّدًا بِمَقَالَتِي * وَلَكِنْ مَدَحْتُ مَقَالَتِي بِمُحَمَّدٍ﴾** فحواسنجه بن ده دیرم: **﴿وَمَا مَدَحْتُ رِسَالَةَ النُّورِ بِمَقَالَتِي * وَلَكِنْ مَدَحْتُ مَقَالَتِي بِرِسَالَةِ النُّورِ﴾**

هم نه حدمه دوشمش که، او منشور قرآندن بحث ایده می! اولسه، اولاییسه بو فقیر، اوندن إستشفاء و إستشفاع و إستفاضه ایده بیلیر. شویله که:

﴿كَرَّ نَهْ خَوَاهِي دَادُ نَهْ دَادِي خَوَاهٍ﴾ قاعده سنجه رضای باری نك کندیسندن خوشنود و راضی اولماسنی ایسترز. و اونک نور یله دنیا ده بتون عالم اسلامک نورلانماسنی ایسترز. و طلبه لرینک دنیا ده برر آرسلان و آخرتده برر سلطان اولماسنی و لواء الحمد سنجاغنک آلتنده، اوکده استادیمزله، بتون طلبه لر یله وارمق ایسترز.

الحاصل: ایسته‌مه‌سنی بیلمدیگم ایچون مادّی و معنوی بتون رزق و احتیاجلریمیزک ویریلمه‌سنی، استادیمنک ایسته‌مه‌سنی ایسترز. اوراده بولونان قارداشلریمیزک، باشده استادیمنز اولارق، جمله‌سنه آیری آیری سلاملرله صحت و عافیتده بَر دوام اولماسنی ایسترز.

﴿الْبَاقِي هُوَ الْبَاقِي﴾

طلبه‌کُز خلیل ابراهیم

رساله نورک مهمم ارکانندن بولونان و بو عین حقیقت اولان مکتوبنی بزلره گوندردن خلیل ابراهیم قارداشیمیزک سوزلرینی عاجز لسانم سویله‌مگه و عاطل قلمم یازمغه مقتدر دگلسه ده، هر خصوصده بو مبارک قارداشیمیزک فکرینه بتون روح و جانمله اشتراک ایدیورم. هم قلبمه باقییوردم؛ بو مکتوبی یازارکن لسانمه ترجمان اولامیان قلبم ده عیناً بو مدحه معنا اشتراک ایدوب برابر او قارداشمله سویلرگی حسن ایدوب تلذذ ایدردم. اگر سویله‌یه‌بیلسه ایدم، بن ده بویله سویلردم.

فیضی



﴿بِاسْمِهِ سُبْحَانَهُ﴾

عزیز، صدیق قارداشلرم!

بو یگنی حادثه تعرضیه‌دن متأثر اولمایکُز. چونکه مکرر تجربه‌لرله، رساله النور عنایت آلتنده‌در. هیچ بر طائفه، شیمدی‌یه قدر بویله اهمیتلی خدمتده بزلر

قدر آز مشقت ایله قورتولان اولماش.

هم گچن رمضانده کی خسته لغم و أسکیشه رده کی مصیتمز گی چوق واقعه لرله ظاهری صیقتیلی مشقتلی حالات آلتنده رساله النورک فائده سنه عائد إنکشافاتی و داها تأثیرلی فتوحاتی گورولمش. إن شاء الله، بو صیقتیلی حادثه دخی، منافق لرك عكس مقصوديله، رساله النورک فتوحاتی باشقه مجرالرده تسهيله وسیله اولور.

بشنجی شعاع آلرینه گچمه سی اهمیتلیدر. فقط بونده بر حکمت وار. بلکه اونلره کندی مسلک لرینی بیلدیرمک و جهنمه گیده نك ماهیتنی بیلیمک ایچون، فوق العاده و إقتداریمز خارجنده بر قضاء إلهی، دییه جناب حقك حکمتنه و عنایتنه و حفظنه إعتما دایوب، مراق ایتمه یگز.

هم سز، هم اونلر بیل سینلر که، صدقه بلایي دفع ایتدیگی گی؛ رساله النور آناتولیدن، خصوصًا إسپارطه و قسطنونیدن آفات سماویه و أرضیه یی دفع و رفعنه وسیله در. اوت صبرینك «يَا أَرْضُ ابْلَيْ... وَاسْتَوَتْ عَلَى الْجُودِيِّ الْخ» آیتندن إستخراج ایتدیگی معنا، حقدر و مطابقدر.

اوت رساله نور، سفینه نوح گی آناتولی یی جبل جودی حکمنه گتیروب، گره أرضك یانغینندن و طوفانندن قورتولمسنه سبیدر. چونکه ضعف ایمانندن گلن طغیان، اکثری مصیبت عامّه یی جلب ایتدیگی گی؛ ایمانی فوق العاده قوتلندیرن رساله النور، او مصیبت عامّه یی دائره سنك خارجنه بیراقمغه رحمت إلهیه طرفندن وسیله اولدی. بو اهل ایمان، بو آناتولی خلقی رساله النوره گیرمه سه لر ده ایلیشمه سینلر. اگر ایلیشمه لر؛ یاقینده بکله یین یانغینلر، طوفانلر، طاعونلرک إستیلاسنه اوغرایه جقلرینی دوشونسونلر، عقل لرینی باشلرینه آلسینلر.

مادام بز اونلرک دنیلرینه قاریشمیورز، اونلر ده بزم بو درجه آخرتزه قاریشمالری اونلره فلاکت گتیرمک احتمالی قویدر.

ایشته بو سکز آیدر، خصوصاً بو هیجان ویرن بو حادثه لرله برابر؛ شیمدی یاغده بولونان فیضی، آمین ایله و بتون دوستلر شاهددر که، بو سکز آی ظرفنده بر تک دفعه، نه حرب عمومی، نه ده سیاستی صورمامشم. و اوطه مده ایشیدیلن رادیوی ده، اوچ سنه در دیگله مدم. حالبوکه بن، بیگلر آدم قدر دنیا به باقمق مناسبتم وار. دیمک بزه ایلیشن، طوغریدن طوغری یه ایمانه تجاوز ایدر. اونلری، جناب حقه حواله ایدیورز. هم اهل سیاستله هیچ بر مناسبتمز اولمادیغی حالده، قطعی بیلسینلر که؛ بو مملکتده، بو عصرده، بو ملتی آنارشیلکدن، تردی و تدنی مطلقدن قورتاره حق یگانه چاره، رساله النورک اساساتیدر.

بو حادثه ده صیقنتی چکن معصوملر و استادلری بیلسینلر که؛ آغیر شرائط آلتنده بر ساعت نوبت، بر سنه عبادت و بر ساعت حقیقی تفکر ایمانی، بر سنه طاعت حکمنه گچدیگی گبی، إن شاء الله اونلرک صیقنتیلری ده او یله ثوابه مدار اولور. اونلر ده، مراق ایدوب تأثر ایله دگل، فرح و سرور ایله قارشیلامالی. فقط حضرت امام علی رضی الله عنہک ایکی کره **﴿سِرّاً بَيَانَةً﴾** **﴿سِرّاً تَنْوَرَتْ﴾** دیمه سنه بناء، بز هر وقت احتیاطلی اولمق و تام صاقینمق وضعیتینی محافظه ایتمگه مکلفز.

رساله نورک منسوبلری، شعور و اختیارلری خارچنده بربريله مناسبتدار، بربرینک حادثه لريله علاقه دار اولدیغنه بر دلیل ده بوگونلرده اولدی. شویله که:

اوراده كى حادثه نك وقوعدن بوگونه قدر، بوراده كى مختلف طبقه لرده كى طلبه لرك وضعيتلرى، اهميتلى بر حادثه يوزندن دگيشمش گي چكىنمك و منافق لرك نظرينى كنديلرينه و بزلره جلب ايتمه مك ايچون توقف دوره سى گچدى. هم نظيف گي بر چوق ذاتك رويالرينك تعبيرلريله، سزك حادثه كز اولديغنى آكلادق.

عموم قارداش لريمزه برر برر خصوصًا مصيبت زده لره سلام و دعا ايديورز. جناب حق اونلرى چابوق قورتاروب (حاشيه) وظيفه لرينك باشلرينه گچيرسين، آمين.

قارداش كز

سعيد النورسى



رساله نورك مهم بر ركنى اولان حافظ على نك (رح) فقره سيدر

عزيز استادم أفنديم!

"بو عجب زمانك ائ بيوك تهلکه سی، حديث شریفله ثابت اولان آخر زمانده چوق اهل سفاهت و غفلت دنيادن ایمانسز چيقيمق ياره سنى لسان قرآن معجز البيانله، قبره ایمان ايله گیرمك علاجيله تداوی ایدن رساله النور شاکردلرينه بر حجت قاطعه بخش ایدن رساله النوره خدمت، عجباً عاجز انسانلرك جزئی و فضل الهی ايله خدمتلى ناصل مقابله ايدر؛ بلکه هر ايکی جهتله بر فضل

(حاشيه): بو دعا خارقه بر صورتده قبول اولدی، پك چابوق قورتولدير.

إلهیدر. " بیان بیورلدقدن صوڭره، ناصل گیجه‌نڭ ظلماتنده یانان بر نور و بر ضیا لسان حال شوقیله بتون روح صاحب‌لرینی، حتّی اُڭ کوچک پروانه‌لری دخی ظلماتدن نوره چاغیروب چیقاردیغی گبی، رساله‌النور دخی لسان حال و قال ایله، شریعت قلنجیله معنّا اعدام اولمامش و ظلماتنده بوغولوب ئولمه‌مش اهل علم و اهل طریقتی دعوت ایتمه‌سی، اونڭ رحیم اسمنه مظهریتی شأندندر.

ایکی خاطره‌دن برنجیسی: اختیاره خانملر حقّنده و هر زمانده نفوذینی و قطعی تأثیرینی گوردیگمز حدیث شریفڭ بیان بیورلماسی، بزلی و چوق علاقه‌دار قادینلری سَویندیردی. جناب حق سزدن ابدّا راضی اولسون، آمین!

ایکنجی خاطره: غفلت سائقه‌سیله ویا گوزسز، آل یاردیمیله بعضلرڭ اَلماس یرینه جام پارچه‌سی آلدیغی گبی، سعادت ابدیه دڭانی اولان رساله‌النوردن سعادت دنیویه آرامغه گلنلری ایقاز و ارشاد فقره‌لریڭز، گیجه - گوندوز یول گوزله‌ین عموم رساله‌النور شاکردلرینی مسرور ایلدی.

طلبه‌ڭز

حافظ علی (رح)



مصطفی‌لر، کوچک علی، مبارک و منور قارداشلر!

مکتوبڭز، بیوک علی‌نڭ مکتوبی گبی عجیب بر حقیقتی بیان ایدیور. او حقیقت، رساله‌النور حقّنده حقدِر. فقط بنم حدّم دگل که، او حدوده گیره‌یم. ﴿عَلَمَاءُ أُمَّتِي كَانُبِيَاءَ بَنِي إِسْرَآئِيلَ﴾ فرمان ایتمش. غوث اعظم شاه‌گیلانی

(قس)، إمام غزالی (قس)، إمام ربّانی (قس) گبی هم شخصاً، هم وظیفهً بیوک و خارقه ذاتلر بو حدیثی، قیمتدار إرشادلریله و أثرلریله فعلاً تصدیق ایتمشلر. او زمانلر بر جهته فردیت زمانی اولدیغندن حکمت ربّانیه اونلر گبی فریدلری و قدسی داهیلری اُمّتک إمدادینه گوندرمش. شیمدی ایسه عین وظیفهیه، فقط مشکلاتلی و دهشتلی شرائط ایچنده، بر شخص معنوی حکمنده بولونان رسالة النوری و سرّ تساند ایله بر فرد فرید معناسنده اولان شاکردلرینی بو جماعت زماننده او مهمّ وظیفهیه قوشدیرمش. بو سرّه بناء، بنم گبی بر نفرک، آغیرلاشمش مشیریت مقامنده آنجق دمدارلق وظیفهسی وار.

سعید النورسی



أوت بو عصرک اُهمّیتلی و معنوی و علمی بر مرشدی اولان رسالة النورک هیئت مجموعهسی، سائر شخصی بیوک مرشدلر گبی کندینه موافق و حقیقت علمیه سنه مناسب، بر قاچ نوعده و بالخاصّه حقائق ایمانیه نك إظهارنده، إنتشارنده عظیم کرامتلری اولدیغی گبی؛ اوچ کرامت ظاهرهسی بولونان معجزات اُحمديه (عصم)، اوننجی سوز، یگرمی طوقوزنجی سوز و آیت الکبرا گبی چوق رساله لری دخی هر بری کندینه مخصوص کرامتلری بولوندیغنی چوق اُماره لر و واقعه لر بگا قطعی قناعت ویرمش. حتّی سکرانده بولونان طلبه لرینه ایمانی قورتارمق ایچون مرشد گبی یتیشدیگنه متعدّد واقعه لر شبهه بیراقمیور.

هم بر ساعت تفکّر، بر سنه عبادت نافله حکمنده... بر مثال "حزب الأکبردر" دییه مشاهده ایتدم و قناعت گتیردم.

بر سؤال جواب اولارق يازديغم بر فقره، سزه ده
فائدهسى اولور احتماليه بيان ايدييورم. شويله كه:

أوليا ديوانلرينى و علمانك كتابلرينى چوق مطالعه ايدن بر قسم ذاتلر
طرفندن صورولدى: "رساله نورك و يردىگى ذوق و شوق و ايمان و اذعان
اونلردن چوق قوتلى اولماسنك سببى نه در؟"

الجواب: أسكى مبارك ذاتلك اكرى ديوانلرى و علمانك بر قسم
رساله لرى ايمانك و معرفتك نتيجه لردن و ميوه لردن و فيض لردن بحث ايدرلر.
اونلرك زمانلرند ايمانك اساساتنه و كوكلرينه هجوم يوق ايدى و اركان ايمان
صارصيلمىوردى. شيمدى ايسه كوكلرينه و اركاننه شدتلى و جماعتلى بر
صورته تعرض وار. او ديوانلر و رساله لرك چوغى خاص مؤمنلره و فردلره
خطاب ايدرلر، بو زمانك دهشتلى تعرضنى دفع ايدهميورلر.

رساله نور ايسه، قرآنك بر معنى معجزه سى اولارق ايمانك اساساتنى
قورتاريور و موجود و محكم ايمانندن استفاده جهتنه دگل، بلكه چوق دليللر و
يارلاق برهانلر ايله ايمانك اثباتنه و تحققنه و محافظه سنه و شبهاتدن قورتارماسنه
خدمت ايتديگندن؛ هر كسه بو زمانده اكمك گبى، علاج گبى لزومى وار
اولديغنى دقتله باقانلر حكم ايدىيورلر.

او ديوانلر ديرلر كه: "ولى اول، گور؛ مقاماته چيق، باق؛ نورلرى،
فيضلى آل."

رساله نور ايسه دير: "هر كيم اولورسه ك اول؛ باق، گور، يالکز گوزيگى
آچ، حقيقتى مشاهده ايت، سعادت ابديه نك آناختارى اولان ايمانكى قورتار."

هم رسالة النور، اَكْ اَوَّل ترجمانتك نفسنى إقناعه چالیشیر، صوگره باشقه لره باقار. ألبته نفس اماره سنى تام إقناع ایدن و وسوسه سنى تمامًا إزاله ایدن بر درس، غایت قوتلى و خالصدر كه، بو زمانده جماعت شكلنه گیرمش دهشتلى بر شخص معنوی ضلالت قارشيسنده تك باشيله غالبانه مقابله ايدر.

هم رسالة النور، سائر علمانك اثرلری گبی، يالكز عقلك آياغی و نظریله درس ویرمیور و اولیا مثللو يالكز قلبك كشف و ذوقيله حرکت ایتیمیور؛ بلکه عقلك و قلبك إتحاد و إمتزاجی و روح و سائر لطائفك تعاونی آياغيله حرکت ایدهرک أوج أعاليه اوچار؛ تعرض ایدن فلسفه نك دگل آياغی، بلکه گوزی یتیشه مدیگی یرله چیقار؛ حقائق ایمانیه پی کور گوزینه ده گوسترر.

سعيد النورسی



معنوی بر إخطار ايله، بر ایکی اینجه مسئله پی یازیورم:

برنجیسی: گچن سنه رمضان شریفده، أهل سنتك سلامتی و نجاتی ایچون ایدیلن پك چوق دعالرك شیمدیلک آشکاره قبوللری گورونمه مسنه خصوصی ایکی سبب إخطار ایدیلدی:

برنجی سبب: بو عصرك عجیب خاصه سندندر كه: ألماسی ألماس بیلدیگی حالده، جامی اوڭا ترجیح ايدر. بو عصرده کی أهل ایمانك فوق العاده صافدرونلغی و دهشتلی جانیلری عالی جنابانه عفو ایتمه سی؛ و بر تك حسنه پی و بیگلر سیئاتی ایشله یین و بیگلر معنوی و مادی حقوق عبادی محو ایدن آدمدن

گورسه، اوڭا بر نوع طرفدار چیقما سیدر. بو صورتله اقلّ قلیل اولان اهل ضلالت و طغیان؛ صافدل طرفدار ایله اکثریت تشکیل ایده‌رک، اکثریتک خطاسنه ترتب ایدن مصیبت عامّه‌نک دوامنه و ادامه‌سنه بلکه تشدیدینه قدر الهی‌یه فتوا ویررلر؛ بز بوڭا مستحقز دیرلر.

اوت الماسی بیلدیگی حالحه، یالکز ضرورت قطعیه صورتنده شیشه‌یی اوڭا ترجیح ایتمگه رخصت شرعیه وار. یوقسه کوچک بر احتیاجله ویا طمع ویا خفیف بر قورقو ایله ترجیح ایدیلسه؛ ابلهانه بر جهالت و خسارتدر، طوقاته مستحق ایدر. هم عالی‌جنابانه عفو ایتمک ایسه، یالکز کندینه قارشی جنایتی عفو ایده‌بیلیر. کندی حّقندن واز گچسه حقّی وار؛ یوقسه باشقه‌لرینک حقوقی چیگنه‌ین جانیلره عفوکارانه باقمغه حقّی یوقدر، ظلّمه‌یه شریک اولور.

ایکنجی سبب: إذن اولمادیغندن یازیلما‌دی.

ایکنجی مسئله: قارداش‌لرم! اُسکیشهر چپسخانه‌سنده، آخر زمانک حادثاتی حّقنده گلن روایتلرک تأویل‌لری مطابق و طوغری چیق‌دق‌لری حالحه، اهل علم و اهل ایمان اونلری بیلمه‌ملرینک و گورمه‌ملرینک سرّینی و حکمتی بیان ایتمک نیتیه باشلادم؛ بر ایکی صحیفه یازدم، پرده قپاندی، گری قالدی.

بو بش سنه‌ده، بش آلتی دفعه عین مسئله‌یه متوجّه اولوب موفق اولامیوردم. یالکز او مسئله‌نک تفرّعاتندن بڭا عائد بر مسئله‌یی بیان ایتمک إخطار ایدیلدی. شویله‌که:

حرّیتک بدایتنده، رساله النور دن چوق اُول، قوّتلی بر اُمید و اعتقاد ایله، اهل ایمانک مایوسیتلرینی ازاله ایچون، "اِستقبالده بر ایشیق وار، بر نور

گورو یورم" دیہہ مژدہ لر ویریوردم. حتیٰ حرّیتدن اَوّل طلبہ لریمه بشارت ایدردم. تاریخچہٴ حیاتمدہ عبد الرحمانک یازدیغی گبی، سنوحاتِ مثللو رسالہ لردہ دخی "بن بر ایشیق گورو یورم" دیہہ دهشتلی حادثہ لره قارشى او اُمید ایلہ طایانوب مقابلہ ایدردم. بن ده هرکس گبی او ایشیغی سیاست عالمنده و حیاتِ اجتماعیہٴ اسلامیہ ده و چوق گنیش بر دائرہ ده تصوّر ایدیوردم. حالبوکه حادثاتِ عالم ایکی حربِ عمومی ایلہ بنی او غیبی إخبارده و بشارتده بر درجه تکذیب ایدوب امیدیمی قیردی.

بردن بر إخطارِ غیبی ایلہ قطعی قناعت ویره جک بر صورتده قلبمه گلدی که: "جدی بر علاقہ ایلہ سنک اُسکیدن بری تکرار ایتدیگک "ایشیق وار، بر نور گوره جگز" دیہہ مژدہ لرک تأویلی و تفسیری و تعبیری، سزک حَقّزده بلکه ایمان جهتیلہ عالمِ اسلام حَقّنده دخی اُهمّیتلی، رسالہ النوردر. بو بر ایشیقدر که، سنی شدتلی علاقہ دار ایتمش ایدی. و بو بر نوردر که، اُسکیدہ تحیل و تخمینکله گنیش دائرہ ده بلکه سیاست عالمنده گله جک مسعودانه و دیندارانه حالتلرک و وضعیتلرک مقدّمه سی و مژده جیسی ایکن، بو معجل ایشیغی او مؤجل سعادت تصوّر ایدهرک، اُسکی زمانده سیاست قیوسیلہ اونی آرایوردک.

أوت اوتوز قرق سنه اَوّل بر حسنّ قبل الوقوع ایلہ حسنّ ایتدک. فقط ناصل قیرمزی بر پرده ایلہ سیاه بر یره باقیلسه، قاره یی قیرمزی گورور. سن دخی طوغری گوردک، فقط یاکلش تطبیق ایتدک. سیاست جاذبه سی سنی آلداتدی."

س ع



أَمِين ایلَه فیضی نځ استادلرینځ غریب وضعیتنه و رسالَه نورځ عجیب اَهمیتنه
دلالت ایدن بر سؤالری و استادلرینځ اونلره و أمثاللرینه ویردیگی بر جوابدر:

سؤال: عالمِ اسلامځ مقدراتیلَه جدی علاقه دار اولان بو جهان حربنځ
دهشتلی زمانلرنده ألی گون قدر، (شیمدی یدی سنه دن گچدی، عین حال
دوام ایدیور. هیچ نه صوروپور و نه ده مراق ایدر.) هر گون خدمتځزده
بولونان بزلردن بر دفعه حق صورمادیځز. عجا بو بیوک حادثه دن داها بیوک
دیگر بر حقیقت می حکم ایدیور که، بونی اَهمیتدن إسقاط ایدیور؛ یاخود
اونځله مشغول اولمانځ بر ضرری می وار؟ دییه استادیمزدن صورتق.

او ده الجواب دییور که: أوت بو جهان حربندن داها بیوک بر حقیقت
و داها أعظم بر حادثه حکم ایتدیگی ایچون، شو جهان حربی اوځا نسبةً چوق
أهمیتسز دوشویور. چونکه بو جهان حربنده ایکی حکومت کُرَه ارضځ حاکمیتی
ایچون مرافعه و محاکمه دعواسنده بولونمالری ایچنده ایکی معظم دینځ مصالحه
و صلح محکمه سنه باریشمق دعواسی آچیلارق و دینسزلگځ دهشتلی جریان
ده سماوی دینلره مجاهدَه عظیمه سی باشلادیغی هنگامده، نوع بشرځ
سوسیالست طبقه سیله بورژووالر طائفه سنځ محکمه کبرالرنده آچیلان دعوالرندن
چوق مهم اویله بر دعوا آچیلیمش و اویله معظم بر حقیقت میدانَه چیقیمش
که، او دعوانځ تک بر آدمه إصابت ایدن مقداری بو جهان حربندن داها
بیوکدر. ایشته او دعوا ده بودر که:

شو زمانده هر بر مؤمن ایچون، بلکه هرکس ایچون کُرَه ارض قدر بر
باقی تارلا و او تارلا باشند باشه باغچه لر و قصرلره مزین ابدی بر ملک آلق
ویا او ملکی غائب ایتمک دعواسی آچیلیمش. دیمک هر بر تک آدمک باشنه

اویله بر دعوا آچیلمش که؛ اگر انگلیز آلمان قدر ثروتی و قوتی اولسه و عقلی ده وارسه، یالکز او دعوایی قزاق ایچون بتونی صرف ایده جک. البته بو دعوایی قزاقمدهن اول باشقه شیلره اهمیت ویرن، دیوانه در. حتی او دعوا او درجه تهلکه یه دوشمش که، بر اهل کشفک مشاهده سیله، بر یرده أجل آلدن ترخیص تذکره سنی آلا ن قرق آدمدن بر آدم قزاقه بیلمش، اوتوز طوقوزی غائب ایتمش.

ایشته بو اهمیتلی، عظیم دعوایی قزاقمدهن جق و یگر می سنه دن بری تجربه لر ایله اوندن سکزینه او دعوایی قزاقمدهن بر دعوا و کیلی بولونسه؛ البته عقلی باشنده هر آدم، او دعوایی قزاقمدهن اویله بر دعوا و کیلی وظیفه یه سوق ایده جک اولان بر خدمته هر حادثه نك فوقنده اهمیت ویرمگه مکلفدر. ایشته او دعوا و کیلنک بو عصرده بریسی بلکه برنجیسی، قرآن معجز الیاناك إعجاز معنویسندن سوزولن و چیقان و تولد ایدن رساله نور اولدیغی بیگلر اونك ایله او دعوایی قزاقمدهن شاهددر.

اوت بو کوره ارضه مأموریتله گوندریلن هر انسان، بوراده مسافر و فانی اولدیغی و ماهیتی بر حیات باقیه یه متوجه بولوندیغی قطعیا تحقق ایتمشدر. او هر انسان، بو زمانده حیات ابدیه سنی قورتاره جق اولان استناد نقطه لر ی صارصیلدیغندن بو دنیاسنی و ایچنده بتون علاقه دار احبابنی ابدی ترك ایتمکله برابر، بو دنیادن بیگلر درجه داها مکمل بر باقی ملکی ده غائب ایتمک و یا قزاقمدهن دعواسی باشنه آچیلمش. اگر ایمان وثیقه سی اولمازسه و براتی و سندی اولان اعتقادی صاغلام بر صورتده آلدن ایتمزسه، او دعوایی غیب ایدر. عجباً بو غائب ایتدیگی شیئک یرینی هانگی شی طولدیره بیلیر؟

ایشته بو حقیقته بناء، بنم و قارداش لریمک هر بریمزک یوز درجه عقلی و فکری زیاده لشسه، بو معظم وظیفه قدسیه نك خدمته آنجق کافی گله بیلیر. سائر

مسئله‌لره باقمق، بزه فضولی و مالایینی اولور. یالکز بو قدر وار که، رسالۀ نور شاکر دلرینک بر قسمی اوتہ کی دعوالر ایچنده بولوندیغی و لزومسز و سببسز بعضًا بزه عقلسزلرک تجاوزلری و تعرّضلری زماننده ضرورت درجه‌سنده، ایسته‌میه‌رک موقّۀ باقمشز.

هم بو حقیقی و پک بیوک دعوانک خارچنده کی دعوالرہ و بوغوشمالرہ علاقہ‌دارانہ فکرًا و قلبًا قاریشمق ضررلیدر. چونکہ بویله گنیش و سیاسی و هیجان ویرن دائرہ‌لرہ دقت ایدن و اونلرہ مشغول اولان بر آدم، قیصہ بر دائرہ ایچنده وظیفہ‌دار اولدیغی اُهمیتی خدمتلرندن گری قالیر و یا شوقی قیریلیر. هم او گنیش و جاذبه‌دار سیاست و بوغوشمه دائرہ‌لرینہ دقت ایدن، بعضًا قاپیلیر؛ وظیفہ‌سنی یاپامدیغی گبی، سلامتِ قلبی و حسنِ نیتی و إستقامتِ فکری و خدمتنده کی إخلاصی غائب ایتمه‌سه ده او إتهام آلتنده قالایلیر. حتی محکمه‌ده بگا بو نقطه‌دن هجوم ایتدکلری زمان دیدم: گونش گبی حقیقتِ ایمانیہ و قرآنیہ، یرده کی موقت ایشیقزلرک جاذبه‌سنہ تابع و آلت اولمادیغی گبی، او حقیقتی جدّا طانییان، دگل کرّۀ ارضده کی حادثاته، بلکه کائناته ده آلت ایده‌مز دیدم، اونلری صوصدیردم.

ایشته استادیمزک جوابی بیتدی، بز ده بتون قوّمزله تصدیق ایتدک.

رسالۀ نور شاکر دلرندن

أمین، فیضی



(بر مکتوبك پارچه سیدر. بو مقام مناسبتنه بناء یازیلدی.)

عزیز، صدیق قارداشلرم!

صاقین، دنیا جریانلری، خصوصاً سیاست جریانلری و بالخاصه خارجه باقان جریانلر سزی تفرقه یه آتماسین. قارشیکزده إتحاد ایتمش ضلالت فرقه لرینه قارشى سزی پریشان ایتمه سین! ﴿الْحُبُّ فِي اللَّهِ وَ الْبُغْضُ فِي اللَّهِ﴾ دستورِ رحمانی یرینه، اَلْعِيَاذُ بِاللَّهِ ﴿الْحُبُّ فِي السِّيَاسَةِ وَ الْبُغْضُ لِلْسِّيَاسَةِ﴾ دستورِ شیطانی حکم ایدهرک، مَلِكْ گبی بر حقیقت قارداشنه عداوت و الخناس گبی بر سیاست آرقداشنه محبّت و طرفدارقله ظلمنه رضا گوستروب، جنايته معنّا شریک ایلهمسین.

أوت بو زمانده کی سیاست، قلبلری إفساد ایدوب عصی روحلری عذاب ایچنده بیراقیر. سلامتِ قلب و إستراحتِ روح ایستهین آدم، سیاستی بیراقمالی. أوت، شیمدی کُرّه أرضده هرکس یا قلبّا، یا روحّا، یا عقلاً، یا بدنّا گلن مصیبتدن حصّه دارلقدن، عذاب چکیور، پریشاندر. بالخاصه أهلِ ضلالت و أهلِ غفلت، مرحمتِ عمومیه إلهیه دن و حکمتِ تامّه سبحانیه دن خبرسز اولدیغندن، نوع بشره رقتِ جنسیه، علاقه دارلق جهتیه کندی أُلندن باشقه نوع بشرک شیمدیکی أَلیم و دهشتلی أَلرلیله دخی متألم اولوب عذاب چکیور. چونکه لزومسز و مالایعنی بر صورتده وظیفه حقیقیه لرینی و أَلزم ایشلرینی بیراقوب آفاقی و سیاسی بوغوشمالره و کائناتک حادثه لرینی مراق ایله دیکله یهرک، قاریشه رق روحلرینی سرسم عقللرینی گوهزه ایتمشلر. ضرره راضی اولانه مرحمت ایدیلمز معنا سنده ﴿الرَّاضِي بِالضَّرَرِ لَا يُنْظَرُ لَهُ﴾ قاعده اساسیه سیله شفقت

حَقّی و مرحمت لیاقتی کندیلرندن سلب ایتمشلر. اولره آجینمیه جق و شفقت ایدیلمز. و لزومسز باشلرینه بلا گتیریورلر.

بن تخمین ایدیورم که: بتون کُرّه اَرْضْک بو یانغینده و فورطنه لرنده، سلامتِ قلبی و إستراحتِ روحی محافظه ایدن و قورتاران، بو مملکتده، رساله النور دائره سنه صداقتله گیرنلردر.

چونکه اولر، رساله النوردن آلدقلى ایمان تحقیقى درسلىرنى نوريله و گوزيله، هر شیده رحمتِ إلهیه نى ایزینی، ئوزینی، یوزینی گوروب، هر شیده کمال حکمتی، جمالِ عدالتی مشاهده ایتدکلرندن کمالِ تسلیمیت و رضا ایله، ربوبیتِ إلهیه نى اجرا آتندن اولان مصیبتلره قارشى تسلیمیتله، گوله رك قارشى لایورلر، رضا گوستریورلر. و مرحمتِ إلهیه دن داها ایلى شفقترینی سورمیورلر که، ألم و عذاب چکسینلر. ایشته بو حقیقته بناء، دگل یالکز حیاتِ أُخرویّه نى، بلکه دنیاده کی حیاتِک دخی سعادت و لذتی ایسته یلر، (حدسز تجربه لرله) رساله النورک ایمانی و قرآنی درس لرنده بولاییلر و بولویورلر.

سعید النورسی



أهمّیتی بر خواجه نى استاد حقّنده زیاده حسنِ ظنّی تعدیل ایتمک مناسبتیله آمین و فیضی نى او خواجه یه گوندردکلى بر مکتوب

عزیز، صادق و محترم خواجه حشمت أفندی!

سزک، مجدّد حقّنده کی مکتوبکزی حیرتله اوقودق، استادیمزه سویله دک.

استادیمز دیور که:

"أوت بو زمانده هم ایمان و دین، هم حیاتِ اجتماعی و شریعت، هم حقوقِ عامّه و سیاستِ اسلامیہ ایچون، غایتِ اُهمّیتلی بر مجدّد ایستر. فقط اُک اُهمّیتلیسی، حقائقِ ایمانیہ یی محافظه نقطه سنده کی تجدید، اُک مقدّس و اُک بیوکیدر. شریعت و حیاتِ اجتماعی و سیاسیہ دائره لری اوکا نسبتاً ایکنجی، اوچننجی، دردنجی درجده قالیور.

روایتِ حدیثه ده، تجدیدِ دین حقّنده کی زیاده اُهمّیت ایسه، ایمانی حقائقه کی تجدیدِ اعتباریله در. فقط افکارِ عامّه ده و حیاتِ پرستِ انسانلرک نظرندۀ ظاهرّا کنیش و حاکمیتِ نقطه سنده جاذبه دار اولان حیاتِ اجتماعیہ اسلامیہ و سیاستِ دینیہ جهتلی داها زیاده اُهمّیتلی گوروندیگی ایچون، او عدسه ایله او نقطه نظر دن باقیورلر، معنا ویریورلر.

هم بو اوچ وظائف بردن بر شخصده، ویاخود بر جماعتده، بو زمانده بولونماسی و مکمل اولماسی و بربرینی جرح ایتمه مسی پک اوزاق، عادتاً قابل گورولمیور. آخر زمانده، آل بیتِ نبوینک جماعتِ نورانیه سنی تمثیل ایدن مهدیده و جماعتنده کی شخص معنویده آنجق اجتماع ایده بیلیر. جنابِ حقّه حدسز شکر اولسون که، بو عصرده رساله النورک حقیقی شاکردلرینک شخص معنویسی، حقائقِ ایمانیہ محافظه سنده تجدید وظیفه سنی یاپدیرمشدر. یگرمی سنه دن بری او وظیفه قدسیه ده تأثیرلی و فاتحانه نشریاتیلہ غایت دهشتلی و قوتلی زندقه و ضلالت هجومنه قارشى تام مقابله ایدوب، یوز بیگلر اهل ایمانک ایمانلرینی قورتاردیغنی قرق ییك آدم شهادت ایدر.

امّا بنم گبی عاجز و ضعیف بر بیچاره‌نڭ، بویله بیگلر درجه حدّمدن فضله بر یوکی یوکلنمک طرزنده، بیچاره شخصی مدارِ نظر ایتمه‌ملی "دیور و سزه سلام ایدیور. بز ده ذاتِ عالیکزه و اوراده کی رساله‌ النور ایله علاقه‌دار اولانلره سلام ایدیورز.

رساله‌ نور شاکر دلرندن

أمین، فیضی



استادیمزک اَهْمِیتلی بر مکتوبدر

غایت جدّی بر إخطار ایله بر حقیقی بیان ایتمگه لزوم وار. شویله که:

﴿لَا يَعْلَمُ الْغَيْبَ إِلَّا اللَّهُ﴾ سَرّیله اَهلِ ولایت، غیبی اولان شیلری بیلدیریلمزسه بیلمزلر. اَکْ بیوک بر ولی دخی، خصمنک حقیقی حالنی بیلمدکلری ایچون، حقسز اولارق مبارزه ایتمه‌سنی عشره مبشره‌نڭ مایینده کی محاربه گوستریور. دیمک ایکی ولی، ایکی اَهلِ حقیقت بربرینی إنکار ایتمکله مقاملرندن سقوط ایتمزلر. مگر بتون بتون ظاهر شریعتّه مخالف و خطا بر إجتهد ایله حرکت ایدیلمش اوله. بو سرّه بناءً ﴿وَالْكَافِرِينَ الْغَيْظَ وَالْعَافِينَ عَنِ

النَّاسِ﴾ ده کی علوّ جناب دستورینه إتباعاً و عوامِ مؤمنینک شیخلرینه قارشی حسنِ ظنلرینی قیرماقله، ایمانلرینی صارصیلمدان محافظه ایتمک و رساله‌ نورک اُرکانلرینک حقسز إعتراضلره قارشی حقلی فقط ضررلی حدّتلرندن قورتارمق لزومنه بناءً؛ و اَهلِ إحداک ایکی طائفه اَهلِ حقیقتک مایینده کی خصومتدن

استفاده ایدہ رک، برینک سلاخیلہ، اعتراضیلہ اوتہ کینی جرح ایدوب اوتہ کینک دلیلریلہ بریکینی چوروتوب ایکسینی ده یره وورمق و چوروتمکدن اجتناباً، رسالہ نور شاکردلری بو مذکور بش اساسہ بناء، معارضلہ حدت و تھورلہ و مقابلہ بالمثل ایلہ قارشیلاماملی. یالکز کندیلرینی محافظہ ایچون مصالحہ کارانہ، مدار اعتراض نقطہلری ایضاح ایتمک و جواب ویرمک گرکدر.

چونکہ بو زمانده انانیت چوق ایلری گیتمش. هرکس، قامتی مقدارنده بر بوز پارچه سی اولان انانیتنی اریتمیور، بوزمیور؛ کندیسینی معذور بیلیمور، اوندن نزاع چیقیور. اهل حق ضرر ایدر، اهل ضلالت استفاده ایدیور.

استانبولده معلوم اعتراض حادثہ سی ایما ایدیور کہ؛ ایلریده، مشربنی چوق بگہنن بعض ذاتلر و خودکام بعض صوفی مشرب و نفس امارہ سنی تام تولدیرمین و حبّ جاه ورطہ سندن قورتولیان بعض اهل ارشاد و اهل حق، رسالہ النور و شاکردلرینہ قارشى کندی مشربلرینی و مسلکلرینک رواجی و اتباعلرینک حسن توجہلرینی محافظہ یتیلہ اعتراض ایدہ جکلر، بلکه دهشتلی مقابلہ ایتمک احتمالی وار. بویله حادثہ لرک وقوعنده، بزلرہ اعتدال دم و صارصیلما مق و عداوتہ گیرمہ مک و او معارض طائفہ نک ده رؤسالرینی چوروتمہ مک گرکدر.

فاش ایتمک خاطرمہ گلہمین بر سرّی، فاش ایتمگہ مجبور اولدم. شویله کہ:

رسالہ نورک شخص معنویسی و او شخص معنوی پی تمثیل ایدن خاص شاکردلرینک شخص معنویسی "فرید" مقامنه مظهر اولدقلری ایچون، دگل خصوصی بر مملکتک قطبی، بلکه (اکثریت مطلقہ ایلہ) حجازده بولونان قطب اعظمک تصرفدن خارج اولدیغی.. و اونک حکمی آلتنه گیرمگہ مجبور دگل. هر

زمانده بولونان ایکی إمام گبی، اونی یعنی قطبِ أعظمی، طانیمغه مجبور اولمایور. بن اُسکیده رسالۀ نورک شخصِ معنویسنی، او إماملردن بریسنی ظن ایدیورد. شیمدی آکلائیورم که؛ غوثِ أعظمده قطیبت و غوثیتله برابر "فردیت" دخی بولوندیغندن، آخر زمانده کی شاکردلرینک باغلانیدیغی رسالۀ النور، او فردیت مقامنک مظهریدر. گیزلنمگه لایق اولان بو سرِّ عظیمه بناءً، مکّه مکرّمهده دخی (فرضِ محال اولارق) رسالۀ النور علیهنده بر إعتراضِ قطبِ أعظمدن دخی گلسه؛ رسالۀ النور شاکردلری صارصیلمایوب، او مبارکِ قطبِ أعظمک إعتراضنی إلتفات و سلام صورتنده تلّقی ایدوب، توجّهنی ده قزائقم ایچون، مدارِ إعتراض نقطه‌لری او بیوک استادلرینه قارشى ایضاح ایله، آلرینی اوپمکدر.

أوت قارداشلرم؛ بو زمانده اوילה دهشتلی جریانلر و حیاتی و جهانی صارصه‌جق حادثه‌لر ایچنده، حدسز بر متانت و إعتدالِ دم و نهایتسز بر فداکارلق طاشیمق گرکدر. أوت ﴿يَسْتَحِبُّونَ الْحَيَاةَ الدُّنْيَا عَلَى الْآخِرَةِ﴾ آیتنک سرِّ إشاریسیله؛ آخرتی بیلدکلری و ایمان ایتدکلری حالده، دنیایی آخرته سوه‌رک ترجیح ایتمک و قیریله‌جق شیشه‌یی باقی ألماسه، بیلهرک رضا و سَوینج‌له ترجیح ایتمک و عاقبتی گورمه‌ین کور حسیاتنک حکمیله، حاضر بر درهم زهرلی بر لذّتی، ایلریده بر بَطمان صافی لذّته ترجیح ایتمک، بو زمانک دهشتلی بر مرضی، بر مصیبتیدر. او مصیبت سرّیله، مؤمنلر دخی بعضاً اهلِ ضلالتنه طرفدار اولمق گبی دهشتلی خطاده بولونویورلر. جنابِ حق اهلِ ایمانی و رسالۀ نور شاکردلرینی بو مصیبتلرک شَرّندن محافظه ایله‌سین، آمین.

سعید النورسی



سؤال: إشارات قرآنیہ رسالہ سندہ، فاتحہ نك صراط مستقیم أصحابی کہ، ﴿الَّذِينَ أَنْعَمْتَ عَلَيْهِمْ﴾ آیتك تعریف ایلدیگی طائفه ایچنده، هم ﴿لَا تَزَالُ طَائِفَةٌ مِنْ أُمَّتِي... حَتَّى يَأْتِيَ اللَّهُ بِأَمْرِهِ﴾ إلی آخر... حدیثك آخر زمانده گوستردیگی مجاهدلر ایچنده، هم وَالْعَصْرِ سوره سنك ﴿إِلَّا الَّذِينَ آمَنُوا وَعَمِلُوا الصَّالِحَاتِ﴾ ایله باشلايان اوچ جمله سندہ معنای إشاری ایله خصوصی بر صورتده داخل بر فردك، رسالۀ نور شاگردلری اولدیغنه سبب نهدر و وجه تخصیصی نهدر؟

الجواب: سببی ایسه؛ رسالۀ نور، یوزه یاقین دین طلسملرینی و حقائق قرآنیہ معمالرینی حل و کشف ایتمشدركه؛ هر بر طلسمك بیلیمه مسندن چوق انسانلر شبهاته و شکوکه دوشوب، ترددلردن قورتولما یوب، بعضا ایمانی غائب ایدردی. شیمدی بتون دینسزلر طویلانسه، او طلسملرك کشفندن صوگره غلبه ایده مزلر. یگر می سکرنجی مکتوبده عنایات سبعة ده بر قسمنه إشارت ایدیلیمش. إن شاء الله بر زمان او طلسملر، مستقل بر رسالده جمع ایدیله جك.

سعید النورسی



صلاح الدینك فقره سندن بر پارچه در

بر وقت طوسیهدن قسطمونی یه گلیرکن، برابرده رسالۀ نورك لمعلری و شعاعلری واردی. حشره دائر بر مبحث اوقویوردیم. قامیون یوقوشلری طیرمانییوردی. هوانك و ماکینه نك حرارتی بكا آغیرلق و فکریمه ده "بو رسالۀ معظم بر معجزۀ قرآنیهدر. باشقه ساحده ده معجزه گوستره بیلیر می؟ حالبوکه

معجزه، أنبئالره مخصوصدر. رسولِ أكرم عليه الصلاة والسلامدن صوڭره معجزه گوستريلميه جکدر. " ملاحظه‌سی اثناسنده قامیون مدهش صدمه‌لرله اوچ طاقله‌ده، یگرمی‌یش اوتوز متره یردن آشاغی‌یه یووارلاندی. شهادت گتیریوردیم. یاره‌لی می‌یم دییه کندیمی یوقلادم. یوز بیك شکر هیچ بر یاره‌م یوق. قورقه‌رق طوغرولدیم، شوفورك قفاسی پارچه‌لانمش، "آه، اوف" چکییور. اطرافمی تدقیق ایتدم؛ شوفور طرفنده کی جاملر خرده‌خاش اولمش. بنم طرفنده کی اینجه جام بیله قیریلماش. او آنده بونك بیوک بر کرامت اولدیغنی، معجزه اولمادیغنی و بر داها بویله ماجرالی شیلری تفکر ایتمه‌مك ایچون کرامتکارانه رساله‌ نورك بر طوقادی اولدیغنی آڭلادم.

رساله‌ نور شاکردلرندن صلاح الدین چلبی



عزیز، صدیق قارداشلرم!

رساله‌ نورك حقانیتنه و اهمیتنه دائر بر إمضای غیبی حکمنده بو مجموعه‌نك گوستردیگی قیمت رساله‌ نورده بولوندیغنی، بو زمانك دهشتلی فورطنه‌لری اثبات ایدیور.

أوت قارداشلرم، حضرت عیسی علیه السلام إنجیل شریفده دیمش که: "بن‌گیدیورم، تا سزه تسلّیجی گل سین." یعنی حضرت أحمد علیه الصلاة والسلام گل سین، دیمه‌سیله قرآنك بشره غایت بیوک بر نتیجه‌سی، بر غایه‌سی، بر هدیه‌سی؛ تسلّیدر.

اوت بو دهشتلی کائناتک فورطنه لری و زوال تخریباتلری و بو بوشلق نهایتسز فضا ده هر شی ایله علاقه دار اولان انسان ایچون تسلی یی و ایستمداد نقطه لری قرآن ویریور. ائک زیاده او تسلی یه محتاج بو زماندر و ائک زیاده قوتلی بر صورتده او تسلی یی ایثبات ایدن، گوسترن رساله نوردر. چونکه ظلمات و اوهامک منبعی اولان طبیعتی، او دلمش گچمش، حقیقت نورینه گیرمش. یگر می طوقوزنجی و اوتوزنجی و اون آلتنجی سوزلرگی اکثر پارچه لرنده، حقائق ایمانیه نئک یوزر طلسملرینی کشف و ایضاح ایدوب، عقلی انکاردن ترددلردن قورتارمش. ایشته بو حقیقت ایچوندر که؛ بو چوق اوصاندریچی زمانده، اوصاندریمیه جق بر طرزده، چوق تکرار ایله، عقلی باشنده اولانلری رساله نور ایله مشغول ایدیور. رأفت مکتوبنده دیمش: "نه وقت بر آرایه گلسه ک، سوزلردن بریسنی آچوب اوقوروز، طاتلی طاتلی ایستفاده ایدوب استادیمزله گوروشورز. هم رساله نورک ائک بارز خاصیتی، اوصاندریمامقدر. یوز دفعه اوقونسه، یوزبرنجی ده ینه ذوق ایله اوقونه بیلیر." دیمش. طوغری سویله مش.

یالکز رساله نورک ترجمانی، حقیقی وظیفه سنک خارجنده دنیاده کی ایستقبالیاته نادراً آرا صیره باقماسی، ظاهری بر مشوشیت ویرر. مثلاً: بوندن اوتوز قرق سنه اول: "بر نور گله جک، بر نور عالمی گوره جگز" دیمش و او معنایی، گنیش بر دائره ده و سیاستده تصوّر ایتمش.

هم بوندن اون درت، اون بش سنه اول، "دینسزلگی چویرنلر مدھش سماوی طوقاتلر ییه جکلر" دییه بیوک، گنیش، گره أرض دائره سنده کی حادثه یی، طار بر مملکتده و محدود انسانلرده تصوّر ایتمش. حالبوکه ایستقبال، او ایکی اخبار غیبی یی تصوّرک پک فوقنده تفسیر و تعبیر ایلدی. اُسکی سعیدک "بر نور عالمی گوره جگز" دیمسی، رساله نورک دائره سنک معناسنی حسّ ایتمش؛ گنیش

بر دائرهٔ سیاسیه تصوّر ایتدیگی گبی، سرّ **إِنَّا أَعْطَيْنَا** ده، اون اوچ اون درت سنه صوگره، "دینسزلگی، زندقہ یی نشر ایدنلر، مدھش طوقاتلر بیه جکلر." دیوب؛ گنیش بر حقیقی طار بر دائره ده تصوّر ایتمش. إستقبال، او ایکی حقیقی تعبیر و تفسیر ایلدی. باشده إسپارطه اولارق رسالہ نور دائره سی، اولکی حقیقی پک پارلاق و گوزل بر صورتده گوستردیگی گبی؛ ایکنجی حقیقی ده، مدنیت سفیهه نڭ طغیاننڭ و مادّیونلق (حاشیه) طاعوننڭ آشیلامسنی چویرن و اداره ایدن ارواح خبیثه نڭ باشلرینه گلن بو دهشتلی سماوی طوقاتلر، گنیش بر دائره ده، سرّ **إِنَّا أَعْطَيْنَا** نڭ حقیقتی، تام تامنه إثبات ایتمش.

سؤال: رسالہ نور قطعی برهانلره إستناداً حکملری عین عیننه، تأویلسز، تعبیرسز حقیقت چیقماسی و یالکز اشارت توافقیه و سنوحات قلبیهیه إعتماداً بیاناتی، بویله دنیوی اولان مسائل إستقبالیه ده نه دن تعبیر و تأویله محتاج اولویور؟ دییه خاطریمه گلدی.

بویله بر جواب إخطار ایدیلدی که: غیبی إستقبال دنیوی ده باشه گلن حادثاتی بیلدیرمه مکده؛ جناب أرحم الراحمینڭ چوق بیوک بر رحمتی صاقلانیدیغی و غیبی گیزله مکده چوق أهمیتلی بر حکمتی بولونیدیغی جهته، غیبی شیلری خبر ویرمکدن یاساق ایدوب، یالکز مبهم و مجمل بر صورتده، یا إلهام ویا إخطار ایله بر أماره یی وسیله ایده رک، کشفیاتده و رؤیای صادقده بر قسم

(حاشیه): اوت مادّیونلق طاعوننڭ خسته لغی نوع بشره بو دهشتلی صیتمه یی و کُرّه أرضه

بو تیتزمگی ویرمشدر.

غیبی حقیقتلرینی احساس ایدر. و او حقیقتلرک خصوصی صورتلری، وقوعندن
صوگره بیلینیر.

سعید النورسی



رساله نور شاکردلرندن آمین، حلمی، کامل و فیضی نك بر فقره سیدر.

رساله نورك قصبه لره، جماعتلره برکته مدار اولماسی و اوگا ضرر ویرنلره
طوقات گلمه سی گی؛ شخصلره ده، پك ظاهر بر صورتده هم برکت و حسن
معیشت (اوگا چالیشانلره)؛ و غیبی طوقاتلر، (اونك علیهنده چالیشانلره)
گلمه سی.. بو حوالیده پك چوق حادثه لری وار. بز کندی نفسمزده؛
چالیشدیغمز زمان پك ظاهری بر صورتده بر حسن معیشت، بر عنایت
گوردیگمز گی؛ رساله نورك ارکانندن نظیف، قطعی بر صورتده خبر ویریور
که: اوچ درت آدم، دنیا ثروتك خاطر ایچون رساله نور علیهنده
طویلانوب، منافقانه بر تدبیر قوردقلری هنگامده؛ اوچ گون صوگره او اوچ
آدمك خانه لری و دگانلری یانوب، بیگلر لیرا ضایعاتله طوقات ییدیلر.

هم بر دساس و جاسوس آدم، رساله نور شاکردلری علیهنده
چالیشیوردی که، اونلری چپسه آتدیرسین. بر گون (سربست اولارق) "بن بر
ایپ اوجی بولامدم که، بونلری چپسه صوقه یم. اگر بر ایپ اوجی بولسه م،
اونلری چپسه صوقه جغم." دییه إعلان ایتدیگی وقتدن ایکی گون صوگره بر
ایش یاپوب، رساله نور شاکردلری یرنده، او ایکی سنه چپسه گیردی.

هم بدبخت، معنّد بر آدم، شدّتلی رسالّه نور علیهنده هم شاکردلرینک بر رکنی علیهنده بولوندیغی هنگامده، بر ایکی گون صوگره میخانه‌یه گیدوب ایچه ایچه چاتلامش، اوراده ئولمش. بو نועده چوق حادثه‌لر وار. دیمک رسالّه نور دوستلره تریاق اولدیغی گبی، دشمنلره ده صاعقه اولویور.

هم غوثِ اعظمک استادیمز حقّنده ﴿فَإِنَّكَ مَخْرُوسٌ بِعَيْنِ الْعِنَايَةِ﴾

فقره‌سیله، عنایت و تسهیله دایما مظهر اولدیغنه؛ و توافق، رسالّه نورک بر معدنی بولوندیغنه پک چوق اماره‌لردن، بو بر ایکی گون ظرفنده، کوچک و لطیف، فقط قطعی قناعت ویرن جزئی حادثه‌لرک توافقاتنده گوزیمزله گوردیگمز عنایات ربّانیه‌نک نمونه‌لرندن بش آلتیسنی بیان ایدیورز که، اونلر بو ایکی گون ظرفنده برابر وقوعه گلمش:

برنجیسی: دون استادیمزه، رسالّه نوره عائد اوچ خدمت لازم گلدی. کیمسه ده یوق. بزلر ده اوزاقدّه. مردیواندن اینوب، بر چوجغی بولوب، بزلره گوندرمک نیتیه قپویی آچدی. رسالّه نورک او اوچ خدمتی گوره‌جک اوچ شاکردی، فوق العاده بر طرزده دقیقه‌سیله قپویه گلمشلر.

ایکنجیسی:

اوچنجیسی: استادیمز، عین بوگون اُمین قارداشیمزه دیدی: اوچ درت آیدر هر هفته قریه‌سندن بورایه گلن خانه صاحبه‌سی گلمدی، درت آی اولدی کراسنی آلمادی. هر حالده خبر گوندریگز گلسین، کراسنی آلسین. " دیدیگی عین وقتده، درت آیدن بری گلمه‌ین او خانه صاحبه‌سی قپویی ووردی، گلدی. بش آیلک کراسنی آلدی. استادیمز، بو حادثه عنایتدن ممنونیتی ایچون، اوکّا اوزاق

بر ناحیه دن گلن، یووارلاق، هیچ گورمدیگمز و بوراده بولونمیان بر کوچک اُکمگی او خانه صاحبه سنه ویردی. عین وقتده یگرمی دقیقه ظرفنده، بوراده بولونمیان او عین اُکمکدن بش مثلی، ایکی سنه رساله نورک بر کتابنی آلوب مطالعه سنک معنوی اجرتنک بیگده بر اجرتی اولارق گلدی. و بر پارچه عاشورا چورباسنی دخی ینه او او صاحبه سنه ویردی. عیناً او عاشورانک اون مثلی قدر، اوچ لطیف اُکمک، ینه ایکی سنه ایکی کتابک اوقوماسنه بیگده بر اجرت اولارق گلدی. گوزیمزله گوردک.

هم بوگون او خانه صاحبه سنک، یدی سنه در آدینی بیلمدیگی ایچون استادیمز اوکا "إسمک نه در؟" دییه صوردی. دیدی: خیریه در. خیریه إسمنده اولمق تفألله، ایکی ساعت صوگره، خیری نامنده رساله نورک بر شاکردی، خبریمز یوقکن إستانبوله گیتمش. هم تجارت مناسبتیه ایکی مهم شاکردلری دخی گیدوب گج قالدیلر. مادّی و معنوی فورطنه لر مناسبتیه استادیمز هم اونلری، هم اوراده کی مهم بر شاکردی ایچون چوق مراق ایدیوردی. بوگون او خیری، ایکی ساعت او خیریه دن صوگره قیوی آچدی گلدی؛ او اوچ شاکرد حقّنده کی مراقی إزاله ایتمکله برابر، استادک درت آیدن بری دوام آیدن تفاریق نامنده کی بر قوقوسی بوگون بیتمش کندیمز گوردک. خیرینک بر کوچک شیشه أنده، "ایشته سزه تفاریق گتیردم." دیدی. ایشه بو کوچک، لطیف تفاریقده کی توافقه بارک الله دیدی.

بو ایکی گون ظرفنده بو کوچک نمونه لر گبی، استادیمز معجزات اُحمديه نك (عصم) تصحیحاتیه مشغول اولدیغی ایچون، چوق نمونه لر گورمش. مادام ایکی گون ظرفنده بو قدر عنایاتک جلوه لرینی گوروپورز. رساله نور دائره سی

ایچنده دقت ایدیلسه هرکس (کندی نفسنده) خدمتی درجه سنده بویله نمونه لری گوره جکدر.

رساله نور شاکر دلرندن
 اوت، بن ده تصدیق ایدیورم.
 حلمی، امین، کامل، فیضی، حافظ احمد
 سعید النورسی



فیضیله امین دیورلر: استادیز اولان رساله نورک جدی حقائقلری ایچنده اڭ طاتلی بر فاکهه سی توافق اولدیغی ایچون، قارداشلیمزه ینه بو ایکی گون ظرفنده کوچک بر ایکی توافقی، سزه بوندن اولکی توافقه حاشیه اولارق یازیورز:

اوت ناصلکه کلماتده و کلمات مکتوبه ده توافق؛ بر قصد، بر عنایت خصوصیه یی گوستریور. بعضاً خارقه اولوب کرامت درجه سنه چیقیور. بعضاً لطیف بر ظرافت ویریور. عیناً او یله ده، رساله نوره عائد و استادیمزه عائد حادثاتده ده عیناً قصدی و عنایتکارانه توافقی، اقوالده اولدیغی گبی، او افعالده ده گوروورز. از جمله:

سزه یازیلان، درت آی گلهمین خانه صاحبه سی ایچون امین قارداشمزه دیدی: "خبر گوندر" تکلّمنده، اونڭ قپو چالماسی توافق ایتدیگی گبی؛ عین جمله یی بر گون صوگره ایکی دفعه او قودیغی زمان، "امینه دیدیگی" کلمه سی او قوندیغی آننده، آشاغیده کی قپوی امین آچدی. گلمک زمانی گلهمدن گلدی.

ایکنجی گون، ینه باشقه بر آدمه اوقوندیغی وقت، "أمینہ دیدیگی" کلمه سنی اوقودیغی وقت، عین آنده یوقاری قپوی آمین آجدی، کلمه عادتته مخالف اولارق گلدی، گیردی. بو ایکی توافق، خانه صاحبه سنک توافقنه توافقی گوستریور که؛ اُک جزئی ایشلریمز ده تصادف دگل، قصدی توافقدر.

هم درت آی اُول بزه بر پارچه تارخانه گتیرن رسالهُ نور شاکردلرندن فؤادکُ إستانبوله گیدوب، اوتوز گون تأخیرندن گج قالماسندن اُنَدیشه ایتدیگمز عین گونده، اونکُ تارخانه سی بیتدیگی عین گونده کلمه سی، توافق ایتدی.

هم عین گونده، بر پارچه تره یاغی، (بز ده استادیمز ده بونکُ برکتنی حسّ ایدیوردق) بیتدیگی دقیقه ده اونکُ مقدارینه توافق ایدوب، ظنّمزجه عین یردن، عین مقدار، عین زمانده گلدیگی گبی؛ هم بورالرده کویلرده، کول ایچنده یاپیلان بر چورک، استادیمزکُ خوشنه گیتدیگی ایچون صباح آقشام اوندن ییوب و اون بش گون دوام ایدن و بیتدیگی عین گونده، عین چورکدن، اونکُ اُقرباسندن بریسی گتیردی. بو توافقکُ خاطری ایچون گری چویرمدی، قبول ایتدی. گوزیمزله بو لطیف توافقه کی شیرین عنایاتِ إلهیه نکُ جزئی جلوه لرینی گوردک و آکلاّدق که، کور تصادف ایشمزه قاریشمییور. معنیدار توافق، رسالهُ نورکُ کلماتنده و حروفاتنده اولدیغی گبی، اوکُ تماس ایدن حرکات و أفعالده دخی معنیدار توافقلر وار. عنایته تماس ایتدیگی ایچون، اُک جزئی بر شی ده اولسه قیمتی بیوکدر. بویله اوزون یازمق و زیاده اُهمیت ویرمکُ إسراف اولماز. چونکه، معناسی اولان عنایت و إلتفاتِ رحمت مراددر. و او بحث ده، معنوی بر شکردر.

رسالهُ نور شاکردلرندن

أمین، فیضی

رساله نور أجزالرينى محكمه دن آلوب، بڭاگتوروب تسليم ايدن
حافظ مصطفى يه خطابدر.

﴿بِاسْمِهِ سُبْحَانَهُ ۖ وَإِنْ مِنْ شَيْءٍ إِلَّا يُسَبِّحُ بِحَمْدِهِ﴾
﴿السَّلَامُ عَلَيْكُمْ وَرَحْمَةُ اللَّهِ وَبَرَكَاتُهُ بَعْدَ حُرُوفَاتِ رَسَائِلِ النُّورِ﴾

سن بيڭلر صفالره گلدڭ، بنى أبدى منتدار ايتدڭ. و صادق آرقداشلرڭ ايله رساله نورڭ سربستيتنه خدمتڭز او درجه بيوك و قيمتداردر، دڭل يالڭز بزي و رساله نور شاكردلرينى، بلكه بو مملكتى، بلكه عالم اسلامى معنا منتدار ايتديڭز كه؛ اهل ايمانڭ امدادينه يتيشمگه رساله نورڭ يولنى سربستجه آچديڭز. بن، بر سنه دن برى سنى و سنگله برابر رساله نورڭ بو سربستيتنه چالیشانلرى، حافظ على و خسرو گي رساله نورڭ قهرمانلريله برابر معنوى قزانجلىریمه و دعالریمه شريك ايتمشم؛ هم دوام ایده جڭ. بورايه قدر يولده كى هر بر دقيقه، بر گون خدمتده بولونمق گي بنى منتدار ايله دڭ.

حاکم عادل نامنى آلان معلوم ذاتى و لهمزده اونڭله برابر چالیشانلرى، بو حقيقى عدالته خدمتلرى ايچون آخر عمریمه قدر اونوتمیه جغم. آلتى یدى آيدر اونلرى ده عینا معنوى قزانجلىریمه شريك ايدييورم. بڭا تسليم ايتدكلرى رساله لرڭ بر قسمنى، قارداشلىریمه جواب ویره جگم، بتوننى يازسينلر، اونلره هديه ایده جگم. چونكه اونلر، رساله نورڭ بوندن صوڭره كى خدمتنه تام حصّه داردرلر. بو مسئله ده بن دڭزلى شهرينى كندى قريه مه آرقداش ايدوب بتون أمواتنى و اهل ايمانڭ حياتده اولانلرينى هم كندم، هم رساله نورڭ طلبه لرى، معنوى قزانجلىریمه حصّه دار ايتمگه قرار ویردڭ. دڭزلى چپسخانه سنى ده، بر إمتحان مدرسه مز

تلّقی ایدیورز. و بزملة علاقه دار هم دڭزلیده، هم چپسندة عمومנה و خصوصنه و تام عدالتنی گوردیگمز محکمه هیئتنه چوق سلام و دعالر ایدرز.

سعید النورسی



﴿بِاسْمِهِ سُبْحَانَهُ﴾

﴿السَّلَامُ عَلَيْكُمْ وَرَحْمَةُ اللَّهِ وَبَرَكَاتُهُ﴾

بشنجی نقطه: رسالۀ نور، بو آناتولی مملکتنه بلالرک دفعنه اُهمیتلی بر وسیله در. صدقه ناصل بلایي دفع ایدیور، اونک انتشاری و اوقونماسی کلّی بر صدقه نوعنده سماوی و ارضی بلالرک دفعنه وسیله اولدیغی چوق اماره لر و چوق حادثه لرله تبیین ایتمش. حتّی قرآنک اشارتیه تحقّق ایتمش. و یازماسنی و انتشارینی منع ایتمک زمانلرنده درت دفعه زلزله لرک باشلاماسی و انتشاریه طورمالری و آناتولیده اکثر یرلرده اوقونماسی، حرب عمومینک آناتولی یه گیرمه مسنه بر وسیله اولدیغی سورۀ ﴿وَالْعَصْرِ﴾ اشارت ایتدیگی حالده، بو ایکی آی قوراقلق زماننده محکمه نک رسالۀ نورک برائنه و وطنه منفعتلی اولدیغنه دائر قرارینی محکمه تمیز تصدیق ایده رک تام بر سربستیتله رسالۀ نورک انتشاری و اوقونماسنی بکلرکن، بتون بتون عکسنه اولارق منع ایدیلمسی و محکمه ده کی رساله لر ی صاحب لرینه إعاده ایدیلدیگی حالده، بزى ده او جهتجه قونوشمقدن منع ایتمه لر ی جهتیه، بلالرک دفعنه وسیله اولان بو کلّی صدقه معنویه بلایه قارشى چیقامدی، گناهمز نتیجه سی قوراقلق باشلادی.

بز رسالۀ نور شاکردلری دنیایه چوق اُهمیت ویرمديگمزدن، دنیایه یالکز رسالۀ نور ایچون باقدیغمزدن، بو یاغمورسزلقده دخی او نقطه‌دن باقییورز. ایشته دگزلیده محکمه‌یه ویریلن جزئی بر قسم رسالۀ نور، صاحب‌لرینه إعاده‌سنک عین زماننده، بوراده دخی بر قسم ذاتلر یازمغه باشلامالری عین وقتده، بو یاغمورسزلقده بر درجه رحمت یاغدی، فقط رسالۀ نورک سربستی جزئی اولماسندن، رحمت دخی جزئی قالدی. إن شاء الله یاقینده بنم ده رساله‌لرم إعاده ایدیله‌جک، تام سربست و إنتشاری کلّیلشه‌جک و رحمت دخی تام اولاجق. (حاشیه)



﴿بِسْمِ سُبْحَانَهُ﴾
﴿السَّلَامُ عَلَيْكُمْ بَعْدَ قَطَرَاتِ الْمَطَرِ فِي لَيْلَةِ الرَّغَائِبِ﴾

نورک بکجیی

عزیز قارداش‌لرم!

سزه ایکی پوصله‌یی لیلۀ رغائب‌دن آلتی ساعت اول یازدم. "حزبِ نوریه" و خسروک کاغدی ایله تسلیم‌دن صوگره، قطعیا بنم قناعت‌ده بر نوع معجزۀ اُحمديه اولارق، ایکی آیدن بری متمادیا قوراقلق و یاغمورسزلق و هر طرفده دائما نمازلردن صوگره پک چوق دعالرک عقیم قالدیغی و هرکس مأیوسیتندن دردِ معیشت اُن‌دیشه‌سیله قلبا آغلارکن، بردن لیلۀ رغائب (بتون عمرمه هیچ ایشیت‌مديگم و باشقه‌لری ده ایشیت‌مديگی) اوچ ساعتده یوز دفعه، بلکه فضله تکرارله ملّکِ رعدک بو یوکسک و شدتلی تسبیحاتیله اوילה بر رحمت یاغدی

(حاشیه): هم عینا اويله اولدی، بز گوردک.

کہ؛ اُکْ معنّده دخی لیلہ رغائبکْ قدسیتی و حضرت رسالتکْ بر درجہ، بر جہتہ عالم شہادتہ تشریفکْ عموم کائناتجہ و بتون عصرلرہ نظر اُہمیتہ و رحمہ للعالمین اولدیغنی إثبات ایتدی و کائنات او گیجہی آلفیشلا یور دیہ گوستردی. عجباً، دعالیمزده إسپارطہ بو مملکتلہ برابر دی، بو یاغمورده حصّہ سی وار می، مراق ایدیورم. شیمدی یہ قدر چوق امارہ لرلہ رسالہ نور بر وسیلہ رحمت اولماسندن، بو رحمت ایما ایدر کہ، ہر حالده بر فتوحاتی پردہ آلتندہ واردر و بلکہ سربستیتنہ بر إشارتدر. (حاشیہ) ہم بورادہ "لمعہ لر"کْ ویردکلری إشتیاق جہتیلہ یازیجیلرکْ چوغالمہ سی، إن شاء اللہ بر نوع مقبول دعا حکمنہ گچدی.

دعاگزہ محتاج قارداشکْز

سعید النورسی

رسالہ نور طلبہ لری نامنہ

أوت أوت

محمد جیلان



(حاشیہ): سوکْزہ تحقّق ایتدی کہ؛ عین زماندہ ہم فتوحاتی ہم سربستیتی پردہ آلتندہ تحقّق

ایتمش.

﴿بِسْمِهِ سُبْحَانَهُ﴾
﴿السَّلَامُ عَلَيْكُمْ وَرَحْمَةُ اللَّهِ وَبَرَكَاتُهُ﴾

عزیز صدیق قارداشلرم!

لیلہ معراجک، عین لیلہ رغائب گبی هیچ إنکار ایدیلمز بر طرزده، بر نوع معجزه احمديه گبی بر کرامتی و کائناتجه حرمتی گوزیمزله گوردک. شویله که:

ناصل اولجه یازدیغمز گبی، ایکی آی قورافلک ایچنده بوراده هیچ یاغمور گلمدیگی، گویا لیلہ رغائبی بکله یور گبی او مبارک گیجه نك گلمه سیله أمثالسز بر گورولتی ایله قدسیتی بوراده گوستردیگی گبی؛ عینا او یله ده: او گیجه دن بری بورایه بر قطره یاغمور دوشمه دیگی حالده، یگرمی گوندن صوگره عینا معراج گیجه سی بردن بره او یله بر رحمت یاغدی که، دینسزلرده شبهه بیراقدی که؛ صاحب المعراج رحمه للعالمین اولدیگی گبی، اونك معراج گیجه سی ده بر وسیله رحمتدر. هم اهل ایمانك ایمانلرینی قوتلندیردیگی گبی، مایوسیتلرینی ده بر درجه ازاله ایتدی.

حال عالمی بیلمیورم، فقط حسن ایدیورم که: اهل ایمان هم خارجی بر قاچ طرفده تضییقات، هم داخلی اُنَدیشه لر و قورافلقدن گلن درد معیشت و نقطه اِستنادی دنیاچه بولامامقدن اُهمیتلی بر مایوسیتك تأثیریله، حتی عبادته قارشى بر فتور گلمشدی. بردن معراج گیجه سی، بوراده کرامتيله لیلہ رغائبك کرامتی تقویه ایده رک، اهل ایمانه بیلدیردی که: "سز صاحبسز دگلسگز. کائنات قبضه سنده بولونان بر ذاتك، عالمه رحمت گوندردیگی بر اِستنادگاهز واردر." دییه مایوسیت و اُنَدیشه لرینی قسما ازاله ایلدی.

هم رسالہ نورک بر سلسلہ کرامتنی تشکیل ایدن توافق، بو حادثہ ده هیچ تصادفه حواله ایدیلمز بر طرزده اوچ درت توافقله، لیله معراج و لیله رغائب حرمتلرنده رسالہ نورک ده بر حصّه سی وار اولدیغنی گوردک.

برنجی توافق: ابتدا و إنتهاء ترقیات حیاتِ اُحمديه نك عنوانلری اولان لیله رغائب و لیله معراج بو قوراقلق زماننده کثرتلی رحمتده توافقلریدر.

ایکنجی توافق: بوگونلرده خسروک توافقلی یازدیغی معراج رساله سنی بوراده رسالہ نور طلبه لری شوقه گلوب عینا توافقنی، حتی یدی "فقط، فقط، فقط" کلمه لرینک پارلاق توافقنی گوسترن نسخه لری یازدیلر، بیتیردیلر. بن ده تصحیح ایدیوردیم، باشقه لری ده اوقویوردیلر. بردن معراج گيجه سی کثرتلی رحمتی ایله گلمه سی، رسالہ نورک یازیلما سی و خسروک معراج رساله سی و إنتشاری دخی بر وسیله رحمت اولدیغنی طلبه لرینه بر قناعت ویردی. ایکی اوچ توافق داها وار. بزه قطعی قناعت ویریور که؛ تصادف ایچنده یوقدر. طوغریدن طوغری یه بو معنّد زمانده شعائرِ اسلامیّه نك اُهمیتلرینی گوسترمگه بر إشارتدر. عموم قارداشلریمه سلام و معراجلرینی تبریک ایدرم.

﴿الْبَاقِي هُوَ الْبَاقِي﴾

قارداشکز

سعید النورسی

أوت، استادیمزی تصدیق ایدیورز.

محمد، محمد، عثمان، ابراهیم، جیلان، خیری و سائرہ...



﴿بِاسْمِهِ سُبْحَانَهُ﴾
﴿السَّلَامُ عَلَيْكُمْ وَرَحْمَةُ اللَّهِ وَبَرَكَاتُهُ﴾

عزیز، صدیق قارداشلرم!

بر سؤال: "توافقه بو کرامت ناصل قطعی ثابت اولویور؟" دییه قارداشلریمزدن بریسنک سؤالنه کوچک بر جوابدر.

الجواب: بر شیده توافق اولسه، کوچک بر أماره اولور که؛ اونده بر قصد وار؛ راست گله بر تصادف دگل. و بالخاصه بر توافق بر قاج جهته اولسه، او أماره تام قوتلشیر. و بالخاصه یوز احتمال ایچنده ایکی شیئه مخصوص و او ایکی شی بربريله تام مناسبتدار اولسه، او توافقدن گلن إشارت صریح بر دلالت حکمنه گچر که؛ بر قصد و إرادة ایله و بر مقصد ایچون او توافق اولمش، تصادفك احتمالی یوق.

ایشته بو مسئله معراجیه ده عینا بویله اولدی. طقسان طوقوز گون ایچنده یالکز لیلۀ رغائب و لیلۀ معراجیه یاغمور و رحمتك توافقی و او ایکی گیجه و گونه مخصوص اولماسی، داها أؤل و داها صوگره اولماسی و إحتیاج شدیدك تام وقتنه موافقتی و معراجیه رساله سنك بوراده چوقلر طرفندن شوق ایله قرائت و کتابت و نشرینه راست گلمسی و او ایکی مبارک گیجه نك بربريله بر قاج جهته توافق ایتمه سی و موسمی اولمادیغی حالده عجیب گورولتیلرله، سونیه جك مادی معنوی زمین گورولتیلرله فریادلرینه تهدیدکارانه و تسلیدارانه توافق ایتمه سی و أهل ایمانك مأیوسیتندن تسلی آرامالرینه و ضلالتك صولتندن گلن وسوسه و ضعفیته قارشى قوۀ معنویه نك تقویه سنی ایسته ملرینه تام توافقی و

بو گیجه لر گبی شعائرِ اسلامییه قارشى حرمتسزلک ایدنلرک خطالرينه بر تکدير اولارق، کائنات بو گیجه لره حرمت ايدر، نه دن سز ايتمييورسکز؟ ديهه معناسنده، کثرتلى رحمتله شعائرِ اسلامییه قارشى، حتّى سماوات و فضايِ عالم حرمتلرينى گوسترمکله توافق ايتمه سی، ذره مقدار انصافى اولان بيلير که؛ بو ايشده خصوصى بر قصد و اراده و اهل ايمانہ خصوصى بر عنایت و مرحمتدر، هيچ بر جهتله تصادف احتمالى اولاماز. ديمک حقيقتِ معراج، بر معجزه احمدیه (عصم) و کرامتِ کبراسى اولديغى و معراج نردبانى ايله گوکلره چيقماسى ايله ذاتِ احمدیه نك (عصم) سماوات اهلنه اهميتنى و قيمتى گوستردیگی گبی؛ بو سنه کی معراج ده زمينه و بو مملکت اهلپسنه کائناتجه حرمتنى و قيمتى گوستروب بر کرامت گوستردی.

دعاکزه محتاج قارداشکز
سعيد النورسى



(*) عزیز، صدیق قارداشلرم!

بزم قطعياً شكّ و شبهه مز قالمادی که؛ بو خدمتمزک نتیجه سی اولان رساله نورک سربستيتنى دگل يالکز بز و بو آناتولى و عالم اسلام آقيشلايور، تقدیر ایدیور؛ بلکه کائنات دخى ممنون اولوب جوّ سما و فضايِ عالم آقيشلايور که؛ اوچ درت آیده بر ياغموره شدّتِ احتياج وارکن گلمدى،

(*) بو مکتوب مکرر در. فقط گچنى مقدّمه یه گیره جک، بو ايسه خاتمه ده قالاجق ديهه

ايليشمدم.

یالکز آنقره تسلیم قرارینه توافق ایدن لیلۀ رغائبده کی أمثالسز و گورولتولی رحمتک گلمه سی و دگزلیده محکمه نڭ بالفعل تسلیمنه قرار ویرمه سی، ینه لیلۀ معراجده عینا رسالۀ نورک بر رحمت اولدیغنه إشارة لیلۀ رغائبه توافق ایدهرک کثرتله ملک رعدک آقیشلاماسیله و رحمتک امیرطاغنده گلمه سی، او تسلیم قرارینه توافق ایتمه سی و بر هفته صوگره دیمک دگزلیده و کیلریمزک ایلله آلینمه سی هنگاملرنده ینه عینا لیلۀ معراج و لیلۀ رغائبه توافق ایدهرک عینا اونلر گبی، شعبان شریفک بر جمعه گیجه سنده کثرتلی رحمت و یاغمورک بو مملکتده گلمه سی اونلره توافقلریله قطعی قناعت ویررکه؛ رسالۀ نورک مصادره سنه و چپسنه درت زلزله لرک توافقی کرۀ ارضجه بر اعتراض اولدیغی گبی، بو امیرطاغی مملکتده درت آی ظرفنده یالکز اوچ جمعه گیجه سنده که (بری لیلۀ رغائب و بری لیلۀ معراج، بری ده شعبان معظمک برنجی جمعه گیجه سنده) رحمتک کثرتله گلمه سی و رسالۀ نورک ده سربستیتنک اوچ دوره سنه تام تامنه توافق ایتمه سی؛ کرۀ هوائیه نڭ بر تبریکی، بر مژده سیدر و رسالۀ نور دخی معنوی بر رحمت بر یاغمور اولدیغنه قوتلی بر إشارتدر.

و اُک لطیف بر أماره ده شودرکه؛ دون بردن بره بر سرچه قوشی پنجره یه گلدی، پنجره یه ووردی. بز اوچورمق ایچون إشارت ایتدک، گیتمه دی. مجبور اولدق، دیدم: "پنجره یی آچ، او نه دییه جک؟" گیردی طوردی، تا بو صباحه قدر؛ صوگره او اوطه یی اوکا بیراقدق، یاتاق اوطه مه گلدم. بو صباح چیقدم، قپوی آچدم؛ یاریم دقیقه ده دوندم. باقدم "قدّوس قدّوس" ذکرینی یاپان بر قوش اوطه مده گوردم. گوله رک دیدم: "بو مسافر نه ایچون گلدی؟" تام بر ساعت بڭا باقدی، اوچمادی، اورکمه دی. بن ده اوقویوردم، بر ساعت بڭا باقدی. اُکمک بیراقدم، ییمه دی. ینه قپوی آچدم چیقدم، یاریم دقیقه ده گلدم؛ او مسافر

ده غائب اولدی. صوگره بگا خدمت ایدن چوجق گلدی، دیدی که: "بن بو گیجه گوردم که، مرحوم حافظ علی نك (رح) قارداشی یاغزه گلמש." بن ده دیدم: حافظ علی و خسرو گی بر قارداشمز بورایه گله جك. عین گونه، ایکی ساعت صوگره چوجق گلدی دیدی: "حافظ مصطفی گلدی." هم رساله نورك سربستیتك مزده سنی، هم محکمه ده کی کتابلرینی ده قسما گتیردی؛ هم سرچه قوشنك و بنم رؤیامك، هم قدوس قوشنك تعبیرینی اثبات ایتدی که، تصادف اولمادیغنی گوستردی.

عجبا أمثالسز بر طرزده هم سرچه قوشی عجیب بر صورتده، هم قدوس قوشی غریب بر صورتده گلوب باقماسی، صوگره غائب اولماسی و معصوم چوجغك رؤیاسی تام تامنه چیقماسی، هم رساله نورك حافظ علی گی بر ذاتك ألیله بورایه گلمه سنك عین زمانه توافقی هیچ تصادف اولایلیر می؟ هیچ بر احتمالی وار می که، بر بشارت غیبیه اولماسین؟ (حاشیه)

أوت بو مسئله، کوچك بر مسئله دگل؛ کائنات و حیوانات ایله دخی علاقه دارد. أوت، رساله النور سربستیتندن بن رساله نورك بر شاکردی اولق

(حاشیه): هم بو قوشلرك رساله نورله علاقه دارلقلرینی تأیید ایدن چوق أماره لر وار. أز جمله: او قوشلرك علاقه دارلغنی گوسترن مکتوب میلاسه گیتدیگی عین وقتده غریب بر طرزده قدوس قوشی او مکتوبك مثالنی وضعیتیه تأیید ایتدیگی گی؛ عین مکتوب اینه بولیده گیجه لین اوقونوركن بیوك بر گیجه قوشی خارقه بر طرزده پنجره به گلوب قنادیله ووروب طوروب دیکلمه سی؛ عین مکتوب صاوه ده اوقونوركن بر دفعه ایکی چکرگه اوستنه گلوب طوروب نتیجه قدر طورمالری؛ بر دفعه ده سرچه و بلبل قوشلری عین مکتوبك اوقوناسنده پروانه گی اوچوب علاقه دارلق گوسترمه لری و إسپارطه ده خسروك أونده عین مکتوب اوقونوركن بلبل قوشی خلاف عادت صالونه گلمه سی، علاقه دارلغنی گوسترمسی گی چوق أماره لر، بو کرامت نوریه یی تأیید ایدیور.

إعتباريله، كندی حصّه‌مه دوشن بو كار و نتیجه‌یی، بیگلر آلتون لیرا قدر قزانجم وار قناعت ایدیورم. باشقه یوز بیگلر رساله نور شاکردلری و تقویه ایمانه محتاج أهل ایمانك استفاده‌لری بوڭا قیاس ایدیلسین.

أوت دینك و شریعتك و قرآنك یوزدن زیاده طلسم‌لرینی، معمّالرینی حل و كشف ایدن و أكّ معنّد دینسزلری صوصدیروب إلزام ایدن و معراج و حشر جسمانی گبی صرف عقلدن چوق اوزاق ظن ایدیلن قرآن حقیقتلرینی أكّ متمرد و أكّ معنّد فیلسوفلره و زندیقلره قارشى گونش گبی إثبات ایدن و اونلرك بر قسمنی ایمانه گتیرن رساله نور أجزالری، ألّته كُرّه أرضی و كُرّه هوائیه‌یی كندی ایله علاقه‌دار ایدر و بو عصری و إستقبالی كندی ایله مشغول ایده‌جك بر حقیقت قرآنیه‌در و أهل ایمان ألّنده بر ألماس قلنجدر.

﴿الْبَاقِي هُوَ الْبَاقِي﴾

أمیرطاغنده قارداشكز

سعيد النورسی



رساله نورك قهرمانی خسرو طرفندن قلمه آلینمشد

﴿بِسْمِهِ سُبْحَانَهُ﴾

رساله نورك كرامت‌لرنندركه: استادیمر رضی الله عنه چوق دفعه رساله‌لرده: "أی ملحدلر و أی زندیقلر! رساله النوره ایلشیمه‌یكز. أكر ایلشیرسه‌كز، یاقینده سزی بکله‌ین بلالر، سیل گبی باشكزه یاغاجقدر." دییه

اون سنه دن بری کراتله سویله یورلردی. بو خصوصده شاهد اولدیغمز فلاکتلردن:

برنجیسی: درت سنه اول ارزنجانده و ازمیر جوارنده وقوعه گلن حرکت ارض اولمشدر. او وقتلر منافقلا، دسیسه لرله اسپارطه منطقه سنده صاوه و قله اوئی و جواری کوپلرده کی رساله نور طلبه لرینه ایلشیدیلر. اوتوز قرق قدر رساله نور طلبه لرینی "جامعه گیتیمیورسکز، تاکیه گییورسکز، طریقت درسی ویریورسکز." دییه محکمه یه سوق ایتمشلردی. جناب حق، ازمیر جوارینی و آزریلری و جوارنده کی خلقی دهشتلر ایچنده بیراقان زلزله لر ایله رساله نورک بر وسیله دفع بلا اولدیغنی گوستردی. بو زلزله لر دن بر هفته صوگره، محکمه یه سوق ایدیلمش اولان او قارداشلریمزک هپسی برائت ایتدیرلرک قورتولمشلردی.

ایکنجیسی: ینه وقت وقت رساله نور طلبه لرینک آرقه لرنده قوشمقده دوام ایدن ملحدلر، خط قرآن ایله چوجق اوقوتدق لرینی بهانه ایدهرک اسپارطه ده متوق محمد زهدی (رحمة الله علیه) ایله صاوه قریه سندن حافظ محمد (رحمة الله علیه) ائسمنده کی ایکی رساله نور طلبه سنه هجوم ایتمشلر. نور درسنی اوقویان چوجقلری، بو ایکی قارداشیمزک اولرندن آیینان رساله نور أجزالریله برلکده محکمه یه سوق ایدیلمش. مرحوم محمد زهدی، پاره جزاسیله محکوم ایدیلیمک ایسته نیلمش. نتیجه ده، مرکزی أریعه و طوقاتده وقوعه گلن ایکنجی بر قورقونج زلزله ایله جناب حق، رساله نور بر وسیله دفع بلا اولمقله شاکردلرینه یاردیم ایدهرک استادلرینک ویردیگی خبرک صحتنی تصدیق ایتیمک ایچون او قارداشیمز برائت ایتدیرمش و آیینان بتون رساله نور أجزالرینی کندیلرینه إعاده ایتدیرمشدر.

اوچنجیسی ایسه: ایچنده بولوندیغمز دگرلی چپسخانه سنده کی مصیبتک باشمزه گلمه سنه سبب اولان او منافقلا؛ رومی ییک اوچ یوز ألی طوقوز (۱۳۵۹)

سنه‌سنده تکرار باشده سۆگیلی استادیمز اولدیغی حالده، بزه و رساله‌ النوره هجوم ایتدیلر. بر قسممزی إسپارطه‌دن طویلا دیلر، بر قسمنی چیوریلدن إسپارطه‌یه گتیردیلر، سۆگیلی استادیمزی ده یالکز اولارق قسطمونیدن إسپارطه‌یه سوق ایتدیلر. داها باشقه ولایتلردن ده آرقداشلریمز إسپارطه‌یه گتیریلمشدی. اهل غرضك اغفالنه قاپیلان إسپارطه عدلیه‌سی، رساله‌ النورك غایه‌سی خارجنده بولونان جبهه‌لرده، بزجه معناسی اولمیان إتهاملر آلتنده بزی صیقیوردی. بالخاصّه قیمتدار استادیمزی داها چوق تضییق ایتدکلری وقت، استادیمزه لزوملی لزومسز بر چوق سؤالر آچان إسپارطه مدّعی عمومیسنك: "بو بلالر دیدیگك نه‌در؟" دییه اولان سؤالنه جواباً: اوت دیمش، زندیقلر اگر رساله‌ النوره و شاکردلرینه ایلیشسه‌لر، یاقینده بکله‌ین بلالرك حرکت ارض صورتیله گله‌جگنی سویله‌مشدی.

داها صوگره بزی دگزیله سوق ایتدیلر. قسطمونی، إستانبول، آنقره داخل اولمق اوزره اون ولایتدن عدلیه‌لره سوق ایدیلن یوزی متجاوز رساله‌ نور طلبه‌لرینك بر قسمی بیراقیلیمش، یتیمش کیشیدن عبارت اولان بر دیگر قسمی ده دگزیلده "مدرسه‌ یوسفیه" نامی آلان حپسده بولونویوردی. بزم بتون مراجعتلریزه صودن جواب ویریلییور، سۆگیلی استادیمز داها چوق تضییق و صیقنتی ایچریسینده یاشاتدیریلییور، عفونتلی، روطوبتلی، ظلمتلی، هواسز بر یرده بتون بتون قونوشمقدن و تماسدن منع ایدیلیمك صورتیله حپس منفردده عذاب چکدیریلییوردی.

ایشته بو صیره‌لرده دگزیلی زندانتك بو دهشتلی اضطرابلرینی گچرمکده ایدك. الله‌دن باشقه هیچ بر إستنادگاهلری بولونمیان بو بیچاره‌لرك بر قسمی قسطمونیدن، دیگر بر قسمی اینه‌بولیدن، دیگر بر قسمی ده إستانبولدن هنوز

کلمہ مشلردی. شو وطنک هر کوشه سنده حق و حقیقت ایچون چیرینان و صاف قبلریله نجاتلری ایچون رب رحیملرینه إلتجا ایدن پک چوق معصوملرک سماواتی دلوب گچن و عرش الرحمانه طایانان آهلری بوشه گیتمه دی. الله ذو الجلال حضرتلری، او مبارک استادیمزک إسپارطه ده سویله دیگی گی، معصوملری جنته گوتورن، ظالملری جهنمه یووارلایان دهشتلی بر دیگر زلزله یی گوندردی. قارشیسنده رساله النور مدافعه وضعیتنده بولونما مسندن چوق خانه لر خراب اولدی، چوق انسانلر أنقاض آلتنده ازیلدی، چوقلری سوقاق اورتهلرنده قالدی. هنوز مملکتلرینک چپسخانه لرنده بولونان قارداشلریمزدن قسطمونیدن محمد فیضی و صادق و امین و حلمی و اینه بولیدن أحمد نظیف، دکرلی چپسخانه سنه سوق ایدیلدکلرنده شو معلوماتی ویردیلر:

"زلزله تام گیجه ساعت سکزده باشلادی. بتون آرقداشلر، ﴿لَا إِلَهَ إِلَّا اللَّهُ﴾ ذکرینه دوام ایدیوردق. زلزله بتون شدتیه دوام ایتمکده ایدی. او صیره ده خاطریمزه گلدی: رساله النوری عشقله و بر سائق ایله اوچ بش دفعه شفاعتجی ایدهرک جناب حقدن خلاص ایستدک. الحمد لله، درحال ساکن اولدی.

قسطمونیده ایسه، او گیجه قلعه دن قوپان چوق بیوک بر طاش، آشاغی یووارلانارق بر خانه یی آزمش، بر چوق خانه لرده یاریقلر، چیققلقلر اولمش، بر قاچ او چوکمش، حکومت بناسی یاریلمش، داها بونک گی خسارات و ضایعات اولمش. فقط زلزله هر گون اولق صورتیه بر مدت دوام ایتمش. طوسییه ده ییک بش یوز او خراب اولمش، ئولو و یاره لی مقداری چوق فضله ایش. قارغی و عثمانجق تماماً، لادیک و سائر محللرده ضایعات فضله مقدارده ایش. اینه بولیده بر مناره نک عکمی اگریلمش، اوفاق تفک چاتلاقلقلر اولمش، خسارات و ضایعات اولماش."

أحمد نظیف، امین، صادق، محمد فیضی

اوچنجی اولان بو حرکتِ اَرَضْدَن صوڭره، ینه رسالَه النوره و طلبه‌لرینه و مؤلفنه هجوم ایدن اهلِ غرضک سوزینی دیکله‌ین عدلیه، عین طرزده بزى صیقمقده دوام ایدیوردی. زندقه طرفدارلری، مبارک استادیمزکِ إخبارلری اولان و رسالَه نورکِ بیوک کرامتلرندن اولوب زلزله‌لر اَلیله گلن بلیه‌لره اَهمیت ویرمک ایسته‌میورلردی. رسالَه نورکِ إلهی و قرآنی حقیقتلرینه قارشى جبهه آلان بو زمره‌نک باشنه بر دردنجی طوقات داها گلدی.

غریبی شو که، بز شباطک اوچنجی گونی محکمه‌یه چاغریلمشدق. إضطراب و اَلَملری ایچنده یورکلریمزى آغلالتان خسته‌لقلى حاليله کنديسندن صوریلان سؤالره جواب ویرمک ایچون اَلتمش بش قدر طلبه‌سنک اوڭنده آیاغه قالقان مبارک استادیمزکِ جوابلری آراسنده "او زندیقلرک دنیلاری باشلرینی یسین و ییه‌جک!" کلمه‌لری، تکرار تکرار هیئتِ حاکمه‌نک یوزلرینه قارشى آغزندن دوکولویوردی. بر قاچ دفعه محکمه‌یه گیدوب گلدکدن صوڭره، ۷ شباط ۱۹۴۴ تاریخلی إستانبولده منتشر "همشهری" إسمنده کی بر غزته اَلیمه گچدی. غزته اوقومغه و رادیو دیکله‌مگه هوسلی اولماقلمغمله برابر، "یگرمنجی عصرکِ مدنیلری‌یز" دییه‌رک بوگونکی ترقیاتِ بشریه‌یی کنديلرندن بیلن، اللّهی اونوتان، آخرته اینانغان إنسانلرکِ باشلرینه جنابِ حَقّک، موطورلی واسطه‌لر اَلیله ناصل آتشلر یاغدیديغنی، او منکرلرکِ دونکی جَنّت حیاتلرینکِ بوگونکی جهنّمی حالات ایچنده ناصل گچمکده اولديغنی بیلمک و رسالَه النورکِ برکتيله اَناطولی‌یی بو دهشتلی آتش یاغمورندن ناصل محافظه ایتمکده اولديغنی گورمک و شکر ایتمک حالتندن گلن بر مراق ایله بعض بو گبی حوادثلری صوراردم و دیکلردم.

ایشته بو غزته‌نک ده حرب بوغوشمالرینه عائد رسملرینه باقییوردم. نظریه

چارپان بیوک یازی ایله یازیلماش بر ستونده، آناتولینک یگرمی بر ولایتی صارصان و شباطک برنجی گوتنک گیجه سنده صباحه قارشى هرکس اویقوده ایکن وقوعه گلن و پک چوق ضایعاته مال اولان دهشتلی بر زلزله یی خبر ویریوردی. درحال، شباطک اوچنده محکمه ده سؤگیلی استادیمزک هیئت حاکمه یه "زندیق لارک دنیا لری باشلرینی یسین و ییه جک" دییه تکرار تکرار سویله دیگی سوزلری خاطرلادم. "ایواه!" دیدم، "رساله نور إصلاح ایدر، إفساد ایتمز، إعمار ایدر، خراب ایتمز؛ مسعود ایدر، پریشان ایتمز" دییه سویلرکن، "عکسیله بزى و رساله النورى إتهام ایتمک، خالقک خوشنه گیتیمیور." دیدم.

ایشته مرکزی گره ده، بولی و دوزجه اولان بو قانلی زلزله، رساله النورک دردنجی بر کرامتی ایدی. بو غزته شو معلوماتی ویریور: آنقره، بولی، زونغولداق، چانغری و إزمیت ولایتلرنده فضلہ غائبلر وارمش. گره ده ده ایکی ییک او ییقیلماش، ییقیلیمان اولر ده اوطوریلیمیه جق درجه ده خراب اولماش، بیگدن فضلہ ئولو وارمش، انقاض آلتندن متمادیا ئولو چیقارتیلییورمش. دوزجه ده ضرر چوقمش، ئولو و یاره لیلرک مقداری معلوم دگلمش. آنقره ده یوز اوچ ئولو و بر او قدر ده یاره لی وارمش. بیگه یاقین او ییقیلماش. دباغ خانه ده ایکی او چوکمش، بعض کویلر ده صارصینتی یی متعاقب یانغینلر اولماش. ایلک صارصینتی چوق قوتلی اولماش، صارصینتی یی یر آلتندن گلن بر طاقم گورولتیلر تعقیب ایتمش. بولیدن و دیگر یرلرک کویلرندن بر هفته گچدیگی حالده هنوز معلومات آینه مییورمش. دیگر بر یرده ایکی یوز او ییقیلماش، اون بر ئولو وارمش. بولی ایله تلغراف و تلفون خطلری کسیلماش، زلزله منطقه سنده شدتلی بر قار فورطنه سی حکم سورویورمش. إزمیتده زلزله اولورکن شمشکلر چاقمش، شهر بر قاچ ثانیه آیدینلق ایچنده قالمش. بر چوق یرلر ده خلق

چیریل چیپلاق سوقاقلره فیلامش. دنیانک بتون رصدخانه‌لری بو بیوک آناتولی زلزله‌سنی قید ایتمش. بر انگلیز رصدخانه‌سی صارصینینک چوق خراب ایدیچی اولدیغنی بیلدیرمشد. سینویده عین گونده چوق قورقونج بر فورطنه اولمش، گوک گورولتیلری و شمشکلره گیتدکجه شدتی آرتیرمشد.

داها صوگره باشقه بر غزته‌ده، تمامالییچی و حیرت ویریچی شو معلوماتلری گوردیم: زلزله‌دن اول کدیلر، کوپکلر اوچر بشر اولارق طویلانمشلر، دوشونجه‌لی، حزنلی گبی آلیق آلیق بربرینه باقهرق بر مدّت برابر اوطورمشلر، صوگره طاغیلمشلر. گرک زلزله اولورکن و گرکسه اولمادن اول ویا اولدقدن صوگره ده بو حیوانلردن هیچ بری گورولمه‌مش؛ قصبه‌لردن اوزاقلاشهرق قیرله گیتمشلر. بر غریبی ده شو‌که: بو حیوانلر عصیانزدن متولد اولارق باشمره گله‌جک فلاکتلری لسان حال‌ریله خبر ویردکلرینی یازیورلر ده بز آکلامیورلر دیه‌رک تعجب ایدیورلر.

ایشته استادیمز بدیع الزمان اوزون سنه‌لردن بری "زندیق‌لر رساله‌ نوره طوقونماسینلر و شاکردلرینه ایلیشمه‌سینلر. اگر طوقونورلر و ایلیشیرلرسه یاقیندن بکله‌ین فلاکتلر، اونلری یوز دفعه پشیمان ایده‌جک." دییه رساله‌ نور ایله خبر ویردیگی یوزلر حادثات ایچنده ایشته زلزله آلیله طوغریلغنی امضا ایده‌رک گلن درت حقیقتلی فلاکت داها... جناب حق بزه و رساله‌ نوره تعرض ایدنلرک قلبرینه ایمان و باشلرینه حقیقتی گوره‌جک عقل إحسان ایتسین. بزى بو زندانلردن، اونلری ده بو فلاکتلردن قورتارسین، آمین!

موقوف

خسرو

﴿بِسْمِهِ سُبْحَانَهُ﴾
﴿السَّلَامُ عَلَيْكُمْ وَرَحْمَةُ اللَّهِ وَبَرَكَاتُهُ﴾

عزیز، صدیق قارداشلرم!

شیمدی یه قدر گیزی منافقار، رسالۀ نوره قانونله، عدلیه ایله و آسایش و اداره نقطه سندن حکومتک بعض اُرکانی اغفال ایدوب تجاوز ایدیورلردی. بز مثبت حرکت ایتدیگمز ایچون، مجبوریت اولدیغی زمان تدافعی وضعیتنده ایدک. شیمدی پلانلری عقیم قالدی. بالعکس تجاوزلری رسالۀ نورک دائره سنی کنیشلتدیردی. بو دفعه یگئی حروفله عصای موسی پی طبع ایتمک نیتمز، اختیاریمز اولمادیغی حالده، تجاوز وضعیتی رسالۀ نوره ویریلیور گبیدر. بو حادثه نك اهمیتلی بر حکمتی شو اولمق گرکدر:

رسالۀ نور بو مبارک وطنک معنوی بر خلاصکاری اولمق جهتیه شیمدی ایکی دهشتلی معنوی بلایی دفع ایتمک ایچون مطبوعات عالمیه تظاهره باشلامق، درس ویرمک زمانی گلدی ویا گله جک گبیدر ظن ایدرم.

او دهشتلی بلادن بریسی: خرستیان دینی مغلوب ایدن و آنارشیلگی یتیشدیرن شمالده چیقان دهشتلی دینسزلك جریانی، بو وطنی معنوی إستیلاسنه قارشى رسالۀ النور، سدّ ذو القرنین گبی بر سدّ قرآنی وظیفه سنی گوره بیلیر. و عالم اسلامک بو مبارک وطنک أهالیسنه قارشى پك شدتلی اعتراض و إتهاملرینی إزاله ایتمک ایچون مطبوعات لسانیه قونوشق لازم گلمش دییه قلبمه إخطار ایدیلدی.

بن دنیانك حالى بيلمیورم، فقط آوروپاده إستیلاکارانه حکم ایدن و اُدیان سماوییه طایغیان دهشتلی جریانك إستیلاسنه قارشى رساله نور حقیقتلری بر قلعه اولدیغی گبی؛ عالم اسلامك و آسیا قطعه‌سنك حال حاضرده کی اعتراض و إتهامنی ازاله و اُسکیده کی محبت و اخوتنی إعاده ایتمگه وسیله اولان بر معجزه قرآنیه‌در. بو مملكتك وطن‌پرور سیاسیلری چابوق عقلنی باشنه آلوب رساله نورى طبع ایده‌رك رسمی نشر ایتملری لازمدرکه، بو ایکی بلایه قارشى سپر اولسون.

عجبا بو یگرمی سنه ظرفنده ایمان تحقیقی پی پك قوتلی بر صورتده بو وطنده نشر ایدن رساله نور اولماسه ایدی، بو دهشتلی عصرده عجیب إنقلاب و إنفلاقلرده بو مبارک وطن، قرآنی، ایمانی دهشتلی صدمه‌لردن تام محافظه ایده‌بیلیر میدی؟ هر نه ایسه... رساله نوره، داها وطنه، إداره‌یه ضرری طوقونق بھانه‌سیله تجاوز ایدیلمز، داها کیمسه‌پی او بھانه ایله اینانديرامازلر. فقط جبهه‌پی دگیشدیروب، دین پرده‌سی آلتنده بعض صافدل خواجه‌لری و یا بدعه طرفدارى و یا اُنانیتلی صوفی‌مشربلیلری بعض قورنازلقلرله رساله نوره قارشى (ایکی سنه اول إستانبولده و دگزلی جوارنده اولدیغی گبی) إستعمال ایتمك و رساله نوره و شاکردلینه آیری بر جبهه‌ده تجاوز ایتمگه منافقلر چابالایورلر. إن شاء الله موفق اولامازلر. رساله نور شاکردلری، تام إحتیاطله برابر، بر تعرض اولدیغی وقتده مناقشه ایتمه‌سینلر، آلدیرمه‌سینلر. آلدانان اهل علم و ایمانسه، دوست اولسونلر. "بز سزه ایلشیمیورز، سز ده بزه ایلشیمه‌یگز. بز اهل ایمانله قارداشز."

دیوب یاتیشدیرسینلر.

ثانیاً: مبارک‌لرک پهلوانی هم عبد الرحمن، هم لطفی، هم بیوک حافظ علی معنارینی طاشییان بیوک روحلی کوچک علی قارداشمز بر سؤال صورویور.

حالبوکہ او سؤالک جوابی رسالہ نوردہ یوز یرده وار. "رسالہ نورک اُرکان ایمانیہ حقّنده بو درجه کثرتلی تحشیداتی نه ایچوندر؟ بر اُمی مؤمنک ایمانی بیوک بر ولینک ایمانی گبیدر، دییه اُسکی خواجهلر بزه درس ویرمشلر؟" دییور.

الجواب: باشده آیت الکبرا مراتب ایمانیہ بختلرنده و آخره یاقین مجدد ألف ثانی امام ربّانی بیانی و حکمی که: "بتون طریقتلرک منتھاسی و اُک بیوک مقصدلری، حقائق ایمانیہنک انکشافیدر. و بر مسئلہ ایمانیہنک قطعیتله وضوحی، بیوک کرامتلردن و کشفیاتلردن داها اییدر." و آیت الکبرانک اُک آخرده کی و لاحقه دن آیینان او مکتوبک پارچه سی و تمامک بیاناتی جواب اولدیغی گبی، میوه رساله سنک تکرارات قرآنیہ حقّنده اوننجی مسئله سی، توحید و ایمان رکنلری حقّنده تکرارلی و کثرتلی تحشیدات قرآنیہنک حکمتی، عینا بتمامها اونک حقیقی تفسیری اولان رسالہ نوردہ جریان ایتمه سی ده جوابدر.

هم ایمانک تحقیقی و تقلیدی و اجمالی و تفصیلی و ایمانک بتون تھاجماته و وسوسه و شبهه لره قارشى طایانوب صارصیلمامسنی بیان ایدن رسالہ نور پارچه لرینک ایضاحتی، بیوک روحلی کوچک علی نک مکتوبنه اویله بر جوابدر که، بزه هیچ بر احتیاج بیراقمیور.

ایکنجی جهت: ایمان، یالکز اجمالی و تقلیدی بر تصدیقه منحصر دگل. بر چکر دکدن، تا بیوک خرما آغاجنه قدر و اُلده کی آیینده گورونن مثالی گونشدن تا دگز یوزنده کی عکسنه، تا گونشه قدر مرتبه لری و انکشافلری اولدیغی گبی؛ ایمانک او درجه کثرتلی حقیقتلری وار که، بیوک بر اُسما اِلهیه و سائر اُرکان ایمانیہنک کائنات حقیقتلریله علاقه دار چوق حقیقتلری وار که: "بتون علملرک و معرفتک و کمالات انسانیهنک اُک بیوگی ایماندر و ایمان

تحقیقیدن گلن تفصیلی و برهانلی معرفتِ قدسیه‌در "دیه اهلِ حقیقت ائتفاق ایتمشلر.

أوت ایمانِ تقلیدی، چابوق شبهه‌لره مغلوب اولور. اوندن چوق قوتلی و چوق گنیش اولان ایمانِ تحقیقیده پک چوق مراتب وار. او مراتبلردن علم الیقین مرتبه‌سی، چوق برهانلرینک قوتلریله بیگلر شبهه‌لره قارشى طایانیر. حالبوکه تقلیدی ایمان بر شبهه‌یه قارشى بعضاً مغلوب اولور.

هم ایمانِ تحقیقینک بر مرتبه‌سی ده عین الیقین درجه‌سیدر که، پک چوق مرتبه‌لری وار. بلکه أسماءِ إلهیه عددنجه تظاهر درجه‌لری وار. بتون کائناتی بر قرآن گبی اوقویه‌بیله‌جک درجه‌سنه‌گلیر. هم بر مرتبه‌سی ده حقّ الیقیندر. اونک ده چوق مرتبه‌لری وار. بویله ایمانلی ذاتلره شبهات اوردولری هجوم ده ایتسه، بر خلط ایده‌مز. و علماءِ علمِ کلامک بیگلر جلد کتابلری، عقله و منطغه إستناداً تألیف ایدیلوب، یالکز او معرفتِ ایمانیه‌نک برهانلی و عقلی بر یولنی گوسترمشلر. و اهلِ حقیقتک یوزر کتابلری کشفه، ذوقه إستناداً او معرفتِ ایمانیه‌ی دها باشقه بر جهته‌ده إظهار ایتمشلر. فقط قرآنک معجزه‌کار جادّه کبراسی، گوستردیگی حقائقِ ایمانیه و معرفتِ قدسیه؛ او علما و اولیانک پک چوق فوقنده بر قوت و یوکسکلکده‌در. ایشته رسالّه نور بو جامع و کلّی و یوکسک معرفت جادّه‌سنی تفسیر ایدوب، ییک سنه‌دن بری قرآن علیه‌نه و اسلامیت و انسانیت ضررینه و عدم عامللری حسابنه تخریباتجی کلّی جریانلره قارشى قرآن و ایمان نامنه مقابله ایدیور، مدافعه ایدیور. ألبنه حدسز تحشیداته إحتیاجی واردر که، او حدسز دشمنلره قارشى طایانوب اهلِ ایمانک ایمانی محافظه‌سنه قرآن نوریه وسیله اولسون. حدیث شریفده واردر که: "بر آدم سنگله ایمانه گلمه‌سی، سکا صحرا

طولوسی قیرمزی قویونلردن داها خیرلیدر. " بعضًا بر ساعت تفکر، بر سنه عبادتدن داها خیرلی اولور. " حتّی نقشیلرک خفی ذکره ویردیگی بیوک اُهمّیت، بو نوع تفکره یتیشمک ایچوندور. عموم قارداشلریمه برر برر سلام و دعا ایدیورز.

﴿الْبَاقِي هُوَ الْبَاقِي﴾

قارداشکز

سعید النورسی



نورک بکجی

(رساله نورك خاص شاگردلرندن و اھمیتلی اُسکی معلملردن و ایمانی قوتلی اولان بیوک معلملری تمثیل ایدن حسن فیضی نك سكه تصدیق غیبیدن آلدیغی بر إھامله رساله نور حقه و او نورك منبعی و اساسی اولان نور محمدی (عصم) و حقیقت قرآن و سر ایمان تعریفنده بو قصیده یی یازمش)

بسم الله الرحمن الرحيم

﴿يُرِيدُونَ لِيُطْفِئُوا نُورَ اللَّهِ بِأَفْوَهِهِمْ وَاللَّهُ مُتِمُّ نُورِهِ وَلَوْ كَرِهَ الْكَافِرُونَ﴾

أحمد یاراتیلمش او بیوک نور اُحددن
هر ذره ده نوردر او ازلدن هم اُبددن

بر نور که اودر هم یوجه هم لایتناهی
اول فخر جهان حضرت محبوب إلهی

پارلاتدی جهانی بو گوزل نور محمد (عصم)
خلق اولماسه، اولماز ایدی بر ذره و بر فرد

اول نوری آنك، هر یری هر ذره یی صارمش
باشدن باشه هر دم بو کثیف ظلمتی یارمش

بر نور که اودر ساده و هم لایتزلزل
عاری و بری جمله دن اوستون و مکمل

بر نور که بتون ذره ده او نمایان
بر نور که ویرر قلبلره هم عشق ایله ایمان

بر نور که اگر اولماسه اول نور هله بر آن
باشدن باشه ظلمتده قالیر هم ده بو اکوان

بر نور که دگل او یله محاط، هم دخی محصور
بر نور که ایدر قلبی ده پرنور، چشمی ده پرنور
بر لمعه در آندن، شو بیوک شمس و قمرلر

هپ ایشته او نوردن بو عجائب قوجه عالم
خلق اولدی او نوردن ینه جنتله جهنم

شک یوق که او نوردن اوقونان حضرت قرآن
اول نور ازل هم سبب خلقت انسان

هر شیئه اودر مبدأ و أصل و أساس هم
اوندن گورونور نوع بشر بویله مکرم

بر ذره دگل، بحر محیط او بحر منیردن
هم ناصل بشر هیچ قالیور هپسی ده بردن

شک یوق که جهان، قطره نوردن او نورک
شک یوق که بو جان، ذره نوردن او نورک

سونسون دییه اوفلنسه، او دریا گی قاینار
سوندورمگه هم کیمده عجب ذره مجال وار

سوندورمگه قالمشدی عصرلر طولو کفار
قهر ایلدی هر هپسنى اول حضرت قهار

هپ سونمش عصرلر، یانیور سونمه‌دن اول
تاریخه سورک، کیمدر او نور، هم کیم ایمش منفور

آلنده یانان نور محمدی خلیک
یتمزدی گوجی باقمغه هر چشم علیک

گورسه‌یدی رسولک او گوزل نورینی، نمرود
یاقمازدی او دم، نارینی اول کافر مطرود

بر سیوری سینک ئولدیریور او شاه جهانی (!)
آتمشدی خلیلی آتسه چونکه او جانی

بر پرده آچوب سویله‌دی حق گیزی کلامدن
اول آتسه بحث ایلدی هم برد و سلامدن

"دوستم و رسولم یوجه ابراهیمی آی نار
آت عادتني، یاقمه بوگون، سن اونی زهار!"

بر گیزی خطاب گلدی ده اول دم ینه حقدن
بر عبد مکرم دخی قورتولدی بیچاقدن

اول نوردن ایچون یونسی حفظ ایلدی اول حوت
اول نور ایله قهر ایلدی هم قومنی اول لوط

اول حسن جمال، آیلدی عالمگیری حیران
نردن اونی بولمش، عجبای یوسفِ کنعان

حکمت نهدر، اول دردلره صبر آیلدی آیوب
هم سَرّی نهدر، یوسف ایچون آغلادی یعقوب

ئولدکجه دیریلدکجه نهدن طویمادی بر حسّ
اول ناملی نبی، شانلی شهید حضرتِ جرجیس

حسرتله نهدن آغلادیلر آدم و حوّا
کیمدندی بو ییللرجه سورن قوص قوجه دعوا

هم آه، نهدن ترک ایدیلوب روضه جنت
بر دارِ قرار اولدی نهدن عالم محنت

نور شهری اولان طوره او دم حضرتِ موسی
أسرارِ کلام هپ چوزولوب بولدی تجلی

بر پارچه زبوردن اوقوسه حضرتِ داود
باشلاردی همان صانکه بیوک محشرِ موعود

بیلیم که نهدن، یل و صولر هپ اونی دینلر
بیلیم که نهدن، هپ ایشیدن آه دییه ایگلر

مخلوقی بتون کندینه رام ایتدی سلیمان
نردندی بو قوّت، اوڭا کیمدندی بو فرمان

یلرله اوچان شانلی بیوک تحت مقدّس
أسرارِ ازلدن او ده طویمش ینه بر سس

اول هانگی عجیب سرّ که، چیقار گوکلره عیسی
کیمدر چکیلن چارمیخه، کیمدر ینه یودا

نور دردی ایچون تختی ترک ایلدی ادهم
بر باشقه سنک تختی اولور دردینه مرهم

چوق شخص ولی، نور ایله هم ایتدی قناعت
چوق شخص دنی، نور ایله هم بولدی کرامت

هر هپسی ده پروانه‌سی، اُفتاده‌سی نورک
هر هپسی معّمّا، گوجی یتمز بو شعورک

شقّ ایتدی قمر، فخرِ بشر، اول یوجه سرّور
هر یرده و هر آنده اونک نوری مظفّر

قرآندی قولى، نوردی یولی، اُمّتى موطلى
اُمّت اولانک قلبی بتون نور ایله طولدی

چکمزدی کدر، اول سوزی جوهر، ئوزی کوثر
اول سورؤ کوثر، دیدی اعداسنه "اَبتر!"

اول شمسِ ازلدن قاچینان اول قورو باشلر
غیّایِ جهنّمده بتون یاقمش آتشلر

بیتمشدی نَفَس، چیقمدی سس، بیقدی ده هرکس
اول نوره واروب باش اَگه رَک هم دیدیلر پس

إدراکی اولان قافله آیریلدی قُرشدن
فیض آلق ایچون طوغمش اولان شانلی گونشدن

اول کوثرِ اَحمددن ایچوب هر بری طاس طاس
اولمشدی او گون صانکه مجلاّ برر الماس

اول باشلره تاج، درده علاج، مرشدِ عالم
آیلردی نظر بونلره نورله دمام

بونلردی او اُعدایی بوغان بر آلائی آرسلان
حق اوغرینه، نور اوغرینه اولمش چوغی قربان

بونلردن او گون اَهلِ نفاق جمله قاچاردی
مشرک ايسه، اول عقلی آنک قالماز اوچاردی

بونلردی او پیغمبرکِ اَصحابی و آلی
دنیا ده و عقباده ده هم شانلری عالی

توصیف ایدیور بونلری هپ شوپله جه قرآن:
صلح وقتی قویون، غاوغاده کوکرک برر آرسلان

هپ یوزلری پاک، سوزلری حق، یوللری حقدی
مرکبلری یلر گپی دُلْدُلْدی، براقدی

بر جذبهٔ "یا حی!" ایله سیلر گبی آقدی
 اعدایه واروب هر بری شمشک گبی چاقدی

بونلردی او گون حلقهٔ توحیدی قورانلر
 بونلردی او گون بالطه لایوب کفری قیرانلر

بونلردی مبارک یوجه جمعیت شوری
 بونلردی او نوردن دیزیلن حلقهٔ کبری

بونلردی آلان سوریه، عراق، ئولکهٔ کسرا
 بونلرله ضیادار او قراکلق قوجه صحرا

بونلردی ویرن خسته، علیل گوزلره بر فر
 بونلردی او تاریخه گچن شانلی غَضَنْفَرُ

هر هپسی ده بر ذرهٔ نوری او حییک
 هر آن گورونور گوزلره اوندن نیجه یوز ییک

نور آلتنه گیرمش بولونان درلو جماعت
 هم بولدی بقا، هم ده بتون گوردی عدالت

درحال آچیلوب گوک یوزی هم پارلادی اول نوردن گلن رسالهٔ النور
 خلاق رحیم ایلدی مخلوقنی مسرور

ظلمت طاغیلوب باشلادی بر یپیکی گوندوز
 بر نشئه طویوب صوصدی برآز آغلایان او گوز

بر دم بیلہ دوشمزنک اوناڭ آهی دیلندن
قورتولدی، یازیق دردلی بشر دردك اَلندن

اول تازه گونش، ئولکەیه سریدکجه ایشیقئر
هپ شاد اولاجق، شوق بولاجق قلبی قیریقئر

هر قلبه سُور، هر گوزه نور طولدی بو گوندن
بر مژده ویرر صانکه او بر شانلی دوگوندن

عرض ایلەیه لم اول یوجه اللّٰه شکرلر
قالقار بو قهر جهل و ضلال، شرک و کفرلر

اول نور هدا صالدى ضیا، قلبه صفا هم
گوستردى بقا، گوچدى فنا، بولدى وفا هم

چیقمشدى شقى، گلدى نقى گوردى عداوت
ايلردى نفى، اولدى خفى نور هدايت

فیشقیردى رساله نور، اُفقدن او نور رسالت
اول نور رسالت ویره جك امن و عدالت

اللّٰه شکر، قالماده هپ جمله قراڭلق
اللّٰه شکر، دولماده هپ قلبه فرحلق

اللّٰه شکر، ايشته بوگون پرده آچیلدى
عالملة آرتق ینه بر نشئه صاحیلدى

آرتق بو سونوک جانلره جان اوفله‌دی جانان
آرتق بو گوگل دردینه اول ایلدی درمان

بر فصلِ بهار باشلادی ایللرده بو گوندن
بر صحبتِ گل باشلادی دیللرده بو گوندن

بندن بگا بن گیتمک ایچون رساله نور دییه قوشدم
نور دردینه دوشدم ده دگزلر گی جوشدم

بر ذره‌جک اولسون بولایم دیر ده آراکن
دوشدم ینه دریا گی بر نوره بوگون بن

ویردم اوکا بن گوکلمی باشند باشه آرتق
معشوقم اودر شیمدی بنم، بن اوکا عاشق

اول نور ازل هم قراران قلبلره لایق
اول نوردن آلیر فیضنی هم جمله خلایق

قهر ایلدی اول ظلمتی رساله نوره آقانلر
نور قهرینه اوغرار، اوکا خصمانه باقانلر

کفرک بتون آلاپی هجوم ایتسه ده ای نور
ایتمز سنی دور، کندی اولور بلکه ده مقهور

سنسک ینه حاضر، ینه سنسک بزه ناظر
ای نور رحیم، ای ابدی بر جلوۀ قدرتِ فاطر

بر نشئه طویوردك ايمانله سَر آزلدن
بر مژده گتيردك بزه اول ناملی گوزلدن

مادام كه ايچيردك بزه اول آب حیاتدن
بر ذره قدر قلمادی خوف شیمدی ممتادن

حسرت یاشادق نورینه ییللرجه بتون بز
معصوم و علیل، درلو بلا چکدی سببسز

ییللرجه آقان، قان طولو گوزیاشلری دینسین
ظالم یره باتسین، او ظلم بر یره سینسین

ییللرجه، عصرلرجه بو نورك ینه یانسین
اوکسوز و یتیم، دول و علیل هپسی ده قانسین

ای نور گلی، نور چهره ثی اویسه م دوداغکدن
قلب باغچه سنك قلبنه دیکسه م بوداغکدن

هر دم قوقارق هم او گوزل رایحه سندن
چیقسه م ینه بن عالم فانی طاساسندن

نور گللك آچسین، ینه مسکله رگی توتسون
سینه مده بو جان بلبلی توحید ایله ئوتسون

سنسك بزه بر نشئه ویرن اول گل خالص
سنسك بزه هم جمله دن أعلا، دخی مخلص

أی نور رسالتدن گلن بر برهانِ قرآن
أی سرّ فرقاندن چیقان حجّتِ ایمان

سندک بزه مطلوب، ینه سندک بزه موعود
سایه‌کده بوگون هرکس اولور زنده و مسعود

هر آن سنی بکلر و صاییقلاردی بو دنیا
حق کندینی گوستردی، بوگون بیتدی او رؤیا

پیک اوج یوز سنه‌در طوپراغه دونمش نیجه میلیار
مؤمن و مَوْحِد سنی گوزلردی هپ آی یار

هر هپسی ده سندن یانه سویلردی کلامی
هر هپسی ده هر آن سکا ایلردی سلامی

نور چهره‌کی آچسه‌ک، آتارق پرده‌یی یوزدن
سویلر بکا روحم ینه ﴿مَا ارَدَدْتُ يَقِينًا﴾

والله، ازلدن بونی بن ایلدم ازیبر
رسالة النوردر والله او صوگ مجدد اکبر

یوزلرجه سند، هم نیجه یوزلرجه إشارت
ایلر بو مقدس قوجه دعوایه شهادت

أک باشد گلن شاهدِ عدل حضرتِ قرآن
گوسترمش عیاناً اوتوز اوج یرده او برهان

﴿يَا مُدْرِگَا﴾ نك قلبنه گومش اُسد الله

چوق سَرّ كه، بیلنلر اولویور هپ سكا آگاه

﴿كُنْ قَادِرِيّ الْوَقْتِ﴾ دیمش اول پیرِ معظم

بیگلرجه ولی هم ینه یاپمش بوکا پیک ضم

معجزدر او سوز، حقدر او ئوز، گورمدی هر گوز

آرتق بو معمّالری گل سن بزه بر چوز

آلتنجی سوزك آلدی بتون فعل و صفاتی

ویردم ده آریندم اوکا هم ذات و حیاتی

مفلس و فقیر بکله یوردم شیمدی قپوگده

توحیده ایریشدیر بنی، گل واریگی صون ده

بن بن دییه یازدمسه ده سنسك ینه اول بن

هیچدن نه چیقار، هم بگا بلك ینه سندن

عفو ایت بنی اُی عفوی بیوک، لطفی بیوک رسالهُ النور

بر دم بیله هم ایلهمه سندن بنی یا رتّنا مهجور

نور عشقنه، حق عشقنه، دوست عشقنه اُی نور

نور گله و سَرّ گله بوگون قیل بزی مسرور

اُی نور ازلدن گلن نور محمّد (عصم)

اُی سَرّ ایماندن گلن نور مؤبّد

بیگلرجه یتیمک طویولان آهنی بر کس

صارصار او بیوک عرشی ده والله بو چیقان سس

والله جمیلک، یتر آرتق بو جلالک

گوستر بزه آی نور محمد، بر کرّه جمالک

درگاهکی آچ، ایت بزه إحسان، ینه آی نور رسالت

بز دردلی قولز، قیل بزه درمان، ینه آی نور حقیقت

أماره اولان نفسمزک آمرینه اویدق

ویر بزلره سن نور ایله ایقان، ینه آی نور قرآن

حرص آتشی سونسون ده گوکل گلشنه دونسون

صاچ نوریکی، هم فیضکی هر آن، ینه آی نور ایمان

سن نور بدیع، نور رحیمک بزه لطف ایت

هپ ایسته گمز عشق ایله ایمان، ینه آی نور إلهی

دینک چکیلوب، دیوگی صالديرماده وحشت

رحم ایت بزی غرق ایتیمیه طوفان، ینه آی نور رحمانی

پرنوره بویانسین بتون آفاق جهانک

هریرده اوقونسون ده بو قرآن، ینه آی نور سبحانی

محبوبکه اویدق، هپمز اُمّتی اولدق

آغلامه یتر، ایت بزی خندان، ینه آی نور ربّانی

اول روضہٗ پاکِ اُحمدی (عصم) گوستر بزه بر دم
آرتق اولالم هپ اوکا قربان، ینه ای نور صمدانی

إسلامه ظفر ویر، بزی قورتار، بزی گولدير
أعدامزی ایت خاک ايله یکسان، ینه ای نورِ فرقانی

هر بلدهٗ إسلام ايله، اولسون بو یشیل یورد
تا حشره قدر جنتِ جانان، ینه ای نورِ ایمانی

اول فخرِ جهان، آلِ عبا حقّی ایچون یا ربّ
حفظ ایت بزی آفات و بلادن، یا نور الأنوار، بِحَقِّ إِسْمِكَ النور!

﴿السَّلَامُ عَلَيْكُمْ وَرَحْمَةُ اللَّهِ وَبَرَكَاتُهُ﴾
﴿وَإِنْ مِنْ شَيْءٍ إِلَّا يُسَبِّحُ بِحَمْدِهِ﴾

مبارك استادم أفندیم!

او بیوک و گوزل خاص نوریکٹ بو فقیر و بیچاره طلبه‌گزّه بو وادیده و
بو شکلده اولان إحسان و إکراماتنی عیناً حضورِ عرفانگزه صونویور و بو وسیله
ایله مبارک ألریکزی و دامنِ پاکتری بر داها اوپمک شریفله مشرف اولویورم،
قبول بیورلماسنی حضرتگزدن إسترحام ایدرم أفندیم.

عاجز و بیچاره طلبه‌گز

حسن فیضی

﴿رَحِمَهُ اللَّهُ بِعَدَدِ حُرُوفِ رَسَائِلِ الْمَكْتُوبَةِ وَالْمَقْرُوءَةِ آمِينَ﴾

یگر می سکزنجی مکتوبدن یدنجی مسئله

بسم الله الرحمن الرحيم

﴿قُلْ بِفَضْلِ اللَّهِ وَبِرَحْمَتِهِ فَبِذَلِكَ فَلْيَفْرَحُوا هُوَ خَيْرٌ مِمَّا يَجْمَعُونَ﴾

شو مسئله "یدی اشارت" در.

أولاً تحديثِ نعمت صورتنده بر قاج سرّ عنایتی
إظهار ایدن "یدی سبی" بیان ایدرز:

برنجی سبب: اُسکی حربِ عمومیدن اُول و اوائلنده، بر واقعۀ صادقده گوروپورم که: آرات طاعی دینیلن مشهور آغری طاغِ آلتندهیم. بردن او طاغ، مدهش انفلاق ایتدی. طاغلر گبی پارچهلری، دنیانک هر طرفنه طاغیتدی. او دهشت ایچنده باقدم که، مرحوم والدهم یانمدهدر. دیدم: "آنا قورقمه! جنابِ حَقِّ اُمَریدر؛ او رحیمدر و حکیمدر." بردن او حالتده ایکن، باقدم که مهمّ بر ذات، بگا آمرانه دیور که: "إعجازِ قرآنی بیان ایت." اویاندم، آکلادم که: بر بیوکِ انفلاق اولاجق. او انفلاق و انقلابدن صوگره، قرآن اُطرفنده کی سورلر قیریلجق. طوغریدن طوغری یه قرآن کندی کندینه مدافعه ایده جک. و قرآنه هجوم ایدیلجک، إعجازی اونک چلیک بر زرهی اولاجق. و شو إعجازک بر

نوعنی شو زمانده إظهارینه، حدمك فوقنده اولارق، بنم گبی بر آدم نامزد اولاجق و نامزد اولدیغمی آڭلادم.

مادام إعجاز قرآنی بر درجه بیان، سوزلرله اولدی. ألبته او إعجازك حسابنه گچن و اونك رشحاتی و برکاتی نوعندن اولان خدمتمزده کی عنایاتی إظهار ایتمك، إعجازه یاردمدر و إظهار ایتمك گرکدر.

ایکنجی سبب: مادام قرآن حکیم مرشدیمزدر، استادیمزدر، إمامزدر، هر بر آدابده رهبریمزدر؛ او، کندی کندینی مدح ایدیور. بز ده اونك درسنه إتباعاً، اونك تفسیرینی مدح ایده جگزر.

هم مادام یازیلان سوزلر اونك بر نوع تفسیریدر و او رساله لرده کی حقائق ایسه قرآنك مالیدر و حقیقتلریدر. و مادام قرآن حکیم أکثر سوره لرده، خصوصاً ﴿الر﴾ لرده ﴿حم﴾ لرده کندی کندینی کمال حشمتله گوستریور، کمالاتنی سویله یور، لایق اولدیغی مدحی کندی کندینه ایدیور. ألبته سوزلرده إنعکاس ایتمش قرآن حکیمك لمعات إعجازه سندن و او خدمتک مقبولیتنه علامت اولان عنایات ربّانیه نك إظهارینه مکلفز. چونکه او استادیمز او یله ایدر و او یله درس ویرر.

اوچنجی سبب: سوزلر حقّنده تواضع صورتنده دیمیورم؛ بلکه بر حقیقتی بیان ایتمك ایچون دیرم که: سوزلرده کی حقائق و کمالات، بنم دگل قرآنکدر و قرآندن ترشح ایتمشدر. حتّی اونجی سوز، یوزر آیات قرآنیهدن سوزولمش بعض قطراتدر. سائر رساله لر دخی عموماً او یله در. مادام بن او یله بیلیمورم و مادام بن فانیم، گیده جگم؛ ألبته باقی اولاجق بر شی و بر اثر، بنمله باغلانماق گرکدر و باغلانمالمی. و مادام اهل ضلالت و طغیان، ایشلرینه گلهمین بر اثری، اثر

صاحبنی چوروتمکله اثری چوروتمک عادتلیدر؛ ألبته سهای قرآنک ییلدیزلریله باغلانان رساله‌لر، بنم گبی چوق اعتراضاته و تنقیداته مدار اولاییلن و سقوط ایدیه‌یلن چوروك بر دیرک ایله باغلانمالمی. هم مادام عُرفِ ناسده، بر اثرده کی مزایا، او اثرک مصدری و منبعی ظن ایتدکلی مؤلفنک اُطوارنده آرانیلیور و بو عُرفه گوره، او حقائقِ عالییه‌یی و او جواهرِ عالییه‌یی کندی گبی بر مفلسه و اونلرک بیگده برینی کندنده گوسترمه‌یین شخصیتمه مال ایتمک، حقیقته قارشى بیوک بر حقسزلق اولدیغی ایچون رساله‌لر کندی مالم دگل، قرآنک مالی اولارق، قرآنک رشحاتِ مزبّاتنه مظهر اولدقلىنی إظهار ایتمگه مجبورم. اوت لذتلی اوزوم صالحیملرینک خاصیتلری، قورو چوبوغنده آرانیلماز. ایشته بن ده اویله بر قورو چوبوق حکمنده‌یم.

دردنجی سبب: بعضاً تواضع، کفرانِ نعمتی إستلزام ایدیور؛ بلکه کفرانِ نعمت اولور. بعضاً ده تحدیثِ نعمت، إفتخار اولور. ایکسی ده ضرردر. بونک چاره یگانه‌سی که؛ نه کفرانِ نعمت چیقسین، نه ده إفتخار اولسون. مزیت و کمالاتلری إقرار ایدوب، فقط تملک ایتمیه‌رک، منعم حقیقینک اثرِ إنعامی اولارق گوسترمکدر. مثلاً: ناصلکه مرصع و مزین بر ألبسه فاخره‌یی بری سکا گیدیرسه و اونکله چوق گوزلشسه‌ک، خلق سکا دیسه: "ما شاء الله چوق گوزلسک، چوق گوزلشدک." اگر سن تواضعکارانه دیسه‌ک: "حاشا!.. بن نه‌یم، هیچ. بو نه‌در، نرده گوزللك؟" او وقت کفرانِ نعمت اولور و حلّه‌یی سکا گیدیرن ماهر صنعتکاره قارشى حرمتسزلك اولور. اگر مفتخرانه دیسه‌ک: "اوت بن چوق گوزه‌لم، بنم گبی گوزل نرده وار، بنم گبی برینی گوستریگن." او وقت، مغرورانه بر فخردر.

ایشته فخردن، کفراندن قورتولمق ایچون دیمه‌لی که: "اوت بن گوزلشدم، فقط گوزللك لباسکدر و طولاییسیله لباسی بگا گیدیرنگدر، بنم دگلدر."

ایشته بونک گبی، بن ده سسم یتیشسه، بتون کره أرضه باغیره رق دیرم که: سوزلر چوق گوزلدلرلر، حقیقتدلرلر؛ فقط بنم دگلرلر، قرآن کریمک حقائقندن تلمع ایتمش شعاعلدرلر.

﴿وَمَا مَدَحْتُ مُحَمَّدًا بِمَقَالَتِي ۖ وَلَكِنْ مَدَحْتُ مَقَالَتِي بِمُحَمَّدٍ﴾

دستوریله دیرم که:

﴿وَمَا مَدَحْتُ الْقُرْآنَ بِكَلِمَاتِي ۖ وَلَكِنْ مَدَحْتُ كَلِمَاتِي بِالْقُرْآنِ﴾

یعنی: "قرآنک حقائق إعجازینی بن گوزللشدیره مدم، گوزل گوستره مدم؛ بلکه قرآنک گوزل حقیقتلری، بنم تعبیراتلری ده گوزللشدیردی، علویلشدیردی. "مادام بویله در؛ حقائق قرآنک گوزلگی نامنه، سوزلر نامنده کی آیینهلرینک گوزللکلرینی و او آیینهلرلغه ترتب ایدن عنایات إلهیهی اظهار ایتمک، مقبول بر تحدیث نعمتدر.

بشنجی سبب: چوق زمان اول بر اهل ولایتدن ایشیتدم که؛ او ذات، اُسکی ولیرک غیبی إشارتلرندن إستخراج ایتمش و قناعتی گلمش که: "شرق طرفندن بر نور ظهور ایده جک، بدعهلر ظلماتنی طاغیده جق. "بن، بویله بر نورک ظهورینه چوق إنتظار ایتدم و ایدیورم. فقط چیچکلر بهارده گلیر. او یله ایسه او قدسی چیچکلره زمین حاضر ایتمک لازم گلیر. و آکلا دق که، بو خدمتمزله او نورانی ذاتلره زمین إحضار ایدیورز. مادام کندیمزه عائد دگل، ألبته سوزلر نامنده کی نورلره عائد اولان عنایات إلهیهی بیان ایتمکده مدار فخر و غرور اولاماز؛ بلکه مدار حمد و شکر و تحدیث نعمت اولور.

آلتنجی سبب: سوزلرک تألیفی واسطه سیله قرآنه خدمتمزه بر مکافات عاجله و بر واسطه تشویق اولان عنایات ربّانیه، بر موققتدر. موققت ایسه، اظهار ایدیلیر. موققتدن گچسه؛ اولسه اولسه بر إکرام إلهی اولور. إکرام إلهی

ایسه، اظهاری بر شکرِ معنویدر. اوندن دخی گچسه، اولسه اولسه هیچ اختیاریمز قاریشمادن بر کرامتِ قرآنیه اولور. بز مظهر اولمشز. بو نوع اختیارسز و خبرسز گلن بر کرامتک اظهاری، ضررسزدر. اگر عادی کراماتک فوقنه چیقسه، او وقت اولسه اولسه قرآنک إعجازِ معنویسنک شعله‌لری اولور. مادام إعجازِ اظهار ایدیلر، البته إعجازه یاردیم ایدنک دخی اظهاری إعجازِ حسابنه گچر؛ هیچ مدارِ فخر و غرور اولاماز، بلکه مدارِ حمد و شکراندر.

یدنجی سبب: نوعِ انسانک یوزده سکسانی اهلِ تحقیق دگلدر که، حقیقته نفوذ ایتسین و حقیقتی حقیقت طانیوب قبول ایتسین. بلکه صورته، حسنِ ظنه بناء، مقبول و معتمد انسانلردن ایشیتدکلری مسائلی تقلیداً قبول ایدرلر. حتی قوتلی بر حقیقتی، ضعیف بر آدمک أَلنده ضعیف گورور و قیمتسز بر مسئله‌یی، قیمتدار بر آدمک أَلنده گورسه، قیمتدار تلقی ایدر. ایشته اوکا بناء، بنم گبی ضعیف و قیمتسز بر بیچاره‌نک أَلنده کی حقائقِ ایمانیه و قرآنیه‌نک قیمتنی، اکثر ناسک نقطه نظرنده دوشورمه‌مک ایچون، بالمجبوریه إعلان ایدیورم که: اختیاریمز و خبریمز اولمادن، بریسی بزی استخدام ایدیور؛ بز بیلیمیه‌رک، بزی مهم ایشلرده چالیشدیریور. دلیلمز ده شودر که: شعوریمز و اختیاریمزدن خارج بر قسم عنایاته و تسهیلاته مظهر اولویورز. اوپله ایسه، او عنایتلری باغیره‌رق إعلان ایتمکه مجبورز.

ایشته گچمش یدی اُسبابه بناء، کلی بر قاچ عنایتِ ربّانییه اِشارت ایده‌جگز.

برنجی اِشارت: یگرمی سکرنجی مکتوبک سکرنجی مسئله‌سنک برنجی نکته‌سنده بیان ایدیلمشدر که، "توافقات" در. اُزمله: معجزاتِ اُحمديه مکتوباتنده، اوچنجی اِشارتدن تا اون سکرنجی اِشارته قدر آتمش صحیفه؛

خبرسز، بيلمیه رك بر مستسخك نسخه سنده ایکی صحیفه مستثنا اولمق اوزره متباقی بتون صحیفه لرده (کمال موازنتله) ایکی یوزدن زیاده "رسول اکرم علیه الصلاة والسلام" کلمه لری بربرینه باقییورلر. کیم انصاف ایله ایکی صحیفه یه دقت ایتسه، تصادف اولمادیغنی تصدیق ایده جک. حالبوکه تصادف، اولسه اولسه بر صحیفه ده کثرتلی أمثال کلمه لری بولونسه، یاری یاری یه توافق اولور، آنجق بر ایکی صحیفه ده تمامًا توافق ایده بیلیر. او حالد بویله عموم صحیفه لرده رسول اکرم علیه الصلاة والسلام کلمه سی؛ ایکی اولسون، اوچ اولسون، درت اولسون ویا داها زیاده اولسون، کمال میزان ایله بربرینک یوزینه باقسه؛ البته تصادف اولماسی ممکن دگلدر. هم سکز آیری آیری مستسخك بوزامدیغی بر توافقك، قوتلی بر إشارت غیبیه، ایچنده اولدیغنی گوسترر. ناصلکه اهل بلاغتك کتابلرنده، بلاغتك درجاتی بولوندیغی حالد؛ قرآن حکیمده کی بلاغت، درجه إعجازه چیقمش. کیمسه نك حدی دگل که اوگا یتیشسین. اوپله ده؛ معجزات أحمدیه نك بر آیینه سی اولان اون طوقوزنجی مکتوب و معجزات قرآنیه نك بر ترجمانی اولان یگرمی بشنجی سوز و قرآنك بر نوع تفسیری اولان رساله نور أجزالرنده توافقات، عموم کتابلرك فوقنده بر درجه غرابت گوستریور. و اوندن آگلاشیللیور که؛ معجزات قرآنیه و معجزات أحمدیه نك بر نوع کرامتیدر که، او آیینه لرده تجلی و تمثّل ایدیور.

ایکنجی إشارت: خدمت قرآنیه یه عائد عنایات ربّانیه نك ایکنجیسی شودر که: جناب حق، بنم گبی قلمسز، یاریم اُمّی، دیار غربتده، کیمسه سز، إختلاطدن منع ایدیلمش بر طرزده؛ قوتلی، جدی، صمیمی، غیور، فداکار و قلملری برر ألباس قلنج اولان قارداشلری بگا معاون إحسان ایتدی. ضعیف و عاجز اوموزیمه چوق آغیر گلن وظیفه قرآنیه یی، او قوتلی اوموزلره بیندیردی. کمال کرمندن،

یوکمی خفیفلشدیردی. او مبارک جماعت ایسه؛ (خلوصینک تعبیریله) تلسز تلغرافک آخذه‌لری حکمنده و (صبرینک تعبیریله) نور فابریقه‌سنک الکتریقلرینی یتیشدیرن ماکینه‌لر حکمنده آیری آیری مزیتلری و قیمتدار مختلف خاصیتلریله برابر، (ینه صبرینک تعبیریله) بر توافقات غیبیه نועندن اولارق، شوق و سعی و غیرت و جدّیتده بربرینه بگزر بر صورتده أسرار قرآنییه و أنوار ایمانییه اطرافه نشر ایتملری و هر یره ایریشدیرملری و شو زمانده (یعنی حروفات دگیشمش، مطبعه یوق، هرکس أنوار ایمانییه محتاج اولدیغی بر زمانده) و فتور ویره‌جک و شوقی قیره‌جق چوق أسباب وارکن، بونلرک فتورسز، کمال شوق و غیرتله بو خدمتلری، طوغریدن طوغرییه بر کرامت قرآنییه و ظاهر بر عنایت إلهیه‌در. اوت ولایتک کرامتی اولدیغی گبی، نیت خالصه‌نک دخی کرامتی واردر. صمیمیتک دخی کرامتی واردر. باخصوص لله ایچون اولان بر اخوت دائره‌سنده کی قارداشلرک ایچنده جدّی، صمیمی تساندک چوق کرامتلری اولاییلیر. حتّی شویله بر جماعتک شخص معنویسی بر ولیّ کامل حکمنه گچه‌بیلیلر، عنایاته مظهر اولور.

ایشته ای قارداشلرم و ای خدمت قرآنده آرقداشلرم! بر قلعه‌یی فتح ایدن بر بولوگک چاوشنه بتون شرفی و بتون غنیمتی ویرمک ناصل ظلمدر، بر خطادر؛ اويله ده شخص معنویکزک قوتیله و قلملریکز ايله حاصل اولان فتوحاتده کی عنایاتی بنم گبی بر بیچاره‌یه ویره‌مزسکز. ألبته بویله مبارک بر جماعتده، توافقات غیبیه‌دن داها زیاده قوتلی بر إشارت غیبیه وار و بن گورویورم؛ فقط هرکسه و عمومه گوستره‌مییورم.

اوپنچی إشارت: رساله نور أجزالری، بتون مهم حقائق ایمانییه و قرآنییه حتّی اُک معنده قارشى دخی پارلاق بر صورتده إثباتی، چوق قوتلی بر إشارت غیبیه و بر عنایت إلهیه‌در. چونکه حقائق ایمانییه و قرآنییه ایچنده اويله‌لری وار

که؛ اُک بیوک بر داهی تلقی ایدیلن ابن سینا، فهمنده عجزینی إعتراف ایتمش، "عقل بوکا یول بولاماز!" دیمش. اوننجی سوز رساله‌سی، او ذاتک دهاسیله یتیشه‌مدیگی حقائقی؛ عواملره ده، چوجقلره ده بیلدیریور.

هم مثلاً: سرّ قدر و جزء اختیارینک حلّی ایچون، قوجه سعدِ تفتازانی گبی بر علامه؛ قرق اَللی صحیفه‌ده، مشهور مقدّماتِ اثنا عشر نامیله تلویح نام کتابنده آنجق حلّ ایتدیگی و آنجق خواصّه بیلدیردیگی عین مسائلی، قدره دائر اولان یگرمی آلتنجی سوزده، ایکنجی مبحث ایکی صحیفه‌سنده تمامیله، هم هرکسه بیلدیره‌جک بر طرزده بیانی، اثر عنایت اولمازسه نه‌در؟

هم بتون عقولی حیرتده بیراقان و هیچ بر فلسفه‌نک اَلیله کشف ایدیلهمه‌ین و سرّ خلقتِ عالم و طلسم کائنات دینیلن و قرآنِ عظیم الشانک إعجازیله کشف ایدیلن او طلسم مشکل‌کشا و او معمّای حیرت‌نما، یگرمی دردنجی مکتوب و یگرمی طوقوزنجی سوزک آخرنده کی رمزلی نکته‌ده و اوتوزنجی سوزک تحولاتِ ذرّاتک آلتی عدد حکمتنده کشف ایدیلمشدر. کائناتده کی فعالیتِ حیرت‌نمانک طلسمی و خلقتِ کائناتک و عاقبتک معمّاسنی و تحولاتِ ذرّاتده کی حرکاتک سرّ حکمتنی کشف و بیان ایتمشلردر، میدانده‌در، باقیله‌بیلیر.

هم سرّ اُحدیت ایلّه، شریکسز وحدتِ ربوبیتی؛ هم نهایتسز قریبتِ اِلْهیّه ایلّه، نهایتسز بعدیتمز اولان حیرت‌انگیز حقیقتلری کمالِ وضوح ایلّه اون آلتنجی سوز و اوتوز ایکنجی سوز بیان ایتدکلری گبی؛ قدرتِ اِلْهیّه‌یه نسبةً ذرّات و سیّارات مساوی اولدیغنی و حشرِ أعظمده عموم ذی‌روحک إحیاسی، بر نفسک إحیاسی قدر او قدرته قولای اولدیغنی و شرکک خلقتِ کائناتده مداخله‌سی إمتناع درجه‌سنده عقلدن اوزاق اولدیغنی کمالِ وضوح ایلّه گوسترن یگرمنجی

مکتوبده کی **﴿وَهُوَ عَلَى كُلِّ شَيْءٍ قَدِيرٌ﴾** کلمه سی بیاننده و اوچ تمثیلی حاوی اونک ذیلی، شو عظیم سر وحدتی کشف ایتمشدر.

هم حقائق ایمانیه و قرآنیده اویله بر گنیشلک وار که، اُنک بیوک ذکاء بشری إحاطه ایدهمدیگی حالده؛ بنم گبی ذهنی مشووش، وضعیتی پریشان، مراجعت ایدیله جک کتاب یوقکن، صیقنتیلی و سرعتله یازان بر آدمده، او حقائقک اکثریت مطلقه سی دقائقله ظهوری؛ طوغریدن طوغرییه قرآن حکیمک إعجاز معنویسنک اثری و عنایت ربّانیه نک بر جلوه سی و قوتلی بر إشارت غیبیه در.

دردنجی إشارت: اُللی آلتمش رساله لر (شیمدی یوز اوتوزدر) اویله بر طرزده إحسان ایدیلمش که؛ دگل بنم گبی آز دوشونن و ظهوراته تبعیت ایدن و تدقیقه وقت بولامیان بر إنسانک؛ بلکه بیوک ذکالردن مرکب بر اهل تدقیقک سعی و غیرتیه یاپیلیمان بر طرزده تألیفلی، طوغریدن طوغرییه بر اثر عنایت اولدقلمی گوستریور. چونکه بتون بو رساله لرده، بتون درین حقائق، تمثیلات واسطه سیله، اُنک عامی و اُمی اولانلره قدر درس ویریلیور. حالبوکه او حقائقک چوغنی بیوک عالم لر "تفهیم ایدیلمز" دییوب، دگل عوامه، بلکه خواصّه ده بیلدیره میورلر.

ایشته اُنک اوزاق حقیقتلری، اُنک یاقین بر طرزده، اُنک عامی بر آدمه درس ویره جک درجه ده؛ بنم گبی تورکجه سی آز، سوزلری مغلق، چوغی آکلاشیلماز و بعضاً قیصهجه مجمل یازدیغندن ظاهر حقیقتلری دخی مشکللدیرییور دییه اُسکیدن بری إشتهار بولمش و اُسکی اثرلری قسماً او سوء إشتهاری تصدیق ایتمش بر شخصک اُلنده بو خارقه تسهیلات و سهولت بیان؛ البته بلا شبهه بر اثر عنایتدر و اونک هنری اولاماز و قرآن کریمک إعجاز معنویسنک بر جلوه سیدر و تمثیلات قرآنیه نک بر تمثیلدر و انعکاسیدر.

بشنجی اشارت: رسالہ لر عمومیتلہ پک چوق انتشار ایتدیگی حالده، اُکْ بیوک عالمدن طوت، تا اُکْ عامی آدمه قدر و اهل قلب بیوک بر ولیدن طوت، تا اُکْ معنّد دینسز بر فیلسوفه قدر اولان طبقاتِ ناس و طائفه لر او رساله لری گوردکلری و او قودقلری و بر قسمی طوقاتلرینی بیدکلری حالده تنقید ایدیلیمه مسی و هر طائفه درجه سنه گوره استفاده ایتمه سی، طوغریدن طوغری به بر اثر عنایت ربّانیه و بر کرامت قرآنیه اولدیغی گبی، چوق تدقیقات و تحرّیاتکْ نتیجه سیله آنجق حصول بولان او چشید رساله لر، فوق العاده بر سرعتله، هم إدراکمی و فکرمی مشوّش ایدن صیقنتیلی انقباض وقتلرنده یازیلما سی دخی، بر اثر عنایت و بر اکرام ربّانیدر.

أوت اُکْثر قارداشلرم و یاغده کی عموم آرقداشلرم و مستنسخلر بیلپورلر که؛ اون طوقوزنجی مکتوبکْ بش پارچه سی، بر قاچ گون ظرفنده هر گون ایکی اوچ ساعتده و مجموعی اون ایکی ساعتده هیچ بر کتابة مراجعت ایدیلیمه دن یازیلما سی؛ حتّی اُکْ مهمّ بر پارچه و او پارچه ده لفظِ رسول اکرم علیه الصلاة والسلام کلمه سنده ظاهر بر خاتم نبوّتی گوسترن دردنجی جزء، اوچ درت ساعتده، طاغده، یاغمر آلتنده اُزبر یازیلماش؛ و اوتوزنجی سوز گبی مهمّ و دقیق بر رساله، آلتی ساعت ایچنده بر باغده یازیلماش؛ و یگرمی سکزنجی سوز، سلیمانکْ باغچه سنده بر، نهایت ایکی ساعت ایچنده یازیلما سی گبی، اُکْثر رساله لر بویله اولما سی؛ و اُسکیدن بری صیقنتیلی و منقبض اولدیغم زمان، اُکْ ظاهر حقیقتلری دخی بیان ایده مدیگمی، بلکه بیلیمه مدیگمی یاقین دوستلرم بیلپورلر. خصوصاً او صیقنتی به خسته لق ده علاوه ایدیلسه، داها زیاده بنی درسدن، تألیفدن منع ایتمکله برابر؛ اُکْ مهمّ سوزلر و رساله لر، اُکْ صیقنتیلی و خسته لقلی زماغده، اُکْ

سرعتلی بر طرزده یازیلماسی؛ طوغریدن طوغرییه بر عنایتِ إلهیه و بر إکرام ربّانی و بر کرامتِ قرآنیّه اولمازسه نه‌در؟

هم هانگی کتاب اولورسه اولسون، بویله حقائقِ إلهیه‌دن و ایمانیه‌دن بحث ایتمش ایسه، علی کلّ حال بر قسم مسائلی، بر قسم إنسانلره ضرر ویرر و ضرر ویردکلری ایچون، هر مسئله هرکسه نشر ایدیلمه‌مش. حالبوکه شو رساله‌لر ایسه؛ شیمدییه قدر هیچ کیمسه‌ده، (چوقلردن صوردیغم حالده) سوء تأثیر و عکس العمل و تخدیش اذهان گبی بر ضرر ویرمدکلری، طوغریدن طوغرییه بر إشارت غیبیه و بر عنایتِ ربّانیّه اولدیغی بزجه محققدر.

آلتجی إشارت: شیمدی بنجه قطعیت پیدا ایتمشدر که؛ اکثر حیاتم إختیار و إقتداریمک، شعور و تدبیریمک خارجنده اوپله بر طرزده گچمش و اوپله غریب بر صورتده اوکا جریان ویرلیمش؛ تا قرآن حکیمه خدمت ایده‌جک اولان بو نوع رساله‌لری نتیجه ویرسین. عادتاً بتون حیاتِ علمیه‌م، مقدّماتِ إحضاریه حکمنه گچمش. و سوزلر ایلّه إعجازِ قرآنک إظهاری، اونک نتیجه‌سی اولاجق بر صورتده اولمشدر. حتّی شو یدی سنه نفیمده و غربتمده و سببسز و آرزومک خلاّفنده تجرّدم و مشریمه مخالف یالکز بر کویده إمرارِ حیات ایتمکلگم؛ و اُسکیدن برّی الفت ایتدیگم حیاتِ اجتماعیّه‌نک چوق رابطه‌لرندن و قاعده‌لرندن نفرت ایدوب ترک ایتمکلگم؛ طوغریدن طوغرییه بو خدمتِ قرآنیّه‌ی خالص، صافی بر صورتده یاپدیرمق ایچون بو وضعیت ویریلدیگنه شبهه‌م قالمامشدر. حتّی چوق دفعه بکا ویریلن صیقنتی و ظلماً بکا قارشى اولان تضییقات پرده‌سی آلتنده، بر دستِ عنایت طرفندن مرحمتکارانه، قرآنک اُسارینه حصرِ فکر ایتدیرمک و نظری طاغیتماق ایچون یاپیلیمشدر قناعتنده‌یم. حتّی اُسکیدن مطالعه‌یه چوق مشتاق اولدیغم حالده؛ بتون بتون سائر کتابلرک مطالعه‌سندن بر منع، بر مجانبت روحه

ویریلیمشدی. بویله غربتده مدارِ تسلی و انسیت اولان مطالعه‌یی بڭا ترک ایتدیرن، آڭلادم که، طوغریدن طوغریه آیاتِ قرآنیه‌نڭ استادِ مطلق اولملری ایچوندرد.

هم یازیلان اثرلر، رساله‌لر، (اکثریتِ مطلقه‌سی) خارجدن هیچ بر سبب گلمیه‌رک، روحمدن تولد ایدن بر حاجته بناء، آنی و دفعی اولارق إحسان ایدیلیمش. صوگره بعض دوستلریمه گوستردیگم وقت، دیمشلر: "شو زمانڭ یاره‌لرینه دوارد." انتشار ایتدکدن صوگره اکثر قارداشلرمدن آڭلادم که، تام شو زمانده کی احتیاجه موافق و درده لایق بر علاج حکمنه گچیور.

ایشته اختیار و شعوریمڭ دائره‌سی خارجنده، مذکور حالتلر و سرگذشت حیاتم و علوملرڭ أنواعلرنده کی خلافِ عادتِ اختیارسز تتبعاتم؛ بویله بر نتیجهٔ قدسیه‌یه منجر اولمق ایچون، قوتلی بر عنایتِ الهیه و بر إکرام ربّانی اولدیغنه بنده شبهه بیراقمامشدر.

یدنجی إشارت: بو خدمتمز زماننده، بش آلتی سنه ظرفنده، بلا مبالغه یوز اثرِ إکرامِ الهی و عنایتِ ربّانیه و کرامتِ قرآنیه‌یی گوزیمزله گوردک. بر قسمنی، اون آلتنجی مکتوبده إشارت ایتدک؛ بر قسمنی، یگرمی آلتنجی مکتوبڭ دردنجی مبحثڭ مسائلِ متفرقه‌سنده؛ بر قسمنی، یگرمی سکرنجی مکتوبڭ اوچننجی مسئله‌سنده بیان ایتدک. بنم یاقین آرقداشلرم بونی بیلیورلر. دائمی آرقداشم بارلالی سلیمان أفندی چوقلرینی بیلیور. خصوصًا سوزلرڭ و رساله‌لرڭ نشرنده و تصحیح‌حاتنده و یرلرینه یرلشدیرمکده و تسوید و تبییضنده، فوق المأمول کرامتکارانه بر تسهیلاته مظهر اولویورز. کرامتِ قرآنیه اولدیغنه شبهه‌مز قالمیور. بونڭ مثاللری یوزلردر.

هم معیشت خصوصنده او قدر شفقتله بسله نییورز که؛ اُڭ کوچک بر آرزوی قلبمزی، بزی استخدام ایدن صاحب عنایت تطمین ایتمک ایچون؛ فوق المأمول بر صورتده إحسان ایدیور. و هکذا... ایشته بو حال غایت قوتلی بر إشارت غیبیه در که، بز استخدام اولونیورز. هم رضا دائره سنده، هم عنایت آلتنده بزه خدمت قرآنیه یاپدیریلیور.

﴿الْحَمْدُ لِلَّهِ هَذَا مِنْ فَضْلِ رَبِّي﴾

﴿سُبْحَانَكَ لَا عِلْمَ لَنَا إِلَّا مَا عَلَّمْتَنَا إِنَّكَ أَنْتَ الْعَلِيمُ الْحَكِيمُ﴾

﴿اللَّهُمَّ صَلِّ عَلَى سَيِّدِنَا مُحَمَّدٍ صَلَاةً تَكُونُ لَكَ رِضَاءً وَلِحَقِّهِ آدَاءٌ وَعَلَى آلِهِ وَصَحْبِهِ وَسَلَّمَ تَسْلِيمًا كَثِيرًا أَمِينَ﴾ اللَّهُمَّ بِسْمِ اسْمِكَ الْأَعْظَمِ اجْعَلْ نَاشِرَ هَذِهِ الرِّسَالَةِ مَظْهَرَ عِنَايَتِكَ وَكَرَامَاتِ فُرْقَانِكَ أَمِينَ أَمِينَ أَمِينَ﴾



محرم بر سؤاله جوابدر

(شو سرّ عنایت اُسکیدن محرمجه یازیلمش، اون دردنجی سوزڭ آخیرینه إلحاق ایدیلمشدی. هر ناصلسه اکثر مستسخر اونوتوب یازمامشلدی. دیمک مناسب و لایق موقعی بوراسی ایمش که، گیزی قالمش.)

بندن سؤال ایدیورسڭ: "نه دن سنڭ قرآندن یازدیڭ سوزلرده اوپله بر قوت،

بر تأثیر وار که، مفسرلرک و عارفلرک سوزلرنده نادرًا بولونور. بعضًا بر سطرده، بر صحیفه قدر قوّت وار؛ بر صحیفه ده، بر کتاب قدر تأثیر بولونویور؟"

الجواب: (گوزل بر جوابدر) شرف، إعجاز قرآنه عائد اولدیغندن و بگا عائد اولمادیغندن، بلا پروا دیرم: اکثریت اعتباریله اوپله در. چونکه: یازیلان سوزلر تصوّر دگل تصدیقدر؛ تسلیم دگل، ایماندر؛ معرفت دگل، شهادتدر، شهوددر؛ تقلید دگل تحقیقدر؛ التزام دگل، إذعاندر؛ تصوّف دگل حقیقتدر؛ دعوا دگل، دعوا ایچنده برهاندر. شو سرّ حکمتی بودر که:

أسکی زمانده، أساسات ایمانیه محفوظدی، تسلیم قوی ایدی. تفرّعاتده، عارفلرک معرفتلی دلیلسز ده اولسه، بیاناتلری مقبول ایدی، کافی ایدی. فقط شو زمانده ضلالت فنیّه، الی أساساته و آرکانه اوزاتمش اولدیغندن، هر درده لایق دوایی إحسان ایدن حکیم رحیم اولان ذات ذو الجلال، قرآن کریمک اّ پارلاق مظهر إعجازندن اولان تمثیلاتندن بر شعله سنی؛ عجز و ضعفه، فقر و احتیاجه مرحمه خدمت قرآنه عائد یازیلمه إحسان ایتدی. فَلِلّهِ الْحَمْدُ سرّ تمثیل دوربینیله، اّ اوزاق حقیقتلر غایت یاقین گوستریلدی. هم سرّ تمثیل جهت الوحدتیله، اّ طاغنیق مسئلهلر طویلاتدیریلدی. هم سرّ تمثیل نردبانیله، اّ یوکسک حقائقه قولایقله یتیشدیریلدی. هم سرّ تمثیل پنجره سیله؛ حقائق غیبیه، أساسات اسلامییه شهوده یاقین بر یقین ایمانیه حاصل اولدی. عقل ایله برابر وهم و خیال، حتّی نفس و هوا تسلیمه مجبور اولدیغی گبی، شیطان دخی تسلیم سلاحه مجبور اولدی.

الحاصل: یازیلمده نه قدر گوزللك و تأثیر بولونسه، آنجق تمثیلات قرآنیه نك

لمعاندنددر. بنم حصّه؛ یالکز شدّتِ احتیاجمه طلبدر و غایت عجزمه
تضرّعمددر. درد بنمدر، دوا قرآنکدر.

سعید النورسی



﴿بِاسْمِهِ سُبْحَانَهُ ۖ وَإِنْ مِنْ شَيْءٍ إِلَّا يُسَبِّحُ بِحَمْدِهِ﴾
﴿السَّلَامُ عَلَيْكُمْ وَرَحْمَةُ اللَّهِ وَبَرَكَاتُهُ﴾

عزیز، صدیق قارداشلم!

أولاً: گچن مبارک لیلۀ برائتکزی و گله جک رمضان شریفکزی تبریک
ایدرز. بو سنه برائت گیجه سنی نورجیلر حقّنده چوق برکتلی و کرامتلی اولدیغنه
بر أماره سنی حیرتله گوردک. شویله که:

بن برائت گیجه سندن آز أول عصای موسی تصحیحیله مشغول ایکن؛
بر گوگرچین پنجره یه گلدی، بگا باقدی. بن دیدم: "مژده می گتیردک؟" ایچری یه
گیردی، گویا اُسکیدن دوست ایدک گی هیچ اورکمه دی. عصای موسی
اوستنه چیقدی، اوچ ساعت اوطوردی؛ اُکمک، پرنج ویردم، ییمه دی؛ تا
آقشامه قالدی، صوگره گیتدی، تکرار گلدی. تا صباحه قدر یانمده
قالدی. بن یاتارکن باشمه گلدی، الله ایصمارلادق نوعندن باشمی اوقشادی،
صوگره اوچدی گیتدی. ایکنجی گون، بن تأسّف ایدرکن، ینه گلدی؛ بر گیجه

داها قالدی. دیمک بو مبارک قوش، هم عصای موسی، هم برائتمزی تبریک ایتمک ایستدی.

سعید النورسی



﴿بِاسْمِهِ سُبْحَانَهُ ۞ السَّلَامُ عَلَيْكُمْ وَرَحْمَةُ اللَّهِ وَبَرَكَاتُهُ أَبَدًا دَائِمًا﴾

أولاً: شیمدی تام تحقّق ایتدی که؛ زلزله، رسالۀ النور ایله علاقه داردر. خسروک مدافعاتمه یازیلان درت زلزله مسئله سنی تصدیق ایدن بو گیجه کی شدتلی درت دفعه زلزله، بگا و نورلره و بو مملکته قطعی بر سوء قصد اثری اولارق حکومت ایچریسنده خدمتجیمه باغیره رق بگا تحقیرکارانه إهانت و شتم ایدوب "گیت اوکا سویله" دین و قائم مقامک آمر جبریل "خسته ده اولسه بورایه گتیریگز" بکجیلره و ژاندارمه لره آمر ویرن و آفیونک پرده آلتنده کی بیوک مأموره طاینان امیرطاغ ضابطه سی، هم نور شاگردلرینک شوقلرینه، هم نورلرک بوراده یازیلماسنه، هم بگا اهمیتلی صیقنتی ویرمه سی عین وقتده، بویله بوراده گورولمه یین بو شدتلی زلزله نک گلمه سی گوستریور که؛ رسالۀ النور بر وسیلۀ دفع بلادره؛ تعطیله اوغرادقجه، بلا فرصت بولوب گلیر.

سعید النورسی



ذکائینک بر منظومه‌سی

بو نور اثر، تفسیریدر او سماوی کتابک،
 إعلان ایدر حقیقتی، امرِ حقّی بیلدیرر.
 عصیانلره، ظلملره معروض اولان جهانک
 بو عصرده گوز یاشنی، نور صاچارق دیکدیرر.

بو اثردر مضطرب گوکلره تسلی،
 بو قرارسز عالمک هر بحرانده نور صاچار.
 بو اثردر هر ظلمتده سلامت رهبری،
 اهل ایمان بو سایه‌ده بو اثرله حر یاشار.

معصوملره بر او گوتدر، گنجلرک ده رهبری
 هر مظلومه "آغلامه" دیر، "گوله‌جکسک یارین سن!"
 تسلیسی چوق یوجه‌در، عبرتلیدر درسلی،
 بلی بوکوک اختیاره مژده ویرر دریندن.

بو نور اثر، هر ییلگینک، هر مؤمنک سرتاجی،
 دردلیلرک درمانیدر، هر منکری طوقاتلر.
 شرکلرک هم هادمیدر، هم هر قایغو علاجی،
 زندیق ظالم ایلشیرسه باشنه وولقان پاتلار.

بو اُثر در انسانلری دهشتلردن دور ایدن،
 قدرت اُلی حامیسیدر، حیرت افزا حکمی وار.
 معنّدر تسلیم اولور، حکمنه مغرور ایکن،
 هر سرسری فیلسوفی مفتون ایدن نوری وار.

أی کوچ یتمز، دهشت ویرن حالتلردن آغلایان،
 فانیلره آلدانه رق قیریلدقجه باغیرمه.
 أی زائلدن، عاجزلردن مدد اوموب باغلانان،
 گیر بو نورك عالمنه، فانیلری چاغیرمه.

آییل آرتیق، غفلت سرخوشلغندن طورمه اویان،
 هوساتك بر اُذرهادر قلبگی کمیره جك.
 یارین مسعود اولاجقدر یوقلقده حقّی بولان،
 نوره ویر نَقْدِ عمری، یارین سکا ویریله جك،
 حضورینه اُخری ده إحتشاملر سریله جك...

رساله نورك قصورلی خادمی

ذکائی



بِسْمِ اللَّهِ الرَّحْمَنِ الرَّحِيمِ

﴿وَمَا أَرْسَلْنَاكَ إِلَّا رَحْمَةً لِّلْعَالَمِينَ﴾

آيتنڭ وراثتِ اُحمديه (عصم) جهتنده، معنایِ إشاری نقطه‌سنده، بو عصرده او رحمةً لِّلعالَمینڭ بر آیینه‌سی و حقیقتِ قرآنیه‌نڭ بر حقیقی تفسیری اولان رسالۀ نور، او کَلِّی رحمتڭ بر جلوه‌سی، بر نمونه‌سی اولماسندن؛ حقیقتِ محمدیه‌نڭ (عصم) بر قسم اوصافی، معنایِ مجازی ایله جزئی بر وارثنه ویریله‌ییلیر دئییه، بو پارلاق قصیده‌یه ایلیشمدم. یالکُز حقیقتِ اُحمديه (عصم) آیینه‌سنڭ فرقه‌ی إشارةً بعض کلمه‌لر علاوه ایدیلدی.

سعيد النورسی

حضور بولور بوگون سنڭله عالم
أی بو عصرده رحمتِ عالم رسالۀ نور
سُرور بولور بوگون سنڭله آدم
أی بر رحمتِ عالم رسالۀ نور

بو خسته گوڭلر چوقدن پریشان
وارسه سنده اگر لقماندن نشان
بر شفا صون، گل ای محبوبِ ذی‌شان
أی جلوه رحمتِ عالم رسالۀ نور

گلمز می صوڳی بو اوزون هیجه نځ
 گچمز می غمی بو یاسلی گیجه نځ
 زاری آرتدی، صبری بیتدی نیجه نځ
 آی جلوۂ رحمتِ عالم رساله نور

فخرِ عالم، عرشدن بو یره ایندی
 شاهِ ولایت گلوب دُلْدله بیندی
 ذو الفقاره بوگون آرتیق نور دیندی
 آی بو زمانده رحمتِ عالم رساله نور

یولمز، بو نورځ بو نورلی یولی
 اولدق هپمز او نورځ بر قولی
 نور یولنده یوروین هم نه موطلی
 آی نمونه رحمتِ عالم رساله النور

نورسځ نور چیقان نورلی طاغنده
 بلبل ئوتر باغچه سنده باغنده
 توزی اولسهق اونځ پاک آياغنده
 آی رحمتِ عالم جلوه سی رساله النور

دردلره درمانسځ، محبوبِ جانسځ
 هم جامع الأسماء والقرآنسځ
 هم ده نورِ حقدن بزه إحسانسځ
 آی بر رحمتِ عالم رساله نور

بو عالمده مادّه دگل، بر ئوزسڭ
 هر ذره‌دن باقان بتون بر گوزسڭ
 کائناتی حیران ایدن بتون بر یوزسڭ
 آی مثالِ رحمتِ عالم رساله‌ نور

أصلی اُولیسڭ بالڭ، شکرڭ
 دریاسیسڭ جمله علمڭ، هنرڭ
 گلمدی جهانہ بویله اثر بڭزرڭ
 آی مرآتِ رحمتِ عالم رساله‌ النور

سن آیلردن، گونشلردن اوستونسڭ
 نهایتسز، صوڭی گلمز بوتونسڭ
 نور جمالڭ بتون بتون گورونسون
 آی مظهرِ رحمتِ عالم رساله‌ النور

بوین بوکوب آجی آجی مله‌ردک
 گوزیاشنی قانلر ایله سیله‌ردک
 گورسه‌ک دبیّه سنی حقدن دیلردک
 آی بر تمثیلِ رحمتِ عالم رساله‌ النور

چونکه سنسڭ بو عصرده رحمةً لِّلْعَالَمینڭ جلوه‌سی
 چونکه سنسڭ شیمدی شفیع المذنبینڭ وارثی
 اَعِثْنَا یا غیاثَ المستغیثین، بر دعاسی
 آی شعله‌ رحمتِ عالم رساله‌ نور

شفا بولسون شیمدی برآز یاره‌مز
 رواج بولسون گچمز اولان پاره‌مز
 صاچ نوریکی، آقه دونسون قره‌مز
 آی ضیاءِ رحمتِ عالم رسالهٔ نور

جُرمزله کلخان گبی پرنارز
 درد آلندن هم هر گون زار و زارز
 عفو ایت بزی مادام سکا‌هپ یارز
 آی نورِ رحمتِ عالم رسالهٔ نور

میلمز یوق یالانچی بر دنیا‌یه
 صوڭ ویردک بز بدعه‌لره، ریایه
 قاپیلما‌یز او‌یله قورو خولیایه
 آی بر حقیقتِ رحمتِ عالم رسالهٔ نور

یوق بزده جمعیت قورمه خولیاسی
 یوق باشقه بر یوله گیتمه سوداسی
 اولدق آنجق نورڭ دردلی شیداسی
 آی دردلیلره رحمتِ عالم رسالهٔ نور

یوللرده بیراقدق گچدک درویشی
 آتدق گوڭلردن او‌یله تشویشی
 کافی بو پارلایان نورڭ گونشی
 آی معکسِ رحمتِ عالم رسالهٔ نور

گچمیشز هپ مدح‌لردن ثنادن
 یوز چویردک ثروت‌لردن غنادن
 نور ایسترز، گچمه‌دن بو فنادن
 آی بو عصرده رحمتِ عالم رساله‌نور

نور اُلندن ایچه‌لی بز شرابی
 چویرمیشز طاتلیلغه عذابی
 بر محبوبک بز ده اولدق ترابی
 آی بزه رحمتِ عالم رساله‌النور

عاشق‌لرک، عرشه چیقان فریادی
 آغلاتیور او پاک روح‌لی اجدادی
 الله ایچون ایلله بزه امدادی
 آی محتاج‌لره رحمتِ عالم رساله‌نور

نورک بکجیی

گوکلر صالدی بلا، یر ویردی بلا
 صارصدی آفاقی بر آجی واویلا
 رحمت ایت عالمه آی نور مولا
 آی جلوئه رحمتِ عالم رساله‌نور

بر یانده سیل وار، بر یانده قان آقار
 بو بلا آتشی عالمی یاقار
 آغلایان بو بشر هپ سکا باقار
 آی نمونه رحمتِ عالم رساله‌نور

چوریلدی آتشلہ بو قوجه دنیا
 بر جھنم گبی قاینادی دریا
 یتیش إمداده آی شاہِ اولیا
 آی بو زمانده رحمتِ عالم رسالۃ نور

هر یانغینی سنک نورک سوندورر
 هر بر یری بر گلشنه سنک نورک دوندیرر
 دجالی ده بر گون گلیر آلبته ئولدیرر
 آی نور رحمتِ عالم رسالۃ النور

زندقه‌یه، کفره قارشى صالديرک
 گوگلردن کدرلری قالديرک
 بزى نورک درياسنه طالديرک
 آی بیچاره‌لره رحمتِ عالم رسالۃ نور

قالديرمز سکا أصلا کيمسه آل
 باغلايورز بزلر سکا جانندن بل
 دنيا لره سنسک اُميد و اَمَل
 آی ضياءِ رحمتِ عالم رسالۃ نور

سن اوردو قورمازسک أرله، اوشاقله
 صاواشمازسک اويله طويله، بیچاقله
 نورکله شو عصرى طوتوب قوجاقله
 آی شيمدی رحمتِ عالم رسالۃ نور

بیتسین ده، بو قورقونج طوفانِ شدید
 آچیلسین یَپْ یَکی بر دورِ مسعود
 اون سکز بیگِ عالم ایله سین هپ عید
 اُی اهلِ قرآنه رحمتِ عالم رساله نور

گلیور شو قارشیدن گرچه بر ظلمت
 فقط سنسک بوگون عطایِ رحمت
 بوغاجقسک اونِ نور کله اَلبت
 اُی بر رحمتِ عالم رساله نور

قیزیل اُژدر یووامزه گیرمه سین
 زهرلی اُلی یاقامزه ایرمه سین
 قارشی طوروب نورک فرصت ویرمه سین
 اُی سیفِ رحمتِ عالم رساله نور

قره دومان اوستمزدن طاغیلسین
 قیزیل آلؤ سونوب عالم آیلسین
 بو ظفرک حشره قدر آگیلسین
 اُی ذو الفقارِ رحمتِ عالم رساله نور

او صویدندر نیجه جانلر یاقانلر
 او صویدندر اولر بارقلر ییقانلر
 او صویدندر سکا کینله باقانلر
 اُی حجتِ رحمتِ عالم رساله نور

معصوملرڭ قانلرینی ایچرلر
 أبو جهلی، غرودلری گچرلر
 ئولوملردن ئولوملری سچرلر
 أی شیمدی بر رحمتِ عالم رسالۃ نور

بر میقروب که، جگرلری دیشله یور
 قانمزله کنديسنى بسله یور
 تمیز یوردی تلویث ایدوب پیسله یور
 أی بر أجزاخانه رحمتِ عالم رسالۃ نور

غازیلرڭ، فاتحلرڭ قوناغی
 سیدلرڭ، سزورلرڭ اوتاغی
 بو وطندر، شهیدلرڭ یاتاغی
 أی جلوۃ رحمتِ عالم رسالۃ نور

او شهیدك آلا دوغش كفى
 مسكلر قوقار، گله بگزى بدن
 اوپر ملكلر ده نورلى نعىنى
 أی نمونه رحمتِ عالم رسالۃ نور

قرآن دییور ئولمه مشدر، دیریدر
 هر بریسی حقك آرسالان آریدر
 تربهلری یورکلری تیره تیر
 أی آیینۃ رحمتِ عالم رسالۃ نور

آرمغانسڭ چونکه اصيل ملّته
 دوشميه لم بر گون بيله ذلّته
 گوتور بزي شانلي بيوك دولته
 اى مثال رحمتِ عالم رساله نور

ايله يه لر نورڭ ايله هپ صولت
 ظفرلره شانلر بولور بو ملّت
 شرقه، غربه ضيا صالحين بو دولت
 اى بزلره رحمتِ عالم رساله نور

نوردن قنادڭ، هم صاغلام قولڭ وار
 نوردن سنڭ حقّه گيدن يولڭ وار
 قبول ايت بر كمّتَر فيضي قولڭ وار
 اى بو عصرده رحمتِ عالم رساله نور!

﴿السَّلَامُ عَلَيْكُمْ وَرَحْمَةُ اللَّهِ وَبَرَكَاتُهُ﴾

استادم، أفنديم حضرتلری!

﴿وَمَا أَرْسَلْنَاكَ إِلَّا رَحْمَةً لِّلْعَالَمِينَ﴾ آيتنڭ نورلرندن، نورڭ سايه سنده

آلا بيلديگم بر ذره يي بو شكلده يازدم و حضور عرفانڭزه صوندم. قبولنى رجا ايدر، سلاملريمى صونار و مبارك آلريڭزدن اوپهرز.

بيچاره طلبه گز

حسن فيضى

(رحمة الله عليه أبداً دائماً)

اونورسیتهده کی نور شاگردلرینک نور حقیقتک فن دائره سنده
فوق العاده قیمتی تقدیر ایتدکلرینه بر نمونه در.

﴿بَاسْمِهِ سُبْحَانَهُ ۖ وَ إِنَّ مِنْ شَيْءٍ إِلَّا يُسَبِّحُ بِحَمْدِهِ﴾
﴿السَّلَامُ عَلَيْكُمْ وَ رَحْمَةُ اللَّهِ وَ بَرَكَاتُهُ أَبَدًا دَائِمًا﴾

شو کائنات سماسنک غروبی اولمیان معنوی گونشی اولان قرآن کریم؛ شو
موجودات کتاب کبیرینک آیات تکوینییه سنی اوقوتدیرمق، ماهیتی گوسترمک
ایچون، شعاعلری حکمنده اولان أنوارینی نشر ایدیور. عقول بشری تنویر ایله
صراط مستقیم گوستریور. بشریت عالمنده هر فرد، خلقتنده کی مقصدی و
فطرتنده کی مطالبی و إستقامتنده کی غایه سنی، او هدایت گونشنک نوری ایله
گورور، آکلار و بیلیر. او هدایت نورینک تجلیسنه مظهر اولانلر، قلب قابلیتی
نسبتنده اوکا آیینهدارلق ایدهرک قریبت کسب ایدر. اشیاء و حیاتک ماهیتی، او
نور ایله تظاهر ایدهرک آنجق او نور ایله گورولور، آکلاشیلیر و بیلینیر.

شمس ازلینک معنوی هدایت نورلرینی تمثیل ایدن قرآن کریم، قلب گوزیله
حق و حقیقتی گورمگی تأمین ایدر. اونک ایچون، اونک نورندن اوزاقده قالانلر،
ظلماتده قالیرلر. زیر هر شی نور ایله گورولور، آکلاشیلیر و بیلینیر.

ایشته شو کتاب کبیرک، معنوی و سرمدی گونشی اولان قرآن کریمک
نور تجلیسنه، بو عصریمزده "نور" اسمیله مسما اولان رسالہ نورک شخص
معنویسی مظهر اولمشدر. او نورلر که: ظلماتدن آیریلماق ایسته مین یراسه
طبیعتلی، غفلت اویقوسی ایله گوندوزینی گیجه یاپان سفاهت پرست، عقلی
گوزینه اینمش، ظلماتده قالارق گوزی گورمز اولانلره و یولنی شاشیرانلره

قارشى پروژكسيون گي نورلرني ايمان حقيقتلرينه توجيه ايدهر ك صراطِ مستقيمي بوسبتون كور اولميانلره گوسترييور. نور طوپوزيني اهلِ كفر و منكرلر ك باشنه ووروب: "يا عقلكي باشكدن چيقار آت، حيوان اول. ياخود ده عقلكي باشكه آلارق إنسان اول." دييور.

علم بر نوع نور اولديغنه گوره، رساله نور ك علمه اولان ا ك درين وقوفني گوستره جك بر ايكي دليلنه قيصة إشارت ايدر ز.

أولا: شوني خاطر لاملی يز كه، رساله نور، باشقه كتابلری دگل، بلكه يالكر قرآن كريمی استاد اولارق طانيماسی و او ك خدمت ايمه سی إعتباريله، مقبولیتی حَقْنده بزم بو موضوعده سوز سويله مه مزه حاجت بير اقمييور. بز آنجق علم أربابی مابيننده رساله نور ك دگري تبارز ايتديرمك ايچون علاوة دير ز كه:

رساله نور، شيمدی يه قدر هيچ بر علم آدمك تام بر وضوح ايله إثبات ايدمهديكي ا ك مغلق مسئلهلری غايت بسيط بر شكلده ا ك عامی عوام طبقه سندن طوت، تا ا ك عالی خواص طبقه سنه قدر هر كسك إستعدادی نسبتنده آكلايه بيله جگی بر طرزده، شبهه سز إقناع ايديجی و يقيني بر شكلده ايضاح و إثبات ايمه سيدر. بو خصوصيت، همان همان هيچ بر علم آدمك اثرنده يوقدر.

ايكنجیسی: بتون نور اثرلری، قرآن كريمك بر قسم آيتلرينك حقيقي تفسیری اولوب، اونك معنوی إعجازينك لمعلری اولديغنی هر خصوصده گوسترمسيدر.

اوچنجیسی: إنسانلر ك ا ك درين إحتياجلرينه، قطعی دليل و برهانلره علمی ماهيته جواب ويرمه سيدر. مثلا: واجب الوجودك وارلغی و آخرت و سائر

ایمان رکنلرینی، بر ذره‌نک لسان حال و قال صورتنده ترجمانلغنی یاپارق اثبات ایتمه‌سی، اُکْ مشهور اسلام فیلسوفلرندن ابن سینا، فارابی، ابن رشد؛ بو مسلک‌لرده بتون موجوداتی دلیل اولارق گوستردکلری حالده، رسالهُ نور او حقیقتلری عیناً بر ذره ویا بر چکردک لسانیلہ اثبات ایدیور. اُگر رسالهُ نورکْ علمی قدرتنی شیمدی اونلره گوسترمک ممکن اولسیدی؛ اونلر، همان دیز چوکوب رسالهُ نوردن درس آلاجقلردی.

دردنجیسی: رسالهُ نور، انسانک سنه‌لرجه اوغراشهرق اُلدہ ایدہ‌میہ‌جگی بیلگیلری، قومپریمه خلاصه‌لر نوعندن قیصه بر زمانده تأمین ایتمه‌سیدر.

بشنجیسی: رسالهُ نور، علمکْ اساس غایه‌سی اولان رضایِ اِلہی‌ی تحصیلہ سبب اولماسی و دنیا منفعتنه، علمی هیچ بر جهتلہ آلت ایتمیہ‌رکْ، تام معناسیلہ انسانیتہ خدمت گگی اُکْ علوی وظیفه‌ی تمثیل ایتمه‌سیدر.

آلتنجیسی: رسالهُ نور، قوتلی و قدسی و ایمانی بر تفکر ثمره‌سی اولوب، بتون موجوداتکْ لسان حال و قال صورتنده ترجمانلغنی یاپار. عین زمانده ایمان حقیقتلرینی علم یقین و عین یقین و حقّ یقین درجه‌لرنده انکشاف ایتدیرر.

یدنجیسی: رسالهُ نور، بتون علملری جامع اولوشیدر. عادتاً علم ایپلکلری ایله طوقونمش مزین قوماش گبیدر. و شیمدی‌یه قدر هیچ بر علم اُربابی طرفندن سویلنمه‌مش و هر علمه اولان اُکْ درین وقوفنی تبارز ایتدیرن وجیزه‌لر مجموعه‌سیدر. مثال اولارق بر قاچنی ذکر ایدہ‌رکْ، هیئتِ مجموعه‌سی حقّنده بر فکر ایدینمک ایسته‌ینلره، رسالهُ نور بحرینه مراجعت ایتمه‌سنی توصیه ایدرز.

"سیوری سینگکْ گوزینی خلق ایدن، گونشی دخی او خلق ایتمشدر."

"بر کله‌بگک معده‌سنی تنظیم ایدن، منظومه شمسى دخى او تنظیم ایتمشدر."

"بر ذره‌بی ایجاد ایتمک ایچون، بتون کائناتی ایجاد ایده‌جک بر قدرت غیر متناهی لازمدر. زیرا شو کتاب کبیر کائناتک هر بر حرفک، باخصوص ذی‌حیات هر بر حرفک، هر بر جمله‌سنه متوجه برر یوزی و ناظر برر گوزی واردر."

"طبیعت، مثالی بر مطبوعه‌در، طابع دگل. نقشدر، نقاش دگل. مسطردر، مصدر دگل. نظامدر، ناظم دگل. قانوندر، قدرت دگل. شریعت ارادیه‌در، حقیقت خارجیہ دگل."

"ثابت، دائم، فطری قانونلر گی روح دخی؛ عالم آمردن، صفت اراده‌دن گلمش و قدرت اوکا وجود حسى گیدیرمشدر. بر سیالیه لطیفه‌بی، او جوهره صدف ایتمشدر."

و هکذا بیگلر و جیزه‌لر وار. بکجی

﴿الْباقِي هُوَ الْبَاقِي﴾

اونورسیتنه نورجیلری نامنه، دعاکزه چوق محتاج

مصطفی رمضان اوغلی



خلیل ابراھیمک منظومہ سیدر

﴿بَاسْمِهِ سُبْحَانَهُ ۖ وَ إِنَّ مِنْ شَيْءٍ إِلَّا يُسَبِّحُ بِحَمْدِهِ﴾
﴿السَّلَامُ عَلَيْكُمْ وَرَحْمَةُ اللَّهِ وَبَرَكَاتُهُ أَبَدًا دَائِمًا﴾

ذرہمزی فرطِ شفقتکله شمسِ أنواریکھ دوشوردک،
جہلمزلہ أنانیتمزی دیارِ عرفانکھ دوشوردک.
معدنِ نحاسمزی پوتہِ فرقانہ دوشوردک،
حیفاکہ، او پوتہدہ زنارِ انکاریمزی دوشوردک.

سرایِ کعبۂ علیایہ ایروبِ طولِ اُلملمزی دوشوردک،
مقامِ نورِ توحیدہ واروبِ خوابِ خیالمزی دوشوردک
حرمگاہِ اِلہیدہ سُویدایِ حجرہسنہ یوکمزی دوشوردک،
ھیئتِ صورتک درونندہ کی معنایہ گوگلمزی دوشوردک.

تا ازل صباحندہ وحدتِ نغمہسنی ایشیتدک،
لیلایِ زمانِ قیسِ ایلہ بر دمده گوروشدک.
دوستِ اِقلیمک لالہسنک باغلرینہ ایریشدک،
وحدتِ ساقی مدادینی ﴿سَقِیْهُمْ﴾ کوثرینہ دوشوردک.

اولماسہیدک ای رسالۂ نور بزہ سن آرمغان؛
چاہِ ماسوا، نفسِ طاغوتلہ بلع ایدردی بزى همان.
ضالالتدن گچہمز، کفر بنگندہ قالیردق عریان،
حمدًا لله قطرهمزی بحرِ أنواریکھ دوشوردک.

سنده کی اَسرارِ حق ﴿سَوْفَ تَرٰیْنِ﴾ یی سویله سه‌م،
 گل وجه‌کده کی لاهوت بن‌گی شرح و بیان ایله سه‌م.
 نورِ خدا، مؤمنه هدا، ضلالت‌ه سیفِ همتا می دیسه‌م؛
 ذو الفقار و عصایِ موسی ایله منکرلری گردابه دوشوردک.

آشنایِ بَرَمِ حق‌در رسالۀ نور طلبه‌لری؛
 نور یزدان، فیضِ قرآندر جمله‌سنک رهبری.
 بو عاجز ناتوان اونلرک بر حقیر کمتری،
 خلیلِ ابراهیمه "خاکِ درِ آلِ عبا" تام دوشوردک.

﴿الْبَاقِیْ هُوَ الْبَاقِیْ﴾

دعاکزه چوق محتاج، گناهکار قارداشکز
 خاکِ درِ آلِ عبا



هو نکته سی

﴿بِاسْمِهِ سُبْحَانَهُ ۖ وَإِنْ مِنْ شَيْءٍ إِلَّا يُسَبِّحُ بِحَمْدِهِ﴾

عزیز و صدیق قارداشلرم!

قارداشلرم، ﴿لَا إِلَهَ إِلَّا هُوَ﴾ و ﴿قُلْ هُوَ اللَّهُ﴾ ده کی ﴿هُوَ﴾ لفظنده یالکزمادی جهته بر سیاحت خیالیه فکریه ده هوا صحیفه سنک مطالعه سیله آنی بر صورتده گورونن بر ظریف نکته توحیدده؛ مسلك ایمانیه نك حدسز درجه قولای و وجوب درجه سنده سهولتی بولونماسنی و شرك و ضلالتك مسلکنده حدسز درجه ده مشکلاتلی، ممتنع بیگلر محال بولوندیغنی مشاهده ایتدم. غایت قیصه بر إشارتله، او گنیش و اوزون نکته یی بیان ایده جگم.

أوت ناصلکه بر آوج طوپراق، یوزر چیچکلره نوبتله صاقسیلق ایدن قابنده اگر طبیعته، أسبابه حواله ایدیلسه لازم گلیر که؛ یا او قابده کوچك مقیاسده یوزر، بلکه چیچکلر عددنجه معنوی ماکینه لر، فابریقه لر بولونسون و یا خود او پارچه حق طوپراقده کی هر بر ذره، بتون او آیری آیری چیچکلری، مختلف خاصیتلریله و حیاتدار جهازاتیله یایمالرینی بیلسین؛ عادتاً بر إله گی حدسز علمی و نهایتسز إقتداری بولونسون. عیناً او یله ده: أمر و إرادة نك بر عرشی اولان هوانك، روزگارك هر بر پارچه سی و بر نفَس و طیرناق قدر اولان ﴿هُوَ﴾ لفظنده کی

هواده؛ کوچوچك مقياسده، بتون دنياده موجود تلفونلرڭ، تلغرافلرڭ، راديولرڭ و حدسز و مختلف قونوشمالرڭ مركزلرى، سانتاللى آخذه و ناقله لرى بولونسون و او حدسز ايشلرى برابر و بر آنده ياپاييلسين و ياخود او ﴿هُوَ﴾ ده كى هوانڭ بلكه عنصرِ هوانڭ هر بر پارچه سنڭ هر بر ذره‌سى، بتون تلفونجىلر و آيرى آيرى عموم تلغرافجىلر و راديو ايله قونوشانلر قدر معنوى شخصيتلرى و قابليتلى بولونسون و اونلرڭ عموم ديلىرى بيلسين و عين زمانده باشقه ذره‌لره ده بيلدىرسين، نشر ايتسين. چونكه بالفعل او وضعيت قسماً گورونويور و هوانڭ بتون اجزاسنده او قابليت وار.

ايشته اهلِ كفرڭ و طبيعّون و مادّيونلرڭ مسلكلرنده دگل بر محال، بلكه ذره‌لر عددنجه محاللر و امتناعلر و مشكلاتلر آشكاره گورونويور. اُگر صانع ذو الجلاله ويريلسه، هوا بتون ذرّاتيله اونڭ اُمربر نفرى اولور. بر تك ذره‌نڭ منتظم بر تك وظيفه‌سى قدر قولايجه، حدسز كلّى وظيفه‌لرني خالقنڭ اِذنيه و قوتيله و خالقه اِنتساب و اِستناد ايله و صانعنڭ جلوّه قدرتي ايله بر آنده شمشك سرعتنده و ﴿هُوَ﴾ تلفظى و هوانڭ تمّوجى سهولتنده ياپيلير. يعنى، قلم قدرنڭ حدسز و خارقه و منتظم يازيلرينه بر صحيفه اولور و ذره‌لرى، او قلمك اوجلىرى و ذره‌لرڭ وظيفه‌لرى دخى، قلم قدرنڭ نقطه‌لرى بولونور. بر تك ذره‌نڭ حركتى درجه‌سنده قولاي چاليشير.

ايشته بن ﴿لَا إِلَهَ إِلَّا هُوَ﴾ و ﴿قُلْ هُوَ اللَّهُ﴾ ده كى حركتِ فكريه ايله سياحتمده هوا عالمى تماشا و او عنصرڭ صحيفه سنى مطالعه ايدركن، بو مجمل حقيقتى تام واضح و مفصل عين اليقين مشاهده ايتدم و ﴿هُوَ﴾ نڭ لفظنده، هواسنده بويله پارلاق بر برهان، بر لمعه واحديت بولونديغى گي؛ معناسنده و

إشارتندہ غایت نورانی بر جلوہٴ اُحدیت و چوق قوّتلی بر حجتِ توحید و ﴿هُوَ﴾ ضمیرینک مطلق و مبہم اشارتی ہانگی ذاتہ باقیور اشارتنہ بر قرینہٴ تعین او حجّتدہ بولونماسی ایچوندہ کہ؛ ہم قرآنِ معجز البیان، ہم اہل ذکر مقامِ توحیددہ بو قدسی کلمہ یی چوق تکرار ایدرلر دیبہ علم الیقین ایلہ بیلدم.

أوت مثلاً بر نقطہ بیاض کاغددہ، ایکی اوچ نقطہ قونولسہ قاریشدیغی و بر آدم، مختلف چوق وظیفہ لری برابر یاپماسیلہ شاشیراجغی و بر کوچک ذی حیاتہ، چوق یوکلر یوکلنمہ سیلہ آلتندہ ازیلدیگی و بر لسان و بر قولاق، عین آندہ متعدّد کلمہ لرک برابر چیقماسی و گیرمہ سیی إنتظامنی بوزوب قاریشہ جغی حالده؛ عین الیقین گوردہ کہ: ﴿هُوَ﴾ نك آناختاری ایلہ و پوصولاسیلہ فکرًا سیاحت ایتدیگم هوا عنصرنده هر بر پارچه سیی حتی هر بر ذرّہ سیی ایچنہ مختلف بیگلر نقطہ لر، حرفلر، کلمہ لر قونولدیغی و یا قونولہ بیلہ جگی حالده قاریشمدیغی و إنتظامنی بوزمادیغی؛ ہم آیری آیری پک چوق وظیفہ لر یاپدیغی حالده ہیچ شاشیرمادان یاپیلدیغی و او پارچہ یہ و ذرّہ یہ پک چوق آغیر یوکلر یوکلندیگی حالده ہیچ ضعف گوسترمیہ رک، گری قالمیہ رق إنتظام ایلہ طاشیددیغی؛ ہم بیگلر آیری آیری کلمہ، آیری آیری طرزده، معنادہ او کوچوجک قولاق و لسانلرہ کمالِ إنتظاملہ گلوب چیقوب، ہیچ قاریشمیہ رق، بوزولمیہ رق او کوچوجک قولاقلرہ گیروب، او غایت اینجہ جک لسانلردن چیقدیغی و او هر ذرّہ و هر پارچہ جق، بو عجیب وظیفہ لری گورمکله برابر کمالِ سربستیتلہ جذبہ دارانہ حال دیلی ایلہ و مذکور حقیقتک شہادتی و لسانیلہ ﴿لَا إِلَهَ إِلَّا هُوَ﴾ و ﴿قُلْ هُوَ اللَّهُ أَحَدٌ﴾ دیوب گزر و فورطنہ لرک و شمشک و برق و گوک گورولتسیی گبی هوا یی چارپیشدیربجی طالغہ لر

ایچریسندە إنتظامی و وظیفه‌لرینی هیچ بوزمیور و شاشیرمیور و برایش دیگر بر ایشه مانع اولمیور. بن عین الیقین مشاهده ایتدم.

دیمک یا هر بر ذره و هر بر پارچه هواده نهایتسز بر حکمت و نهایتسز بر علمی، إرادة‌سی و نهایتسز بر قوتی، قدرتی و بتون ذراته حاکم مطلق بر خاصه‌لری بولونمق لازمدرکه: بو ایشلره مدار اولاییلسین. بو ایسه، ذره‌لر عددنجه محال و باطلدر. هیچ بر شیطان دخی بونی خاطره گتیره‌مز. اويله ایسه بو صحیفه‌هوانک؛ حق‌الیقین، عین‌الیقین، علم‌الیقین درجه‌سندە بداهتله ذات‌ذو الجلالک حدسز غیر متناهی علمی و حکمتله چالیشدیردیغی قلم قدرت و قدرک متبدل صحیفه‌سی و بر لوح محفوظک عالم تغیرده و متبدل شئوناننده بر لوح محو و إثبات نامنده یازار بوزار تحت‌سی حکمنده‌در.

ایشته هوا عنصرینک یالکز نقل اصوات وظیفه‌سندە مذکور جلوّه وحدانیتی و مذکور عجائی گوستردیگی و ضلالتک حدسز محالیتنی إظهار ایتدیگی گی، عنصر هواینک سائر اهمیتلی وظیفه‌لرندن بری ده الکتریق، جاذبه، دافعه، ضیاگی سائر لطائفک نقلنده شاشیرمادن منتظمّا، اصوات نقلنده کی وظیفه‌ی گوردیگی عین زمانده، بو وظیفه‌لری دخی گوردیگی عین زماننده، بتون نباتات و حیواناته تنفس و تلقیح گی حیاته لزومی بولونان لوازماتی کمال إنتظام ایله یتیشدیریور. أمر و إرادة‌الهیّه‌نک بر عرشى اولدیغنی قطعی بر صورتده إثبات ایدیور و سرسری تصادف و کور قوت و صاغیر طبیعت و قاریشق، هدفسز اسباب و عاجز، جامد، جاهل ماده‌لر بو صحیفه‌هوائیه‌نک کتابتنه و وظیفه‌لرینه قاریشماسی هیچ بر جهتله احتمال و امکانی بولونمادیغنی عین‌الیقین درجه‌سندە إثبات ایتدیگی قطعی قناعت گتیردم و هر بر ذره و هر بر پارچه لسان حال ایله

﴿لَا إِلَهَ إِلَّا هُوَ﴾ و ﴿قُلْ هُوَ اللَّهُ أَحَدٌ﴾ دیدکلرینی بیلدم و بو ﴿هُوَ﴾ آناختاری

ایله هوانک مادی جهتنده کی بو عجایی گوردیگم گی، هوا عنصری ده بر ﴿هُوَ﴾ اولارق عالم مثال و عالم معنایه بر آناختار اولدی.

متباقیسی شیمدیلك یازدیریلما دی. عمومه بیگلر سلام.

قارداشکز

سعید النورسی



یگر می طوقوزنجی مکتوبک بشنجی رساله اولان بشنجی قسمی

بسم الله الرحمن الرحيم

﴿اللَّهُ نُورُ السَّمَوَاتِ وَالْأَرْضِ... الخ﴾

آیت پرأنوارینک چوق أنوار أسرارندن بر نورینی، رمضان شریفده بر حالت روحانیهده حسن ایتدم، خیال میال گورددم. شویله که:

أَوَيْسُ الْقُرَآنِيِّ: ﴿إِلَهِي أَنْتَ رَبِّي وَ أَنَا الْعَبْدُ * وَ أَنْتَ الْخَالِقُ وَ أَنَا

الْمَخْلُوقُ * وَ أَنْتَ الرَّزَّاقُ وَ أَنَا الْمَرْزُوقُ * الخ...﴾ مناجات مشهوره سی

نوعندن، بتون موجودات ذوی الحیات، جناب حقّه قارشى عین مناجاتی

ایتدکلرینی و اون سکزی یئک عالمک هر برینک ایشیغی، برر اسمِ الهی اولدیغنی بگا قناعت ویره جک بر واقعه قلبیه خیالیه پی گوردم. شویله که:

بربرینه صاریلی چوق یاپراقلی بر گل غنجه سی گبی، شو عالم بیگلر پرده پرده ایچنده صاریلی، بربری آتنده صاقلی عالملی بو عالم ایچنده گوردم. هر بر پرده آچیلدقجه، دیگر بر عالمی گورو یوردم. او عالم ایسه، آیت نورک ارقه سنده کی **﴿أَوْ كَظُلُمَاتٍ فِي بَحْرِ لُجِّي يَفْشِيهِ مَوْجٌ مِنْ فَوْقِهِ مَوْجٌ مِنْ فَوْقِهِ سَحَابٌ ظُلُمَاتٌ بَعْضُهَا فَوْقَ بَعْضٍ إِذَا أَخْرَجَ يَدُهُ لَمْ يَكْدِ يَرِيهَا وَمَنْ لَمْ يَجْعَلِ اللَّهُ لَهُ نُورًا فَمَا لَهُ مِنْ نُورٍ﴾** آیتی تصویر ایتدیگی گبی؛ بر ظلمات، بر وحشت، بر دهشت قراکلیغی ایچنده بگا گورو نو یوردی. بردن بر اسمِ الهینک جلوه سی، بر نور عظیم گبی گورو نوب ایشیقلا ندیریوردی. هانگی پرده عقله قارشی آچیلمشسه، خیاله قارشی باشقه بر عالم فقط غفلتله قراکلیغی بر عالم گورو نورکن، گونش گبی بر اسمِ الهی تجلی ایدر، باشدن باشه او عالمی تنویر ایدر و هکذا... بو سیر قلبی و سیاحت خیالیه چوق دوام ایتدی.

أز جمله: رزقه محتاج حیوانات عالمی گوردیگم وقت، حدسز احتیاجات، شدتلی آجلقلریله برابر ضعف و عجزلری، او عالمی بگا چوق قراکلیغی و حزین گوستردی. بردن رحمن اسمی، رزاق برجنده یعنی معناسنده بر شمس تابان گبی طلوع ایتدی؛ او عالمی باشدن باشه رحمت ضیاسیله یالیزیلادی.

صوگره او عالم حیوانات ایچنده، اطفال و یاورولرک ضعف و عجز و احتیاج ایچنده چیریندقلری، حزین و هرکسی رفته گتیره جک بر قراکلیق ایچنده دیگر بر عالمی گوردم. بردن رحیم اسمی شفقت برجنده طلوع

ایتدی، او قدر گوزل و شیرین بر صورتده او عالمی ایشیقلا ندیردی که؛ شکوا و رقت و حزنندن گلن یاش طامله لیمی، فرح و سروره و شکرک لذتندن گلن طامله لره چویردی.

صوگره سینه ما پرده سی گبی بر پرده داها آچیلدی، عالم انسانی بگا گوروندی. او عالمی او قدر ظلماتلی، او قدر قراکقلی، دهشتلی گوردم که؛ دهشتمدن فریاد ایتدم، "ایواه!" دیدم. چونکه گوردم که: انسانلرده کی ابدہ اوزانوب گیدن آرزولری، امللری و کائناتی إحاطه ایدن تصوّرات و افکارلری و ابدی بقا و سعادت ابدیه پی و جنتی غایت جدی ایسته یین همتلری و استعدادلری و حدسز مقاصده و مطالبه متوجّه فقر و احتیاجلری و ضعف و عجزلریله برابر، هجومه معروض قالدقلری حدسز مصیبت و اعدالریله برابر؛ غایت قیصه بر عمر، غایت دغدغلی بر حیات، غایت پریشان بر معیشت ایچنده، قلبه اُک اَلم و اُک مدّش حالات اولان متمادی زوال و فراق بلاسی ایچنده، (أهل غفلت ایچون) ظلمات ابدی قپوسی صورتنده گورولن قبره و مزارستانه باقیبورلر، برر برر و طائفه طائفه او ظلمات قویوسنه آتیلیورلر. ایشته بو عالمی بو ظلمات ایچنده گوردیگم آنده، قلب و روح و عقلم ایله بتون لطائف انسانیه، بلکه بتون ذرات وجودم فریاد ایله آغلامغه حاضر ایکن؛ بردن جناب حقّ عادل اسمی حکیم برجنده، رحمن اسمی کریم برجنده، رحیم اسمی غفور برجنده (یعنی معناسنده)، باعث اسمی وارث برجنده، محی اسمی محسن برجنده، ربّ اسمی مالک برجنده طلوع ایتدیلر. او عالم انسانی ایچنده کی چوق عالملری تنویر ایتدیلر، ایشیقلا ندیردیلر و نورانی آخرت عالمندن پنجره لر آچوب، او قراکقلی انسان دنیاسنه نورلر سریدیلر.

صوگره بر معظم پرده داها آچیلدی، عالم ارض گوروندی. فلسفه‌نک قراکقلی قوانین علمیه‌لری، خیاله دهشتلی بر عالم گوستردی. یتیمش دفعه طوپ گله‌سندن داها سرعتلی بر حرکتله، یگرمی بش ییگ سنه مسافه‌یی بر سنه‌ده دور ایدن و هر وقت طاغیلماغه و پارچه‌لانمغه مستعد و ایچی زلزله‌لی، اختیار و چوق یاشلی کره ارض ایچنده، عالمک حدسز فضا‌سنده سیاحت ایدن بیچاره نوع انسان وضعیتی، بگا وحشتلی بر قراکقل ایچنده گوروندی. باشم دوندی، گوزم قراردی. بردن خالق ارض و سماواتک قدیر، علیم، رب، الله و رب السموات والارض و مسخر الشمس و القمر اسملری؛ رحمت، عظمت، ربوبیت برجنده طلوع ایتدی. او عالمی اوילה نورلاندیردیلر که؛ او حالتده بگا کره ارض غایت منتظم، مسخر، مکمل، خوش، امنیتلی بر سیاحت گمیسی تنزه و کیف و تجارت ایچون مهیا ایدیلیمش بر شکلده گوردیم.

الحاصل: ییگ بر اسم ایلینک، کائناته متوجه اولان او اسمادن هر بری بر عالمی و او عالم ایچنده کی عالملری تنویر ایدر بر گونش حکمنده و سر احدیت جهتیهله، هر بر اسمک جلوه‌سی ایچنده سائر اسملرک جلوه‌لری دخی بر درجه گورونویوردی. صوگره قلب، هر ظلمات آرقه‌سنده آیری بر نوری گوردیگی ایچون، سیاحتیه اشتها‌سی آچیلییوردی. خیاله بینوب، سمایه چیقماق ایستدی. او وقت، غایت گنیش بر پرده داها آچیلدی. قلب، سماوات عالمنه گیردی. گوردیم که:

او نورانی تبسم ایدن صورتنده گورولن ییلدیزلر، کره ارضدن داها بیوک و اوندن داها سرعتلی بر صورتده بربری ایچنده گزییورلر، دونیورلر. بر دقیقه بریسی یولنی شاشیرتسه، باشقه‌سیله مصادمه ایده‌جک، اوילה بر پاتلاق ویره‌جک که، کائناتک ئودی پاتلایوب عالمی طاغیده‌جق. نور دگل، آتش صاچارلر؛

تبسم دگل، وحشتله بگا باقدیلر. حدسز بیوک، گنیش خالی، بوش، دهشت، حیرت ظلماتی ایچنده سماواتی گوردیم. گلدیگمه ییك پشیمان اولدم. بردن

﴿رَبُّ السَّمَوَاتِ وَ الْأَرْضِ * رَبُّ الْمَلٰٓئِكَةِ وَ الرُّوحِ﴾ كُ اَسْمَاءِ حَسَنِ سِی،

﴿وَلَقَدْ زَيَّنَّا السَّمَاءَ الدُّنْيَا بِمَصَابِيحَ * وَ سَخَّرَ الشَّمْسَ وَ الْقَمَرَ﴾ برجنده

جلوه لریله ظهور ایتدیلر. او معنا جهتیهله، قراثلقی اوستنه چوکمش اولان ییلدیزلر، او انوار عظیمه دن برر لمعه آلوب، او ییلدیزلر عددنجه الکتریق لامباری یاقیلمش گبی، او عالم سماوات نورلاندی. او بوش و خالی توهم ایدیلن سماوات دخی ملائکه لرله، روحانیلرله طولدی، شنلندی. سلطان ازل و ابدك حدسز اوردولرندن بر اوردو حکمنده حرکت ایدن گونش لر و ییلدیزلر، بر مانوره علوی یاپیور طرزنده، او سلطان ذو الجلالك حشمتنی و شعشعه ربویتی گوستریور گبی گوردیم. بتون قوتمله و ممکن اولسیدی بتون ذراقله و بنی دیکله سه لردی بتون مخلوقاتك لسانلریله دییه جکدم، هم عموم اونلرك نامنه دیدیم: ﴿اللَّهُ نُورُ

السَّمَوَاتِ وَ الْأَرْضِ مَثَلُ نُورِهِ كَمِشْكُوهٖ فِيهَا مِصْبَاحٌ الْمِصْبَاحُ فِي زُجَاجَةٍ الزُّجَاجَةُ كَأَنَّهَا كَوْكَبٌ دُرِّيٌّ يُوقَدُ مِنْ شَجَرَةٍ مُّبَارَكَةٍ زَيْتُونَةٍ لَا شَرْقِيَّةٍ وَلَا غَرْبِيَّةٍ يَكَادُ زَيْتُهَا يُضَيُّءُ وَلَوْ لَمْ تَمْسَسْهُ نَارٌ نُّورٌ عَلَى نُورٍ يَهْدِي اللَّهُ لِنُورِهِ مَنْ يَشَاءُ﴾

آیتنی اوقودم؛ دوندم، ایندم، آیلدم؛ ﴿الْحَمْدُ لِلَّهِ عَلَى نُورِ الْإِيمَانِ وَ الْقُرْآنِ﴾ دیدیم.



نَعْبُدُ نَكْتَه‌سی

بو معنایی تنویر ایچون، کندی باشمدن گچمش نورلی بر حالی و حقیقتلی
بر خیالی سویله‌یورم. شویله‌که:

بر وقت **﴿إِيَّاكَ نَعْبُدُ وَإِيَّاكَ نَسْتَعِينُ﴾** ده کی نُونِ متکَلِّم مع الغیری
دوشوندم و متکَلِّم وحده صیغه‌سندن **﴿نَعْبُدُ﴾** صیغه‌سنه إِنْتِقَالْک سببنی قلبم
آرادی. بردن، نمازده کی جماعتک فضیلتی و سَرّی، او نوندن إِنْکِشَاف ایتدی.
گوردم که: نماز قیلدیغم او بایزید جامعنده کی جماعتله إِشْتِرَاکمی و هر بری بنم
بر نوع شفاعتجم حکمنه و قرائتمده إِظْهَار ایتدیگم حکملره و دعوالره برر
شاهد و برر مؤید گوردم. ناقص عبودیتمی، او جماعتک بیوک و کثرتلی عباداتی
ایچنده درگاهِ إلهی‌یه تقدیمه جسارت گلدی. بردن بر پرده داها إِنْکِشَاف
ایتدی: یعنی إِستَانْبُولْک بتون مسجدلری إِتْصَال پیدا ایتدی. او شهر، او بایزید
جامعی حکمنه گچدی. بردن، اَوْنَلَرْک دعالرینه و تصدیقلرینه معنّا بر نوع
مظهریت حسّ ایتدم. اونده دخی؛ روی زمین مسجندنه، کعبه مکرّمه أطرافنده
دائره‌وی صفلر ایچنده کندیمی گوردم. **﴿الْحَمْدُ لِلّٰهِ رَبِّ الْعَالَمِينَ﴾** دیدم. "بنم
بو قدر شفاعتجیلرم وار؛ بنم نمازده سویله‌دیگم هر بر سوزی عینّا سویله‌یورلر،
تصدیق ایدیورلر. "مادام خیالاً بو پرده آچیلدی؛ کعبه مکرّمه محراب حکمنه
گچدی. بن بو فرصتدن إِستفاده ایده‌رک او صفلری إِشْهَاد ایدوب، تحیاتده
گتیردیگم، **﴿أَشْهَدُ أَنْ لَا إِلَهَ إِلَّا اللَّهُ وَأَشْهَدُ أَنَّ مُحَمَّدًا رَسُولُ اللَّهِ﴾** اولان ایمانک
ترجمانی مبارک حجر الأسود تودیع ایدوب اُمانت بیراقیورم دیرکن، بردن بر
وضعیت داها آچیلدی. گوردم که: داخل اولدیغم جماعت اوچ دائره‌یه آیریلدی:

برنجی دائرہ: روی زمینده مؤمنلر و موحدینده کی جماعتِ عظما.

ایکنجی دائرہ: باقدم، عموم موجودات، بر صلاتِ کبراده، بر تسبیحاتِ عظماده، هر طائفه کندینه مخصوص صلوات و تسبیحاتی ایله مشغول بر جماعت ایچندهیم. "وظائفِ اُشیا" تعبیر ایدیلن خدماتِ مشهوده، اونلرک عبودیتلرینک عنوانلریدر. او حالده "الله اکبر" دیوب حیرتدن باشمی اگدم، نفسمه باقدم:

اوچنجی بر دائره ایچنده، حیرت‌انگیز ظاهرًا و کیفیةً کوچک، حقیقةً و وظیفهً و کمیةً بیوک، بر کوچک عالمی گوردیم که ذراتِ وجودیه مدن تا حواسِ ظاهریه مه قدر، طائفه طائفه وظیفه عبودیتله و شکرانیه ایله مشغول بر جماعت گوردیم. بو دائرهده، قلبمده کی لطیفه ربّانیهم، ﴿إِيَّاكَ نَعْبُدُ وَإِيَّاكَ نَسْتَعِينُ﴾ او جماعت نامنه دییور. ناصل، اولکی ایکی جماعتده ده لسانم، او ایکی جماعتِ عظمایی نیت ایدهرک دیمشدی.

الحاصل: ﴿نَعْبُدُ﴾ نونی، شو اوچ جماعته إشارت ایدیور.

ایشته بو حالتده ایکن بردن قرآن حکیمک ترجمانی و مبلّغی اولان رسول اکرم علیه الصلاة والسلامک، (مدینه منوره دینیلن معنوی منبرنده) شخصیت معنویه سی، حشمتیله تمثّل ایدهرک، ﴿يَا أَيُّهَا النَّاسُ اعْبُدُوا رَبَّكُمُ﴾ خطابنی، معنًا هرکس گبی بن ده ایشیدوب؛ او اوچ جماعتده هرکس بنم گبی ﴿إِيَّاكَ نَعْبُدُ﴾ ایله مقابله ایدیور تحیل ایتدم. ﴿إِذَا ثَبَتَ الشَّيْءُ ثَبَتَ بِلَوَازِمِهِ﴾ قاعده سنجه، شویله بر حقیقت فکره گوروندی که:

مادام بتون عالم‌لرک ربّی، انسان‌لری مخاطب اِئخاذ ایدوب، عموم موجوداتله قونوشور و شو رسول اکرم علیه الصلاة والسلام، او خطاب عزّتی، نوع بشره بلکه عموم ذی‌روحه و ذی‌شعوره تبلیغ ایدیور. آلبته بتون ماضی و مستقبل، زمان حاضر حکمنه گچدی؛ بتون نوع بشر بر مجلسده، صف‌لری مختلف بر جماعت شکلنده اولارق؛ او خطاب، او صورتله اولره ایدیلیور. او وقت هر بر آیات قرآنی؛ غایت حشمتلی و وسعتلی بر مقامدن، غایت کثرتلی و مختلف و اُهمیتلی مخاطبندن، نهایتسز عظمت و جلال صاحبی متکلم ازلیدن و مقام محبوبیت عظمای صاحبی ترجمان عالی‌شانندن آلدیغی بر قوت علویت، جزالت و بلاغت ایچنده؛ پارلاق، هم پک پارلاق بر نور إعجازی ایچنده گوردیم. او وقت، دگل عموم قرآن؛ یا بر سوره و یا خود بر آیت، بلکه هر بر کلمه‌سی برر معجزه حکمنه گچدی: ﴿الْحَمْدُ لِلَّهِ عَلَىٰ نُوْرِ الْإِيْمَانِ وَالْقُرْآنِ﴾ دیدیم. او عین حقیقت اولان خیال‌دن ﴿نَعْبُدُ﴾ نوننه گیردیگم گبی چیقدم و آکلادم که: قرآنک دگل آیت‌لری، کلمه‌لری، بلکه نُونِ نَعْبُدُ گبی بعض حرف‌لری دخی مهم حقیقت‌لرک نورلی آناختار‌لریدر.

قلب و خیال، او نُونِ نَعْبُدُ چیققدن صوگره، عقل قارشیلرینه چیقدی، دیدی: "بن ده حصّه ایسترم. سزک گبی اوچامام. آیاقلرم دلیلدر، حجتدر. عین ﴿نَعْبُدُ﴾ و ﴿نَسْتَعِيْنُ﴾ ده، معبود و مستعان اولان خالق‌ه گیدن یولی گوسترمک لازمدر که، سزکله گله‌بیلیم." او وقت قلبه شویله گلدی که: دی او متحیر عقله:

باق کائناتده کی بتون موجوداته؛ ذی‌حیات اولسون، جامد اولسون،

کمالِ اطاعت و انتظام ایله وظیفه صورتنده عبودیتلری وار. بر قسمی شعورسز، حسسز اولدقلری حالده، غایت شعورکارانه، انتظامپرورانه و عبودیتکارانه وظیفه گوروپورلر. دیمک بر معبودِ بالحق و بر آمرِ مطلق واردر که، بونلری عبادته سؤق ایدوب استخدام ایدیور.

هم باق بتون موجوداته، خصوصاً ذی حیات اولانلره.. هر برینک غایت کثرتلی و غایت متنوع احتیاجاتی وار و وجود و بقاسنه لازم پک کثرتلی، مختلف مطلوبلری وار؛ اُک کوچکنه آللری اولاشه ماز، قدرتلری یتیشمز. حالبوکه او حدسز مطلبلری، اوممادیغی یردن، وقتِ مناسبده، منتظمًا اونلرک آلرینه ویریلیور و بالمشاهده گورونویور.

ایشته شو موجوداتک بو حدسز فقر و احتیاجاتی و بو فوق العاده إعاناتِ غیبیه و امداداتِ رحمانیه بالبداهه گوسترر که: بر غنیّ مطلق، کریم مطلق و قدیر مطلق اولان بر حامی و رازقلری واردر که، هر شی و هر ذی حیات اوندن إستعانه ایدر، مدد بکله یور. معنًا ﴿وَإِيَّاكَ نَسْتَعِينُ﴾ دیر. او وقت عقل، "آمنا و صدقنا" دیدی.

سعید النورسی



رساله نور نه در، بدیع الزمان کیمدر؟

هر عصر باشنده حدیثجه گله جگی تبشیر ایدیلن دینک یوکسک خادمیلری؛ آمر دینده مبتدی دگل، متبّعدرلر. یعنی، کندیلرندن و یگیدن بر شی

احداث ایتمز لر، یکی احکام گتیرمز لر. اساسات و احکام دینییه و سنن محمدیه (عصم) حرفیا اتباع یولیه دینی تقویم و تحکیم و دینک حقیقت و اصلیتنی اظهار و اوکا قاریشدی ریلیمق ایسته نیلن اباطلی رفع و ابطال و دینه واقع تجاوزلری رد و إحا و أوامر ربّانییه یی إقامه و احکام إلهیه نك شرافت و علویتنی اظهار و إعلان ایدر لر. آنجق طور اساسی یی بوزمادن و روح اصلی یی رنجیده ایتمه دن یکی ایضاح طرز لریله، زمانك فهمنه او یغون یکی إقناع اصول لریله و یکی توجیهات و تفصیلات ایله ایفاء وظیفه ایدر لر.

بو مأمورین ربّانییه، فعلیات لریله و عمل لریله ده مأموریتلرینك مصدقی اولور لر. صلابت ایمانیه لرینك و إخلاص لرینك آیینه دارلغنی بالذات ایفا ایدر لر. مرتبه ایمانلرینی فعلاً اظهار ایدر لر. و أخلاق محمدیه نك (عصم) تام عاملی و مشوار احمدیه نك (عصم) و حلیه نبویه نك حقیقی لابس ی اولدقلرینی گوستر لر. خلاصه: عمل و أخلاق باقیمندن و سنت نبویه إتباع و تمسك جهتندن اُمت محمدّه تام بر حسن مثال اولور لر و نمونه إقتدا تشکیل ایدر لر.

بونلرك كتاب اللّٰهك تفسیری و احکام دینییه نك ایضاحی و زمانك فهمنه و مرتبه علمنه گوره طرز توجیهی صد دنده یازدقلری أثر لر، کندی تلقاء نفس لرینك و قریحه علویه لرینك محصولی دگلدر، کندی ذکا و عرفانلرینك نتیجه سی دگلدر. بونلر، طوغریدن طوغرییه منبع وحی اولان ذات پاك رسالتك معنوی إلهام و تلقیناتیدر. جلجلوتیه و منوی شریف و فتوح الغیب و أمثالی آثار هپ بو نوعدندر. بو آثار قدسیه یه او ذوات عالیشان آنجق ترجمان حکمنده در لر. بو ذوات مقدسه نك، او آثار برگزیده نك تنظیمنده و طرز بیاننده بر حصه لری وارد ر؛ یعنی بو ذوات قدسیه، او معنائك مظهری، مرآت ی و معکسی حکمنده در لر.

رساله نور و ترجمانه گلنجه: بو اثر عالی شانده شیمدی یه قدر أمثالنه

راستلانماش بر فیض علوی و بر کمال نامتناهی موجود اولدیغندن و هیچ بر
 اثرک نائل اولمادیغی بر شکله مشعله إلهیه و شمس هدایت و نیر سعادت اولان
 حضرت قرآنک فیوضاتنه وارث اولدیغی مشهود اولدیغندن؛ اونک اساسی نور
 محض قرآن اولدیغی و اولیاء الله آثارندن زیاده فیض أنوار محمدیه یی حامل
 بولوندیغی و ذات پاک رسالتک اوندہ کی حصّه و علاقہ سی و تصرف قدسیسی
 اولیاء الله آثارندن زیاده اولدیغی و اونک مظهری و ترجمانی اولان معنوی
 ذاتک مظهریتی و کمالاتی ایسه او نسبتده عالی و أمثالسز اولدیغی گونش گبی
 آشکار بر حقیقتدر.

أوت او ذات داها حال صباوتده ایکن و هیچ تحصیل یاپمه دن ظواهری
 قورتارمق اوزره اوچ آیلق بر تحصیل مدّتی ایچنده علوم أولین و آخرینه و
 لدنیات و حقائق اشیایه و أسرار کائناته و حکمت إلهیه وارث قیلنمشدر که،
 شیمدی یه قدر بویله مظهریت علیایه کیمسه نائل اولمامشدر. بو خارقه علمیه نک
 اشی أصلا مسبوق دگلدر. هیچ شبهه ایدیلهمز که؛ ترجمان نور، بو حاليله
 باشند باشه عفت مجسمه و شجاعت خارقه و إستغنای مطلق تشکیل ایدن
 خارق العاده متانت أخلاقیه سی ایله بالذات بر معجزه فطرتدر، تجسم ایتمش بر
 عنایتدر و بر موهبه مطلقه در.

او ذات ذی خوارق داها حدّ بلوغه ایرمه دن بر علامه بی عدیل حالنده
 بتون جهان علمه میدان اوقومش، مناظره ایتدیگی ارباب علومى إلزام و إسکات
 ایتمش، هر نرده اولورسه اولسون واقع اولان بتون سؤالره مطلق بر إصابتله
 و أصلا تردد ایتمه دن جواب ویرمش، اون درت یاشندن إعتباراً استادلق پایه سنی
 طاشیمش و متمادیا أطرافنه فیض علم و نور حکمت صاچمش، ایضا حارنده کی

اینجه‌لک و درینلک و بیانلرنده کی علویت و متانت و توجیه‌لرنده کی درین فراست و بصیرت و نورِ حکمت، اربابِ عرفانی شاشیرتمش و حقیله "بدیع الزمان" عنوانِ جلیلی بخش ایتدیرمشدر. مزایایِ عالیّه و فضائلِ علمیّه سیله ده دینِ محمدینک نشرنده و إثباتنده بر کمالِ تام حالنده رونما اولمش اولان بویله بر ذاتِ ألبته سیّد الأنبیا حضرتلرینک اُکْ یوکسکِ إلتفاتنه مظهر و اُکْ عالی حمایه و همتنه نائلدر. و شبهه‌سز او نبیّ اقدسکْ أمر و فرمانی ایله یوروین و تصرفیله حرکت ایدن و اونکْ أنوار و حقائقنه وارث و معکس اولان بر ذاتِ کریم الصفتدر.

أنوارِ محمدیه‌یی و معارفِ اُحمديه‌یی و فیوضاتِ شمعِ إلهی‌یی اُکْ مشعشع بر شکلده پارلاتماسی و قرآنی و حدیثی اولان إشاراتِ ریاضیه‌نک کندیسنده منتهی اولماسی و خطاباتِ نبویه‌یی إفاده ایدن آیاتِ جلیله‌نک ریاضی بیانلرینک کندی اوزرنده طویلانماسی دالئلریله، او ذاتِ خدمتِ ایمانیّه نقطه‌سنده رسالتکْ بر مرآتِ مجلاّسی و شجرهٔ رسالتکْ بر صوُکْ میوهٔ منوُری و لسانِ رسالتکْ إرثیت نقطه‌سنده صوُکْ دهانِ حقیقتی و شمعِ إلهینکْ خدمتِ ایمانیّه جهتنده بر صوُکْ حاملِ ذی‌سعادتِ اولدیغنه شبهه یوقدر.

اوچنجی مدرسهٔ یوسفیه‌نک الحجة الزهرا و زهرة النور
اولان تک درسنی دیگله‌ین نور شاکردلری نامنه

أحمد فیضی، أحمد نظیف، صلاح الدین، زبیر،
جیلان، صونغور، طابانجه‌لی

بنم حصّه می حدّمدن یوز درجه زیاده ویرمه لرله برابر، بو امضا صاحب لرینک خاطر لرینی قیرمغه جسارت ایده مدم. سکوت ایده رک او مدحی رسالهٔ نور شاکر دلرینک شخص معنویسی نامه قبول ایتدم.

سعید النورسی



مؤلفک وصیتنامه سی مناسبتیله، خلیل ابراهیمک رسالهٔ نور حقّنده، نور شاکر دلری نامه یازدیغی بر فقره سنک بر پارچه سیدر.

﴿بِسْمِ سُبْحَانَهُ﴾

رسالهٔ نور نوردن بر ابریشمدر که، کائنات و کائناتده کی موجوداتک تسبیحاتلری اونده دیزیلمشدر.

رسالهٔ النور آخذه و ناقله ایله مجهّز بر رادیوی قرآنیه در که؛ اونک تل و لامبالری، آیینه و بطاریالری حکمنده کی سطرلری، کلمه لری، حرفلری او یله انتظامکارانه و اعجازدارانه بسط ایدیلمشدر که؛ یارین هر علم و فن آدم لری و هر مشرب و مسلک صاحب لری علم و اقتدارلری مقدارنجه عالم غیب و عالم شهادتدن و روحانیات عالمندن و کائناتده کی جریان ایدن هر حادثاتدن خبردار اولاییلیر. زیرا رسالهٔ النور، منشور قرآندر.

رسالهٔ النور مؤمنلره؛ هدایای هدایت، وسیلهٔ سعادت، مظهر شفاعت و قیاض رحماندر.

رساله‌ی النور کائناته، نوبهارک فیضنی ویرن بر آب حیات و عینِ رحمت و محضِ حقیقت و بر گلزارِ گلستاندر.

رساله‌ی النور لطفِ یزدان، کمالِ ایمان، اشاراتِ قرآن و برکتِ إحساندر.

رساله‌ی النور کافره خسران، منکره طوقات، ضلالتّه دشمندر.

رساله‌ی النور بر کنزِ مخفی و بر صندوقچه‌ی جواهر و منبعِ أنواردر.

رساله‌ی النور حقیقتِ قرآن و معراجِ ایماندر.

رساله‌ی النور سرتاجِ اولیا، سلطانِ الأثر و زبده‌ی المعانی و عطایایِ الهی و هدایایِ سبحانیدر.

رساله‌ی النور بر بحرِ حقائق و بر سرِّ دقائق و کنزِ المعارف و بحرِ المکارمدر.

رساله‌ی نور خسته‌لره شفاخانه‌ی حکمت و ماءِ زمزم، صاغرله معیشتِ حقیقت و ریحِ ریحان و مسلکِ عنبردر.

رساله‌ی نور موعِدِ اُحمدی (عصم) و مؤیّدِ حیدری (رض) و تعاونِ غوثی (قس) و توصیه‌ی غزالی (قس) و إخبارِ فاروقیدر (قس).

رساله‌ی النور شمسِ قرآن معجزِ البیانک ألوانِ سبعه‌سی، رساله‌ی النورک منشورِ حقیقتنده تام تجلّی ایتدیگندن، هم بر کتابِ شریعت، هم بر کتابِ دعا، هم بر کتابِ حکمت، هم بر کتابِ عبودیت، هم بر کتابِ أمر و دعوت، هم بر کتابِ ذکر، هم بر کتابِ فکر، هم بر کتابِ لدنیات، هم بر کتابِ تصوّف، هم بر کتابِ منطق، هم بر کتابِ علمِ الکلام، هم بر کتابِ علمِ إلهیات، هم بر کتابِ تشویقِ صنعت، هم بر کتابِ بلاغت، هم بر کتابِ إثباتِ وحدانیت و معارضلرینه بر کتابِ إلزام و إسکاتدر.

رساله نور اجزای بر سماء معنویه نك گونشلی و آیلری و ییلدیزلریدر. ناصلکه ظاهرًا، پردهٔ اسباب اولان گونشدن، قمردن و کواکبدن بتون کائنات تنور و تزین و بتون اشیا نشو و نما و حیات بولویور. ایشته رساله نور دخی بو عصرده بتون عالم بشریته حیات جاودان و آدمه کامل انسان و قلوبه نشئه ایمان و عقوله یقینِ اطمئنان و افکاره انکشاف و نفوسه تسلیم رضا و جان شعاعلرینی قرآن معجز البیاندن آلوب صاچمقدهدر.

او سمای معنویه بی بعضًا و ظاهرًا بحسب الحکمة آفاقی بر بلوط کتله سی قاپلار. او جلاللی سمدان اوپله بر باران فیض و رحمت تقطر ایدر که استعدادلر؛ تخمیر، چکر دکلر، حبه لرگی و صیقیجی و او طار عالمده گرچه برآز مضطرب اولورلر، فقط تا او صیقیلماقدن اوزرلرنده کی قشرلری چاتلار و ییرتیلیر؛ و آنده بلوطلر ده افقلره چکیلوب نوبتجی وضعیتنده بکلمه سی، بر امتحان ربّانی و بر انکشاف فیضانی و بر رحمت نورانیدر که؛ اولجه بر حبه، بر چکر دک یگیدن تازه بر حیاته آتیلیر، اشتیاقله و نشئه انکشافله میوه دار قوجه بر آغاج صورتی آلیر و ﴿يَبْدِلُ اللَّهُ سَيِّئَاتِهِمْ حَسَنَاتٍ﴾ سَرینه مظهر اولورلر.

أوت یگر می سنه در دوام ایدن شو موسم شتا، إن شاء الله تعالی نهایت بولمش اوله... دنیایه یگی و فیضلی بر فصلِ نوبهار گله و عالمک یوزی نور ایله گوله...

رساله النور قرآن معجز البیانك تحت تصرّفنده اولدیغندن، اوڭا اوزانان و ایلشیمك ایسته یین هر آل قیریلیر و هر دیل قورور.

عموم نور شاکردلری نامنه

خلیل ابراهیم

مدرسة الزهرانك اركانلرى نامنه بز ده اشتراك ايدييورز.
عثمان، رشدی، رأفت، خسرو، سعید، حلمی،
محمد، خلیل ابراهیم، محمد نوری



مدینه منوره ده بولونان و نورك حقیقتنی تام آكلايان
و اسلاميته خدمت ایدن بر عالمك مکتوبیدر

گوڭلر فاتحی پك محترم و مكرم استادیمز حضرتلری!

مبارك آلریگزدن اوپر، بتون عزیز و صداقتلی طلبه‌لریگزله برابر صحت
و سلامتده دائم اولماڭزی بارگاه کبریادن نیاز ایلرم.

مسلمانلر ایچون اڭ بیوک بر بایرام دییه آنجق و صفلاندریلا بیلن برائتگز،
بتون نورجیلری شاد و خندان ایلدیگی گبی، بنده‌ڭزی ده دنیا لر قدر ممنون و
مسرور ایلهمشدر. ناصل ممنون ایتمه‌سین که، سزك اثرلریگزله برلکده برائتگز
دیك؛ روحك مادّیاته، نورك ظلمته، ایمانك کفره، حقك باطله، توحیدك شرکه و
عرفانك جهله غالب گلهمه‌سی دیمکدر.

بیللردن بری اوڭنه صیره‌طاغلر گبی اُنگلر، قورقونج اوچوروملر گبی مانعلر
قونیلان نور چاغلایانی؛ اڭ صوڭنده معجزه‌وی بر شکله بتون سدلری ییقمش،
مانعلری آشمش، نور ایلهمش بتون ظلمتلری تارمار ایلهمشدر.

"معجزه‌وی خارقه‌لرله طوغان اِلهی تجلّیلرک وصفنده قلملر قیریلیر، فکرلر

گوریلدر، إلهاملر یانار کول اولور. "دیرلردی. حقیقهٔ بنده‌گز، شیمدی بو مستثنا ظفرک قارشیسنده عین عجزی بتون وارلغمله حسن ایدیورم. زیرا تفکر و إلهامه نهایتسز بر أفق آچیلیور... جهان، محتشم بر نور معبدینی آکدیریور... جوارمده کی هر شی، هر یر درین وجد و إستغراقلرله غشی اولمش بر حالده... هر ذرده ﴿وَإِنْ مِنْ شَيْءٍ إِلَّا يُسَبِّحُ بِحَمْدِهِ﴾ سِرِّ سبحانیسی تجلی ایدیور...

بناءً علیه بیلمیورم، بو مسعود حادثه‌بی؛ شانلی بر ظفر، شاهانه بر فتح، إلهی بر قورتولوش، جهان شمول بر بایرام دییه می وصفلاندریم؟ زیرا قدسی دعوانک قراشمش اولدیغی بو إلهی ظفر، بتون اسلام و انسانلق دنیا سنده کی مجاهدلرک عزم‌لرینه قوت، روح‌لرینه جان، ایمان‌لرینه خیز و هیجان ویرمشد.

أوت عزم و ایمان‌لری، عشق و أمللری هنوز کماله ایرمه‌مش اولان بر چوق مسلمانلر؛ مع الأسف آجیق‌لی بر یأس ایچنده ایدیلر. بویله بر ظفرک تحققی، خیال و محال گورو یورلردی. فقط بتون فیض و نورینی انسانلغی تنویر و إرشاد ایچون إلهی بر گونش حالنده عرش اعظمک پرنور أفقلرندن اینن قرآن کریمدن آلان نور نشریاتی، طورغون گول‌لری آکدیران گوگل‌لری دریالرگی جوشدیرمش، قسوت و هجران ییللرینک اُمید و أملله ووردیغی مدهش زنجیرلری قیرمشد. او نور قایناغندن فیشقیران او سراپا فیض و حکمتلر صاچان اُترلر؛ حسلرک، فکرلرک و بالخاصّه آلؤلر ایچنده یانان روح و وجدانلرک اُزلی و اُبدی إحتیاج‌لرینه جواب و یردیگی گبی؛ اونلری طالغه طالغه بوغوجی قراکقلر محیطندن، ترمیز و پیریل پیریل نور أفقلرینه چیقارمشد.

ییللرجه دوام ایدن اوزون بر سکوت، درین بر غفلت و بوغوجی بر ظلمتدن صوگره إلهی بر گونش حالنده پارلایان بو قدسی ظفر، نور ایچون یول

آرامقده اولان پریشان بشریتک یاقین بر گله جکده اویانه جغنی مژده له مکده در. چونکه دین احتیاجی؛ صِرف مسلمانلرک دگل، بالعموم انسانلرک ازی و ابدی احتیاجیدر.

بوگون بدبخت انسانلق، دین نعمتندن محروم اولمانک سورکلی هجران و فلاکتلرینی باغری یانه رق چکمکده در. بو آجیقلی بحرانک قورقونج نتیجه سیدر که، چاریک عصر ظرفنده ایکی بیوک حربه گیرمش و اوچنجیسنک ده قپوسنی چالمق چیلغیلغنی گوسترمکده در.

آرتیق بتون انسانلری قارداش یاپارق یمیشیل جتتیرک نورلی اُقلرندن اُسَن رفاه و سعادت، حضور و آسایش روزگار یله طالعه لانان عالم شمول بر بایراق آلتنده طویلا یه جق اولان یگانه قوّت، اسلامدر. زیرا بشریتک بوگونکی حالی، طبقی اسلامدن اُولکی انسان جمعیتلرینک آجیقلی حالیدر. بونک ایچون انسانلغی او گونکی ابدی فلاکتدن قورتاران اسلام، بوگون ده قورتاره بیلیر...

اوت میلیونلرک، میلیارلرک قلبنده عصرلردن بری قانامقده اولان او درین یاره یی صاراجق یگانه مشفق آل؛ اسلامدر. هر نه قدر اُقلرده زمان زمان بعض اویدورما ایشیقلر گورولیورسه ده.. مستقبل، بتون نور و فیضنی گونشلردن دگل، بالذات ربّ العالمیندن آلان ازی و ابدی "ییلدیز" ندر. او ییلدیز، دنیلر طور دقجه طوراجق و اونی سوندورمک ایسته ینلری یردن یره ووره جقدر.

جهان قیمت استادم!

معلوم فاضلانه لریدر که؛ صوُک گونلرده مقدّس دعوا یه خدمت ایدن بعض تنویر و ارشاد حرکتلری طوغمش، فقط مع الأسف هیچ بریسی رساله نور

کلیاتک گوردیگی مهم ایشی گورهمه مش و إحراز ایتدیگی إلهی ظفری قزاناماشدر. زیرا بو یول؛ پیغمبرلرک، ولیرک، عارفلرک، صالحلرک و بالخاصه جانی جانانه سوه سوه فدا ایدن و صایسی میلیونلره صیغیان قهرمان شهیدلرک مقدس یولیدر. آرتیق بو چتین یولده یورومک ایسته ینلر، هر آن قارشیلرینه دیکيله جک اولان مدھش مانعلری دایما گوز اوکنده طوقمالری لازمدر. اوت بو یولده یورویه جک اولانلرک؛ سزده کی صارصیلمق بیلمه یین ایمانله، یوکسک و إلهی عرفانله و بالخاصه خارق العاده إخلاص و فراغتله مجھز اولمالری گرکدر. چونکه بو مهم وادیده نور دعواسنک تعقیب ایتدیگی تبلیغ، تنویر و إرشاد اصولی، بامباشقه خصوصیتلر طاشیمقدهدر. آرتیق إنسانک حس و فکرینه، روح و وجدانه بامباشقه أفقلر آچاق اولان بو درین بحثی، دعا بیورک ده مستقل و مفصل بر اثرده عزیز دین و گوکلداشلیمزه عرض ایتمک شرفنه نائل اولایم. چونکه بو نورلی بحث او قدر درین و او درجه مهمدر که، بویله بر قاج صحیفه لک مکتوب و مقاله لرله أصلا إفاده ایدیلهمز.

ایمان و قرآن نوری ایله ترتمیز گوکلنی فتح ایتدیگنر گنجلک، إلهی ظفریکنرک اؤ پارلاق دلیلنی تشکیل ایدن اؤ مهم وارلق و اؤ قیمتلی جوهردر... "نوردن سسلر"ک همان هر مصراعنده، أصیل و شعورلی روحنه خطاب ایتدیگم ترتمیز گنجلک، ایشته بو حق و حقیقتک باغری یانیق عاشغی اولان گنجلکدر.

نورلی دعوانک قزانمش اولدیغی بو صوؤ ظفرک ویردیگی وجدله طولو بر إلهامله یازدیغم شو منظومه یی(*) تقدیم ایدیورم. قبولنی رجا و إسترحام أیلرم.

(*) "گوکللر فاتحی بیوک استاده" باشقلی اولان بو منظومه، مکتوباتک و إخلاص

تکرار تکرار آلریڭزدن اوپر، قیمتلی دعالریڭزی بکله‌رم، پک محترم
استادم حضرتلری.

معنوی اولادلریڭزدن
علی علوی



نورک بکجیی

بِسْمِ اللَّهِ الرَّحْمَنِ الرَّحِيمِ

﴿يَا اللَّهُ * يَا رَحْمَنُ * يَا رَحِيمُ * يَا فَرْدُ * يَا حَيُّ *
يَا قَيُّوْمُ * يَا حَكَمُ * يَا عَدْلُ * يَا قُدُّوسُ﴾

إِسْمِ أعظمك حَقُّه و قرآنِ معجز البيانك حرمتنه و رسولِ أكرم عليه الصلاة والسلامك شرفنه.. بو مجموعه يي باصديران رسالهُ نور طلبه لريني جنت الفردوسده سعادتِ أبدية يه مظهر أيله. آمين! و خدمتِ ايمانيه و قرآنيه ده دائما موفق أيله. آمين! و دفترِ حسنات لرينه سكه تصديقِ غيبينك هر بر حرفنه مقابل ييك حسنه يازدير. آمين! و نورلك نشرنده ثبات و دوام و إخلاص إحسان أيله. آمين!

يا أرحم الراحمين!.. عموم رسالهُ نور شاگردلريني ايكي جهانده مسعود أيله. آمين! إنسى و جنّي شيطانلرك شرلرندن محافظه أيله. آمين! و بو عاجز و بيچاره سعيدك قصوراتني عفو أيله. آمين!

عموم نور شاگردلری نامنه
سعيد النورسى

